

清名家詞

十

294018

行

344747

上海图书馆藏书



A541 212 0014 9629B



寒松閣  
詞

運彰



張鳴珂（道光九——光緒三四）

原名國檢。字公束。一字玉珊。浙江嘉興人。同治辛酉拔貢。卽選訓導。官至江西知縣。嘗受業于全椒薛時雨。海鹽黃燮清。所作詞以婉麗稱。李慈銘譚獻交推之。著有寒松閣集。

序一

詞雖小道。不善學者不能爲。爲之亦不能工也。橋李詞藪也。自朱竹垞太史李秋錦徵君開其先。數十年尋聲摺譜。不乏其人。所爲詞雖薄不浮。雖淺不俚。有清空婉約之致。無肥澤浮靡之習。師程具在。律呂精嚴。良可慕也。張君玉珊家橋李。年纔弱冠。雅好譜詞。著有秋風紅豆樓詞鈔。一日寄予索序。讀之以溫李之才。寫纏綿之格。春情豐繁。秋思往復。筆意最近靜志居。予素喜填詞。酒邊燈下。雁晚花前。每有感託。付之倚聲。今讀玉珊詞。不禁有觸予好。明年春水生時。當袖我笛譜。載雛鬢。泊舟鴛鴦湖畔。與君賭唱紅牙數拍也。咸豐紀元醉司命前五日。桐鄉馬蘭芬拜手序。

序二

夫以珂雪鬱鬱。把梅邨之袖。竹垞朗朗。拍飲水之肩。姜張吳史。商羽流徵之音。湖厥遺風。實在長水。蓋樂府之職志。而倚聲之林淵也。吾友嘉興張公東。陶靈碧山。標體白石。擷梅谿之秀。而芟其蕪。翫夢窗之奇。而割其頽。先哲可作。後來交推。結交十五

六年。唱予數十百調。公束以稚圭楊檠。不佞以止庵津逮。以爲樹比興於慢令。通絃雅於犯引。譬之染黛妝蛾。短長入鏡。成塵拂麝。冷暖皆香。琴緒分明。酒鄉棲逸。抑亦磊落如昔。顰笑無端者已。公束去年賦春柳四詩。傳唱東南。身世之感。民物之故。託興如見。而槭詞可通。予閱歲乃始和之。折腰淪落。拄笏偃蹇。同心離居。兩刀一鞘。斯敬通孝標。各當自序可乎。審定公束詞卷。附以諄之譚獻撰。

序三

古不云乎。詩三百篇。大抵聖賢發憤之所爲作也。夫人苟非不得已。殆無文字。卽填詞亦何莫不然。浙西之詞。以小長蘆釣師爲職志。其生平減儉宗旨。備見於自題詞集之中。以彼飄零桑海。蕭索高門。夜別酒徒。朝瞻兵氣。此何景邪。舟唇馬背。水曲山椒。北風淒其吹人。饑烏昏而啄屋。此何地邪。引商刻羽。其第求派別邪。其第美音節邪。夫固有迫之於初。幹之於內者矣。君生長詞人薈萃之鄉。濡染已非尋常。又得韻甫黃氏爲之導師。卷首所載商榷諸言。可藥末派。可起正宗。故君所涉筆。銅簧新炙。

無其脆。彈丸脫手無其靈。初寫黃庭。神與體會。知者皆能道之矣。憶予經南昌郭外。晤君於野寺。四壁黯黯。小窗微明。君獨據一案。校乙淮南鴻烈解。細楷流麗。如珠走盤。蕭然不自知。聽鼓應官爲何事。乃嘆人惟能甘淡泊之境。始有情至之言。情愈至。品愈高。詣愈深。蘊抱愈厚。激發愈雄。將得已邪。不得已邪。然則君之詞。殆其嚆矢耳。予於詞。旣孱學。又多意造。況復聞見蒼涼。知交零落。才華旣退。結習遂除。棄置不講久矣。今讀君詞。又不禁怦然有動於中。惜乎相逢之已晚也。異日者。落月在梁。碧雲舒卷。若有作天風海濤之音。唱玉宇瓊樓之句者。其殆君乎。光緒甲申冬月。長樂弟謝章铤。

# 寒松閣詞

嘉興張鳴珂玉珊

南浦 春水用山中白雲詞韻同褚少梅紹羲徐金坡鑾賦

谿雨夜廉纖。趁東風、著力溶溶流曉。新漲漸平隄。垂楊外、一帶林塘如掃。偷窺鏡面。理妝十五漁娃小。南浦那時、曾賦別腸斷。綠波春草。年年開徧桃花。數江鄉又是。鱖魚肥了。杜若暗生香。汀洲畔、可有搴芳人到。煙波杳渺。湔裙佇立風前悄。回首畫船天上坐。載得落紅多少。

江城子

紅藕花殘小苑涼。一泓秋水香。倚迴廊。生疏樓閣。何處捉迷藏。魂斷隔簾鸚鵡語。歸去也。沒商量。

倦尋芳 春光欲去雨意垂垂於紅稀綠暗中翦燈賦此時夜寒特甚彌益淒戾矣



柳絲蘸雨。苔暈生煙。庭院催暝。悄揜窗紗。窗外妒花風勁。紅藥翻階春欲去。碧桃窺戶寒猶凝。最銷魂。是梁閒紫燕。一雙低並。歎芳事。那堪重省。萍絮三生。飄蕩無定。淺夢梨雲。又被杜鵑驚醒。簫局撥殘。蘭麝火。牆陰閒煞鞦韆影。料天涯。卷湘簾。翠鬢慵整。

疏影 少梅索題梅花仕女幅用石帚韻

冰蜨映玉。有耐寒老鶴。苔際棲宿。底事宵深。不管清愁。高樓起弄橫竹。巡簷索共梅花笑。儘倚徧、枝南枝北。禪晚妝、鬢影如煙。伴取瘦痕幽獨。還憶江鄉舊事。綺窗試問訊。纖蕊搖綠。渺渺天涯。酒醒羅浮。夢墮荒寒蘿屋。何郎漸老。風情懶、已忘卻。玉臺歌曲。待翦燈、重喚春魂。賸有冷香盈幅。

高陽臺 醉司命日燈下讀又雲繼振五湖煙艇題贈集賦此用穀人集中祀

竈日題詹石琴詞卷韻

燭點燒春。錫香煮凍。荒村景偏殘年。一卷新詩。攜來展向梅邊。分明醒了羅浮夢。賸

鬢絲、輕颺茶煙。伴疏窗、一穗寒燈。好證情禪。幽懷欲共瑤琴語。把淒涼心事。付與鷓鴣絃。我亦多愁。夜深冷抱青氈。人間縱有雙紅豆。又雲見贈詩有人間。只賸雙紅豆。我欲平分故惱公之句。寫相思、難盡豪顛。漸冰澌、暗結谿流。阻斷魚箋。

疏影 黃硯北丈仁家篠峯鴻卓雷約軒葆廉舉嬉春詞社約賦春影

玲瓏碎玉。是舊時月色。移到蘿屋。檻外疏梅。相約今宵。橫斜寫上綃幅。湘簾十二低垂地。漾澹澹、波紋如縠。看鬢邊、一縷煙飛。小鼎雨前茶熟。猶記鞦韆架畔。海棠睡未醒。偷照紅燭。剗襪歸來。慵整殘妝。鏡裏脩蛾微蹙。銀燈莫燦雙蕖朵。怕不見、倚闌人獨。最可憐、捉搦楊花。譜入笛家新曲。

聲聲慢 春聲嬉春詞社分賦

錫簫宛轉。社鼓喧闐。怱怱節近清明。燕姁鶯嬌。朝來似報新晴。街頭賣花人到。喚梨雲、殘夢恹惺。卷簾看、怕生紅飛墮。繫箇金鈴。記否尋芳陌上。共個儂門草。釧觸琤琤。天半鳴絃。誰家穩放風箏。新詞柳枝賭唱。隔花陰、防有人聽。愁又是、替催歸、鷓鴣語。

未停。

菩薩蠻

重來人似雕梁燕。尊前不分長相見。相見背銀釭。影兒成一雙。分明閒坐久。那得長相守。相守奈今宵。春愁上下潮。

憶舊遊

乙卯秋客武林晤餘杭郎夔亭瑞載酒湖上極筆硯琴尊之樂青山無恙紅鯉書稀忽忽已二年矣今夏訪予春波釣屋相見歡甚別又匝月譜

此寄懷

記湖脣覓影。水榭招涼。款語西風。小艇沿波去。正初荷過雨。墜粉飄紅。叩舷段家橋側。題吧句玲瓏。悵客裏光陰。提鷗挈鷺。都是萍蹤。怱怱臥游處。認扇底煙鬢。依舊溟濛。於西湖鷗舫中爲予寫山水便面。最怕鷗盟冷。向鴛鴦湖上。重繫詩篷。酒醒故人何處。零落翠尊空。待小壘銀箋。愁心寄與雲外鴻。

浣谿紗

秋夜夢中得鷗舫句曉起足成之

菡萏紅彫小苑秋。嫩涼人倚水邊樓。半簾花雨鷓鴣愁。羅帕題香留鏡檻。玉釵分影入茶甌。畫眉纔罷看梳頭。

齊天樂 游查氏竹素園

菱波新漲銀塘淨。園林已消殘暑。粉墜蓮房。香飄桂叢。秋在梧桐庭宇。牆陰過雨。正薄靄初收。溼煙堆樹。一角頽峯。翠痕猶畫舊眉嫵。淮南招隱賦罷。任蒼苔踏徧。游屐來去。壞塔窺窗。孤亭枕水。多少珠簾瓊戶。繁華易阻。甚蕭瑟蘭成。慣商愁句。壁間有鐵紅主人題句甚悽婉付與階前。亂蛩深夜語。

又 褚二梅榮槐歸自東臺出始游集屬校爲賦此解

江山洵美非吾土。登樓最憐王粲。彈鋏歌魚。揮豪倚馬。儘把閒愁消遣。淒迷淚眼。看戰壘蕭蕭。綠蕪春滿。落日荒城。暮笳幽抑和哀怨。天涯多少俊侶。悵鸞飄鳳泊。離緒誰緜。廿四橋邊。十三河上。題徧兒孃團扇。柔腸易斷。甚芳草年年。故鄉歸晚。好約盟鷗。翠尊留醉淺。

又 江館聽秋圖爲王麈齋鼎華題予今秋再至武林僑寓吳山時木落江寒  
新愁如約倚簫歌此不覺詞之沈鬱也

商聲一片闌宵起。蕭蕭翠梧風颭。警露蛩寒。征霜雁苦。淺夢驚回荒店。腰圍乍減。又  
龔赭潮來。枕函微撼。宛轉蘭心。翦燈獨東盧切自賦哀豔。天涯同是倦旅。記吳山  
蠟屐。楓老如染。月滿江空。飄迴樹合。把袂年時游覽。青衫試檢。有淚點模糊。酒痕濃  
澹。我更添愁。賞秋重繫纜。

東風第一枝 憶梅用蛻巖韻

石屋橫琴。羅浮遲夢。瓊妃休誤輕約。翠禽飛上苔枝。隔籬乍舒嫩萼。東風簾卷。正鏡  
裏、曉鬢初掠。憶那時、綺袂相逢。驚起睡酣雙鶴。風峭峭、茜裙漸薄。波澹澹、素蟾未  
落。浪傳春到江南。忍聽數聲戍角。何郎老去。已換了、朽闌疏箔。待翦燈、橫幅重臨。記  
取凍香池閣。

買陂塘 題鮑銘青昌照叩舷覓影圖寓感逝意

倚荃棹。采香盈袖。碧雲誰寄芳杜。凌波已斷鷺鴻影。何況襪羅微步。還憶否。憶解佩湘皋。曾被鴛鴦妒。歡悰易阻。算雙槳移春。一燈煮夢。佳約者番誤。低徊久。怕聽瀟瀟暮雨。浮漚彈指應悟。蘭香恩眷桃花命。佇想又添酸楚。愁不語。任叩徧桐舷。懊惱歌金縷。多情最苦。盼天際螺峯。柳梢蛾月。隱隱露眉嫵。

露華 春日散步小橋流水閒見緋桃一株妍媚可愛用玉笥山人韻寫之  
洞天未曉。被東風嬈娜。吹醒香魂。洗春雨過。輕盈猶帶啼痕。照水一枝清絕。映夕陽。紅染羅裙。歌扇底。嫣然一笑。未懺情根。休尋去年人面。誤俊侶重來。呵筆題門。鈿車零落。只愁霧暝煙昏。甚日武陵谿上。繫釣篷。歸隱花村。塵夢冷。芳心欲化絳雲。

南歌子

明鏡窺星鬢。疏簾帶雨聲。春陰如墨冑紗櫺。一角遙山。不畫黛眉青。舊約聽箏誤。新歡打槳迎。愔愔芳序過清明。懊惱東風。猶未放新晴。

金縷曲 六舟上人達受手拓漢竟寧雁足燈弟廿五墨本爲胡鼻山震題

翠墨香痕凝。笑攜來、叢殘故紙。竟寧堪證。遺物漢家傳雁足。不數銅荷鳳頸。算玉盃、金甌相並。更有仙人殘鏡在。予藏有漢仙人不老殘鏡一規。照宮妝。一樣如花靚。思往事。淚珠迸。西京舊迹憑誰省。讓山僧、剝苔剝蘚。撫摩宵永。耿耿蘭心含欲吐。鬧煞春蛾弄影。愁不見、玉釵挑醒。笑我青藜光未借。剔昏檠。細字牛毛映。銀蠟燼。夜窗冷。

琴調相思引

縱得相逢已可憐。等閒辜負好華年。思量何事鉛淚溼征鞦。私爇水沈香暗祝。願伊成佛我成仙。博山灰。冰心字。一鑪煙。

天香 擬宛委山房賦龍涎香用質房韻

猊鼎溫磨。麝煤暖炷。縈簾一縷雲氣。碎碾冷塵。勻調玉唾。海客爲傳遺製。驪宮月滿。誤喚醒。潛蚪癡睡。迢遞槎程萬里。滄波暗浮煙水。相逢茗餘竹外。沁芳魂。翠屏風細。幾度護春。閒試碧簪斜墜。籠袖餘馨漸褪。渾未減。當年戀香意。漫理瓊箏。濃熏繡

被。

水龍吟 擬浮翠山房賦白蓮用玉田韻

爲誰淨洗鉛華。宵深易泣銅盤露。亭亭玉立。珊珊佩整。霓裳罷舞。月鏡窺妝。冰壺濯魄。盟尋沙鷺。記采香歸也。銀塘路遠。渾不覺。秋來處。仙掌芙蓉休妒。夢梨雲、鴛鴦應誤。芳姿自淡。芳心自潔。一般無語。粉暈微銷。脂痕全褪。待傳豪素。倘相逢。隔浦。明璫解贈。便凌波去。

摸魚兒 擬紫雲山房賦蓴用碧山韻

翦湘波、翠痕不斷。一池春影搖碎。柔絲裊裊垂釵股。宛轉鯉函題字。看又似。似水面新荷。點點青錢綴。尊前往事。記玉豉凝香。紅鹽糝雪。相與伴清醉。斜陽外。又聽吳歎唱起。懷歸翻恨無計。鱸魚菰米依然好。可惜故鄉千里。愁只是。冷一箸秋風。誰識飄零意。江南望裏。指鳧葉銀塘。蘋花芳渚。渺渺隔煙水。

齊天樂 擬餘閒書院賦蟬用紫雲韻



翠雲深鎖閒庭宇。流空一絲琴韻。倦抱纖柯。疏吟病葉。隔斷人間煩聽。槐廳睡醒。正柳外風生。佩斜難整。露下重霄。五銖衣薄耐清冷。林塘殘暑退了。晚來聲更急。催遞涼信。故苑都荒。枯形易蛻。似訴齊宮恩倖。繁華閱盡。又繞砌蛩寒。早秋光景。澹月昏黃。瑣窗移短鬢。

桂枝香 擬天柱山房賦蟹用瑤翠韻

霜寒浦口。正冷葦夜然。漁舍如書。隱隱乘潮爭聚。鷺汀前後。玉琴絲裏。爬沙響。補秋容。數行衰柳。蓼枝扶起。斷疏輕入。一燈紅溜。憶那日。汾湖載酒。怪鄉味尊前。別來非舊。徐擣薑芽小試。廚娘攪手。尖團不用新詩換。歎吟腰。何事消瘦。瑣窗閒坐。眼波相對。煮茶時候。

臺城路 題家鎔伯興烈雲來山館圖

疏簾不隔山眉影。朝朝翠浮吟几。石瘦棲雲。花腴媚晚。滿院斜陽紅膩。闌干共倚。有飼鶴漁童。課茶樵婢。指點湖山。畫圖誰似故鄉美。萍蹤同寄海上。夜潮流客夢。孤

權來艤。翦燭評詩。停杯說劍。一灑窮途危涕。飄零倦矣。況喬木亭臺。等閒都廢。蕭瑟江關。暮笳聲又起。

齊天樂

題蕭棣薌丈承夢秋夜讀書圖

鉤簾試檢廬陵賦。庭空露華涼凝。蛻粉蟬枯。絮愁蛩急。如豆疏燈寒耿。紗窗未暝。早墜葉蕭蕭。亂飄金井。攤卷闌宵。一聲聲雁警淒冷。詞仙同住海上。浣花身世。感自寫秋興。英氣花銷。柔魂酒盪。夢徧江南煙艇。銀屏睡醒。正鑄鴨添香。鬢蟬移影。繙罷瑤籤。夜吟和漏永。

浣谿紗

瑟瑟蘆花已白頭。西風涼入鬢絲秋。夕陽無語亂山愁。戍角聲中人獨立。畫眉橋畔水西流。五湖容得一扁舟。

摸魚兒

題倪元卿師旦寒江釣雪圖

倚苔磯。翠綸垂水。煙波無限清興。玉龍鱗甲參差舞。江上暮寒風勁。斜又整。認嫋嫋

竿絲拂滿霜華影。疏林漸暝。待呼起漁兄。瓦盆注酒。燈火醉顏映。相逢處。記泛松江釣艇。鱸魚滋味同領。天涯多少繁華夢。漁笛一聲吹醒。心似鏡憶陸瑄池邊。曾唱風波定。一般耐冷。倘辦得煙蓑。來分半席。我亦刺船並。

高陽臺 江亭之側土壠歸然樹以短碣題曰香冢暇日過此爲賦是解  
紫玉成煙。紅綃裊淚。多情爲聚飛花。豔李穠桃。東風幾樹天斜。香魂零落春無主。算昭君、不慣胡沙。話芳時、小劫恩愁。滿年華。然脂怕寫傷心史。但摩挲短碣。往事空嗟。燕子飛來。當年門巷兒家。佩環月冷歸何處。誤西陵、油壁香車。最銷魂、芳草裙腰。綠徧天涯。

清平樂 鸚鵡冢

晶簾香凍。慧舌調新哢。楊柳樓臺春似夢。寂寞斜陽荒冢。金經苦懺前因。落花同葬殘春。瘞在香冢之側。滴盡棠梨夜雨。驚寒欲喚人人。

倦尋芳 丁卯歲莫都中書來知芳雲已謝人世去年予留京師曾拈花名品

歌卽目芳雲爲芍藥病樹不春將離成讖爰述是解時密雪灑窗燈昏似豆  
弁陽翁所謂薄醉孤吟也

翠綃哀淚。羅袂分香。心共天遠。酒賭旗亭。法曲羽衣偷按。芍藥豐臺芳信好。緇塵京  
國嬉游倦。送歸人。有煙際晚山。瘦眉微展。悵別後。墜歡如夢。孤館宵涼。愁聽秋雁  
豔劫難留。一霎彩雲吹斷。夜雨棠梨歌釧冷。春明燈火。簫聲怨。傍東風。忍重憶杏花  
人面。

木蘭花慢

題吳玉卿女史珩遺繪團扇冊

玉卿桐城人縣丞廷康女辛酉十

一月殉難事詳浙江忠義錄

抱冬心一點。賸零落舊冰紈。訝紅印脂酣。翠描黛淺。芳訊曾傳。飄然散花去後。葬香  
魂。疏雨五更寒。扇底重尋豔骨。東風冷咽啼鵲。當年綺閣晝無眠。寫韻憶嬋娟。正  
官齋日永。香溫茶熟。殺粉調鉛。誰憐。好春斷送。弔斜陽。老淚灑吳天。更有霜楓露菊。  
傷心同付秋煙。

高陽臺 題許邁孫增煇夢庵填詞圖

蕉雨聲稀。梨雲夢淺。疏窗一碧惜惜。搢譜闌宵。拈豪試寫秋心。燈前況有吹簫侶。彈  
雙鬢。背立花陰。寄相思。一幅蠻箋。幾度沈吟。歡游已阻春婆醒。笑移宮換羽。但抱  
青琴。舊日樓臺。憐他燕子重尋。梁谿水咽鷗盟冷。弔逋翁。淚灑寒潯。君爲顧兼塘先  
生入室弟子兼翁嘗爲予評定詞卷甲子過梁谿曾作詩弔之望江南。拍徧闌干。誰是  
知音。

菩薩蠻

綠陰如幄春寒淺。東風悄掩重門扇。斜日柳絲飛。春歸人未歸。畫樓凝望久。腸斷  
休回首。新水碧於羅。奈他雙槳何。

憶舊游 鳳谿秋禊圖爲石仲華芳保題

漸蘋花煙冷。藕葉風欹。涼滿汀洲。未了尋芳興。又琴尊近局。呼起閒鷗。停橈鳳喈橋  
畔。裙屐少年游。笑禊飲重修。單衫小扇。無限風流。句留泥人處。有勸酒雛鬟。背立

含羞。莫話蕤醺約。寄相思何處。風雨扁舟。老我十年羈旅。雙鬢暗驚秋。歎客裏光陰。登高縱目愁倚樓。

齊天樂

姚桂生以令兄竹生所作旅雁圖索題壬戌冬日竹生自江北至雲

間兄弟歡聚旬餘寫此誌別並題句云聽得一聲歸雁至江南江北總相思  
今竹生墓草已宿翦燈歌此愴然予懷也

敗蘆獵獵西風颭。征霜一行倦羽。影落江湖。書傳關塞。涼曳幾聲柔艣。呼羣最苦。正水翦吳淞。月明瓜步。江北江南。爪痕泥雪忍重數。池塘春草夢醒。一燈孤館裏。悽斷絨素。柱裂瑤箏音沈錦字。哀怨滿懷誰訴。相思易阻。歎我亦驚寒。舊盟鷗鷺。漠漠平沙。夜涼吹暗雨。

一枝春 落梅

酸釀梅風。最愁聽、畫笛江城吹警。樓高路迥。可奈綺羅香冷。零蕪斷砌。料難覓、步塵纖影。空自把、詞筆題芳。換得瘞花銘贈。淒涼滿懷誰省。記相逢竹外。一枝低映。天

寒袖薄。道是玉人春病。脂痕褪盡。更休問。那時妝鏡。還證取、仙夢羅浮。夜深未醒。

瑤臺第一層 郭浩然以沈竹賓畫瑤臺仙夢圖見貽倚此題之

縹緲游仙。銖袂薄。東風豔綺羅。碧城寒重。瓊簫聲斷。春恨偏多。夜深留鶴守。正月斜。松影婆娑。望瑤闕。指梨雲圍處。還阻銀河。銷磨鬢絲凋矣。十年舊約總蹉跎。蕊珠宮裏。拍肩俊侶。笑靨生渦。近來鸞信杳。料酒醒。悽斂雙蛾。寄相思。賸淒涼心事。暗託微波。

買陂塘 吳晴峯丈屬題其尊甫樂圃先生春水盟鷗遺照

寄幽棲。碧苔磯畔。夕陽芳徑深閉。東風吹軟晴漪皺。舍北舍南春水。涼影墜。罩一樹垂楊。向晚搖空翠。煙波畫裏。指古岸柴門。閒鷗來往。拍拍又飛起。橫塘路。暖綠鄰鄰無際。孤筇花外頻倚。相看總愛忘機好。淺夢正圓潮尾。吟未已。悵玉笥埋雲。身世浮漚似。詩盟廢矣。賸倦客江湖。呼羣載酒。重覓舊游地。

秋宵吟 和家蘊梅同年景祁韻依白石原譜協四聲

晚涼侵砌。蟀語起。翦疏窗、織炬江南好。記畫舸遲遲。夢圓鷗渚。阻銀河、展素杼。罷織流黃當戶。情無那。伴夜笛吹殘。亂愁千縷。酒醒香銷。問可約、褰裳俊侶。倦依篝火。瘦怯西風。嫩鬥柘枝舞。眉月林梢吐。兔魄斜窺。鸞信漫數。惱恁恁。漏點頻催。牆角蕉葉逗暗雨。

望湘人 和蘓梅同年韻

漸疏燈照夢。清簾帶寒。畫堂秋思何限。拜月瑤階。卷簾繡館。揜映春人嬌面。綺席擲筭。粉籤評曲。年時游讌。指翠屏、重疊遙山。隱約眉痕深淺。花外驚催漏箭。向闌干倚處。襖塵尋徧。縱詞託微波。尚有亂愁難翦。紅薇徑裏。碧梧庭畔。悔煞當初輕見。那更問、曉鏡窺妝。只賸釵梁雙燕。

綺羅香 和羊辛楣復禮韻

蝶夢剛回。蠶絲盡吐。多少纏緜吟緒。青鳥傳言。又報碧雲期誤。畫簾半、飛絮偏縈。曲闌外、落花無主。看熏爐、心字香銷。迢迢蓮漏夜如許。紅牆遙指一抹。猶記雙雙拜



月常娥應妒。彩筆攜來。替寫十眉新譜。歎團扇、漸欲捐秋。問桃葉、幾曾名渡。任拋殘、紅豆相思。斷腸人共語。

清平樂 題畫

香紅微褪。壓損眉尖恨。起卷湘簾剛問訊。疏影正橫欵鬢。翠禽消息沈沈。羅浮淺夢難尋。手撚玉梅花嗅。年年酸透春心。

聲聲慢 題潘麟生鍾瑞聽風聽水填詞圖

雲移帆影。潮落灘聲。江湖人在扁舟。楓葉蘆花。程程細數征郵。今宵酒醒何處。警孤眠、單枕支愁。疏篷底。試重尋笛譜。傳唱蘋洲。商校銀燈密字。倩紅牙按拍。翠黛輕謳。過盡松陵。煙波無限風流。天涯最憐倦旅。歎鬢絲、容易驚秋。鷗夢冷。艤橫塘、還憶舊游。

邁陂塘 麟生屬題西泠餞秋圖用卷中自題韻

莽西風、亂飄殘葉。閒庭深夜如雨。朝來試望疏林外。寒斂遠山眉嫵。人小住。聽隱隱

霜鐘催送秋歸去。歸期尙阻。待重滌銀尊。和愁澆酒。油壁舊游路。明湖畔。我亦頻年寄旅。蘋花煙艇低護。蕙羹鱸膾依然好。回首故鄉何處。須記取。記滿眼滄桑。欲共閒鷗語。蒼涼寸緒。看橫翠樓前。柳腰瘦盡。還忍倚闌否。

壺中天 題陸劄雲丈源行看子

壺天栖隱。愛蕭蕭水竹。涼空搖翠。一笛西風塵盡浣。禁得荒寒如此。倚石敲詩。看雲悟畫。領略閒情味。相思何處。舊盟鷗鷺呼起。還憶鄧尉膠溪。卅年小住。花底柴門閉。繞屋琅玕霏綠雪。回首煙波無際。麋走臺荒。燕歸巢換。身世飄零矣。鄉愁多少。白頭重話吳市。

青玉案 王小谷庚出畫扇索題

春人易墮傷春淚。早減了、眉彎翠。靜揜文窗剛小睡。啼鶉聲苦。落花紅膩。繡出麤蕪地。香殘銀葉鑪煙細。風雨連宵斷腸未。兩鬢絲雲梳未起。湘簾慵卷。畫闌斜倚。多少愁滋味。

蝶戀花 海棠桃花畫扇姬人乞題

胡蝶飛飛花滿院。銀燭高燒，揜映嬌紅面。乞借春陰春尚淺。綠章遙奏通明殿。爲  
祝東風簾半卷。玉洞幽姿，綽約無人見。會待仙郎來結伴。一篙春水江南岸。

淒涼犯 題盛詵孫傳均孤燈對影圖

疏燈不照。團圞影。麻衣閃閃如雪。掌珠碎後，庭蕩頓萎。寸腸酸裂。西風乍拂，又吹墮、  
瑤臺片月。最傷心、妝樓怕上，環佩響淒絕。當日追歡處，繡襖斑衣，鏡籤吟篋。卅年  
夢短，盼銀河、曙星明滅。倦客情懷，更休問、銅荷穗結。祇深宵冷燄，似豆伴、哽咽。

摸魚兒 題潘順之年丈遵祖懶漁圖

浸苔磯。半篙新漲，游鱗波底無數。桃花春水江南岸，漠漠柳陰吹絮。人小住，聽隔浦  
鳴榔，爭櫂扁舟去。移篷共語。有笭箸隨身，竿絲在手，來作石湖主。幽棲好，漁父頭  
銜自署。筆牀茶竈容與。朝衫換卻煙蓑便，穩臥葦風蘋雨。憑記取。但遙指潛淵，更有  
何人妒。斜陽未暮。且吹火船唇，瓦盆注酒，相款舊鷗鷺。

百字令 小昉延秀與許康甫等身同客竹樵方伯恩錫署中繪吳天萍合圖

屬題

金閨亭畔。歎年年萍梗，飄零如此。日下雲閒誰獨絕，同調古今能幾。孤岫團雲，畫船聽雨，長嘯逢知己。酒酣起舞，簫聲應動吳市。還喜幕府棲遲，醉吟東閣，心事梅花寄。旅館一燈聯好句，寫罄烏絲闌紙。十手爭鈔，雙鬢傳唱，莫漫銷英氣。鷗盟無恙，石湖尋徧煙水。

夢橫塘 壬申秋八月二十三日挈姬人兒女爲南湖之游道出松陵扣舷歌

此

槳迎桃葉，絳曳蘆梢，盪得琉璃波軟。雨洗秋容，看繞岸、蘋花開滿。橋臥虹垂，塔尖雲鎖，水平天遠。正惺忪縮髻，小拓篷窗橫一抹，山眉淺。儂家舊住鴛湖，笑全家一舸，鼓柁歸緩。過盡松陵，聽隱隱、玉簫吹怨。最難忘、隨身笞箬，老作煙波釣徒伴。此去鄉園蟹肥菱熟，話風塵游倦。

齊天樂 偕姬人登煙雨樓

鴛鴦不妒游仙夢。扁舟又尋清境。激藜紅疏。湖菱翠繞。望斷激波千頃。闌干共凭。正隄柳絲絲。亂飄鬢影。水皺風狂。畫羅衫袖訝秋冷。樓臺圖畫在否。歎浮雲劫換。前事誰省。曲榭塵凝。危橋石偃。步履重開芳徑。斜陽易暝。警一笛漁蓑。漸催歸艇。樹杪明蟾。照愁煙外醒。

虞美人 泊石佛里

荒湄斷汜疑無路。中有濛濛樹。幾家臨水揜雙扉。燈火樓臺。舊夢認依稀。十年前避兵居此湖田菱熟縱分罍。采采人如畫。滿灘明月泊孤舟。吹老西風黃葉。寺門秋。

疏影 題高次愚燻梅窗讀書圖

層層畫榻。盪玉梅瘦影。疑寫殘墨。喚起冰魂。芳訊依依。疏香冷入瑤席。開籤試檢生綃看。儘負了、銀屏遙夕。祇夜深、翠羽飛回。悄傍暮寒簾隙。猶憶題襟漢上。一燈旅館裏。縑素堆積。粉本攜來。茶熟香溫。點染春風顏色。詞人老去飄零死。謂陶錐庵又

忍聽淒涼鄰笛。倘擘箋、重仿橫枝。寄我綺窗消息。

百字令

題沈書卿松隱庵讀書圖

語兒谿上。記秋風一舸。年時來往。望斷松林叢密處。道是隱侯門巷。花細敲牀。室虛延籟。天半濤聲響。浮雲劫過。草堂依舊無恙。遙憶靜坐攤書。追涼人健。蒼翠縈簾幌。插架琳琅三萬卷。一一丹黃評賞。吐鳳才華。枯蟬滋味。好作千秋想。一瓶容借。準拏煙艇相訪。

甘州

題雷夏叔秦淮移艇圖

又西風吹冷石城秋。扁舟記初停。正江空月白。雲橫雁度。流水迴汀。莫問六朝金粉。臺榭總飄零。賸有長隄柳。猶自青青。休更登臨望遠。便移篷橋外。倚醉聽箏。奈淒涼法曲。瑤怨寄湘靈。幾回把珊瑚擊碎。向酒邊。留取舊狂名。牢愁甚。寫傷春句。分付旗亭。

百字令

朱節甫蓴菊數百種花時排列盆盎延客酌賞繪圖索題

谿山無恙。向白龍潭上。誅茅營屋。四壁圖書千斛酒。添藝一籬黃菊。留客持螯。引杯看劍。談笑俱驚俗。閒鷗來去。舊盟商略重續。還憶籌筆雲間。拈豪門韻。同翦西窗燭。昔日相逢。今十載。霜鬢星星凋綠。掃徑呼童。篝燈課子。勝事輸君獨。西風簾卷。晚香吹滿闌曲。

浪淘沙 題畫

梳裏最風流。鬢禪眉修。仙心俠骨兩無儔。醜面桃花春水暖。自洗吳鉤。毳幕易驚秋。十載句留。幾人投筆覓封侯。賴有侍兒能說劍。了了恩讎。

夢橫塘 題蔣卓如樹本夢歸圖

夕陽含暝。斷浦迴潮。片帆歸去無恙。一舸夷猶。悄不見。閒鷗來往。紅熄邊烽。綠迷津渡。此時情況。向橫塘轉舵。隱約漁鄉。垂楊映。明蟾上。欣看似水門庭。有煙蕪匝徑。露蕊盈盎。鏡檻書窗。添幾許。暗塵蛛網。指修行。吾廬宛在。好作桃源避秦想。怎奈今宵酒醒何處。怨昏燈羅帳。

桂枝香 文胥麓姨丈如喙臨衡山待詔仙桂新枝圖遺墨子廉表弟屬題

天香萬斛。正小院秋晴。晚風低撲。剛卷湘簾延賞。翠甌茶熟。停雲妙筆空千古。有詩孫畫圖重續。調鉛熏豔。拖藍渲葉。散芬盈幅。指昔日、禾城老屋。賸黃霰飄階。廢苔凝綠。記得淮南招隱。小山遺曲。故鄉耆舊凋零久。展瑤箋。墨花吹馥。吟魂呼起。新枝又長。一叢金粟。

臺城路 題吳景喬松年竹院參禪圖

蕭蕭撼撼荒寒甚。篔簹四圍環繞。翠蘚侵階。白蓮結社。卻喜攢眉人到。桐心漸槁。早妙悟拈花。炷香微笑。淨洗塵根。一聲清磬盪昏曉。當年曾共玉帳。記橫戈躍馬。五茸春草。剪燭談兵。停杯說劍。還倚危樓孤嘯。鴻泥印爪。歎浪迹雲浮。故鄉歸好。颺徧茶煙鬢絲空自裊。

壺中天 丁丑春日將還禾中過怡園留別

嫩寒池閣。浸一簑春水。辛夷吹落。燕子呢喃巢未穩。遮了重重簾幙。蘚石埋雲。蘿垣



過雨濃翠分幽壑。小桃開也。夕陽紅照闌角。還憶漠漠秋陰。香飄叢桂。招我花間酌。記聽擲箏頻勸酒。往事思量如昨。塵鞅辭難。巖緣修淺。空負林泉約。他年歸隱。再來休怨。蜩鶴。

憶舊游

丁丑春莫朱慕庵文炳拏舟過予東原草堂出昔年與王松谿麟書

施均甫

補華

游西溪圖屬題松谿近宦江右均甫從戎甘涼予亦有都門之

行舊雨晨星前塵如夢用樊榭韻歌此殊黯然也

記鷗邊夢醒。雁底煙疏。雲斂山眉。一舸尋秋去。正蘆花作雪。涼滿晴漪。昨宵鯉魚風起。吹瘦柳絲絲。喜勝侶偕來。扶筇貰酒。同款柴扉。塵機問誰息。任掃地焚香。剪燭吟詩。聚散搏沙似。歎光陰彈指。催試征衣。怎奈水遙山遠。關塞幾斜暉。又草綠天涯。誅茅有約人未歸。

踏莎行

題秦散之敏樹小睡足寮圖

枕倚麤紅甌。浮乳碧。濛濛花影晶簾隔。攬衣殘夢尙惺忪。斜陽未暮。鶉聲急。笠澤

仙鄉微雲詞筆。一時吟賞應無敵。莫釐峯下做疏寮。酒醒又理鴛湖楫。

甘州

甚年時。蹤迹似浮萍。東風又天涯。望鄉關眇邈。羊車再到。開落桃花。可是棲香願滿。疏雨冷琵琶。忍聽哀蟬曲。愁鬢都華。記得鳳階橋畔。展眉籤殘月。同倚窗紗。道尋春未晚。仙夢碧城遮。翦淞波。綠蕪千里。誤幾回。燕子傍誰家。魂歸也。有垂楊處。啼煞昏鴉。

木蘭花慢

偕錢筮仙。振常董覺軒。沛王同伯。同楊雪漁。文瑩潘伯。循適。漢止。

潛子潼集松筠庵餞羊辛楣南歸

乍相逢。日下又驪唱。送君行。訝綠鬢絲凋。白雲秋冷。離思迴縈。飄零故鄉夢遠。況年年。釵卜竟無靈。明發歸期定準。酒邊細數郵程。長征聚散如萍。人海裏。訂鷗盟。喜堂開諫草。蘭池暑淨。月映簾旌。多情舞衫題徧。把一腔幽怨。託湘蘅。譜入花谿。倦笛。天涯賺得狂名。

浣谿紗

紫陌迢迢碾翠輪。悄攜羅帕拂鞦韆。寒帷剛見玉精神。  
入座殷勤斟桂醕。停歌宛轉訴蘭因。金尊檀板總銷魂。  
麋月樓遙品藻遲。羣芳誰並好花枝。櫻桃紅到十分時。  
團扇新詞如夢令。洞簫私謔有情癡。酒闌燈爍輒相思。

好事近 硯悅齋出歌郎七兒小景索題

北斗正闌干。行過竹林尋覓。勸飲玉川茶罷。倚寶牀將息。  
雙星脈脈渡銀河。問今夕何夕。手撫冰絃無語。伴微雲詞客。

二郎神 李蕤客慈銘屬題秋江菱榜晚霞時詩意畫扇用陶子綸方琦韻

畫船載酒剛趁著。晚霞明靚。正叩徧桐舷。攜來簫侶。那管湖天弄暝。兩兩鴛鴦驚飛起。又悄傍銀塘窺影。憐拂袖護香。推篷延爽。玉肩偷並。愁凝山眉送黛。雙蛾低映。恨雁底煙涼。鷗邊夢醒。風露一襟漸冷。佩插蘅芳。歌傳菱唱。多少墜歡誰省。須記取。

一諾微波揜扇。自羞鸞鏡。

聲聲慢

題許季仁太守善長碧聲吟館圖

一聲一葉亂颭芭蕉。西風釀成寒碧。瘦影離披。搖暝綠紗雙榻。黃昏冷蟾未上。卷疏簾。晚涼猶怯。睡鴨燼正香心添試。畫屏遙夕。莫歎秋光易老。算輸與吟商。庾郎詞筆。招譜挑燈。花底嫩簧初炙。霜鴻半空嘹唳。寄相思。錦箋稠疊。夜漏永。又誰家。吹墮玉笛。

孤鸞

題吳穎函丈昌言悼亡詞後

碧紋窗揜。認殘月眉。鏡塵棲黯。數盡蓮籌。耐得竟牀長簟。涼颭動搖翠竹。夢驚回。佩環聲颭。料是楚魂無定。暈短檠。蘭燄。歎沈郎腰瘦帶圍減。況賃廡年年。客游多感。昨夜東風。又到杏花村店。清明禁煙近也。酌孤墳。濁醪香醞。檢點舊時羅帕。有淚痕勻染。

憶江南

江南好。蒸雨熟梅天。一招爪痕留。橋李。五更肩擔販冰鮮。風味憶由拳。  
江南好。春樹喚提壺。箋裏桃花姑嫂餅。刀披雪片馬皋魚。風味憶當湖。  
江南好。畫舸載行廚。八字眉彎搓粉餃。一簋春水網斑魚。風味憶姑胥。  
江南好。春草雉媒閒。潮落蠶螟螫斫雪。雨餘蘭筍籜凝斑。風味憶雲閒。

垂楊

黃鞠裳

元坤家新城之規溪環溪種柳煙縷露條揜映籬落咸豐己未

庚申閒佐徐壽蘅學使樹銘校士閩中欲歸未得繪柳溪夢隱圖以寄慨戊  
寅夏晤於西江志局出圖徵題爲賦是解

疏簾乍卷。看小橋曲徑。翠陰遮斷。漫水搖隄。柳絲飄颻東風軟。年年不綰游驄轉。料  
辜負、茂陵心眼。望江鄉、空倚桃笙。數舊愁深淺。應歎琴尊夢短。算輸與定巢。畫梁  
雙燕。酒醒今宵。月殘猶帶眉痕展。春來芳信天涯遠。怕歸路、花飛絮顫。任濛濛亂撲  
征衫。塵未澣。

點絳脣

樓芸皋

杏春將赴信州索詞爲贈

覽偏匡廬。晚涼一櫂江天倚。溼雲流翠。濃碧霑衣袂。采采蘋花。望遠憑誰寄。拚深醉。雁聲低墜。冷抱瑤琴睡。

長亭怨慢 明姚簡叔 尤在畫白太傅潯陽送別橫卷爲李蓺淵太守維翰屬

題

最蕭瑟、叢蘆荒岸。墜葉搖涼。楚天秋晚。送客長亭。夕陽鴉背已零亂。去帆催挂。頻目極、煙波遠。九派走江聲。試比似、離情深淺。腸斷。聽陽關唱徹。忽訝素絃低按。停燈招譜。有多少、綺懷幽怨。歎薄宦、一例銷魂。自淪謫、天涯誰管。奈酒醒今宵。珠淚青衫彈滿。

琵琶仙 己卯春莫鄭曉涵由熙自吉州來章門出蓮漪詞屬訂並用白石韻  
製詞爲贈依韻和之

塵海吟身乍相見。顛顛青衫如葉。商略簫譜。重修新詞最淒絕。斜照外、花飛麴輓。又聽喚、數聲鷓鴣。對酒當歌。憑闌望遠。心緒誰說。甚風雨、門揜春寒。歎辜負、清明好

時節芳訊至今迢遞。任飄零、萸萸。楊柳岸、韶光漸老。倚畫簾、粉絮吹雪。底事腸斷江南。故鄉輕別。

憶舊游

曉涵家黃山僑寓白下癸丑寇燹避地十有餘年江表肅清金陵重

到繪圖以寄禾黍之悲徵題賦此

正鳴笳送晚。疊鼓驚寒。重擊吟橈。滿目滄桑感。漸荒蕪綠徧。戰壘蕭蕭。板橋幾株疏柳。霜悴短長條。笑社燕歸來。烏衣巷冷。舊隱誰招。魂銷冶游地。賸古渡斜陽。流水迢迢。畫舸飄零盡。只莫愁湖上。煙艇輕搖。指點遠山眉黛。金粉話南朝。但夢繞空江。鄉心此夕隨去潮。

壺中天 題曉涵蓮漪填詞圖

鬧紅何處。看粉雲圍繞。扁舟容與。萬頃晴漪秋瑟瑟。水佩風裳無數。浴鷺低拳。明蟾偷照。扇底清芬度。叩舷微唱。一襟涼染珠露。曾否喚起湘靈。哀絃重理。羅襪凌波步。卅六鴛鴦誰管領。似訴年華遲暮。玉笛吹愁。銀燈校字。商略修簫譜。采香歸去。待

傳芳訊休誤。

湘江靜 羅兩峯臨董北苑瀟湘卷爲王鶴樵觀察嵩齡題

曉霧收浮嵐漸露。又濛濛、絮雲晴護。沙明遠岸，微波似鏡，攬中洲芳杜。玉笛一聲秋。垂楊外、扁舟來去。樵歌唱晚，魚罾買涼，看都是舊鷗鷺。夢乍醒、吟正苦。指僧廬翠微深處。青蘿挂壁，新篁繞徑，聽疏鐘遙度。易惹客心愁。江天迴、雁行移艣。蒼茫四望，湘煙暈碧，斜陽未暮。

大有 己卯九日偕鄭曉涵游百花洲遲李芋仙七棊不至還集通志局邀同

蔣篆雲芳王松谿杜颺初熾勳小飲用潘懷古九日韻

遠水微茫，百花洲上，倚短筇、延賞秋九。浸寒漪池荷，冷落非舊。危廊曲榭共臨眺。正佳節、登高時候。有約醉倒東籬，西風卷簾人瘦。霜螯熟、聊命酒。綴佩擷紅萸，暗香盈袖。詩思頻牽，指點板橋疏柳。卻喜鷺鷥來又。休重向煙波回首。最難得、擊盞聯吟，催租去後。



百字令 蔣香生鳳藻自吳中來章門出竹籬招隱圖索題時將赴官閩中  
菴鱸歸興喜田園無恙一椽棲託杜老秋風茅屋底位置笛牀茶幕麕眼編籬鶯聲  
選樹開徑尋真樂芋陂蕙稜晚涼還課僮約誰信遠道年年征帆細雨來上滕王  
閣榕驛三千灘百二明日扁舟重泊叢桂淮南孤松彭澤寂寞留雲壑草堂資辦故  
山休負鰲鶴

買陂塘 辛巳秋吳子梅觀察世熊有乞病之意繪安穩收帆圖屬題並訂結  
鄰之約

曳斜陽布帆無恙魚天涼氣吹暝橫江雨過疏煙闊圍住縠紋千頃明似鏡看一櫂  
中流自在風波定商飈正勁喜遼海雲颿轉輸紅粟穩波木蘭艇闌干凭指點微  
茫雁影秋光誰共消頌名山游歷如今嬾忽動五湖歸興鷗夢醒垂柳外聲聲漁笛  
塵心警鄉關路迴倘鼓枻來時小長蘆畔相約倚橈等

大江東去 題許子笠太守承家天際歸舟圖

乘風歸去。推篷望、千丈銀濤如雪。一霎滄溟經萬里。飄蕩孤舟似葉。險浪鷗眠。驚波鯨吼。眼底真奇絕。鄉心無限。赭竈遙指天末。回憶長揖軍門。大旗懸落照。陣雲愁結。把首韓刀馳露布。蠻觸紛紛漸滅。汗馬論功。椎牛開宴。快擊中流楫。樓船橫海角。聲猶自嗚咽。

齊天樂 王景之祖斌僑寓吳門繪鴛湖泛權圖以寄故鄉之思徵題賦此  
畫船聽慣江南雨。鄉園頓生歸興。萬澱潮通。蘆碕雪颭。中有樓臺名勝。琉璃萬頃。看柳色空濛。綠波交暎。唱徹漁謳。渚煙飛破鷺鷥影。清游更饒豔景。水風牽荇帶。搖漾明鏡。翠幔聞鶯。紅裙裏鴨。一權穿雲無定。鴛鴦睡醒。怕偷眼篷窗。妒人雙凭。我欲浮家。白鷗盟未冷。

月下笛 題羊辛楣花谿漁笛圖用卷中樊雲門增祥韻

橫竹呼秋。輕橈盪水。釣游何處。飄零太苦。蓑笠相逢在南浦。浮家泛宅依然好。莫更向天涯問渡。正鯉魚風起。蘆花瑟瑟。滿灘煙絮。疑佇斜陽暮。使貰酒湖濳。醉盟鷗

鷺。關河倦旅。夢回江上孤嶼。故園無恙歸帆穩。有笳箏、隨身帶取。和一曲滄浪。吹徧  
贛洲舊譜。

百字令

辛楣將赴粵東張子衡廉訪岳齡餞之梅園賦詞贈別余亦繼聲

垂燈春淺。又綠波南浦。征帆催別。小憩名園陪杖履。相對一尊淒絕。孤劍從軍。中流  
擊楫。壯志何空闊。習池高會。座中都是英傑。猶喜臘鼓迎年。衝寒庾嶺。剛報梅花  
發。驛路相思誰寄取。打疊吟箋盈篋。潮落灘聲。煙迷津樹。夢斷關山月。扁舟風送。浪  
花堆起如雪。

又

題繆芷汀觀察德柔秋樹讀書圖

秋來何處。是梧桐小院。西風蕭槭。葉墜空廊簾半卷。涼染一襟濃碧。睡鴨添香。瘦蟾  
窺影。靜坐繙芸帙。研朱讎校。硯凹清露微滴。還憶毳幕從戎。飄零書劍。同此分陰  
惜。塵垢一囊隨馬足。萬里關河籌筆。斟酌謨觴。縱橫圖史。醞釀匡時策。疏林煙暝。翦  
燈休負遙夕。

鳳皇臺上憶吹簫 題謝枚如章鋌賭基山莊圖

一月垂天萬山窺牖。借大箸酒邊詞中句謝家詞筆清空。認草堂何處。喬木青葱。世事枯棊一局。還憶否。賭墅爭雄。從今後。楸枰斂手。得失雞蟲。怱怱客游去也。花底幾樓臺。蛛網塵封。況鼓鼙聲急。漸少歡悰。賸有池邊疏柳。開倦眼。猶待春風。春風到。元亭問奇。載酒相從。

浣谿紗

孤館春寒酒易醒。夢回長憶鬢雲橫。別來消減幾分青。一枕潮聲黃歇浦。三年浪迹灌嬰城。但憑短札訴衷情。紅豆拋殘冷畫屏。隔花吹徹鳳簫聲。當年深悔別離輕。木驛通波傳錦鯉。海棠籠霧度流鶯。斷腸天氣又清明。

南浦 送謝枚如還廬山鹿洞書院

珠簾暮卷倚滕王。高閣送君行。纔過清明寒食。飛絮滿江城。且盡綺筵杯酒。照湖波、

綠鬢各星星。看片帆催挂。短橈頻撥。黯黯別離情。此去水程漸遠。壓孤篷、空外數峯青。差喜匡廬無恙。猿鶴早相迎。料理筆牀茶竈。傍東風、聽徧讀書聲。奈小桃開落。一春花事總飄零。

高陽臺 和許季仁太守篷窗聽雨寄懷原韻

江闊雲低。船浮浪湧。風風雨雨斜侵。悄揜孤篷。那知潮淺潮深。荒灘暝色圍叢篠。聽瀟瀟、空外流音。倚熏篝、欲寫相思。擁鼻微吟。扁舟十載金閨路。記朱闌喚酒。陳迹堪尋。誰分飄零。依然野岸疏林。落紅滿地韶光老。咽啼鶻、悽斷芳心。又宵來、惻惻春寒似水難禁。

瑤花 沈蘆汀汝彬由鴛湖還茗上風雪扁舟光景奇絕不啻白石老仙垂虹夜游也繪圖寄示題以歸之

扁舟載酒。遙指菰城。探玉梅消息。寒鴉盤陳。斜照外、淦淦湖雲如冪。關河歲晚。問誰伴、芳心孤寂。祇夜深、飛雪濛濛。夢繞水西荒驛。朝來試啓篷窗。看一抹疏林。晴絮

堆積。銀塘似境。渾不管。凍損鴛鴦雙翼。柴門晝掩。牘幾縷。炊煙縈碧。記舊游曾釣苔磯。負了綠蓑青笠。

掃花游

費餘伯以耕畫梅花水榭橫幅鄭斫齋德凝索題

小園傍水。訝漠漠輕寒。翠禽啼迸。暗香度嶺。看橫斜態好。綺窗搖暝。凍萼無言。一笛高樓喚醒。畫闌凭。正雪壓半谿。詩夢都冷。春信教管領。問驛使南來。折花誰贈。舊游試省。記銅坑醉月。縞衣妝靚。洗硯池邊。淡墨微茫弄影。對清景。又黃昏。角聲初靜。

西湖月

順治庚寅虞山蒙叟留西湖賦雜感二十首書於絹素梅村祭酒爲

補圖芝麓尙書題一律於幀末江左三家萃於一卷洵名蹟也狄曼農學耕得之屬爲賦此

鶯花半壁湖山。指一抹荒煙。趙家宮闕。接天衰草。棲霞古柏。斷橋殘雪。興亡都閱盡。牘幾樹垂楊零病葉。料應是。望帝魂歸。枝上五更啼血。那禁雨苦風淒。又似水宵寒。釀愁時節。翦燈相對。詞人老去。舊游能說。錢王遺廟在。看翠墨淋漓題片碣。最難

忘、鐵弩餘威射潮鳴咽。

乳燕飛 本意和許季仁太守韻

錯認天涯路。傍東風、回翔紫陌。蹴花低舞。王謝堂前曾相見。誰識烏衣舊侶。更不辨、喃喃私語。楊柳樓臺春如海。任飄搖、幾日成飛絮。巢未穩、恁歸去。主人恩重渾非故。記當初、銜泥補壘。畫梁都污。猶待歸來簾常卷。商略年年小住。奈換了、斜陽庭宇。睨睨時聞流鶯囀。惜同羣、儘把心情訴。秋近矣、尙羈旅。

金菊對芙蓉 題許子笠太守石鐘泛月圖

晴雪亭臺。灑寒城闕。宵來風景偏幽。漸冰蟾催上。冷掛簾鉤。湖波淨、拭如斂鏡。寄疏狂、一葉扁舟。吟朋三五。篷窗翦燭。容與中流。依約水際螺浮。折苔枝、叩石聲澈林。陬料東坡去後。無此清游。江山彈指成今昔。話當年、飛捷名樓。空舒嘯、圓沙拍拍。驚起眠鷗。

憶江南 丙戌除夕和王次逸 甲癸

殘年盡。風雪揜衡茅。歲月崢嶸。蛇赴壑。關河飄泊。燕營巢。春信上梅梢。  
鄉關迴。離思正無窮。事業他年煨芋火。因緣異地聚萍蹤。把酒祝東風。

尾犯 雪後寫望簡次逸

小苑雪初晴。殘粉畫檐。清溜微滴。倦柳腰慵。舞東風無力。棲凍樹。昏鴉萬點。界斜陽。  
紅闌數尺。卷簾凝望。盪散片雲。江上春山碧。琴樽空訂約。曾寄錦字消息。蘚徑荒  
寒。阻尋芳雙屐。探梅訊。南枝舒蕊。倚熏篝。餘香戀夕。釀愁誰省。起弄月明深夜笛。

一萼紅 丁亥冬家慈將率眷屬買舟來章門先期移寓桃花巷榭園主人用

玉田弁陽翁新居韻賦詞見贈依韻和之

拂征衣。看緇塵浣盡。鍼綫綻多時。游子離鄉。高堂望遠。頻更佳節芳菲。溯西江。全家  
一舸。祝馬當。相送好風吹。安穩程途。團圞笑語。休寄當歸。最愛桃花深巷。有蔬畦。  
環徑。梧井通池。位置琴尊。安排筆硯。小窗晴旭。移遲。冬至後一日待重試。香心紅袖。  
喜依然。書味夜燈知。且待板輿花下。細譜笙詩。



又 述懷仍用玉田韻

織弓衣笑高歌。勅勒橫槩記當時。束髮從戎。揮豪倚馬。塞垣草長芳菲。洗吳鉤。自搏殘雪。聽五更。帳外角聲吹。上將星明。捷書露布。長揖言歸。誰分飄零宦海。任孤雲出岫。弱絮縈池。庾嶺寒梅。章門煙柳。渡江春信遲遲。繞湖隄。看山拄笏。算閒情。只許白鷗知。檢點奚囊。賸句補綴新詩。

百字令 贈汪芍卿。綬之即送其出宰豐城

酒龍詩虎。是醉翁席上。丰標先挹。卅載論交深幾許。潭水桃花千尺。官閣吟梅。郵亭折柳。離合傷萍迹。烏紗同岸。鬢華都已如織。還憶劫換滄桑。雲停嶺海。恥作諸侯客。擊鼓回帆。風力健。飽看匡廬山色。劍氣干霄。潮聲入枕。翦燭歡今夕。兒童騎竹。隔江遙候煙驛。

高陽臺 洪梅孫祖詒屬題其尊甫肖梅先生香雪論心圖。用卷中齊玉谿韻

瘦影窺蟾。孤懷伴鶴。東風吹徹冰心。踏破蒼苔。羊求徑裏同尋。巡簷且索寒梅笑。翦

春燈共對宵深。聽高樓、玉笛聲催。香雪成林。年年戎馬關山路。起相思一段。分付瑤琴。籬落昏黃。故園消息都沈。詞人已醒游仙夢。醉芳魂、好訂知音。繞谿流、萬點疏花。一角遙岑。

百字令

麻幼愚瑤宰瑞金購巨石於廢園置諸棉江書院銘而刻之索華海

初文匯畫以徵題予去秋權上饒署中亦有一石頗可人意因賦此解遂牽連及之

洞天清曉。認翠微峯下、眉痕浮碧。一片雲腴憑割取。積蘚蒼蒼如滴。巒壑迴環。盆池供養。官閣傳觴夕。相逢顛米。定攜袍笏長揖。猶憶小住南屏。階飄黃霰。秋嶂橫簾隙。皺瘦玲瓏通萬竅。我亦煙霞成癖。解組怱怱。鬱林裝辦。不載扁舟石。輸君圖畫。雪泥鴻爪重覓。

垂楊

稚柳初黃春風駘盪柔條披拂依依動人爲賦此解

垂垂灞岸。漸弄晴蘸水。碧搖春淺。萬種纏絲。引將芳思舒青眼。纖腰低襯東風軟。任

眠起不教人見。倚斜陽、一角紅樓。把翠陰遮斷。曾記蘼蕪小院。聽啼老曉鶯。絮飛煙亂。惜別攀條。幾回惆悵珠簾卷。飄零最怕天涯遠。問何事、柔絲未結。待他時化作浮萍。吹易轉。

念奴嬌 諾瞿上人貫徹摘覺阿詩句畫一蒲團外萬梅花圖翁叔平尚書用

石帚韻賦之出脉徵題爰爲繼聲

疏林微雪。悄飛來孤鶴。翩翻爲侶。萬疊青山環古寺。添種玉梅無數。鄧尉移春。維摩說法。花落紛如雨。一蒲團外。贊公會賦新句。薄暮香氣濃熏。禪心欲破。忙喚扁舟去。高唱大江西上曲。一笑相逢南浦。蓮社攢眉。天池洗盃。好向匡廬住。流泉招隱。訪君應認樵路。

金縷曲 李樾卿雲出其尊甫剛介公傳忠錄見貽謹書其後

世事堪悲咤。望遙空、星分翼軫。天狼低射。幾輩憂時能殺賊。屈指公眞健者。纔不媿、書生戎馬。楚尾吳頭連克捷。更長驅、東逐江流下。迎戰急、鼓聲啞。濃磨盾墨淋漓。

寫走龍蛇，蜿蜒腕底。整軍多暇。自製饒歌朱鷺曲。文采跨顏凌謝。原不惜，以膏塗野。爭奈援師三舍避。膽孤忠碧血。萋弘化。千古恨，淚頻灑。

南歌子 楊花

淺霧蒸微潤。輕陰閣晚晴。東風作意太憨生。一任悠揚、飛絮滿迴汀。糝徑濃於雪。黏池化作萍。年年舒眼爲誰青。盡道纏絲、不道會飄零。

清平樂 富溪道中

好山無數。眉黛層雲護。行盡溪灣迷去路。煙鎖夕陽村隴。峭寒漸逼征衣。暮鴉繞樹爭飛。商略停車何處。故人相候柴扉。謂劉潤芬奇鄉昆季

玉蝴蝶 自上富至義寧百七十里崇巒疊巘曲折紆回經大還山尤幽蒨可

喜爰填此闕憩松石閒解囊琴歌之欲令衆山皆響也

昨向匡廬游徧。一肩行李。來倚吟筇。嶺路千盤如磨。追躡樵蹤。散靈芬、暗聞巖桂。吹落葉、冷舞霜楓。振天風。飄飄衣袂。長嘯凌空。 愬愬未招猿鶴。蒼茫凝睇。雲氣溟濛。

此閒林壑深邃。松檜青蔥。寄幽棲、衡茅靜揜。度曲礪，略徇斜通。倘相逢。仙人采藥，同上高峯。

采蓮令 愛蓮池在州署西偏宋周濂溪先生主簿分寧時舊址

藕花殘、風露銀塘冷。雲籤展、倒窺天鏡。四圍翠巘，送遙青、淺漾山眉影。凌波步、田田唱罷。鴛鴦夢醒。暗香知爲誰領。舊治濂溪，尙賸半畝清涼境。穿蘿徑、畫闌閒凭。柳絲搖曳，看足了、滿院斜陽暝。更回憶、龍華小劫。湘纍沈後，夜夜廢池光瑩。咸豐乙卯之變州牧贈太僕卿葉公殉節於此

蝶戀花 題許霽樓蘇齋蘭蕙同心錄

珍重靈根移楚畹。翠葉離披，颺得春風軟。綺石玲瓏環四面。露華只訝宵來淺。空谷幽香參鼻觀。吮筆調鉛，寫上鵝谿絹。注罷離騷經一卷。望湘人隔天涯遠。

絳都春 孫翰香家楨得王載揚徵君故宅築小靈鷲山館繪圖徵題

玲瓏邃館。露一角翠巒，牆腰遮斷。踏破蘚痕，小徑逶迤，隨花轉。斜陽飛絮閒庭院。聽

密樹、青禽低喚。試尋蒼玉、迴廊盡處、皺雲迎面。空戀。徵君舊宅、鶴書早渺矣、稿焚封禪。雨洗嫩苔。卷石招涼、橫秋巘。靈根閱世繁華換。結長嘯、蘇門人伴。掬來鶯脰湖波、暗塵淨澣。

### 憶秦娥

愁千疊。楚天微雨銷魂別。銷魂別。白蘋香送，好秋時節。曉窗綠樹聽啼鴉。江南江北音塵絕。音塵絕。玉璫緘札，淚痕淒睫。

### 山亭宴

金漉生武祥宦游粵西訪漫亭故址乞汪穀齋瑤補書元次山冰井

### 銘重刻之唱和成帙郵示索題爲賦此解

試尋漫叟登臨處。有當年、井闌銘語。宦蹟著炎荒。喜同此、驂鸞小駐。大雲山色最青蒼。望不斷、濛濛煙樹。澗底響潺湲。聽石罅、流泉注。一泓止水空亭古。灑微雨、碧苔潤礎。寒登汲詩瓢。歎照影、塵顏似故。煮茶僧舍滌煩襟。問味比、中泠甘否。翠墨久凋殘。好寄與詞仙補。

掃花游 陳伯平國治嗜金石文字我友孫叔苒祿增弟子也以馮黔夫世定

所作秋山訪碑圖屬題

雁雲盡卷。露一抹層巒。數行疏樹。冷紅瘦舞。又飄蕭亂葉。梵王宮宇。蘚徑荒涼。賸有  
經幢臥雨。寄情處。但攜杖看山。山靜無語。椎拓知幾許。檢翠墨巾箱。月虹光吐。寸  
眸鑒古。歎韓陵片石。不堪重撫。寶漢樓高。叔苒樓名。目斷征鴻倦羽。話離緒。望孤城。  
瓣香遙炷。

黃鶴引 題陳伯平鶴廬圖

雲門山下。小葺衡茅結吟社。紫藤花發年年。濃香盈把。軒窗秀雅。位置商彝周鼎。酒  
新篘。好約詞客挑燈閒話。十載故鄉思。千里長風借。掛帆遙指匡廬。天然圖畫。神  
閒意暇。那有利名牽惹。夢尋村舍。只老鶴翩翻來也。

聲聲慢 錢塘葉生頌周維新年未弱冠工小楷諳琴旨壬辰歲晤於西江節

署相從問字執弟子禮甚恭黔夫爲作江天琴話圖紀一時萍合也倚此題

之

移篷坐雨卷幔吟秋。空濛水天涵碧。小榭枕江。花外偶停游屐。闌干爪痕畫徧。抱孤琴知音難覓。麝炷裊聽泠泠絃語。替傳心迹。卅載關河倦羽。莫錯認清狂。五陵佳客。楚尾吳頭。相見似曾相識。鷗盟故鄉未冷。夢西湖。扁舟蓑笠。乍酒醒。又征塵。吹上柳色。

慶清朝 將遊都門道出津沽訪呂庭芷耀斗並晤吳蘭石煥采談讌竟日賦此留別

茂苑題襟。松江鼓枻。怱怱十九年華。飄蓬未定。潞河春水浮艤。雨過一隄嫩綠。柳絲影裏玉鞭斜。關心認小橋曲港。靜揜窗紗。差喜故人把臂。有舊游詩老。並坐煎茶。相逢意外。囊底新句爭誇。話到別離最苦。酒闌分手卽天涯。從茲去。碾輪紫陌。吹面塵沙。

梅子黃時雨 錢新甫駿祥招讌陶然亭同集者許子頌淮祥戚升槐揚吳祁



甫承志。潘安濤慶瀾。陳杏孫。昌紳金甸丞。蓉鏡孫魏若。寶琦也。

雙闕雲中望。空外孤亭堪共吟眺。奈積潦盈途。葦叢低繞。梅子黃時。零宿雨。畫簾不卷。鑪香裊。傾懷抱。密語淺斟。多少同調。誰料黃塵烏帽。閱星霜廿載。游屐重到。笑壞壁留題。難尋鴻爪。垂柳絲絲繫客夢。晚鶯聲軟。驚春老。西山好。一痕黛眉橫掃。

百字令 吾浙會館之在下斜街者趙吉士先生寄園舊址竹垞老人曾居之  
初白集中有詩可證丙寅夏予偕朱亮生采過此愛其幽寂將移榻焉僉謂  
荒廢已久弗宜僑寓而止恩恩二十八年矣比來都門李蕤客折簡招飲至  
則門庭堂廡脩治一新且廣旁舍植花木蔚然深秀喜而賦此

斜街西畔。向古槐深處。來訪新築。畫棟雲飛。花徑掃。添蓋數重。吟屋梅雨初過。柳陰交翠。濃染鬚眉綠。壺天清曠。舉杯先泛醪醕。追溯長水詞仙。江湖載酒。曾此棲高躅。更有煙波垂釣叟。同翦西窗銀燭。佳句猶傳。流風誰繼。好補春明錄。寄園無恙。百年還認喬木。

浣谿紗 改七薺雙紅豆圖爲繆小珊荃孫題

南國春來發幾叢。問誰把酒祝東風。壺中情淚一般紅。記曲暗拋羅扇蝶。投瓊斜

溜玉釵蟲。箇人心事更玲瓏。

狡獪題詩記阿雲。相思無那要平分。生憎楚客佩芳蓀。老眼看花矜異瑞。柔腸得

酒沃靈根。干卿何事暗銷魂。予嘗乞烏程費餘伯華亭胡公壽畫紅豆相思冊漢軍繼  
又雲題句云人間只賸雙紅豆我欲平分故惱公根觸舊游爲之惘惘

齊天樂 夏夜露坐寄懷頌周章門

雨餘庭院涼如水。翛然碧天雲淨。倚扇兜螢。鉤簾待燕。屏卻疏窗燈影。銀蟾破暝。正  
槐葉陰濃。棗花香靜。坐久苔階。拂來衣袂露華凝。憑高何處望遠。大江流日夜。塵  
夢都醒。醉墨題箋。冰絃寫怨。一樣羈懷誰省。鷗盟未冷。問柳外朱闌幾時同凭。獨自  
眠遲。聽殘蓮漏永。

西子妝 題錢子密丈應溥寶泉河觀荷圖

曲沼圍泉。虛廊薦爽。翠蓋亭亭擎露。曉雲霏雨。潤天街。策吟鞵。鳳城西去。尋芳道暑。  
早蠻榼。攜來尊俎。酌名花。愛玉容銷酒。清涼如許。銀塘路。萬柄搖風。縹緲紅衣舞。  
苦心脈脈。有誰憐。護嬋娟。夕陽拳鷺。詩情漫與。歎衰鬢。年光暗度。問何時。一舸鴛湖  
夜語。

中  
白  
詞

運  
彰



莊 械（道光

——光緒四）

字中白。江蘇丹徒人。治易春秋。好微言大義。口吃。善言名理。客遊京師。無所遇。曾文正延致淮南書局。勘定羣籍。甚敬禮之。同輩若戴望袁昶譚廷獻皆欽服其學。著有周易通義蒿菴集。

自序一

戊午刻詞四十首于京師。後間有作，不復著錄。今年夏，李君冰叔序薛慰農江舟欸乃集詞。言薛君之作，中多鬱伊，非漫爲也。索居白下，風雨如晦，稍稍爲之。歸次舊日所作，遂乃成帙。予無升沈得喪之戚，其善自懷思，則自少壯至今，固無殊也。查工片石，卽予字之切韻，取以弁首，無餘義焉。若謂詞之道小，不足盡所長，此其所以爲片石與。是又郢書而燕說矣。丙寅秋日識。

自序二

余自壬子學爲詞，至今十八年。綜所作計之，幾三百首。始以爲難，繼以爲易。丙寅以後，由易而知難矣。于是向從北宋溯五代十國，今復下求南宋，得失離合之故。戊辰五月，訂所作得八十餘闕，諷詠數過，疵累畢呈，因益加刪削，以附詩後。周草窗云：作詞難，改詞更難。吾于今益服斯言矣。己巳正月。

跋

仁和譚復堂篋中詞選。盛稱蒿盦先生詞。鄉先輩陳亦峯白雨齋詞話。傾倒尤至。晨夕諷誦。知兩家之言。非阿私所好也。顧訪求全本不可得。宣統己酉。識仁和許伏民於滬上。承以蒿盦遺集十二卷見貽。乃光緒丙戌先生之壻許氏承家豫章刻本。後三卷爲詞甲詞乙詞補遺。而詞話所收未盡編入。乙卯入都。江寧陳小樹示以仁和蔡氏壽祺刻本。詞話諸篇悉見其內。審爲先生自撰詞序所云戊午刻詞四十首於京師之本。陳氏所見僅此。蓋當時亦未得遺集也。頗思彙刊以傳。偶語吳興徐森玉。森玉亦酷愛蒿盦詞。曾取遺集之詞重雕。因檢版片見贈。人事鮮暇。未遑理董。今年秋。靜盦弟促完舊願。因取蔡刻所多各篇。刻爲續補遺。屬弟婦江南蘋合校印行。去森玉贈版之日。已忽忽近十年矣。乙丑嘉平。吳庠識於惜往日齋。

# 中白詞

丹徒莊 中白

## 憶舊游 草

試平原極目。翠色芊絳。不盡燒痕。倚仗東風力。便迷離古道。能不消魂。有時暗拈長帶。牽住石榴裙。看巷陌。情情。郊塍漠漠。都是愁根。溫存。向誰寄。想萬種春情。幽緒難論。莫把韶光負。任落花飛絮。分付芳尊。馬嘶客向何處。嬌殺玉樓人。漫寂莫空庭。蘼蕪滿徑深閉門。

## 玉樓春 閉門海上春事寂然午夢闌珊不禁成詠

空庭人靜香篝冷。睡起無言妝懶整。鶯聲轉轉繞花旛。燕子雙雙穿藻井。游絲裊向秋千影。佳約雨雲無定準。夢中好事夢難尋。倦眼微抄徐自付。

## 南柯子 夜起露坐

塵滿芙蓉鏡。香消菡萏鑪。釵橫鬢禪不堪扶。一任聲聲。夜漏滴銅壺。濁酒微醒後。



殘妝乍卸初。此時清景好追摹。不見花梢明月，繞啼烏。

綺羅香 歸揚州作

宿雨新晴。微寒乍暖。簾幕長垂清晝。草色冥迷。門外碧茵如繡。穿藻井、翠羽迷離。掩珠箔、紅樓依舊。共誰人、私語商量。韶光盡日鎮相守。恩恩江上去也。休說嬉春忒早。收燈時候。淺漲初生。吹起綠波微皺。臨野渡、萍絮飄時。恰大隄、柳枝歌就。漫惆悵、深院黃昏。淚痕揩滿袖。

瑞鶴仙 乙卯二月自海上歸揚州見新燕賦

燕飛妝懶整。細思量、雙棲還讓恁穩。屏間翠鬢隱。問青天碧海、可能相引。花梢弄影。漾愁心、闌干夢醒。更樓頭、楊柳依依。說道好春將盡。休省風流佳約。似水鈿車。杜陵風景。芹泥蹴損。腸斷處、更誰領。早歸來、簾幕深深靜押。絮語雕梁晝永。怕窗前、又有流鶯。向人巧逞。

側犯 酴醾次清真韻

惱紅怨綠。淺勻膩粉。新妝靚。人定似。縹緲瓊樓露明鏡。冰肌自掩袂。雪月深深徑。風靜。婪尾讌。光浮玉杯影。盈盈壓架。背立芳心瑩。還記省。春閨鴉鬢共潘令。夢繞梨雲。豔魂清迥。無語東風夜闌金井。

珍珠簾 歸海上作

熏風乍引齊紈扇。繞空階。曲曲闌干行徧。香裊畫簾深。又篔簹紋初展。倚枕支頤情繾綣。渾不覺。夢兒縈轉。流眄任寂莫。閒庭落紅成片。誰遣繭紙敲窗。似人來。几案亂翻書卷。驀地起相尋。見白雲天遠。芳草滿川。梅雨後。只望斷。江南何限。淒惋對茶鼎沈沈。閒煎綠薺。

水龍吟 和秦淮海

小窗月影東風。單衣竚立輕寒驟。閒門靜掩。湘簾不捲。深宵時候。已隔經年。更添愁緒。問君曾有。料春光滿眼。王孫草色。離離遠。迷荒蹊。一曲楊枝別後。恰依稀。探春時。又客中何處。儂今生怕。爲儂消瘦。飛燕離梁。落花深巷。一般搔首。更天涯是處。流

鶯滿院說新和舊。

風流子 楊花

柳絲飄不定。東風起。吹送到天涯。看著地旋飛。沾衣還起。濃春難覓。芳思都除。夢何在。飛花迷巷陌。新綠上窗紗。一樹密陰。回頭猶戀。半池新漲。臨水誰家。分攜愁難撇。爲誰貼點點。共委泥沙。空向短長亭畔。披拂香車。任無心宛轉。偏勞人顧。有時瀆。淚先被塵遮。休語翠樓夫婿。啼損棲鴉。

花犯 陌上見楊柳

粉牆陰。絲絲柳色。芊絲弄清景。暗塵輕整。早夢繞江潭。愁緒難竟。去年繡閣藏鴉鬢。鞭絲更掩映。怎解道。娉婷丰度。征人難再問。今年綠楊又依依。柔條似可折。天涯誰贈。飄蕩裏。闌干畔。游絲無定。待儂與。燕鶯細語。春正在。梢頭嬾靄。漫憶那。水邊飛絮。化萍青眼賸。

阮郎歸 衛河作

一彎涼月碧雲西。纖纖向客低。眉痕猶似畫時齊。當年夢已迷。官道水，久分潮。玉  
驄何處嘶。當窗莫聽夜烏啼。還愁霜滿隄。

蘭陵王 如皋作

水光定。明月流黃共映。鴛衾冷，羅綺舊情，牡蠣窗前客孤凭。新霜慘翠鬢。休問。流紅  
暗徑。朱樓晚，回首昔時，曾畫山眉對妝鏡。愁孕有誰訊。便蟻酒重斟。麝煤都燼。秋  
風孤擢波清瑩。和雁羽汀洲，荻花江國。新詩隨處自題詠。管絃轉愁聽。幽興且追  
趁。甚錦字箏調。心字香印。高城遠隔天涯近。枉合貯鈿釵。綵成花勝。愔愔歸也待寄  
與。淚懶搵。

醉桃源 畫眉鳥

妝臺鏡子遠山青。南都石黛橫。問儂夫婿不知名。聲聲別有情。疑鷓鴣，誤流鶯。還  
隨蜂蝶并。筠籠幾處傍簾旌。簾中笑語盈。

慕山溪 秋雨

憑闌無語。綺思歸何許。客裏怕聞蟬。爲難得、悲秋伴侶。流光冉冉，一換一番愁。鳩自拂。燕交飛。不斷絲絲雨。西風連日。渺渺長亭浦。流水送行舟。卻望斷、天涯羈旅。房櫳歸去。幽思轉難忘。放翠幕。下珠簾。深鎖雲窗霧。

婆羅門引 月下憶荷花

夕陽漸下。晚來落月尙窺人。一彎乍吐冰輪。也學蛾眉新樣。融入畫堂春。喜纖雲不起。玉宇無塵。香醪一尊。理瑤席。共誰陳。獨自追涼小院。無語黃昏。相思何限。鬧荷花。深處晚香勻。倚玉闌。繞轉千巡。

國香慢 畫梅

疏影橫斜。是孤山往日。處士人家。幽香共誰尋覓。月色輕紗。不管清寒攀摘。一枝冑、流漾平沙。春風又相遇。澗地塵縑。穿逕苔遮。芳心縈繫久。卻翠藤倒挂。俏露芳華。柔條披拂。倩誰寄與天涯。夜月沈沈。妝閣。擲笛聲。愁落瓊葩。繽紛壓寒碧。縹緲仙雲。隱逐鈿車。

祝英臺近 夜坐

枕函欵釵玉墮。深院晚涼臥。玉簾橫陳。林影月篩破。往時曾怨春歸。春歸無那。再莫把、秋期錯過。溼香唾。綃雲籠霧輕衫粉。細腰涸。山額融黃。風顫鬢絲簸。畫屏低映雙星。一年待到。卻不解、流光推磨。

高陽臺 七夕

星靨脂紅。山眉黛綠。良宵門戶愔愔。蘭麝中衣。香囊合字。霏金。流螢點點無心撲。繞雕闌。又上羅襟。正雲屏、低度雙星。銀漢斜臨。秋期密約年年好。任人間兒女。乞巧穿鍼。自送春歸。可憐盼到而今。相思一寸柔腸轉。更休論、遠水遙岑。影伶俜。露浥鴉鬢。月照鴛衾。

惜奴嬌 荷花

紅暈脂痕。照出水、新妝靚。幽情共、綠雲低映。一曲西洲。誰採取、亭亭影。人靜。對西風、凌波自省。水佩風裳。偏又報、涼秋信。舞衣冷、幽香滿徑。壓鬢誰簪。枉負了、閒心性。

漫詠。泛一舸，田田萬柄。

朝玉階 秋燕

梁燕呢喃款款飛。新秋明日是，景全非。紅襟飄瞥影霏微。愁將離恨說，意依依。一  
春幽恨願多違。相看桃李放，鬪芳菲。思量真箇倦游歸。且隨螢火繞，拂書幃。

訴衷情 雨

曉來簾幕卷東風。細雨溼冥濛。辜負俊游佳約，春事去怱怱。雲日轉，透簾櫳。瑞光  
融。等閒看了，染柳熏桃，種種情濃。

鷓鴣天 溪上春望

李白桃紅次第開。何人谿上泛舟來。盤殮市遠無兼味，樽酒家貧只舊醅。慵拾翠，  
緩停杯。良辰美景且開懷。人生不向三春醉，何事東風淑景催。

杏花天 燕

畫屏海燕來棲息。漸數到、清明寒食。芹泥著雨燕支溼。溪上落紅誰拾。往事憶雕

梁藻飾新巢壘，似曾相識。天涯浪迹終悽惻。幾處紅樓解得。

采桑子 春暮

桃花落後楊花落，更裊游絲。鎮日簾垂。嬌女深閨倦繡時。平蕪十里春衫薄，玉勒  
驕嘶。曾向天涯。難把心情說與伊。

小重山 白門行館望雨有懷

密雨斜梭貼地勻。小樓聲不斷，似瑤箏。綠陰深處鳥還鳴。黃鸝轉，和入曲中聽。春  
事莫關情。流酸梅子熟，濺眉嚬。一川芳草自盈盈。繞闌久，階上碧苔生。

醉蓬萊 琴川嘗作蘆花四律屬和余未答也又遲作冬花館詞亦久而不報

秋水泛舟蘆荻彌望而琴川新沒于徐州眷念故人能無感喟

乍西風蕭瑟。蘆荻芳洲。晚霞成綺。不道殘秋。有畫圖如此。雪舞纖瓊。月凝狂絮。更映  
盈盈水。又到重陽。故人何處。光陰彈指。幾載漂搖。爲誰零落。放鶴亭高。愁心難已。  
點綴寒英。情枉孤芳。徒一樣。征人一般。詞客各一番。情思且引蘭舟。沿溪徐聽。采菱



歌起。

燭影搖紅 月季

廿四番風漫將花信從頭數。一年一月一番新。不解情如許。海嶠靈根暗孕。鬪嬋娟、尹邢共住。重帷深閉。勻粉調脂。含煙和露。仙影重樓。晚春舊約茶蘼誤。翦絨嬌女。豔隋宮。畫閣還重遇。篩月籠雲。冒霧倚金尊。深宵緩度。碧芽徐引。芳意深緘。莫教春去。

木蘭花慢 簡周丈縵李雲君壬叔

被游絲一瞥。方解道。是殘春。料處處園林。紛紛桃李。吹送香塵。銷魂。漫天飛絮。到中庭。颺起看還勻。底事重簾不捲。從教誤了芳辰。風風雨雨。乍新晴。幾輩逐雕輪。想草軟如茵。香車穩臥。說也忺人。溫存。一襟幽思。繞深閨。午夢翠眉。懶起向闌干斜倚。待看新月如銀。

南浦 落月

落月轉迴廊。照鏡臺、翠眉深夜人靜。相對不成眠。珠簾放、參差縠紋交並。玉鉤斜處，鬢絲飄拂，休回省。乍離碧海，纔一晌、行徧雕梁藻井。初三下九佳期，枉舊曲、儂翻新妝自整。心事訴姮娥。游仙夢、還被落紅吹醒。春將去也。博山鑪裊沈檀冷。看他三五團圓候，佳約終宵歡永。

傳言玉女 白門久客春事將闌倩客寫梅譜此遣興

腸斷崔徽，偏寫淡妝人面。游絲冉漾，又嬉春情倦。昨夜三更夢，向西洲會見。一枝枝映，雜花如霰。直到今朝，覓餘香、尙眷戀。小窗橫幅，鎖重重幽怨。飄零未似，繚繞楊花滿院。怕被香把夢兒吹轉。

南柯子 晚春

草綠閒門掩。苔深曲徑迷。東風無力裊游絲。自向闌干，閒步覓春詞。畫閣新陰暗。珠簾薄霧垂。多情徧有蜜蜂兒。依舊小庭來往，繞花枝。

訴衷情 霞

夕陽隱隱繞朱霞。紅袖映窗紗。那得中山美酒，千日醉桃花。  
煙檻隔繡屏遮。漫嗟呀。春心自鎖，一任游絲，裊向天涯。

唐多令 卽事

斜日照疏櫺。朱霞天半晴。裊游絲、百種輕盈。似解憐人春晝永，故宛轉，寫深情。  
心字篆香縈。茶煙午夢清。繞空階、新雨苔生。閒倚闌干無一事，直坐到，月華明。

又

飛雨灑空階。羅帷風自開。隱車聲、緩送輕雷。魚鑰沈沈深院鎖，難道有，玉人來。  
心印篆成灰。銅壺箭漏催。逐行雲、何處徘徊。露出疏星三四點，有殘月，且開懷。

江城子 曉起

水晶簾下看梳頭。思悠悠。意悠悠。曾記多情，攜我上蘭舟。小院三年芳草綠，眉自畫，月如鉤。  
纖腰一似柳枝柔。怕登樓。不知愁。只是悔教，夫婿覓封侯。拚把一春沈醉，過還夜夜，夢揚州。

思佳客 春雨

一曲歌成酒一杯。困人天氣好亭臺。沈沈春晝斜飛雨。寂寂閑門亂點苔。花幾簇，錦千堆。落紅成陣映香腮。不如卻下簾兒坐。自看同心七寶釵。

無賴今年又晚春。一春風雨倍銷魂。梁間歸燕空留客。葉底流鶯解罵人。飛絮繞，落花頻。佩環搖蕩夢中雲。閉門已過春三月。莫向青郊問畫輪。

端正妝成繡閣遲。卷簾終日雨絲絲。欲知庭外春多少。試看屏前影透迤。吹不斷，望還迷。畫欄蜂蝶各參差。空階點滴如絃管。難把新詞付與伊。

六醜 冶城白桃花次沐庵韻

漸淒迷萬綠。且一洗鉛華顏色。道春欲歸。春光偏愛惜。盪碎瑤魄。縞袂憐伊苦。者般姿態。向畫闌欹側。無言便覺人傾國。柳絮翻空。梨雲悽咽。多情讓伊幽潔。自劉郎去後。前事休說。嬌癡無力。任佩環搖曳。似舊玄都夢。影寂寂。重來綺思空憶。賸盈盈夜月。與共悽惻。游絲裊。斷腸難覓。拚儘把。雨雨風風受了。小庭狼藉。閒門鎖。卻怕人

識待御風，縹緲天台去。瓊簫喚徹。

掃花游 春寒

飛花墜絮，竟欲送春歸。晚風人悄。閒雲共裊。向闌干望去。一般縈繞。輕暖輕寒。怎把輕絲換了。自顛倒。快喚取香醪。愁待伊掃。沈醉休坐嘯。憶水畔蘭舟。岸邊桂櫂。出門一笑。問韋郎可見。亂山殘照。愛殺房櫳。莫把香篝撇掉。暮煙罩。去添衣。且休游眺。

尉遲杯 金陵懷古

晴雲繡繞。迤邐雉堞排層岫。淒涼六代煙花。惆悵朱樓紅袖。閒門白鎖。誰復向、長亭問新柳。望歸鴻、去逐天涯。夕陽偏帶明秀。多情十二闌干。怕碧草侵階。綺思非舊。燕語鶯啼都休問。且鎖日、簾兒共守。無慘是、琴絲茗椀。更誰識、新霜鸞鏡。有但相忠、弄笛桓伊。一江春水如酒。

鷓鴣天 青溪

九曲青溪一葉舟。山圍潮打自風流。西園公子名無忌。南國佳人字莫愁。溪上住。

水邊謳。往時歌舞已都休。新來識得相思苦。說起相思不自由。

探春慢 春夜

斗帳燈紅。翠尊酒綠。洞戶雲羅縹緲。角枕棲鴛。香篝爇麝。竟是承平年少。拚放他春去。怎不把、春愁放掉。坐看蠟炬成灰。西窗鐘動清曉。殘夢幾回縈繞。趁密約風流。後堂春好。鳳管么絃。象棋雙陸。次第莫教忘了。幾許行雲處。鬢絲拂、暗塵吹帽。惆悵鶉聲。三更低喚春老。

木蘭花令 閨情

嬌雲暖困柔情膩。罨畫山屏眉映翠。簾波織就字回文。燈穗結成花並蒂。石榴裙  
子腰支細。依舊錦囊羅帶繫。由來蕩子愛倡家。誰令妝成門獨倚。

宴滿都 燕

春去尋王謝。花草亞。甚時梁燕纔嫁。尋常巷陌。人人自比。莫愁聲價。芹泥拾去還怕。醉夢裏。宮衣暗卸。漫夕陽、低說興亡。香巢且壘蘭麝。須知葉底流鶯。樹陰啼鳩。春

殘到夏。屏山似舊。簾櫳未改。舞休歌罷。歡娛好趁良夜。快輕翦、雲羅繡帕。更那堪、梅子青圓，薔薇滿架。

浣溪紗 題士女圖

礎潤苔衣溼不乾。落紅飛盡尙輕寒。庭前細雨更漫漫。古髻學成妝閣坐，腰支人覺帶圍寬。沈沈不語向闌干。

清平樂 曲徑

回廊一一。徑窄衣衫偏。飛燕穿將簾子入。猶認尋常巷陌。柳絲難結春情。一池淺漲浮萍。池上莫教回首。杜鵑低喚聲。

高陽臺 初夏

腸斷花辰。心蘇草甲。柔情不放人閒。又送春歸。如何尙怯輕寒。落紅飛絮看都盡。爲綠陰、愁倚闌干。裊沈檀、一縷游絲。繞向簾間。何須更寫相思苦。倩回文雲錦。小字冰紈。礎潤苔滋。淚痕拭也難乾。庭前燕子雙雙舞。笑班姬、學製團欒。夢心酸。遠岸江

離別院幽蘭。

西江月

乍雨乍晴天氣。輕寒輕暖簾櫳。游絲飛絮已無蹤。閣外溼雲煙重。綠樹舟迷前浦。朱欄馬滑溪橋。香車油壁漫相邀。誰是西陵蘇小。

好事近

春去日遲遲。靜鎖一庭濃綠。深院翠帷亭午。夢鴛鴦穩宿。門前流水是秦淮。風顫浪紋簇。牽動王孫歸思。挂蒲帆十幅。

曲游春 菜花

小院飛花盡。看一畦菜。爭弄晴色。點染餘春。共水邊藻荇。隴頭麩麥。路轉野棠隔。似刺繡。縷金交織。已徧開。萬紫千紅。休怪蝶衣無力。漫憶溝塍。溜碧。記匝地榆錢。忙到寒食。美景恩恩。任翻階芍藥。畫欄煙絮。叱犢橫簫笛。醉又醒。羅衫風偏。笑有人。綺閣深深。那會相識。



探芳訊 樸園

步芳徑。又草綠門閒。花紅砌映。悵廢池橋畔。難開舊奩鏡。嬋娟應共春光去。誰向湖山訊。漫褰衣、去上林亭。自循苔磴。名勝恁休問。賸瓦礫淒迷。淚痕清瑩。惆悵荒臺。題詠尙能認。繁華逝水歸腸斷。嬌困風吹醒。待何人、攜酒重來酌酹。

聲聲慢 秦淮晚步

朱欄人倚。綠水舟橫。銷魂只有秦淮。暮雨朝雲。讓誰點綴陽臺。長隄柳枝漸綠。似伴羞、亂顫瑤釵。愁未遣。又眉彎新月。暗逐人來。知否城闌將晚。過鈿車偏送。塘外輕雷。障面飛花。紗窗翠霧疑開。游魚翠瀾漫攪。且句留、衫影徘徊。春自遠。背東風、香沁碧苔。

步月 繡球

暖雪紛鋪。晴雲低蹙。一庭靜對穠綠。畫簾乍捲。似月明金屋。儷瓊萼。碧玉嫁時。誇珠彩。石家盈斛。妝臺畔。釵鳳顫微。暗香遙觸。屏山新睡足。正刺繡深閨。雲鬢斜矗。唾

絨綵結。好重重團簇。惜春去。人倩淡妝。助花傲。夜嬌銀燭。雕闌壓。胡蝶滿園粉撲。

賣花聲 白門對雨作

庭院草痕齊。綠漲淒迷。香泥溼透暈苔衣。燕子不來春已去。又到黃鸝。花好是將離。人卜歸期。王孫心事不須題。梅子雨肥風折筍。斗酒誰攜。

浪淘沙 秦淮水上看鍾山

檻夜是鍾山。翠擁煙巒。山腰茅屋兩三間。我卻低頭水上望。幾箇漁船。金粉記當年。裙屐依然。一春心事有誰憐。燕子誤將王謝認。來往翩躚。

又

綠水亞朱欄。柳色氤氳。漁舟撐出隔溪灣。如此風光何處去。休唱陽關。山外更青山。一樣煙巒。管絃寂寞意闌珊。那得珠簾垂十里。不放春閒。

惜分釵 夜坐

江城晚。江渚遠。夢魂自向千山轉。孤衾寂。孤燈碧。幾曲迴腸。一枝橫笛。戚戚。金尊

款。清歌婉。晝長應恨良宵短。家園隔。佳辰擲。老大征人。遠游行客。惻惻。

高陽臺 長樂渡

長樂渡邊。秦淮水畔。莫愁艇子曾攜。一曲西河。尊前往事依稀。浮萍綠漲前溪徧。問六朝遺蹟都迷。映玻璃。白下城南。武定橋西。行人共說風光好。愛沙邊鷗夢。雨後鶯啼。投老方回。練裙十幅誰題。相思子夜春還夏。到歡聞。先已淒淒。更休提。煙外斜陽。柳外長隄。

又 新月

舞燕翻風。晴霓散雨。一彎淺露蛾眉。準備新晴。明朝去踏沙隄。影兒滿地看都好。喜綠陰。青子離披。望還疑。穿徧閒雲。飛上高枝。簾鉤不改春時樣。誤幾回良夜。幾度佳期。暝色纔開。依然國色天姿。團欒漸露微微意。到初三。便是芳時。好看伊。光滿雕闌。彩泛金卮。

鳳凰臺上憶吹簫 懷丁保庵興化

拱極臺邊。昭陽湖畔。微風吹送清謳。有一枝漁笛。相與句留。又是三年不見。巾帶緩。似舊風流。空相憶。江籬遠岸。杜若芳洲。悠悠浪游。廿載題詠徧津亭。自豁吟眸。臘小紅低唱。巧囀歌喉。我是江郎才盡。臺城路。誰與綢繆。休重問。青青薺麥。冷月揚州。

滿庭芳 別沐庵

花是將離。曲成懊惱。滿城草綠煙含。片帆歸去。行客柳毵毵。同是哀時庾信。婆娑影。我覺難堪。消魂處。今宵酒醒。好句自幽探。深絨無一字。嬉春已倦。芳思都芟。想畫梁雙燕。相對呢喃。休憶盧家小婦。何人去。灑淚江潭。都忘卻。朱櫻綠筍。沈醉是淮南。

臨江仙 江行雜詠

綠草萋萋波灩灩。出門一笑舟橫。客心何處最傷情。石城橋畔路。直是少人行。往事六朝都不見。莫愁留得湖名。湖邊莫去訪娉婷。畫船人似玉。端正自吹笙。纔到江津聞喚渡。岸傍還插旌旗。江南江北望迷離。無心鷗鷺好。來往各忘機。此際涉江何處去。落花流水天涯。蘼蕪杜若有誰遺。晚山青不斷。幕府路逶迤。

繞徧青山橫北郭。郭門正對苔磯。磯邊燕子幾時飛。江空沙岸闊。風定客舟歸。尚  
有石亭今不見。臥碑宸翰留題。承平風景記依稀。戰征將廿載。涕淚暗雙垂。  
帆颭微風浴碧浪。遠天低度行雲。客中風景向誰陳。山知今古事。水慣送迎人。坐  
看舟移芳草岸。岸邊沙鳥來頻。百年行客幾逡巡。不如沽美酒。歸醉畫堂春。

揚州慢 過揚州作

飛絮時光熟。梅天氣。片帆又到揚州。繞荒城十里。尙似舊淮流。過多少。尋常巷陌。銜  
泥飛燕。何處句留。望紅樓人語。沈沈深押簾鉤。杜郎老去。有何人。能訴清愁。喜學  
語雛鶯。新聲百舌。不解含羞。好向綠陰深處。西風動。怕報涼秋。已醪醺。開到行人休  
憶春游。

少年游

畫簾深押理春蠶。金粟一燈含。簾外黃昏。滿天梅雨。腸斷是江南。簾閒燕子雙棲  
穩。簾內語鶻鶻。抽繭情懷。化蛾心事。風味十年諳。

虞美人 午夢

暖風吹送晴絲碧。深院珠簾隔。夢回枕上意難忘。行徧三吳三蜀、又三湘。寸心萬里天涯繞。草色閒門好。春風過了又秋風。歲歲年年、都在酒尊中。

戚氏 歸自白門綠陰滿徑流鶯睨好音動人率然賦之不自知其言之長也

看花回。又看新綠護樓臺。幾處輕陰。晝長無事。去徘徊。塵埃。點蒼苔。芳心撩亂碧雲釵。消魂連番花信。向人蜂蝶自飛來。鬪草情緒。尋花心事。箇儂誰共銜杯。記筵陳夏屋。香滿春殿。羯鼓頻催。螺黛淺畫蛾眉。朱顏漸老。寶鏡又慵開。游絲繞。舊歡休憶。倦眼徐揩。遣幽懷。薄靄翠幕四垂。似水靜悄空階。脆圓薦酒。沁齒流酸。結子還有青梅。百轉流鶯巧。任啼鴉老。聽杜鵑哀。悵悵高樓影事。共文簫。宛轉韻幽諧。一般斗酒雙柑。竹林深處。招隱人何在。枉早春。游冶花如海。思往事。空令愁埋。慘綠衣。手自親裁。奈流光。迅速信音乖。想方塘外。鈿車穩臥。緩送輕雷。

玉胡蝶 本意

斷送一春芳思。小庭寂寂。獨自飛來。未到秋殘。湘簾且與徘徊。聽流鶯。怕窺綠樹。聞啼鳥。愁見青梅。黯樓臺。一池芳草。滿院蒼苔。安排午晴曬粉。翠迷楊柳。紅訝玫瑰。莫遇莊生。枕中幽夢。費疑猜。舞衣翻。應游上苑。仙風送。可引蓬萊。繞閒階。滕王圖畫。相映空齋。

風入松

微風細細送行雲。雲散遠天青。秋千柱散。花飛後。賸遙山。眉黛輕盈。冷落後堂宿燕。淒迷深樹啼鶯。殘陽徧解向人明。蛛網罨新晴。疏簾清簟。情無限。更何須。載酒林亭。別有一般惆悵。彎彎新月初生。

玲瓏四犯

夢裏餘春。便睡不成眠。嬌困慵起。寶帳低垂。胡蝶一生花底。深院燕語鶯啼。且認作。滿園桃李。好蒙頭。過了時光。一任歲華如駛。簾痕微拂。纖纖指。鬢雲鬆。欲梳還止。

尋芳懶向花枝問。誰把流蘇親理。憑問陌上行人。到處香車流水。擁鴛衾休問。風自顫。漾簾葦。

浣溪紗

簾幕愔愔望轉深。簾閒鶯燕自沈吟。熟梅天氣半晴陰。日照紗窗人未起。風吹羅帳困難禁。無心再去理瑤琴。

一萼紅 盤香

寫相思。倩柔絲萬縷。午夢乍醒時。巧樣回文。斷魂心字。引將筠管潛吹。畫堂深。雜和蘭麝。任縈迴。誰與撥餘灰。樵燭良宵。輸他蠟淚。尙說成堆。莫認銅檠承露。是春心微逗。一綫靈犀。宛轉柔腸。纏綿芳思。向人情自依依。更好共、書籤藥裏。傍簾旌。終日總相宜。只有往時荀令。未解憐伊。

瀟瀟雨 噴壺

閒庭無一事。聽蕭蕭。葉響藥欄頻。似跳珠濺玉。灑來自密。噴處還勻。多爲盛將仙露。



來寫十分春。潤偏衣篝靜。美景良辰。誰把玲瓏巧鑿。向清泉一掬。只爲芳塵。便柔  
黃纖手。都是灌花人。料靈苗。能解滋味。漲香泥。不藉雨和雲。花閒隱。問壺公去。可許  
容身。

清平樂

晝長人靜。紅日紗窗映。午夢初回魂乍定。說是傷春酒病。羅衫汗透難乾。簾紋玉  
腕斑斑。起向中庭閒步。一雙胡蝶簾間。

永遇樂

辛幼安北固山詞紅友佚而不錄得毋有未備與梅雨滿天閒譜此  
調易其壯語出以曼辭亦才人之狡獪也

簾影如絲。如絲疏雨。消遣清晝。潤偏衣篝。青袖滑膩。半卷榴裙皺。陰濃暈翠。苔深漲  
綠。休憶落紅鴛鴦。恁含愁。闌干獨倚。淚痕溼透。衫袖。空階黯黯。誰彈箏瑟。相雜深  
宵玉漏。梅子黃時。滿川煙草。風味江南又。更容幽隱。絕無人到。海燕雕梁共守。憑誰  
曉。晴霽較準。鏡螺眉岫。

六州歌頭

門迎衆綠。還放石榴紅。人如醉。嬌欲睡。起先慵。靜簾櫳。愁緒天涯繞。共鶯燕。隨蜂蝶。會幾度。額黃染。臉脂融。賸得輕陰。閣外深深護。雨溼煙濃。望江南江北。綺思去無蹤。似水韶華。太恩恩。記嬉游處。春如海。花飛徑。乍相逢。佳約誤。鈿車過。更誰從。影朦朧。舊日庭前月。似團扇。又熏風。秋未到。歡長好。意惺忪。纖手瑤琴自撫。仙裾曳。玉佩丁冬。任鴛鴦六六。水宿夢相通。碧漲悠溶。

蝶戀花

城上斜陽依綠樹。門外斑駁。見了還相顧。玉勒珠鞭何處住。回頭不覺天將暮。風裏餘花都散去。不省分開。何日能重遇。凝睇窺君君莫誤。幾多心事從君訴。百丈游絲牽別院。行到門前。忽見韋郎面。欲待回身釵乍顫。近前卻喜無人見。握手恩恩難久戀。還怕人知。但弄團團扇。強得分開心暗戰。歸時莫把朱顏變。綠樹陰陰晴晝午。過了殘春。紅萼誰爲主。宛轉花旛勤擁護。簾前錯喚金鸚鵡。回

首行雲迷洞戶。不道今朝。還比前朝苦。百草千花羞看取。相思只有儂和女。  
殘夢初回新睡足。忽被東風。吹上橫江曲。寄語歸期休暗卜。歸來夢亦難重續。  
隱約遙峯窗外綠。不許臨行。私語頻相屬。過眼芳華真太促。從今望斷橫波目。

壺中天慢

行雲何處。卻分明。依舊昨宵華月。城上烏啼啼未曉。正好三更時節。巷口煙深。窗間  
燭暗。乍見心先快。那能再與。殷勤深訴離別。回憶往日來時。手中團扇。竟難教拋  
撇。幾曲銀屏天樣遠。更有輕紗隔絕。欲住無言。爲愁含笑。此際心如結。遙知去後。比  
前更覺淒切。

瑞鶴仙

望鈿車何處。香乍拂。暗鎖一庭薄霧。雲窗小院。罈。恍屏山曲曲。紗籠珍護。玳梁幾許。  
問海燕。芳蹤可住。看紅襟飄瞥。重到畫屏。漫把人誤。苦憶年年遠道。水驛山程。空  
怨零雨。鶯聲暗訴。催春至。共誰語。怕高樓去後。花枝滿眼。東風吹向繡戶。更青青柳

色。陌上費人凝佇。

相見歡

春愁直上遙山。繡簾閒。贏得蛾眉宮樣、月兒彎。雲和雨、煙和霧、一般般。可恨紅塵、遮得斷人間。深林幾處啼鵑。夢如煙。直到夢難尋處、倍纏綿。蝶自舞、鶯自語、總淒然。明月空庭、如水似華年。

定風波

爲有書來與我期。便從蘭杜惹相思。昨夜蝶衣剛入夢。珍重。東風要到送春時。三月正當三十日。占得。春光畢竟共春歸。只有成陰并結子。都是。而今但願著花遲。

菩薩蠻

人人都說江南好。今生只合江南老。水調怨揚州。月明花滿樓。當時年少樂。湖上春衫薄。春水碧於煙。綠陰藏畫船。

香車道上。蹇珠箔。行人問道誰家樂。嬌小不勝春。輸他金屋人。衣衫飛雪積。獨倚闌干立。若解鬪芳菲。雪中花滿枝。

闌干深院無人語。畫屏金雀參差舞。懶起學濃妝。偷閒繡鳳皇。輕雲簾乍捲。香霧羅幃掩。記得嫁王昌。盈盈出畫堂。

黃雲積裏千堆雪。吹殘瓊笛關山月。驛騎昨宵回。江南放早梅。梅花開復落。紅雨霏妝閣。薄霧礙游人。青郊斷畫輪。

念奴嬌

流雲乍歇。又當空推出。一輪明月。月自多情能照我。怎奈我傷離別。鬢已成絲。眉常蹙。黛此後從誰說。那堪回首。班驩繫岸時節。幾回遠寄鸞牋。深藏懷袖。字字愁磨滅。欲待將書重一讀。讀又柔腸千結。使得常留也。難相比。攜手重親接。不知今夜。夢魂可化胡蝶。

浪淘沙

衰柳暮棲鴉。樓畔殘霞。珠簾半卷玉鉤斜。只有箇人簾外坐。今日誰家。舊事漫嗟呀。鏡影窗紗。音書字字記無差。說不盡時拋卻去。流水天涯。

鳳凰臺上憶吹簫

瓜渚煙消。蕪城月冷。何年重與清游。對妝臺明鏡。欲說還羞。多少東風過了。雲縹緲、何處句留。都非舊。君還記否。吹夢西洲。悠悠。芳辰轉眼。誰料到而今。盡日樓頭。念渡江人遠。儂更添憂。天際音書久斷。還望斷、天際歸舟。春回也。怎能教人忘了閒愁。

醜奴兒慢

飛來鶯燕。驚破綠窗殘夢。看幾處花昏柳暝。雲暗烟籠。望帝春心。枝頭曾否解啼紅。闌干曲曲。游絲細細。愁殺游蜂。長記那時。成蹊桃李。一樣鮮穠。到此際。風風雨雨。誰寫春容。迢遞仙源。何人尋約到山中。蛾眉休說。入門時候。妒恨偏工。

菩薩蠻

瞳矓紅日纔當午。一鉤新月天邊吐。相去幾多時。參差形影隨。深宵朱戶裏。塔佩

聲徐起。倘許共徘徊。羅帷可暫開。  
寶函鈿雀。泥鳳。釵梁欹側。雲鬢重。莫遣夢兒酣。江南春色闌。音書金雀斷。芳草  
芙蓉岸。當戶理機絲。年年戰士衣。  
沈沈私語誰家院。闌干共倚珠簾卷。儂等自情癡。郎心知不知。重樓歡笑息。香鼻  
篆煙直。何日莫愁堂。雙雙上畫梁。  
六銖衣薄迷香霧。畫屏曲曲山無數。生小愛新妝。輸人眉黛長。夢迴深院靜。月過  
秋千影。宮裏醉西施。烏啼臺上時。

摸魚子

盼春回者。番風信。柳枝新綠初吐。飛來幾處紅襟燕。恣拂向人簾戶。閒記取。可解識。  
雕梁舊日曾棲處。呢喃絮語。惹葉底蜂圍。花間蝶擾。好景有誰主。闌干外。絲雨輕  
籠霧。牢愁岑寂。誰訴。嬉游那用湔裙約。春色滿園關住。君莫誤。只一例。沾泥漬水  
同塵土。斜陽遠樹。正回首。憑闌。傷心無限。冥冥莫雲度。

一萼紅 秋日海棠

影離披。又沈寥天氣。木落已多時。敗葉舒英。新紅吐豔。那料花發高枝。惜春去、傷心飄墮。曾說與、相見隔年期。旖旎心情。止餘官柳。一樣垂絲。秋思番番更換。念天涯海角。何故來歸。態度依然。丰姿似舊。偏憐妝閣依依。且共他、高燒絳蠟。照靚妝、相對夜何其。若問月中桂樹。可解相思。

迷神引 秋草

莫道春來秋更綠。渾不似春情緒。花閒葉底。等是蟲鳴苦。曲籬穿。幽徑繞。叢荒圃。恁向方塘外。閒看取。鏡裏菱荷聲。送涼雨。舊約湔裙。何處嬉春似。賸亂螢飛。寒蟬噪。乍來還去。偏疑作春花舞。漸改青衫。怎不向。雕闌佇。也曾見。燒痕迷遠渚。怕看到。飄搖隨風舉。

憶瑤姬 白秋海棠

涼意當門。看玲瓏琢玉。一抹烟痕。畫屏新夢轉。映玉階羅襪。月影黃昏。微融粉褪。細



貼黃勻。更淨無暗塵。卻就濃、還撇低旋。顧心事誰論。到此際、恁解溫存。冰紈掩面。織素含顰。香肩誰共倚。怕玉簪相對。先爲消魂。藍橋杳。銀燭空陳。闌干憑獨倚。西風冷。羅袂單。寒手自捫。

月下笛 索居荒邨風雨如晦遲梅不發譜此賦之

作就輕陰。留花不放。似愁花謝。春心暗逗。自疊宮衣小窗下。隴頭驛使何須問。待消受。脂香粉麝。漫驚回夢雨。西窗翦燭。苦吟深夜。珠瀉紛飄瓦。正閉置重帷。晚妝初卸。空階淅瀝。笛聲誰共描寫。園林終有開時候。玉蝶羅浮更休憶。揚州東閣。往時情話。

絳都春 曲塘朱氏有牡丹二株晚贈鍾丈而不著花鍾歸江上移於北莊春

日載陽駢生蓓蕾詞以記之

春回玉砌。有天涯倦客。閑倚朱欄。十載舊情。淒迷庭院。雨風殘。移根幾度車輪轉。珮環月下闌珊。柳綿飄蕩。梨雲掩黯。淚眼汎瀾。冉冉仙雲乍返。翻柔萼暈碧。嫩蕊含

丹。語燕漸來。流鶯初弄。待團欒。花魂久被瑤臺款。往時誰伴宮鬢。新妝休遣。離人鎮日對看。

又 櫻桃

芳春已渺。到結子成陰。偏伊能早。畫檻繡簾。休寫來禽。招啼鳥。枝頭密網千絲護。爲柳絮。隨風輕裊。露香星燦。生成豔冶。溜圓嬌小。還遣朱唇掩映。看膩紅一捻。愁被花惱。金屋妝成。宮錦新裁。衣衫嫋。風光須讓淮南占。去說與。離支閩嶠。那堪樊素情深。累人夢繞。

玉京秋 譜草窗

深夜怯。疏簾弄清影。小庭明月。林飛烏鵲。夢回胡蝶。疑是晨鐘動了。拂羅帷。瑩似秋雪。景淒切。此時情緒。幾人能說。讓我新詞霏屑。耐宵深涼。侵露襪。凝望到妝臺明鏡。一般幽潔。閒傍空階。問若箇。消受冰壺澄澈。錦衣疊。誰被鄰雞喚徹。

小梅花

孤燈碧。孤衾寂。夜烏相伴離人泣。撥鵝絃。拂花箋。說到無人解處倍纏綿。閒情他日猶惆悵。宛轉新詞深院賦。筆空投。淚暗流。辛苦人閒。一賦是登樓。歡宜早。人愁老。放懷休。令金尊倒。忒淒其。自迷離。誰料青衫。還與草痕齊。一年一度久腸斷。眼見流年暗中換。戶飛花。月籠紗。難道阮郎。春盡不歸家。

浪淘沙慢

溼陰沍。雲迷野渡。霧隱邨市。愁聽漁舟遠笛。情牽驛路離思。乍落葉、飄搖風暗起。掃門巷、轉誤童稚。念時節、番番去。何許。經冬客懷滯。容易鏡中鬢影憔悴。想水驛山程。經行久。往事難再記。對似舊青衫。空自凝睇。歸期漫計。儘客舟來往。當門流水。十七年來。煙波裏。移家慣。宛同轉蟻。探芳信、牆陰花共蕊。任春去、蕩逐天涯。且放浪。年年穩醉金尊裏。

夜飛鵲 落葉

河橋送人處。都已辭枝。傍岸卻自依依。禮花豔蕊會隨侍。如今不是將離。重來更知

何日待春風轉後。柳便生穠。暫時去也。便天涯、恁用淒其。透迤平沙。回望餘塵漸堆積。疑是成蹊。可否回思前度。深深蔭暝。草綠還迷。新霜一拂。怎恁恁、便改芳姿。但徘徊衰草。延緣古道。惆悵長隄。

氏州第一 自題小影

磐石修篁。谿畔穩坐。荒邨休說棲隱。過眼韶華。依人歲月。容我蕭閒自省。添得髭鬚。好認取、舊時心影。詞賦關情。江湖放浪。十年俄頃。難得良朋蹤迹並。有周縵雲袁子文題辭又何用、簡編徐付。旅況更番。歸期未卜。正野塘春近。且休將、如意貼、蕭樓寂。雲沈意迴。待夢高唐。欲成眠、誰能睡穩。

法曲獻仙音

書未三行。燭然半寸。過眼韶華容易。漸到天明。猶疑夢雨。且把綺懷拋棄。更相念、鴛衾畔。有人正酣睡。轉私計。想十年、漂泊江城。酌尊酒、未改當時興致。辜負好丰姿。肯付與、衫青眉翠。早爲遄歸。芳春動、再聯征騎。待林亭香滿。龍腦共熏麝膩。

垂楊

東風幾日。怎留人不住。更添金縷。睨晚流鶯。依稀似欲迎人語。儂心縱使從君訴。奈飛燕、雕梁嬌妒。傍長隄、一碧無情。任玉驄嘶去。淒楚連宵苦雨。竟沾水漬泥。不堪重顧。鬢已如絲。笛中偏惹閒情緒。柔枝婀娜誰攀折。但贏得、離愁幾許。年年踈地青。青休怨汝。

壺中天慢 李易安醠醠春去小影

醠醠候。早春光過了。芳時難覩。折花枝將面映。天氣惱人依舊。訝粉成團。疑冰簇水。好景須將就。銷魂鬢影。輕衫紅暈羅袖。山館此日閒情。詞翻玉井。海秋玉井山館集有詞詠易安小影似鶯簧微溜。我亦工愁簪筆久。自卷珠簾清晝。一樣嬋娟者般憔悴。空把閒情逗。日長人靜。閉門清簟相守。

浣谿紗 荷葉

青蓋當年入洛陽。往時天水亦堪傷。誰家中婦覩新妝。莫愛秋風珠露滴。還愁鏡

子漸飛霜。采蓮且莫向橫塘。

高陽臺 丙子清明題郭湘渠所持臨宋人上河圖一角畫扇感今懷古念亂  
憂生觸緒成吟不自覺其言之拉雜也

飄拂微風。芊眠楊柳。上河時候清明。扇底嬉春。誰人一角重臨。鑾輿猶記曾來駐。更趙家、圖畫重尋。久消沈、夢華舊錄。且說東京。才人何事搜求苦。數弇州遺恨。直到而今。倦客相看。此時別自傷心。金戈鐵馬經過眼。看廿年、河外蜺旌。賸閒情、渡頭艇子。打槳來迎。

唐多令

鏡燄似凝脂。紅心草恐非。罽煙煤。一樣迷離。照得空庭都四徹。原不藉、蠟成堆。影隔便難知。光留許衆窺。也會看、鏡裏蛾眉。窗外北風冰正冱。只微火、轉淒其。

虞美人 懷魯仲實

悠悠客鬢生華髮。十載音書絕。枕函殘夢醒微茫。瞥見南飛烏鵲。不成行。故人識

我詞中意。說也先憔悴。蓬萊方丈不須游。近日乘槎。直到海西頭。

買陂塘

問西風、數行新雁。故人今向何許。銜來音信從誰至。宛轉似將人語。休輕顧。便拆得封時。都是傷心句。此情最苦。賸涼月三更。盈盈血淚。化作杜鵑去。空階外。往日佳期已誤。淒涼說與遲暮。清商一曲原蕭爽。消受幾多霜露。情莫訴。休再望南天。渺渺衡陽浦。錦箋附與。回首絳雲飛。傷心只在。一點相思處。

八六子

窰重城。淒淒風雨都來。伴我孤征。漸濕霧淒迷不斷。薄寒料峭還生。秋心暗驚。沉不放新晴。倚檻慵開鸞鏡。臨流罷撫銀箏。漫忘卻。他鄉茱萸節近。黃花放後。白衣人遠。但見拍水沙鳧野渡。寥天雲雁煙汀。黯銷凝。恁恁又聽櫓聲。

阮郎歸

風風雨雨到天涯。春歸何處家。有人腸斷爲鶯花。鶯花須自嗟。眉黛淺。鬢雲斜。亂

紅窗外遮。輕陰那不護韶華。偏教愁暮鴉。

菩薩蠻

茶蘼開後羣芳歇。綠陰滿院聽鶗鴂。窗外老鶯聲。都教和淚聽。日長人倦午。芳草蝴蝶舞。瘦損小腰圍。翩翩金翅衣。曉雲和夢凝鴛帳。梨花如雪還相向。人在木蘭艤。春波度遠江。歸來夢莫續。潛伴諸郎宿。郎意若爲尋。妾愁江水深。宮眉新樣黃初吐。夢驚粉重西園雨。弱薄不勝衣。滿園鶯亂飛。樓頭花事寂。金雁無消息。怎得晚春時。薄情郎早歸。畫橋綠水沾春酒。烏啼門外霏春柳。春色倍關心。閒庭芳草深。花叢人似月。忙煞飛來蝶。簾外幾番風。香閨夢正濃。

思帝鄉

朝朝花花相映紅。鈿雀金蟬香閣繡帷中。罽篆紗窗雲霧。星眼倦朦朧。望到樓頭不



見有歸鴻。

夢江南

芳草岸。岸上玉驄嘶。紅袖滿樓招不見。橋邊楊柳細如絲。春雨杏花時。

更漏子

玉樓寒。芳草碧。門外馬嘶人跡。擗繡幕。拂銀屏。風來夜不扃。應念我。偏相左。魚鑰重門深鎖。書不寄。夢無憑。窗紗一點燈。

春光好

燒蠟燭。照銀屏。袖羅輕。暗憶扁舟下綠汀。布帆聲。新月半明半暗。浮雲旋散旋生。只有些微看不見。兩三星。

少年游

熏爐香燼。畫堂煙暝。無語掩重門。夢未曾醒。燈先上了。簾外已黃昏。窗兒獨自看都黑。那箇與溫存。只有經行。玉闌干畔。留得舊啼痕。

青門引

夢裏流鶯囀。喚起春人都倦。研箋莫漫去題紅。雨絲風片。簾幕晚陰卷。碧雲冉冉。遙山展。去也無人管。便尋畫篋螺黛。可堪路隔天涯遠。

菩薩蠻

曉妝未褪衣衫薄。晝長獨上三層閣。簾卷對青山。眉痕新月彎。含羞羅袖掩。自拂桃枝簾。鸞鏡繡幃中。花花相映紅。

踏莎行

斜日樓臺。平蕪道路。玉驄嘶去無尋處。斷霞一抹遠山橫。東風忽送行雲住。美景恩恩。華年負負。當筵空把金尊舞。尊前餘瀝且休揮。明朝簾外迷紅雨。

復

堂

詞

蓮  
葉



譚 獻（道光一二——光緒二七）

初名廷獻。字仲修。號復堂。浙江仁和人。同治六年舉人。納貲爲縣令。歷署歙縣全椒合肥。不數年卽歸。銳意著書。所刻半厂叢書。僅十之一耳。工駢文詩詞。嘗選輯清朝人所著爲篋中詞六卷。頗詳著其流別。

序

周美成云。流潦妨車轂。又曰。衣潤費鑪煙。辛幼安云。不知筋力衰多少。祇覺新來嬾上樓。填詞者。試於此消息之。不佞悅學卅年。稍習文筆。大慚小慚。細及倚聲。鄉人項生。以爲不爲無益之事。何以遣有涯之生。其言危苦。然而知二五而未知十也。譚獻書。

# 復堂詞

仁和譚獻仲修

## 菩薩蠻

綺窗香暖屏山掩。菱花半照愁蛾斂。繡綫怯衣單。鶻啼風雨寒。遠山眉翠薄。素靨輝珠箔。紅袖倚華枝。亭亭三五時。

象牀觸響釵梁鳳。嬌鶯喚斷春閨夢。裙衩映垂楊。曾驚游冶郎。一從春色去。玉貌渾非故。夫婿是浮雲。愁風愁水頻。

深宮柳色慵眠起。章臺夾道車如水。付與可憐春。房櫳藏玉人。綠苔緣砌上。燕啄銅鋪響。殘醉醒還迷。門前聞馬嘶。

朱絃掩抑聲如訴。鈿蟬金雁飛無數。人去幾時回。行雲何處來。畫闌圍曲曲。敲折搔頭玉。花老鬱金堂。閒熏沈水香。

長亭怨慢 霜楓漸盡書和廉卿

又消受、江楓低舞。幾徧清霜。落紅盈路。返照蒼茫。亂山憔悴黯無緒。悵花吹絮。曾目送、春風去。往日倚樓人。早領略、芳容愁苦。薄莫。望昏雅宿雁。卻向隔城煙樹。長亭載酒。道休負、別時言語。記得是、荳蔻梢頭。怕回首、尋芳前度。奈一晌停車。林際葉聲如雨。

醜奴兒慢

晴雲做暖。如睡寒山初醒。尙留得、婆婆衰柳。忍記青青。幾點蘆花。誤看飛絮化浮萍。霜林深處。殘紅未了。一樣飄零。淺水渺茫。畫船歸後。簫鼓都停。問吹笛樓頭人去。記否丁寧。省識春風。踏歌扶醉上湖亭。而今依舊。青衫中酒。落照西冷。

摸魚子

悄無人。繡簾垂地。輕寒惻惻如許。東風送暖衣纔卸。還又繞樓疏雨。春好處。怕落了梅花。便算青春暮。紅兒笑語。道薜荔牆根。秋千索下。芳草綠無數。天涯遠。不斷行雲去去。征鴻歸計休誤。紅橋雙屐片泥滑。寂寞踏青游侶。從閒阻。任折柳聽鶯。年少

判虛度。懷人正苦。更卷起重簾。蕪煙漠漠。斜日暗南浦。

清平樂

東風吹徧。穉柳垂青淺。雲樹朦朧千里遠。望見高樓不見。樓前塞雁飛還。愁邊多少江山。忍把棉衣換了。玉梅衣下春寒。

青衫溼

春來未有晴時候。風雨閉重門。今朝折柳。明朝飛絮。幾箇黃昏。一燈上了。簾前瘦影。銷也無魂。青衫溼處。看來卻似。點點啼痕。

湘春夜月

忒迷離。幾番風雨花朝。賸有一片芳塵。渾望斷紅橋。燕子繞梁飛遍。爲怕伊憔悴。替壘香巢。早長亭折柳。天涯盡處。春去難招。空階夜色。彎彎月冷。羅袂飄飄。天末風生。吹皺了。浣紗溪水。濺上天桃。一襟紅淚。照往時。鬢影蕭條。算此際。有愁人似我。朱樓縹緲。無寐吹簫。



雙雙燕 綠陰詞同廉卿作用梅溪韻

漸花事了。數寒食清明。斷紅香冷。人家綠暗。曉樹後堂枝並。行到荒臺廢井。正天氣陰晴難定。闌干竟日沈沈。鏡裏雙鬢留影。幽徑羅衣露潤。怪葉底聲圓。乳鶯輕俊。韋郎歸也。莫是莫雲催暝。剛許眠琴坐穩。算分付尋芳音信。嬌病最怯春寒。雨過瑣窗還凭。

蘇幕遮

綠窗前。紅燭底。小撥檀槽。月盪涼煙碎。夜靜銜杯風細。吹上羅襟。仍是相思淚。病誰深。春似醉。陌上桃花。門內先憔悴。夢到高樓星欲墜。零露無聲。冷入空閨裏。

青門引

人去闌干靜。楊柳曉風初定。芳春此後莫重來。一分春少。減卻一分病。離亭薄酒終須醒。落日羅衣冷。繞樓幾曲流水。不曾留得桃花影。

南浦

杯行漸盡。便天涯、芳草送征輪。此去看花得意，休念酒邊人。不是馬前風雨，是臨歧、別淚灑紛紛。只依然雲樹，無多煙水，一樣動離魂。我是近來消瘦，最懨懨、傷別復傷春。怨殺浣紗溪水，不照舊羅裙。日暮歸鴉飛盡，賸河橋、獨立病中身。問翠衾何處，綠蕪無語，已黃昏。

洞仙歌

闌干濺碧，疊苔痕多少。芳樹陰陰斷啼鳥。記簪榴日暖，折柳風疏，妝鏡畔、斂袖愁蛾淡掃。陌頭新燕去，煙雨無情，遮斷香車往來道。徐起拂青琴，絃上塵生，憑傳語、知音歸早。怕此去、秋聲滿江亭，賸把酒登樓，亂鴻衰草。

滿庭芳

花是將離，曲成憐子，心情不似當年。桃笙選夢，綠酒說從前。滿地蘿陰似水，無人到、鬪草闌邊。風初起，池萍點點，搖蕩不成圓。聞蟬楊柳外，乍調脆管，半澀新絃。試重問齊宮舊事，誰傳。消受晚來風露，離亭樹、淡欲生煙。聲徐歇，高樓微月，翠袖隔重簾。

浣溪紗

昨夜星辰昨夜風。玉窗深鎖五更鐘。枕函香夢太惛惛。  
簾閣焚香煙縹緲。闌干攔  
笛月朦朧。碧桃花下一相逢。

好事近

花入畫屏秋。花外夕陽僂僂。高柳病蟬嘶起。卻晚晴時候。  
酒邊知是笑啼難。風味  
記新舊。獨掩盈盈畫扇。忍伴人消瘦。

蝶戀花

庭院深深秋夢斷。玉枕新涼。雨氣和愁亂。一炷爐香燒漸短。空房無語芳心軟。  
小  
膽惺忪誰是伴。瘦到支離。病比年年慣。眼底朱闌千里遠。西風幾點南飛雁。

角招 荷華

近來瘦。還如蘸水拖煙。漸老隄柳。欲尋雲際岫。盪槳采菱。多刺傷手。悲秋病久。看褪  
盡、紅衣蓮畝。昨日柔香縹緲。有三十六鴛鴦。向花前低首。空有。抱香兩袖。江南信

息爭唱新詞秀。翠盤珠乍溜。細雨微波。重來時候。登樓念舊。歎綠鬢、消磨尊酒。莫遣簫聲更奏。怕雙淚、溼青衫。人歸後。

### 采桑子

闌干一夜霜華重。夢墮寒煙。鬢老秋蟬。菡萏香殘似去年。朱顏總被尋常誤。箏柱慵拈。簾幕依然。碧樹當樓更可憐。

### 浪淘沙

欄檻雨絲柔。錦樹當樓。芙蓉零亂作深秋。不信浮雲從此去。都是離愁。酒盡暮江頭。怕聽箏篴。青袍多少淚痕留。殘月杏花簾幙下。往日風流。

### 更漏子

酒杯停。人語細。月午繡簾垂地。收玉鈿。卷羅衣。海棠憔悴時。清漏斷。迴腸轉。誰道秋宵更短。纔半晌。又三更。疏燈聞雁聲。

### 鷓鴣天

城闕煙開玉樹斜。幾重簾幙醉流霞。井華曾照翩翩袖。巷口疑聞隱隱車。芳草地。玉人家。女兒生是斷腸花。西風只在高樓上。吹澹文窗舊日紗。

芳草 送別

問西風。玉階芳草。門前便是天涯。驪歌聽唱徹。漫持殘酒。淚滿金杯。羅衣親拂拭。戀餘香。曾入儂懷。暫握手。忽不語。斜日樓臺。頻催。滿堂絲竹。離亭畔。怎許徘徊。登車還在眼。玉容憔悴損。首莫輕回。銀屏人寂寂。有年時。明月重來。算此後。翠衾夢斷。夢亦疑猜。

蝶戀花

樓外啼鶯依碧樹。一片天風。吹折柔條去。玉枕醒來追夢語。中門便是長亭路。眼底芳春看已暮。罷了新妝。祇是鸞羞舞。慘綠衣裳年幾許。爭禁風日爭禁雨。下馬門前人似玉。一聽班驩。便倚闌干曲。乍見迴身蛾黛蹙。泥他絮語憐幽獨。燕子飛來銀蒜觸。卻怕窺簾。推整羅裙幅。語在修眉成在目。無端紅淚雙雙落。

抹麗柔香新欲破。爲卜團圓。暗數盈盈采。睡起鬢邊低漸墮。鏡前細整留人坐。卻  
換羅衣憐汗顆。不喚紅兒。自啓葳蕤鎖。一握鬢雲梳復裹。半庭殘日恹恹過。  
帳裏迷離香似霧。不燼鑪灰。酒醒聞餘語。連理枝頭儂與汝。千花百草從渠許。  
蓮  
子青青心獨苦。一唱將離。日日風兼雨。豆蔻香殘楊柳暮。當時人面無尋處。  
庭院深深人悄悄。埋怨鸚哥。錯報韋郎到。壓鬢釵梁金鳳小。低頭只是閒煩惱。  
花  
發江南年正少。紅袖高樓。爭抵還鄉好。遮斷行人西去道。輕軀願化車前草。  
玉頰妝臺人道瘦。一日風塵。一日同禁受。獨掩疏櫺如病酒。卷簾又是黃昏後。  
六  
曲屏前攜素手。戲說分襟。真遣分襟驟。書札平安知信否。夢中顏色渾非舊。

金縷曲 江干待發

又指離亭樹。恁春來、消除愁病。鬢絲非故。草綠天涯渾未徧。誰道王孫遲暮。腸斷是、  
空樓微雨。雲水荒荒人草草。聽林禽、祇作傷心語。行不得、總難住。今朝滯我江頭  
路。近篷窗、岸花自發。向人低舞。裙袂芙蓉零落盡。逝水流年輕負。漸慣了、單寒羈旅。

信是窮途文字賤。悔才華、卻受風塵誤。留不得、便須去。

東風第一枝

省識花風。驚回夢雨。輕寒恰又輕暖。斷魂紅袖香殘。半醒翠尊酒淺。空階竹影。又訝是、青袍微展。鎮故園、數點幽花。欲寄一枝人遠。從別後、帳中淚眼。知憶否、樓頭素面。慘悽曉鏡孤鸞。冷落舊巢旅燕。虛簾鉤起。有一片、柔腸同卷。便好春、過了江南。怕過往時庭院。

賀新郎

離思無昏曉。不分明、東風吹斷。舊時顰笑。疏雨重簾煙漠漠。花色雨中新好。又怕、人隨花老。珍重乍來雙燕子。問玉驄、何處嘶芳草。腰帶減、更多少。春衫裁翦渾拋了。盼長亭、行人不見。飛雲縹緲。一紙音書和淚讀。卻恨眼昏字小。見說是、天涯春到。夢倚房櫺通一顧。奈醒來、各自閒煩惱。知兩地、怨啼鳥。

長亭怨

看春老、飛花飛絮。燕子來時，綠窗朱戶。不浣閒愁，漫煎離恨，奈何許。妾魂銷矣，最恨是、沙頭樹。相送客舟行，卻不道、天涯從此。欲暮，想征衫乍解，雙袖淚痕無數。玉環錦帶，是纖手、背人親付。算此後，步步關情，似花發、空階無主。更不遣分明，淒斷柔腸一縷。

浣溪紗 舟次吳門

五十三橋未是長。水流不斷似迴腸。弄風帆影過吳江。玉枕啼痕猶昨日，翠樓人語已他鄉。真愁強笑費商量。

蝶戀花

梔子花殘蝴蝶瘦。鏡裏晨昏，總是愁時候。夢到江南人在否。斷魂付與青青柳。過盡春風三月後。門外斜陽，馬上休回首。私語難忘今日酒。玉闌干畔攜雙袖。

鷓鴣天

綠酒紅燈漏點遲。黃昏風起下簾時。文鴛蓮葉成漂泊，玄鳳桐花有別離。雲澹澹，



雨霏霏。畫屏閒煞素羅衣。腰支眉黛無人管。百種憐儂去後知。

破陣子 泊舟見官柳一株亭亭如蓋感賦此闋

紫燕黃鸝寒食。綠窗朱戶清明。簾幙尙留飛絮影。衣帶誰聞拜月聲。畫闌攜手行。  
野水臉波添滿。遠山眉黛同青。題作人閒端正樹。驛路斜陽一片明。西風容易生。

解連環

後堂春晚背紅燈影裏。酒寒人散。自卷幔。別淚闌干。正斜月輝輝。斷雲天遠。半晌儂  
儂。怎便是。三更三點。歎從今只有。妝臺鏡子。照人心眼。回頭歲華荏苒。記無多笑  
語。總添哀怨。謾付與。約指雙環。問何日題詩。定情相見。繡幄香泥。好護惜。明年宿燕。  
待蕭郎。白馬歸來。絮飛滿院。

相見歡

往時幾度春風。過恁恁。最苦今年。人去落花紅。月如水。光千里。與誰同。一樣翠衾  
香冷。枕函空。

踏莎行 畫柳

玉樹微寒。瑣窗宿雨。分明夢到閒庭宇。一重簾幙對西風。離愁不斷浮雲去。來雁驚秋。吟蛩向暮。江鄉景物還如許。幾番殘月又新霜。當時折柳人何處。

浪淘沙

楊柳暮蕭條。風雨瀟瀟。別時春水滿河橋。幾日江南鴻雁到。燕子辭巢。玉樹向人凋。角枕無聊。啼痕新舊總難銷。樓上黃昏簾不卷。明月今宵。

虞美人

天風吹落樓頭月。客鬢生華髮。枕函迷夢醒還空。帳外一星燈穗吐微紅。書來猶澆封時淚。留得相思字。江南芳草又逢春。祇覺一般春色不宜人。

河傳

樓畔。輕喚。鬢低垂。欲語含羞語遲。送郎出門郎馬嘶。相思。夢回儂未知。難倩征鴻傳我意。情似水。空灑無名淚。畫鴛鴦。更漏長。殘妝。君眠何處牀。

鳳皇臺上憶吹簫 和莊中白

鏡掩虛塵。枕寒別淚。綺窗暗換春風。悔翠眉輕別。花月愔愔。問訊趙家姊妹。看擁髻、都是愁中。雙棲燕。雕梁在否。容易相逢。重重。故山望斷。有一片飛雲。曾度牆東。想倚闌無語。玉袖啼紅。不分銀笙吹冷。調怨曲、銷損芳容。春依舊。天涯斷腸。人去房空。

江城子

江城垂柳一枝枝。別君時。日遲遲。不道東風。又是隔年期。霧鬢雲鬟憔悴損。除鏡子。沒人知。小樓花發故人非。送斜暉。信音稀。有恨無言。明月上羅幃。金鴨香殘鴛袖冷。剛許道。莫相思。

甘州

問蕭條、底事走天涯。席帽拂黃塵。又當筵紅燭。金尊中酒。惆悵逢春。回首花幡綵勝。嬈嬈倚樓人。一別高樓去。日日含顰。況是物華輕換。望長安不見。宵夢難真。便明年人面。雙笑恐無因。悔從前。天寒羅袖。倚嬌柔。只是少溫存。思今夕。掩盈盈淚。幾處

銷魂。

綺羅香 白蓮

與月依依。非煙脈脈。獨抱愁根遲暮。一片行雲。爭許妙香留住。驚夢醒、返照當樓。聽歌起、櫂舟歸浦。鎮相憐、病榻維摩。拂衣正在花深處。飄零人事盡改。休唱田田舊曲。江南樂府。遠水生秋。消受和煙和露。憐往日、羅襪凌波。願化身、膽餅深護。恁禁得、搖蕩真圓。銀塘連夜雨。

南樓令 羊辛楣花谿吹笛圖

岸柳晚颼颼。餘酣漱碧流。卻臨風、三弄倚輕舟。吹得月華如水冷。有多少、古今愁。一雁度南樓。關山音信休。憶春風、花影簾鉤。曾是羅襟曾是酒。渾不似、少年游。

眉嫵 梅花洲小泊寄趙桐孫張玉珊杭州

看霜棲柏樹。風約蘆碕。舫扣小橋暝。屈指芙蓉老。冬心誰寄香訊。斷霞記省。料輕鴻、曾照雙影。更堪想、一角朱樓小。畫眉遠山靚。趙北張南門徑。羨買鄰計好。沽酒村

近。約略紅裙醉。鴛鴦曲。琵琶彈到絃冷。汎舟路穩。問榜人、消息應準。卻洲畔梅開。歸趁春風未醒。

尉遲杯 西湖感舊周韻同潘少梅丈作

平隄路。正落照、欲下城頭樹。離離草色城陰。前日鈿車來處。東風宛轉。吹不醒、離魂夢南浦。卻相逢、柳外黃昏。送他雙燕歸去。回頭海國浮雲。難忘是、園林坐石萍聚。唱徹家山。渾蕭瑟話。幾許零歌斷舞。如今又、江深草閣。但添得、巴山一夜語。問飄來甚處簫聲。倚樓應是愁侶。

湘春夜月 今年春初薛先生偕秦觀察楊太守送吳少宰于超山有梅邊送

客圖紀事予以五月九日之官秀州雨後過山下梅林陰陰感賦此解

度芳洲。綠波碧草茫茫。便覺一片春情。分付與離觴。人在萬梅花下。耐幾分風雪。有幾分香。卻畫橈載酒。郵亭折柳。別緒方長。青袍似草。飄零詞筆。禪鬢蒼蒼。玉笛聲中。吹起了。戀香雙羽。花落江鄉。修眉鏡闌等甚時。重照梅妝。算再到。只空枝月影。宵

深漏斷。還上船窗。

一萼紅 吳山

黯愁煙。看青青一片。猶誤認眉山。花發樓頭。絮飛陌上。春色還似當年。翠苔畔、曾容  
醉臥。聽語笑、風動畫秋千。一曲琴絲。十三箏柱。原是人閒。細數總成殘夢。歎都迷  
蹤跡。只有留連。劫換紅羊。巢空紫燕。重來步步回旋。儘消受、雲飛雨散。化胡蝶、猶繞  
舊闌干。不分中年到時。直恁荒寒。

憶舊游

九月八日紅豆詞人自禾中來踐登高約越日大風雨不得出微吟

寫怨遂成此解憶二十年前與魏滋伯丈楊綱士重九唱和有壽樓春詞回  
頭影事已墮秋煙兼道山陽之感矣

正瀟瀟風雨。漠漠城闌。如此重陽。負了尋秋約。怕登山臨水。楚怨微茫。廿年舊游蹤  
跡。分付與衰楊。算省識當時。六朝裙屐。九日壺觴。秋涼綺懷減。想似水僧寮。潤到  
衣裳。各有看花淚。黯青袍顏色。冷落餘香。一任晝陰陰地。愁雁語昏黃。待洗出秋容。

明湖澹冶西子妝。

金縷曲 唐邨月夜懷勞平甫

木葉飛如雨。繞空舟、惟聞闌浪、悄無人語。篷背新霜侵衣袂。冷壓釭花不吐。料此際、微吟閉戶。三徑蕭蕭蓬蒿滿。記從前、裙屐歡難補。春去也。惜遲暮。飄零我亦泥中絮。歎明明、入懷月色、夜深還去。芳草變衰浮雲改。況復美人黃土。算生作、有情原誤。莫倚平生丹青手。看尋常、顏面皆行路。哀與樂、等閒度。

霓裳中序第一 怡雲小築梅萼初發尋春未遲

緗英展凍靨。二月春風初著力。江上蘼蕪弄色。好盪箇吳舫。試迎桃葉。絲絲雨溼。傍小池、籠影清徹。人清瘦、乍調鶯語。幾點上妝額。清絕。舊游曾識。看參橫、玉梅如雪。移根孤嶼。拂拭倚竹生寒。羅袖岑寂。一枝親許折。問三店、雙橋信息。歸來蚤、商量眉黛。留取夜闌說。

虞美人

柔塵吹鬪絲鞭道。繡轂知多少。玉河柳色又今年。消受飛花飛絮，晚風前。斜陽只合遲遲下。我已魂銷也。殘妝有鏡更無人。留得鏡中小影，自溫存。霞明煙細還如舊。只覺桃花瘦。有風無雨過清明。慣了天涯，不慣杜鵑聲。玲瓏格子鑪香裏。只共梨花笑。儻教吹笛影兒雙。多謝四更山月，照幽窗。

點絳脣 臨平道中

側帽東風輕撓。翦斷朝來雨。去年客路。愁聽車鈴語。黛色臨平。影作眉痕聚。春如許。玉人心緒。恐被眉痕誤。

謁金門 春曉

人未起。聽盡一湖春水。林外杜鵑聲不已。杜鵑花發未。多少深閨羅綺。臨鏡不勝悲喜。花發遲遲花落易。留春須蚤計。

山花子

曲曲銀屏畫折枝。檐花欲笑向伊誰。樓上輕寒羅袂薄。最相思。頻拂粉。繚鬢鏡暗。



乍調筠管鳳簫遲。綠鬢徘徊渾不是。少年時。  
門外蕭郎駿馬行。章臺初日踏歌聲。妝閣夜長金穗落未分明。黛掩啼眉山隱約。  
笙調怨曲玉瓏玲。胡蝶夢中單枕側。不須驚。

望江南

東風起。如畫是家山。草色卻隨流水綠。夕陽只在有無閒。燕子話春寒。

花犯

唐鄴梅花林下作

倚東風。看花霧冷。芳心付流水。去帆陰裏。望暮雨朝雲。無限離思。弄珠負了韶年紀。  
前歡猶賸幾。恁記省。半江顏色。嬋娟相料理。無言繞花易黃昏。依稀認窈窕。文禽  
煙際。仙袂舉。疏枝外。不禁憔悴。漣漪碧。晚來照影。春夢好。憐他鶯喚起。但領取。玉樓  
顰笑。寒香生翠被。

洞仙歌

初秋

楊枝弄碧。繫天涯心眼。幾日涼風便零亂。畫橋邊。一片流水無聲。人獨立。暮角將愁

吹斷。春塵煙雨裏。如夢簾櫳。曾拂檐花笑相見。我已厭聞歌。玉笛蒼涼。又吹起、十年情怨。問采采、夫容隔西洲。卻樹下門前。爲誰留戀。

西河 用美成金陵詞韻題甘劍侯江上春歸圖

江上地。長亭草樹猶記。夢回故國。渺鄉心。斷鴻喚起。萬方一概聽笳聲。煙波來去無際。耿長劍。何處倚。楊枝渡口船繫。烏衣巷畔有春風。晚蘆故壘。倒吹淚點上征衣。知他江水淮水。女牆夜月過小市。照飛蓬。歸來千里。往事幾回塵世。只龍蟠虎踞。山形依舊。還枕滔滔寒流裏。

最高樓 金眉老煙雨尋鷗圖卷中有王定甫通政陳實菴編修蔣鹿潭大使

宗湘文郡守及眉老唱和詞

煙雨裏。脈脈只悲秋。風片薄。酒波柔。綠楊不是靈和樹。白頭重上采菱舟。百年身。千古事。一登樓。春去也。倡條和冶葉。人去也。斷雲還缺月。涼別袂。觸鄉愁。相逢客路如南雁。欲尋舊夢問閒鷗。賸華年。與流水。兩悠悠。

蝶戀花 水香菴餞春

零亂楊枝千萬縷。今日爲萍。昨日還飛絮。禪榻鬢絲春又去。東風不伴閒花住。幾點繞簾梅子雨。潤到屏山。畫箇江潭樹。門外天涯芳草暮。眉顰深淺渾無語。

南歌子

不暖臨分帶。羞調已碎琴。當時情竭爲知音。憔悴青山、何況舊羅襟。黃月如冰冷。銀杯借淚深。少年景事總銷沈。只有微波、來去到而今。

瑣窗寒 連夕與子珍步月秋心眇感賦此解用玉田韻

淺酌吟香。單衣卻燭。畫闌同凭。虛簾卷起。月上一庭花景。問何時。羽衣舞殘。玉樓遠憶人閒冷。恁無端葉底。新霜不管。井梧飄盡。苔潤尋芳徑。便涼收翠扇。暖餘金鼎。含情寫怨。誤了弄潮音信。正閣中秋。夢不成。鞦韆海棠花下等。傍妝臺。鏡子團圓。天涯歸未穩。

齊天樂 許邁孫袁夢齋填詞圖

瑣窗朱戶尋消息。明蟾與花俱瘦。病榻玄談。柔鄉景事。曾付青春消受。微波似舊。問前度通辭。箇儂知否。老卻夫容。晚鴛獨自戀珍偶。輕颺罷吹暗牖。曲終人乍去。離緒拖逗。遠水長東。殘雲漸暝。笛裏情濃如酒。閒吟醉後。只煙外迷離。故園楊柳。便不相思。隊歡何處有。

浣溪紗 樊雲門詞卷

別院東風著意吹。晶簾不卷雨霏霏。等閒過了牡丹時。花外燕鶯猶旖旎。酒邊箏笛沒參差。道人原不解相思。

記得華年是鏡中。背燈人面隔花風。天涯只在桂堂東。不語任佗瑤瑟冷。回頭已是畫屏空。十年影事忒怱怱。

綺羅香 題李愛伯戶部沅江秋思圖用梅谿韻

草瘦芳心。柳迷倦眼。回首佳人遲暮。一片愁魂。還被水雲留住。思故國、不隔西風。奈離緒、尙縈南浦。最憐佗、松柏同心。往來寂寞鈿車路。清秋江上望遠。祇恐回帆浪

急。公今無渡。霧失峯青。蕉萃鏡中眉嫵。垂翠袖。人憶當年倚簾牀。夢醒何處。恁禁得、彈冷箏絲。瀟湘和雁語。

一萼紅 愛伯桃花聖解庵填詞圖

晝陰陰。待題箏昵酒。華髮謝冠簪。歌管東風。星霜別夢。前事都付銷沈。黛淺厭厭。睡損。又喚起。簾外怨春禽。杏子單衫。梨花雙鬢。愁到而今。猶有平生詞筆。只空枝細草。日日傷心。木末關河。雲中殿闕。風雨無伴登臨。願重倚。如人寶瑟。數絃柱。芳歲共侵尋。記得班駘繫門。一寸花深。

長亭怨 燕臺愁雨和陶子珍

恁愁緒。鷓鴣啼冷。滑滑天街。雨昏煙暝。潤到單衾。幾時成夢。幾時醒。蚤蟬聲靜。偏獨自。偎金鼎。裏一縷餘香。乍記得。渠儂燒賸。卻恨者。珠歌翠舞。付與曲廊人定。妝臺鏡暗。記曾照。月痕星影。向客舍。澗徧輕塵。鎮蕭瑟。與君同聽。便去也。吳孃。休唱一般思省。

二郎神 清秋夜集人月如畫當歡欲愁

吐雲華月。便墮作鏡中嬌面。正玉樹煙迷。香蘭霧細。賺得柔情似繭。素扇攜來團圓影。有幾日、輕涼相見。思淺綠酒波。低紅燈穗。儘容留戀。聽徧晚樓倚笛。不勝淒怨。但婉變清歌。碧天如水。一片梁塵在眼。寶瑟比人。春花同笑。芳景怕成秋苑。還只恐。後夜風風雨雨。畫簾愁卷。

解語花 陶少箕珊瑚簾試香圖

花鏤寶蕊。酒蘸香波。妙豔相思句。卷簾微雨。鑪煙裏。小坐避人不語。柔馨澹泞。在幾曲銀屏深處。清夜游。微步珊珊。散滿車塵路。我亦鳳城小住。好沾蘭染麝。姚冶游侶。分囊傳靶。都銷冷。但有暖心一縷。秋情未暮。更繚繞。月魂疑霧。襟袖寒。攜向天涯。留舊痕如許。

臨江仙 紀別

昨夜酒闌人未見。玉郎從此天涯。清秋倦客正思家。十年景事。回首夢京華。不分

車前重握手。柔腸結了還加。啼痕欲寫臉邊霞。無言強忍。怕染路旁花。

渡江雲 大觀亭同陽湖趙敬甫江夏鄭贊侯

大江流日夜。空亭浪卷。千里起悲心。問花花不語。幾度輕寒。恁處好登臨。春旛顛裏。憐舊時人面難尋。渾不似。故山顏色。鶯燕共沈吟。銷沈。六朝裙屐。百戰旌旗。付漁樵高枕。何處有。藏雅細柳。繫馬平林。釣磯我亦垂綸手。看斷雲。飛過荒潯。天未暮。簾前只是陰陰。

謁金門

人寂寂。江北江南春色。繞樹輕煙迷倦客。煙中山半額。榆火梨花時節。獨自怎生將息。簾外弄寒風又急。子規聽不得。

空繾綣。休認當年人面。雨雨風風渾不管。落花飛滿院。付與清明魂斷。折得楊枝還短。樹下門前千里遠。出門儂又懶。

煙雨裏。十二闌干慵倚。飛絮飛花人似醉。生憎江上水。檢點羅衣殘淚。帶眼莫將

春繁。夢短夢長。渾不記。餘寒憐翠被。

桂枝香 秦淮感秋

瑤流自碧。便作就可憐。如許秋色。祇是煙籠水冷。後庭歌歇。簾波澹處留人景。裏西風。數聲長笛。綵旗船舫。華燈鼓吹。無復消息。念舊事、沈吟省識。問曾照當年。惟有明月。拾翠汀洲密意。總成蕭瑟。秦淮萬古多情水。奈而今、秋燕如客。望中何限。斜陽衰草。大江南北。

法曲獻仙音 盤屋路山甫罷官客淮上

高柳無絲。么荷非鏡。賺得春人都老。坐斷斜陽。夢回行雨。殘英有枝空繞。凝望眼。江波渺。離尊那堪倒。渾閒了。恁妝臺、入時梳裹。聽杜宇、簾卷總成獨笑。風雨滿天涯。奈而今、眉黛慵掃。怕損魚鱗。寄音書、流宕難到。問樓頭、月色後夜隔花涼照。

鵲橋仙 七夕感汾陽故事

羅雲愁薄。緒風催暮。燭照擎杯酒淺。絳河森森向人垂。是別淚、經年流滿。江湖節



序。睽離心事。忍記星期近遠。尋常行路更何人。問可有、駟車相見。

大酺 問政山中春雨

看舞榆低。絲楊縮。爭忍良辰拋擲。無端敲竹雨。響空階。疑是故人雙屐。枕溼鑪寒。杯空劍鏞。吹鬢東風欺客。勞勞亭前路。便傷心不似少年時節。者人遠多忘。書催難好。付渠憐惜。泥塗遙望極。望中見。山外天空闊。怕說與、鶯兒巧囀。蝶子輕翻。待相逢、翠幃將息。暖到雙羅袖。曾記得、牽蘿顏色。更長笛。誰吹徹。梅瓣都墜。容易細英收拾。脆圓幾時薦席。

玉樓春

青山日日流鶯語。啼得春來春又去。好雲不似故鄉多。行雨依然相送處。樓臺金粉江南路。欲寄相思無處所。清明霧裏溼梨花。寒食煙中迷柳絮。

木蘭花慢 桃花

過風風雨雨。尙留得一叢花。便欲舞還停。如顰又笑。巷曲人家。胡麻賺儂老去。者仙

山一出是天涯。消受趁時勻染。鬢邊片片朝霞。交加照水一枝斜。鬢影誤年華。記  
渡江用楫。停辛佇苦。別夢都差。丹砂漫尋句漏。向紅塵何處走雲車。只是輕衾小簾。  
從渠玉管金笳。

浪淘沙

未雨已沈沈。簾外輕陰。澹黃柳色望中深。一片東風吹乍起。江上愁心。倦眼阻登  
臨。袖手閒尋。雲愁海思兩難禁。百草千花渾不解。獨自沈吟。

浣谿紗

是處樓臺是處風。夕陽欲下可憐紅。水晶簾外望玲瓏。芳草生時人似雁。鏡奩掩  
處鬢如蓬。不成將息只恁怱。

大酺

奈枕常敲。裘常攤。愁病桃花時節。紅芳原不改。過蕭蕭風雨。闌銷顏色。燕姁鶯嬌。梨  
昏柳暝。哀樂何曾忘得。驚心長亭路。但春泥沒馬。要留車轍。使山欲化雲。絮都成淚。

怨離傷別。年年挑菜日。怕多露。門外青蕪溼。有幾許、瑤琴餘恨。濕酒餘歡。到而今、總成追憶。更與吹橫玉。還弄徹。落梅淒切。正迢遞、斜陽驛。嘶騎遙駐。人在江城天末。倚樓忍聽幾疊。

訴衷情 村燕

梨花淡白自成村。花下不開門。春愁更與誰道。憑燕子、話黃昏。簾乍卷。覓巢痕。與銷魂。問伊來處。綠草天涯。有箇人人。

丁香結 舟夜寄陶漢邈武昌

妝鏡人非。屋梁吟罷。寂寞酒尊棋墅。問少年游處。記斷夢、幾輩天涯塵土。千花和百草。同消受、葉上曉露。眉頭曾有舊恨。更遣新愁來補。岐路。只馬足難留。折柳長亭前度。小簾輕衾。今宵酒醒。試哦離句。人世原有甘瓜。我覺瓜仍苦。況班騅郎去。心事何時再吐。

賀新郎 野水用顧菴塘莊眉叔唱和韻

野水方清淺。拂篷窗、莫雲如蓋。一痕流電。昨日牽舟今帆下。絕似風前花片。慚愧殺、紅襟新燕。楊柳層層深似幄。笑閨中、坐老閒針線。春夢好。那堪選。絲繁絮亂征衣點。化浮萍、依然身世。者番驅遣。玉笛關飛人何處。冷落舊家閒院。更誰倚、乘鸞雙扇。秦女但留顏色在。待逢佗、蕭史開生面。天一笑。雨聲徧。

百字令

和張樵野觀察題倪雲劬花陰寫夢圖

雲英爲水蕩。春魂一片。落花浮席。鸚武簾櫳人在否。屬付東風留客。雷送車塵。月裁扇景。容易雙成隻。美人香草。百年難忘今夕。見說墜夢迷離。游仙大小。樂府翻新拍。多少相思紅豆樹。未抵明珠三百。種柳光陰。牽蘿身世。付與誰憐惜。千絲織盡。支機天上餘石。

小重山

二月二日同馮笠尉江皋春行

陌上依然草色薰。柳絲猶未卸。雨如塵。相望珠箔一年春。江城畔。無地展芳尊。桃蕊兩三分。竹籬茅舍外。乍含顰。少年何處醉紅裙。風光好。留與白頭人。

瑞鶴仙影 白石客合肥自度此曲子用其韻題王五謙齋小輞川圖安得啞  
筆栗倚之

越阡度陌。涼雲下、蕪城一例蕭索。故山可隱，名園有主，不聞殘角。傾襟未惡。更消受、青尊酒薄。試重歌、藍田輞曲。冷句寫寂漠。回首芳林晚，讀畫絃詩，少時行樂。翦燈細雨，贖檐花，向人徐落。燕到淮南，者門巷、年年記著。弄扁舟，卻問野水賦舊約。

摸魚兒 用稼軒韻自題復堂填詞圖

唱瀟瀟、渭城朝雨，輕塵多少飛去。短衣匹馬天涯客，遙見亂山無數。留不住。又只恐飄零長劍，悲岐路。舊時笑語，待寄與知心，被風吹斷。曉夢託萍絮。瑤琴上，曲調金徽早誤。深宮人復誰妒。一絃一柱華年賦，但有別情吟訴。鸚鵡舞。已草草青春，紅袖歸黃土。斜陽太苦。獨自上高樓，迷離望眼，不見送君處。

壺中天慢 夏夜訪遺園主人不遇

眉痕吐月，倚新涼羅袂，流雲栖暝。楊柳知門塵不到，記取羊求三徑。疊石生秋，餘花

媚晚何地無幽景。先生舒嘯。結廬祇在人境。我是琴賦嵇康。依然病嬾。卽漸忘龍性。留得廣陵絃指在。無復竹林高興。裁製荷衣。稱量藥裹。況味君同領。清輝遙夜。碧天飛上明鏡。

無悶 早雪

雲幕銀屏。風滿畫檐。陽雁宵飛向盡。卻夢枕猶欹。酒懷初醒。早是鏤冰試手。送大地、無塵山河冷。苑荒竹瘦。聲聲碎玉。鶴眠同警。淒緊在人境。比臥老空山。一般孤迥。已誤了華年。那堪重省。吹上蕭蕭短髮。怕鏡裏、難銷相思影。儻故里、留語春風。待我落梅芳信。

滿江紅 漢十二辰鏡和謙齋

天上人間。難得此。長圓明月。羌付與、舞鸞羞影。涼蟾慵鬪。耐冷不隨孤劍化。拂塵渾似輕綃滑。更扣來。碧玉一聲聲。真尤物。興亡過。情先竭。文字古。磨還滅。喜沈霾無恙。尙方珍跡。十二辰中鉛有淚。千年劫後鴻留雪。奈鏡邊、心事笑啼難。何堪說。

少年游

高樓煙鎖。曲闌風緊。修竹影交加。別樹棲烏。離亭去雁。簾外已天涯。芳梅折倩誰  
行寄。不爲惜年華。一任殘香。玉顏非故。認是故鄉花。

復堂詞有兩刻。一附篋中詞後。作一卷。一刻於復堂類集中。分二卷。取以  
互勘。則類集本多詞十二首。而少年游一首。則又篋中詞刻本所獨有也。  
其去取之故不詳。丙子五月校訖記。

湘綺樓詞

運彥





王闈運（道光一二——民國五）

字壬秋。又字壬父。號湘綺。湖南湘潭人。生時父夢神榜其門曰天開文運。因以闈運名。咸豐乙卯舉人。後欽賜翰林院檢討。與武岡鄧輔綸鄧繹等結蘭陵詞社。號湘中五子。四川總督丁寶楨延爲成都尊經書院山長。諸生能守師法。稱爲蜀學。還主長沙校經書院。移衡州船山書院。一時奉爲經師。實則以文章見勝。餘事及詞。有湘綺樓詞選。取舍不同於人。所作亦能自名一家。著作甚多。有湘綺樓全集。

湘綺樓詞

湘潭王闓運 壬父

獻仙音 寄訊張永州

張自衡上省。適余入城。張衡州寄詩。有尹邢避面之戲。余亦下湘還山。作此訊之。

回雁霜鐘。湘東梅月。游宦未妨羈旅。選韻挑燈。消寒添酒。華簪雅共尊俎。奈冰雪。劉  
叉去。無緣問連句。潭州路。想扁舟。犯寒東下。早孤負。官閣翠酣紅舞。鴛瓦不留人。  
又吟鞭。敲雪何處。粥嫩糕甜。好年光。正在歲暮。便貂裘典盡。差勝黃紬衙鼓。

一萼紅 寄張衡州乞官曆

碧雲深。正霜輕日嫩。梅萼破疏林。驢背行佳。翠禽眠暖。薄醉還自微吟。料何遜、風流  
未老。想白髮。幡勝正堪簪。紫印泥封。繡衣貂薄。俊賞須尋。冬暖競以小貂相尙。臥  
雪披雲世外。倚邦君政美。隨興登臨。臘鼓占豐。竈觚催鉢。重聞盛日和音。莫便放、年

華去也。只應爲詩酒惜光陰。寒盡山中。班春願聽瑤琴。

醜奴兒 西湖游宴

西湖千古多情地。畫舫紅燈。寶鈿香塵。流水年年照麗人。休提倚翠偎紅事。細數青春。瘦盡吟身。三十看花是老人。

祝英臺近 己巳送竈

玉錫香紅燭豔。良夜永清漏。爆竹聲催。新泉釀芳酎。年年三六盈虛。瓶尊報賽。還略似、夢華風候。一冬又。爲問葉竈陰羊。人間幾貧富。每度梅開。每度醉村酒饒。他土鏗鐺空。寒宵鏡暖。渾不爲、世情儻懣。

瑞鶴仙 弔開封倡女四菊

汴宮流水咽。剩秋花無人。更與攀折。幽情自縈結。只繁霜弔雁。暗香藏蝶。輕憐重別。淚娟娟。羅衣皺褶。恨清尊、易竭關山。一去愁煙萬疊。淒絕。微根地弱。殘夢天寒。恁時消歇。人間一霎。生共死、爲誰說。待看花人問。孤芳尋斷。正是銷魂時節。替西風、補

入圖中，伴他明月。

又 賦得燈前細雨檐花落

別愁淒滿院。正晚來疏簾。和雨都捲。春痕背燈見。又煙絲碧潤。露花紅斷。瀟瀟綫綫。繞回闌。寒輕夜淺。被東風。迤逗相思。剛落檐花一片。休繾。紅樓隔冷。珠箔通光。作成閨怨。天涯縱遠。詩共酒。儘消遣。但西窗翦燭。東闌對雪。年時幾回相見。好殷勤。愛惜良宵。莫催銀箭。

摸魚兒 庚午題岳陽樓用稼軒韻

問汀洲。幾多芳草。青青遠黏天去。少年兒女春閨意。又對流光重數。留不住。煙波恨。逡巡踏破湖邊路。憑欄不語。待更不傷心。此心仍似一點未飛絮。人間事。離合悲歡總誤。無情猶有癡妒。愁來漫寫登樓賦。不遇解人誰訴。梁燕舞。還只恐。洞庭也化桑田土。當年戰苦。休更說周郎。風流盡在。千古浪淘處。

女冠子 庚午送竈

年年簫鼓總是一家兒女。鬧深宵。酒薄寒猶在。香輕春共搖。夔殮何日了。車馬不辭勞。消受餠糕粥。更麩糟。

又 二月初一

二月初一。十九年前今日。正春分。酒綠香如霧。花紅暈作雲。娉婷輕嫁了。旖旎暗憐人。惟有迷離夢。又逢春。

南鄉子 賦得惜花春起早

春恨壓屏山。細雨欺花困牡丹。雨若再晴花再豔。應難喚起雙鬢。摘下看。凭軟曲闌干。曉逗微光似不寒。忽地玉階風過覺。衣單。重入羅幃又懶眠。

壽樓春 青縣舟中

看西風吹雲。只偷年換節。助老欺人。剛有疏蘆瘦柳。爲他銷魂。殘月影。秋煙根。又豆花。依依遮門。奈暑氣低篷。陰塵籠店。無趣訪江村。良時去。佳期新。怎閒眠。閒坐。閒過黃昏。憶得新秋涼味。畫樓平分。嫌酒暖。愁香熏。到恁時。羅衣溫存。空夢著。今宵銀

河玉階清露痕。

玉山枕 歲暮夜歸

歲暮寒夜喜良會。春無價。不眠不坐。分明笑靨。更點脣朱。早又妝罷。指看襟上酒痕多。獨自守。月昏燈灺。待歸時。數說相思。到相逢。更無從嬌姘。且將年事安排者。翦幡勝。同心畫。莫飲屠蘇。欺人老大。學寫宜春。玉手重把。昨宵鏡聽道來來。繡一對。鳳囊酬謝。願明年。步步相隨。儘商量。在玉梅花下。

八音諧 成都新綠寄懷張永州

雲暗少城東。看夕陰昏處。新綠初顯。惆悵獨歸路。送天邊春眼。湘水汎舟何時。早燕子。分明檣上見。算別後。便佳期誤了。垂楊如綫。七載西山看暮雲。料舊夢無迹。郡齋苔暖。游屐更迢遙。獨啼鶻相喚。有些殘剩山川。對暮色。付教天管客裏放春歸。訝道楚江潮滿。

一萼紅 庚辰人日定王臺宴集和姜白石

漢王宮。正良辰勝賞。荆楚歲華穠。草襯驄嘶。松留鶴守。誰道時序怱怱。入春早、商量梅柳看嫩蕊、新綠引東風。花在詩前。雁歸人後。酒滿吟中。懷古感時都罷。喜清時政暇。故國年豐。一水西浮。層陰北望。還見雲樹重重。似今欲歸歸便得。休惆悵、寒澗石牀東。寄語繁花。明年更映人紅。

夜合花 和孫季蕃

眉語兜歡。頰窩添笑。教人無那涼宵。鳳幃雙掩。香魂暗共釵搖。愛嫋娜、作憨嬌。把雲衣、皺折紅綃。翠鴛濃睡。防他夢醒。莫把燈挑。前度暗咽瓊簫。怨春風夢遠。枕上遙遙。羅裙半幅。誤翻酒汗難消。香篆冷。鈿雲飄。好留仙、捻住纖腰。怕伊重見。眼波溜處。羞也麼潮。

八歸 辛巳臘月十九日郭筠仙壽蘇集飲

年年雅會處處新詩。誰知暗裏催老。散仙勘破人問世。付與將來好事。家家東道。湘上平安多福地。把海內、風流占了。更有峨眉歸客。戲著雪鴻爪。借問壽蘇故事。自

覃谿去後。唯有楊家酒好。謂海琴三年夢裏。八仙局外。同治閒軍機有前後八仙。又見尊前一笑。想文章嬉罵。空洞胸懷可同調。且較量紅燭光中。綠梅花外。甚處得春蚤。

眞珠簾 壬午送竈

糕甜粥嫩催年事。年剛被、爆竹今宵催起。夜雪悄生寒。趁壺觴先醉。里巷人家爭節物。早廚辦、一杯香水迎歲。便獅頭臘鼓。牛鞭春意。猶念暮景團圓。自寒扉掩後。鏗煙冷膩。語笑舊兒童。悔棗梨嬉戲。鏡聽無人重跪拜。但老去、菱花羞對。憔悴更憑誰說與。那時情味。

芳草 水仙花卽蒿山蒜花開如釜蒸鬲今或名雅蒜根如蒜也爾雅凡香草卽曰山

又相逢、深寒簾幙。晴光燈影參差。素蘭羞葉瘦。銅瓶湘几外。占春宜。瑤姬慣嫁。便遠行、未損腰支。看萬里輕車。細馱玉蕾瓊肌。拋離一分塵土。不須風露自秀芳時。嫩



黃三四箭。暗香疏影地。搖曳煙絲。伴晨妝夜盥。卻未妨。汚粉凝脂。怪只怪、橫江一笑。誤了幽期。

探芳訊 夏芝岑修飾定王臺。每歲人日探梅。必有賦詠。癸未邀集用草窗調應之

探梅信。看乍入新年。東風相趁。喜詞人依舊。韶光豔華鬢。幾年人日尋芳約。春早佳期近。更多情。逗酒迎香。鬥詩催韻。紅綻北枝認。似漢月窺檐。湘煙長暈。雲麓臺前。游屐沒苔瑩。登臨共道。遨頭好。花與人俱俊。料今日。先占一分春穩。

八六子 沅江舟悶

更無風。漫流平碧。輕舟漾到鷗邊。看遠浦隔回江浪。夕陰留住春煙。離情那天。清和芳草。緜緜。休道別愁難摸。一時載滿湖船。憶膩水脂紅粉。嬌桃嫩。惹衣香沁。露酣藻重。如今。獨自憑闌望眼。遙山黛色依然。蚤娟娟。前番明蟾又弦。

玲瓏四犯 夜來盛開歸期無準七夕秋近作此寄家人

瘦蕊樓花。更不管人愁。香滿涼夜。欲睡還休。長記玉窗燈下。冰簟夢醒惺惺。誤茉莉、暗兜羅帕。想帶煙、暮露無語。開徧鬧庭閒榭。一年容易秋還夏。望銀河、月斜星亞。玉真自許禁離別。妝晚饒嬌蛇。聽到絡緯一聲。重繞向翠藤雙架。那夜西風裏。羅裙拽處。散香和麝。

長亭怨 紙煤

正妝罷、搓胭搯粉。早又拈起。麝煤纖篴。巧削蔥根。細吹蘭氣。口脂暈酒邊茶後。頻敲處、微紅印看似碧蕉心。不許展、春風半寸。香燼怎知香歇罷。剛被冷茸留襯。殷勤記取。喜羅袖、暗籠低技。問那日、細寫相思待燒了。成灰教認。莫去點孤燈。長是照人離恨。

倦尋芳 湖曲待風寄半山

小舟困嬾。曲澗彎環。細雨風翦。春去宵寒。漫道柳綿煙暖。前浦燕來看似熟。暮雲鳩語如相喚。但朝朝。被新潮賺去。隨風吹轉。料別後、紅窗暗坐。計日量程。早過巫巘。

肯夢相尋。夢定比人行遠。自是無心隨去棹。爭知有恨銷年箭。怕怱怱。作桃源、迷仙劉阮。

宴清都 和盧浦江

春夢無拘管。人去後、粉牆花影撩亂。分明月在，闌干倚處，佩香猶暖。荼蘼似肯相伴。奈夏雨、池臺綠換。只刺藤、曾冒羅裙，橫斜占了西苑。窗前帕印脂冰，牀假簟汗，嬌笑如見。重簾暫護，芳塵莫掃，一方空院。良緣若道真斷。怎猶得、歡情在眼。耐思量、惟有閒愁，依依傍晚。

長亭怨 沙市晴望

正雲外、層陰乍霽。又引天際，送春餘恨。半老江湖，怨晴愁雨，沒期准。沙頭風色，從來是、催離信。五渚任興亡，忘不了、蕙花啼粉。春晚但看流水去，誰管佳人遠近。征帆似筍，指吳蜀、浪高濤憤。恁渺渺、萬里煙波，楚宮外、柳絲吹盡。使跨海樓船，不抵鷗夷桴穩。

齊天樂 天津聞蟬用吳韻

綠槐涼雨高樓靜。淒淒嫩聲還咽。楚夢無憑。蜀魂乍返。不記甚時相別。寒吹玉葉。是  
早日聽伊。弄音清切。得意初來。一庭花影送殘笛。如今素秋又換。使孤吟到夜。空  
伴啼蟀。南國芳華。夕陽弦索。打疊羅衣收歇。西風漫曳。斗驚起離心。玉壺冰熱。細算  
流光。喚人愁第一。

轆盧金井 廢圃尋春見櫻桃花感賦

玉窗長別。分今生、不見淚痕彈粉。春夢潛窺。驀相逢、晚亭亭細問。背人處、倩妝誰  
認。朝雨香殘。斜門煙禪。耐他思忖。常時上林芳訊。見玉妃侵曉。撩亂雙鬢。妒殺天  
桃。占東風不穩。如今瘦損。悔前度、挂心提恨。又欲成陰。一時判與。蚤鶯銜盡。

雨淋鈴 辛卯 月十九夜雨

秋霖曾賦。自中年後。漸減愁趣。連宵到曉。何事向孤燈外。敲窗搖樹。料是無眠。慣聽  
更、淒切蛩語。驀記起、飄箔紅樓。點點聲聲斷腸處。殘花落盡泥沾絮。總教天漏盡

何須補閒情。已自難耐。爭得管。酒帘花榜。睡也休休。侵曉衝門。一段寒霧。只怕到、絲鬢重青。早又瀟瀟暮。

暗香 定王臺夜集

漢時月色。向古城一角。長窺詞客。試傍玉梅。歲歲春來探消息。環佩歸時夜冷。料瘦損、胡沙天北。又十載、蠟屐重經。長嘯楚天碧。南國。遠岑寂。比雪苑兔園。未近鋒鏑。故垣約略。時有幽禽覩苔石。休道長沙地小。長樂外、鐘聲堪憶。這冷淡、蹤跡處。幾人覓得。

獻仙音 江建霞母華淑人翠柏圖

歐氏灰寒。孟家機暖。長念殷勤慈母。紫誥回鸞。金觴捕鯉。春暉待報難補。寫不盡。書燈味。當年折菱處。歲華暮。問從來、雪饜冰坼。幾曾見、翠柏碧筠寒沍。莫作傲霜看。想人生、隨分爲遇。玉樹庭階。喜承歡、更有謝絮。只披圖暗恨。我亦曾經荼苦。

綠意 陳柏屏楓林山莊圖

湘流碧玉。正浦雲平處。翠松團屋。世外仙源。歸去來兮。三徑叢蘭更綠。板輿惟道閒居好。渾不憶、禁鐘邊角。只夜窗、聽得書聲。又似紡燈宵讀。萬事如今莫問。且料理牆外。幾株梅竹。清絕湖南。楓樹青青。分付楚蠻騷曲。牧童釣客如相訪。更休說、滄浪水濁。儘流連、一片汀洲。穩放采菱舟宿。  
伯屏言楓林當爲風菱。湘浦多菱。

曲游春 題俞仲隅臥游圖送別

畫裏湖山好。又幾回題句。年華催換。少日襟情。老來游迹。舊圖都見。莫道風波惡。泛一葉、釣舟歸便。愁洛陽、暗滿胡沙。遲了菹鱸張翰。非晚。新恩重眷。有琴鶴歸裝。蘿荔芳院。待欲抽簪。怕羲之笑我。庾公塵浣。陶令容蕭散。記運甓、纔專方面。只蘭亭不似新亭。許多春怨。

又 李公子明湖秋宴圖

十頃澄瑩水。有客亭負日。看人來去。春怨難勝。不如秋好。碧雲吟暮。千古銷金地。盡付與、柳絲蘆絮。問荷花、照過傾城。還似舊時香否。延佇。前游三過。記玉堂牆外。眉

月彎處。更有珠宮。聽紅兒歌罷。較量詞譜。只恨詩人老。況近日。黃流沙汙。怕圖中畫裏相逢。又鉤離緒。

暮山溪 衡陽夜宴喜逢徐幼穆

舊時游處。只恐滄桑換。明月又窺人。喜分明。尊前眼見。塵襟初澣。離緒不勝情。三更燭。滿堂賓。總道深杯淺。玉驄催去。計日征蓬轉。公事且休忙。好安排。詩筒茗盞。涿陰梅子。五月定應黃。將攜酒。論英雄。莫論閒長短。

一枝花 秋蝶

二月相逢後。正見涼秋籬豆。玉階前幾日。長苔繡。豔影交飛。略比春前瘦。無酒無花候。莫更兜人。有些離恨。迤逗。閒幔消長晝。漫道詩情依舊。薄羅歌扇冷。舞裙皺。桂小香寒。怎似牡丹雙宿。晴日金釵溜。爲報西風。儘他羅袖消受。

一枝春 訪滕王閣婁妃墓因過謝尙宅並看澹臺將軍石像

舊迹重荒。剩殘壘。指點承平游處。北蘭寺廢。畫棟片雲成霧。網船唱晚。料無復。藏園

詞句空自訪、賢守碑題、更尋傍城斜路。江州謝家治譜。到於今尙想、南朝風度。南唐又過、說甚澹臺徐孺。轉車腹痛、似聽得、往年笳鼓。五十年前陳希唐監澹臺門余赴樂平話別於此應替我細數流光不須弔古。

燕山亭 甲辰臘月十四日萍鄉換船泛醴陵淥水出湘入漣一日夜至山塘

莊喜而成詠

細雨催春。蘭槳順流。回避殘年風雪。十五盡頭。早約還期。圓夢勝於圓月。鴛瓦油衣。從前意、如今都歇。佳節。只粥嫩饊甜。酒溫香熱。多少離合悲歡。算年去年來。大家休說。誰是倦游。那有閒情。朝朝替人傷別。若望歸舟。亂山裏、片帆明滅。山缺。剛見綺窗梅發。

拜星月慢 甲辰除夕前夜自城還山舟中作

臘鼓催年。航船侵夜。送我愔愔喚渡。自笑閒忙。把歸期遲誤。問何事、只剩殘冬一日。兀自片帆雙鷁。卻累長年。向斜風吹雨。算年來、更沒關心處。誰曾管世上流光度。



去住不負良時。似山陰來去。到明朝、獨守梅花樹。屠蘇暖、醉裏紅顏駐。道此行、恰似飛仙在新春前路。

琵琶仙

孔東塘所藏韓滉小忽雷葉東卿拓本今在陶齋乙巳上元日感題

馬上胡笳更安史。亂後琵琶淒切。誰道經畫。江淮繁華未銷歇。檀槽手製。幾回看、柳花如雪。用韓晦日詩意。元相徵歌。李謩擲笛。長自嗚咽。想秦蜀、流落千年。又新染桃花扇邊血。多少玉顏漂泊。歎腥羶宮闕。只一曲、迢遞沙塵。把古今、積恨彈徹。說甚葉氏韓家。那時喧熱。

望湘人

題金甸丞祖母夜紡圖

憶青燈課子。到老含飴。苦荼還是甘蔗。一樣機聲。廿年鏡影。忘卻花晨霜夜。爲展極書。似依慈母。琅琅伊亞。聽禁鐘、夢醒回思。隱約紡車纔罷。圖裏慈恩難寫。更杯捲永恨。淚珠盈把。只留得遺編。報答春暉未謝。人間淑懿。自然天性。女學何須矜詫。歎我亦、七歲孤孫。祖德詩慚無和。

二郎神 過西安北院感題

漢宮唐殿夕照外。並無禾黍。更五載秋風。依稀誰記。前度雕闌綺署。反掛珊瑚。旁人見也。被笑。怱怱來去。看彩鳳。帷空盤螭。金暗啞。鴉語。無數。翠綉鳴玉。趁班鷓鴣。想待漏星稀。退朝雲散。看盡終南黛嫵。古往今來。前因後果。留得許多詞句。但一角危樓無人共倚。朱顏如故。

換巢鸞鳳 乙巳送竈

烹得黃羊喜廚中酒熟。甑裏糕香。團圞無鏡聽。兒女有家當。五窮辭去去東洋。依然那時。燈光燭光。消得我七十次。香花供養。惆悵。休更想。要識世界。苦樂常相傍。范釜常寒。梁炊不熱。他日歡情無量。勘破流年似回環。只愁霜鬢明朝長。誰思量。紫姑神。如願酬餉。

月華清 丙午元夕從東鷺山乘月還山莊

燈影新春蟾圓此夜。幾家庭院。蕭管。緩緩輕舛。熟路未妨歸晚。正到門。爆竹煙籠。先

照著玉梅花暖。庭畔似雲階。月地游仙乍返。暗數前時賞玩。只第一良宵。姮娥難見。度盡華年。寶馬香塵夢遠。怕夜寒、簾隙窺人。溼衫袖、柳梢吟怨。緣淺。想玉人獨自璇宮漏轉。

玲瓏四犯 八仙圖晚唐時蜀人張素卿所畫孟昶得之令歐陽炯爲讚卽李  
耳容成董仲舒張道嚴君平李八百長壽葛永瓚也長安城東有八仙菴  
西巡詔改八仙宮有黃楊二株交蔭數畝蓋宋時古樹樊承宣請余爲詩以

六朝體不詠唐事歸作此詞

漢柏唐槐只陌上荒塵。長罨斜照。卻訪青門。雙樹綠陰寒罩。牆外碧玉交枝。渾不似、  
閨年生小。想向來、閱過滄桑。相伴歲寒三老。曾經御輦鳴鸞到。問游仙、夢痕誰掃。  
吹香密葉。藤花外、古寺臨官道。看盡灞上柳條。兵火後、依然春好。比六榕蠻地。空杳  
靄。雲昏曉。

霓裳中序第一 丙午二月二日苦雨淒風饒有春意

淒淒半月雨。做盡春愁無處訴。簾外潑寒處處。只柳眼啼煙。杏腮籠霧。寒鴉報曙。聽幾聲、蕭瑟如許。誰知我、酒邊詩裏。別有詠花句。芳樹。豔陽潛度。且引起、玉鉤金縷。花朝剛是小雪。儘放春來。莫教天妒。眼前驄馬路。怕他日、天涯又去。還分付、暖香眠鴨。好在繡幃護。

三部樂 題張仲炘都門帳飲圖

幾輩清流。選諫草。更得諫垣甄別。此生親見。三度楊花榆莢。那禁得、宮樹流鶯。有百般巧語。暗似鶻鴞。不如早去。一任寄巢啼血。江湖未須回首。向故山隱處。自尋薇蕨。漁陽鼙鼓動地。蒼黃宮闕。問東門、那時帳飲。更悵望、斜陽柳隙。一掬離恨。都付與、銅琵琶、鐵笛。

夢芙蓉 題王太守戴笠圖

看誰持玉杖。是匡廬舊日。主人無恙。峽泉三疊。琴調破雲浪。浩歌聲自放。天風吹做淒盪。盡吟情有吳煙幾點。搖曳白波上。戴笠尋詩有樣。瘦損何妨。呼吸通天響。

牯牛平望。夷語亂樵唱。洗空山水瘴。飛流濺瀑千丈。更莫閒游。祇憑闌把酒。一醉吐空曠。

長亭怨 爲俞廙仙題臥游圖

記曾探、山陰春曉。思發花前，興先雲到。王謝風流，情都說、宦游好。玉驄珠舫，剛一洗、酸寒稿。況鶴畔琴邊，自指點、年時游釣。吟嘯。正汾陰聽雁，又是洞庭秋早。漁蓑豸繡，總不負、江山文藻。更到處、勝侶高朋，閒添入、奚囊詩料。但展卷看題，空想圖中三妙。

歸國謠 爲俞廙仙題彭雪琴畫梅

姑射兒。舊日酒邊曾索笑。春風吹醒人年少。花開花落情多少。明蟾照。人間只有西湖好。

翠樓吟 春信

不分春來，柳條無賴，驀地報人春信。新年纔幾日，更打探、花期遠近。窗梅遙問。料青

苔點點。落英盈寸。誰知道。碧桃開了。劉郎未省。長恨。花事慙慙。怕紅無三日。綠陰成陣。海棠嬌小。慣且先趁。東風賭俊。好春無盡。總不如今年。暗催離怨。沙泉畔。踏春行處。夜雷驚筍。

又

繼蓮畦爲江藩與端督齟齬。朝命移甘肅於道。令權皖撫。故爲此詞。

一角鍾山。朝朝拄笏。宦情不如歸興。君恩容臥治。且饒與。皋蘭輶乘。公才須稱。喜六旆紅停。皖山青映。新開府。早秋衙鼓。雁聲遙應。還認。油幕看人。問故人別後。好風誰贈。白蘋江上句。料難共。吳興爭勝。戟門香凝。有得意詩篇。賞心圖幀。君知否。楚雲樓閣。有人閒凭。

百字令

戊申元宵贈陳甥鄧塔

燈喧月靜。好元宵景。色綠梅香透。玉鏡銀階。千萬影。簫管曲長催酒。夜已三更。花迷五色。換燭添香又。記曾尋句。六街春景如繡。恰是月轉回廊。照星星華髮。年光非舊。舊日兒童今老大。憔悴青衫短袖。斫地休歌。惱人無寐。此夜真孤負。忘情一笑。依舊。

然傍花隨柳。

玉漏遲 滋摘蠶豆寄窠爲作一詞索才女和

好春蠶事早。竹外籬邊。豆花香了。自挈筠籠。摘得綠珠圓小。城裏新開菜市。應不比、家園風調。櫻筍較甘芳。略勝點鹽剛好。曾聞峽口逢仙。說姊妹相攜。世塵難到。二兄四姊於巫山逢仙女。數人岸旁摘蠶豆。近日相煎。怕被豆根詩惱。寄與嘗新一笑。想念我晨妝眉掃。風露曉。園中芥莖將老。

又 爲滋和代懿作

和章來不早。又碧池深漲。綠荷開了。消夏閒吟。正拂浣花箋小。軍將打門傳送。剛譜得、紅閨新調。誰唱定風波。墨向盾頭磨好。堪憐十四瓊枝。似四折瓜稀。仙凡顛倒。且向深山。聊避六根煩惱。偶得開顏一笑。便一斗胸中塵掃。清鏡曉。提防玉關人老。  
弟時作軍官以此嘲之

拜星月慢 和樊山七夕詞

綺思年年。雖情處處。慣別渾成閒事。海上風波。惹新亭悲淚。料今歲不如唐宮露盤  
花水。只是爆聲傳喜。那用乞靈看羣兒自貴。歎山中自有悲秋意。被詞人拉入愁  
城底。一曲新吟。在啼螿聲裏。如今好。久住神仙地。豈不肯。挽盡銀河水。且付與。織剩  
餘絲。織人間錦字。

瑣窗寒

甲寅四月夏氣猶寒芍藥已殘新荷未出登樓晨望靄然有作

纔送春歸。當階芍藥。剩紅留影。風寒雨細。誰問綠苔芳徑。曉光籠。闌干暗憑。寂寞誰  
管離愁醒。只翠禽雙語。似知人悶。笑人孤另。強起開明鏡。又照見橫波。淚痕香冷。  
今年好月。孤負粉櫻紅杏。甚佳期。寒食踏青。倡條冶葉閒寄興。但昏昏。夢入梨雲。早  
鶯啼嬾聽。

水龍吟

題嶽雲聞笛圖

圖爲程穆庵爲其師顧印伯作。印伯。余弟子。葉煥彬誤以康有爲爲我再傳  
弟子。故戲比之。時久不作詩。偶題二絕句寄去。又於案頭得來紙索題者。因



檢案頭易由甫琴思詞本。和其第一篇水龍吟韻。以期立成。蓋文思不屬時。非和韻必無著手處。以此知宋人和韻。皆窘迫之極思也。印伯溫文大雅。必無無聊之作。見此必憐我之慁慁矣。如張孝達則又無此捷才。而印伯亦師之。弟子不必不如師。康南海又何諱焉。穆庵師誼至篤。印伯如存。待余身後。未必能如穆庵也。或曰。余弟子多。印伯弟子少。故不能同。然則三千人。故不及一子貢。此又昌黎師說所未及者。書此以記淵源。甲寅寒露日。闔運記於宣武門西館。時年八十三。

嶽雲遠到南橫。尙書舊第風箏碎。人生逝水。幾家詩社。又興吟事。西蜀才人。少年潘鬢。暗驚鉛淚。笑詩翁充老。龍鍾自喜。渾不管。陳搏睡。今日法源春醉。問歸魂。可留瓊佩。再傳弟子。比康南海。更加憔悴。來往燕臺。驢背馱詩。遺編不墜。恨虞淵日薄。黃公壚畔。更無題字。

小玲瓏閣

詞

運齋



葉大莊

字臨恭。號損軒。福建閩縣人。申薊曾孫。同治十二年舉人。官至江蘇知縣。署松江府海防同知。著有玲瓏閣詩詞集。

敍

慈父自信其詩。而自疑其詞。所藏數十紙。欲棄斥者屢矣。余謂自浙派盛行。玉田白石外。家夢窗而戶竹山。有寧爲晦澀不爲流易者。然夢窗竹山固時出疏快語。非惟澀焉已也。君詞宗南宋。最近夢窗竹山。庸可棄乎。爰命余爲刪存三十闋。卽以所言於君者敍焉。同里陳衍石遺。

自敍

少日倚聲。積藁盈寸。恐妨學也。中間輟去。或一年止得數闋。或數年不得一闋。拋荒寢久。音節之不合者。更勿論矣。今年移家海上。寓齋歲闌。編次詩藁。從故篋中檢出。錄置於後。過去光陰。老來情況。聊存簿記。非欲附於詞家也。

# 小玲瓏閣詞

閩縣葉大莊遜父

## 醉花陰 別意

滿院醺醺如酒熟。萬竹圍吟屋。細雨溼春寒。靠着闌干。藥鼎烟都綠。翦燈淪茗花陰宿。夢斷真難續。展轉不分明。寄與江南。當作家書讀。

## 聲聲慢 賊退經年行次秀州破屋荒江慘然彌目孤舟夜泊填此寄意

寒旂日淡。苦角霜高。秋程一片黃昏。葦渚蘆漪。孤艇翦燭誰論。淒涼墜鷗夢醒。冷蕭蕭、暈出波痕。遠望外、問荒燈破瓦。何處孤村。十載真如塔火。向鴛湖夜泊。疏雨潺湲。古柳栖鴉。江路約略猶存。重來落帆買酒。訝深宵、過客敲門。說亂定、有人歸、無地招魂。

## 華胥引 泊舟鴛脰湖

日斜風定。繫艇橫塘。暮雲似墨。籬腳花開。秋容尙自罨寒碧。水榭繡幙齊鉤。有數聲

長笛。翠袖凭欄。故遮團扇窺客。匹練銀光。畫屏中、割來湖色。松陵殘夢。煙波詩興。蕭瑟。一種蒼涼況味。又雁碣催別。悄對疏燈。滿林黃葉都落。

齊天樂 蘭山旅店和壁閒韻

關山等是窗前月。偏促離人宵起。燈盞寒更。車帷曉色。落得淒涼而已。倩誰料理。這酒病如年。詩愁似水。馬尾楊花。北來相送六十里。模糊夢境非耶。是恰丁香開謝。辛夷開矣。雪屋簷衣。雨窗展卷。盼斷家書一紙。茫茫春去。知何處天涯。真當恨死。明日黃河。又風沙堆裏。

買陂塘 蘆溝寫望

揭車帷。西山一角。淒煙怨黛如昨。嗚咽金元河畔水。夢斷壁璫珠絡。春漠漠。看萬點飛花。寒食東風作。夕陽將落。又九陌紅塵。千門紫氣。冷月上金爵。啼鴉魄。處處野棠晴雪。椒蘭火盡樓閣。通天臺下。通天表。只有初明痛絕。心緒惡。枉贏得風流。萬柳堂前酌。帝京人老。聽雨打新荷。年年歌向。供奉翠華幙。

百字令 趙北口題壁

恩恩去也。問離人心事，誰能拘管。驛路青山驢背影，細雨夢如春懶。楊柳漁莊，菰蒲蟹舍，畫出江村晚。炊煙門巷，馬通早又堆滿。閒坐土鏗煤鑪，居然魚米，似我家鄉飯。更有十三紅袖女，拉雜琵琶聲斷。下第光陰，少年風味，一醉原無損。奈儂多恨，擁衾燈火孤館。

高陽臺

南旋過馬馱沙朋舊流連。排日張飲清歌，明燭殆難爲懷。

京口寒潮揚州曉雨，江天催我歸船。池館秋燈，詞人終夕流連。草堂舊約櫻桃會，付閒情、畫裏琴邊。祇恩恩、花月光陰，詩酒華年。宣南社事薔薇老，記一尊聽曲，醉也悽然。芋火僧坊，竹鑪烹雪無眠。來時與子荒城話，又西風、拉雜銅弦。恐明朝、蘆花楓葉，冷逼吟肩。

琵琶仙 橘溪夜泊

寒月孤篷，空載得黃葉滿船而返。又早白雁，聲聲離程趁秋晚。極目是蘆煙葦雪，竹

林外、荒畧誰管。田舍柴荆。酒家燈火，供客魚飯。問溪上、聚族居人，看如此風波出  
門懶。耐得生涯淡泊。水石眠安穩。聽處處、焙茶搗紙。願一年、春雨無損。怎識歲暮歸  
途。擁爐腸斷。

綺羅香

洪宅買菊歸憩塔湖禪院用樊榭韻

露重衣單。波圓被冷。篷背秋聲如許。老圃幽容。綻出淡金無數。偃病蝶、半榻疏煙。伴  
寒蟬、一簾微雨。又和泥、擔上江城竹。村黃雪蟹燈暮。僧樓銷盡酒思。閒坐柴煨品  
字。塔鈴孤語。明日西風。怕失青山眉嫵。愁聽水、夢裏攙來。愛買湖、畫中偷取。趁鬢花、  
搖到門前。認草堂景否。

齊天樂

題湘煙閣秋蝶扇子

疏籬一抹斜陽暝。寒花褪紅誰省。病翅銷香。殘衣墜豔。禁得幾番宵冷。呼茶強飲。正  
繡被霜淒。華燈雨警。話到南朝。畫中金粉些兒影。商聲吹得夢懶。又斷雲流水。蒼  
涼詩境。綠牘蘇畦。黃遺菊圃。簾外相思人靜。羅浮酒醒。記楚尾秋光。消除俄頃。付與



西風藥闌眠夜永。

唐多令 秋夜法源寺送芸敏往津門

霜緊菊花黃。祇林佛粥香。聽秋聲、夜撼邊牆。落葉一燈寒臥病。能幾日。又重陽。稻蟹舊家鄉。相思總斷腸。問丁沽、何處陂塘。前度填詞人不見。明月好。水西莊。

綺羅香 寓齋寒夜

風動糊窗。雨昏補壁。誰遣愁人宵坐。展卷旋拋。兀自擁裘惟我。圍炭擊、嬾拾餘香。揀茶餅、閒留微火。最妨他、暖盡寒生。凍簷折竹夢難妥。殘燈孤照土炕。和悶哦詩罷。油花將墜。細數僧鐘。雪氣曉天如鎖。念病夜、冷透衾窠。想晨妝、春融釵朶。又辨色、趨直而來。出門車沒堞。

摸魚兒 春盡遊極樂寺海棠落矣用樊榭韻

雪濛濛、落英如鬪。僧廬風景依舊。三年兩踏東華土。失意渾如病酒。君記否。墨樣藤花、金樣垂絲柳。重簾坐久。更疏雨聲淒。斜陽影淡。低唱破櫻口。來非偶。纔過殘紅。

時候。郭外遊人還有。鬪茶讀書山房曉。官醞宜賒三斗。香夢瘦。想春事都城、半落詞家手。禪幢靜晝。賸綠幄濃陰。叩門看竹。小約翦燈又。

西子妝 端陽節近偶感舊遊用夢窗韻

梳盞油乾。蘭盆粉褪。夢冷螺峯香霧。水邊人影酒邊人。記停舟、畫橋西塊。荷翻柳舞。總莫把、萍踪綰住。最傷情、恁滿斟蒲釀。歸期何許。花時誤。鏡裏紅顏。又被春帶去。石榴如血日如年。伴午眠、北窗高樹。揚州舊句。蒿艾朱門空賦。負佳辰、悶坐蕭齋聽雨。

玉漏遲 和俶玉從城中歸陶江邨居用樊榭韻

秋齋眠乍倦。黃花雨歇。微嫌天短。說是君歸。欲往蹴泥筇顫。琅琅一闋。總寫盡、畫家縑片。風似翦。漁邨夜靜。蟹燈沙眼。新寒滿路霜林。紫翠垂簷。那人山館。冷絕生涯。想得耦耕偕嘆。買向雲蘿裏住。便謝卻、江湖萍散。潮落矣。鹿門船初到岸。

蕙蘭芳引 和俶玉食蟹用樊榭韻

閒憶水程。屢收纜、市沽宵午。最近水人家。入饌銀刀切縷。鮮風撲鼻。對霜葉、冷尋香處。訝山齋、讌客閒坐。相思無語。菊瓣零黃。蓼花墜紫。酒思難訴。漫落窳澆愁。那管柘枝狂舞。竹燈圍影。詩翁悶聚。想去年、臘雪一簾秋浦。

雪獅兒

俶玉以雨後夜歸楞巖屬和用樊榭韻

莎村寒雨。衝泥夜返。燴湯新浴。靜掩巖腰。壁火微穿籬綠。房隨石曲。喚赤腳。彫胡炊熟。復自起。移燈拈句。巡廊花蹴。覆頂何慚無竹。便添牆補檻。休教牛觸。刻意經營。受凍吾廬心足。汝吟我續。莫寫得、牢愁盈掬。山窗獨。鴿研薄冰敲玉。

綺羅香

留俶玉小飲用樊榭韻

近臘蔬庖。江鮮雪嫩。少許也贏多許。苦囑廚人。食譜從新更數。秋欲晚、菜醬迎霜。天乍寒、橘羹含雨。山中留客何勤。閉門消受竹樞暮。詞邊易攪。笛思總不斷迴腸。西風酸語。果是在家。那蹙秋鬢雙嫵。愛說餅、舊事重提。喜鬪茶、新香再取。算箇中、知味伊誰。君今眉皺否。

慶宮春 乙酉臘月十五夜雨憶俶玉用樊榭韻

陣陣酸風迎寒催凍。山齋孤閉林罅。殘葉零紅。纖蔬帶碧。冬容籬落堪寫。□□□□。卻消得、幽居靜雅。煙簷忽黯。如注糟牀。黃昏初罷。故人近往江城。愁到衝泥。日歸時乍。山中景物。濃香勝雪。冷坐蜜梅花下。擁衾尋夢。五更轉、熏鑪添麝。灑窗繁點。急似吳篷野橋春夜。

瑣窗寒 十六夜雪用樊榭韻

昨雨剛停。晚寒峭甚。煙禽跳瓦。細聽折竹。獸炭銅盆新治。□□□□□□。水邊驀記丁家榭。正鮑魚欲上。青裘貰酒。冷吟閒話。淺淺分水汶。卻在孤村。夜春聲罷。好事南中。堪卜豐年團社。似明朝千峯草堂。琉璃屏風和粉寫。詔山僮遲遲開門。滿徑香雲惹。

天香 十七夜月用樊榭韻

玉戲初闌。銀妝又換。瓊樓現出纖翳。寫弄珠遊。繪淩波樣。可少神仙新製。流連懶去。

誰惜汝。欲飛無翅。好是山深一種。嬋娟泥人寒翠。冬宵最愁對此。奈奇冷、聳肩難避。準備虛窗先掩。重衾如水。儘把梅花付與。呵凍笑、填詞不成字。誤作天明。風鴉叫起。

點絳脣 初夏園居和俶殷韻

一派紅荷。前頭一派黃金柳。梅炎難受。又試輕紈手。六柱油篷。寫入圖中否。家居久。雨聲穿牖。夢在吳淞口。

齊天樂 甲申七月馬江師敗之次日遇賣佛手者盡貨持歸草堂清供幽香

襲人不知身在兵間。今秋賣者又來。感而填此。邀俶殷同作。

禪香滿擔無人買。三年蕊提舊事。亂後黃橙。兵閒綠荔。盡是詞家孤淚。霜林又墜。蠟造雙拳。金鎔一掌。彈指流光。佛邊如水。打包睡。小幅草堂畫記。瓦盤烏几上。堆出秋意。陀利真香。兜羅別樣。生本託根初地。園翁忽至。太念我多情。筠籃珍寄。泥首經幢。花源休再避。

踏莎行 初春遊虎邱飲闔門水閣

鏡裏情懷。笛邊風調。曼聲度曲低聲笑。小樓寒勒海棠花。杜鵑抵死花前叫。野寺春遊。名園晚眺。落燈時節閒人少。眞娘墓上雨瀟瀟。誰家冒雨燒香轎。

南鄉子 曼睽同客金陵偶填此調寓玉溪巴山夜雨之思情韻雙豔余適重

有所感疊韻繼作

豔夢冷湘屏。小雨衾渦聽到明。斷送江南秋去也。瓏瑋。嬾續么絃第二聲。歸櫂佛狸城。漫說傷心畫不成。元遺山句一片傷心畫不成。帶得六朝烟水返。淒清。天上人間寄與卿。

又 曼睽見和有山黛隱圍屏句風韻佳絕再填以答

山黛隱圍屏。寫上烏絲字字明。半夜紅牙翻笛譜。琤琤。細和跳珠一兩聲。歸夢闔閭城。白浪連天去不成。落得聽風還聽水。清清。秋雨琴臺病馬卿。

金縷曲 連日雨甚欣然見月霜天如畫就曼睽璞齋兩君談久之歸雨復作

補疊此解

五夜湘簾燭。記年時、秦淮艇子。鳴頭春綠。泛宅滄江間。鷗似牽得吳篷作屋。轉撇去、南村松竹。乍過重陽。宵宵雨。鎖秋闌。悶譜淋鈴曲。蔣山影、橫窗幅。銀蟾忽吐。寒如玉。乞明珠。消除病渴。銅盤仙醪。寶樹霜娥清虛府。不豔人間。膩福。奈又損、嬋娟螺蹙。一陣淒瀟。簷溝響。替黃花。試把來朝卜。煩左手。晚香掬。

東風第一枝 壬辰歲暮吳下寓齋疊樊榭韻

竹銜茶濃。糟牀酒熟。滿窗斜插梅影。瓦簷殘雪初融。又攙挑珠夜永。衝泥客嬾。總攔了。消寒詩興。泥翠鬢、炙硯仇書。一笑水仙開並。拈往事、話長誰證。牽舊夢、睡醒不省。避人花國真佳。捨身佛天更淨。山光不斷。五六里、橫塘如鏡。約討春、打槳能來。可似去年風景。

又 除夕憶玉屏舊居再疊樊榭韻

案拂椒香。廚含柏火。享堂初挂遺影。歲除單舸搖歸。愛依燭邊漏永。溪橋雪斷。奈又

阻官梅遊興。且展裝、酒脯祠詩。戶外玉山高並。田舍事、幼時堪證。書卷味、老來最省。絕憐鬢絲將衰。尙餘爪痕未淨。銷魂水面，看漸逗、春江明鏡。料此宵、獨樹柴門，一幅苦瓜寒景。

瑞鶴仙

新正五日春寒甚厲雨雪未已有念福州燈市去家又七年矣疊清

真韻

看人家繞郭。元夕近、一片香泥漠漠。山昏雨絲落。盼張燈風好，銀蟾樓角。池梅影弱。記釀錢、來趁社約。有長街火樹，聽唱鬧蛾，滿盞春酌。最是村南去路，柳坵灣灣，漁莊花閣。齊鉤繡幕挑青菜，鬪紅藥，擲千金買夜。神絃吹送，攔江何怕浪惡。莫流光，誤卻微病，嫩寒也樂。



萬  
金  
詞

運  
金



馮 煦（道光二三——民國一六）

字夢華。號蒿齋。晚稱蒿隱。江蘇金壇人。光緒丙戌一甲三名進士。授編修。累官至安徽巡撫。時水旱爲災。煦單騎履勘給振。民霑實惠。罷官後卜居寶應。晚寓滬上。振災之事。無役不從。著有蒿齋類稿。

序

始君年弱冠。客游淮安之桃源。居處寥寂。間爲詞自娛。歲莫返權。出而相示。肇磨心竊好之。已肇磨讀書北村。偶有所作。錄稿就正。時君方共亡友毛子次米更倡疊和。因爲肇磨辨析唐五代兩宋之流別。風尚之出入。期惟正軌是循。舉從來麤獷纖穠。與體之若俳若詭。苟焉取悅一世之耳目者。屏絕剷除。相引爲嚴戒。詞於藝事。雖微之微者。而源流正變之故。要非漫無所持擇也。歲丁卯。次米下世。逾年。君遂家金壇。獨旅居蘇鎮間。又一年。相見於江寧。江寧江山雄偉。其城北諸峯。又至官邃。爲自昔幽人窟宅。年少健步。春秋佳日。輒相與披榛莽。窮壑巖。求六朝以來故蹟所在。及曩時名賢之游躅。有所興發。則咸寓諸詞。又越一年。肇磨去客嘉定。屬遭離人事。僕僕尠寧趾。雖時聚首。而游興亦少衰減矣。同光之交。君連歲入蜀。所至恆多憂時懷遠之作。丁丑中夏。乃復同居冶城之飛霞閣。閣踞山巔。與鍾阜石城相峙。頽睨塵閣。如越世。雲煙朝夕。瑰奇變幻。千端萬態。讎澗之隙。晷益相與研精聲律。商榷同異。縱覽

古今作者升降而折衷於大雅。每登臺舒嘯。或就斗室煑茗。促膝夜話。致足樂也。嗟乎。自吾兩人先後去江寧北度。而譚諧之歡。幾幾不可復得。津門距都才兩日程。相別三載。未獲一執手勞問。君今年五十。肇磨亦四十有六。蓋自總角而弱冠。而壯而強。而逮五十之年。吾兩人之蹤跡。數離數合。且跡疏而心愈親者。未嘗不一見之所爲詞也。抑君於學無不通。平生所撰造詩古文辭。若駢四驪六之作。屬草殆已逾尺。而君雅不以自名。惟孜孜焉究心天下之大計。以備當代一日之用。宜於詞彌無取焉。然而少小所習。長大有不能忘。薄技且然。矧足以寫性情之鬱伊。而藉著友生聚散之跡者哉。若夫君詞之工。則明者能自會之。固無俟肇磨之區區私論也。光緒壬辰冬十有一月。寶應成肇磨。

蒿盒詞

金壇馮煦夢華

霜葉飛 秋暮過虧園同次米賦

峭寒如雨。簾陰暗、斜陽猶戀庭宇。苔花吟老斷無人。奈此時情緒。渾不記、留題甚處。暗蟲蝕盡東牆樹。且共倚危闌。怕寸碧煙空。薄游今已非故。曾是選石延雲。洗瓢邀月。爛藤香裏同住。年年散髮弄涼秋。有幾多淒楚。莫更問、琴歌酒賦。庾郎先自傷遲暮。算我亦漂零久。負了沙邊舊盟鷗鷺。

徵招 八月二十一日同蘋香夜飲殘月當樓冷雲在水有懷次米白田

寒城清角吹煙起。涼蟾半規殘白。瘦影怯凭闌。對沈沈空碧。相思忘不得。待歸雁、爲傳消息。野寺疏鐘。江樓橫笛。幾番游歷。望極暮天西。銀河轉、冥冥溼雲無迹。木葉下微波。更啼螿悽惻。遙知虛幌側。只人共、素娥岑寂。甚愁裏、殺了明鐙。又斷腸今夕。西子妝 秋宇澄霽殘月初上暝煙不生樓外叢樹動搖涼翠欲滴同蘋湘賦

此一繩新雁若與歌聲相和也

斷港通煙。危嵐卷雨。消盡庭陰空碧。孤城畫角下黃昏。颺殘旂、亂波如織。南鴻悽惻。似遲我、倚闌橫笛。夜冥冥、怕單衣一葉、涼雲吹溼。秋無迹。落木微霜、野鵲驚寒色。小樓西畔玉繩低。幾消磨、醉筇吟屐。半弓殘白。待句起、玲瓏簾額。問姮娥、可有海天消息。

淒涼犯 同蘋湘徘徊方塘之上野風襲人灑然襟抱明月在水荇藻交映俯仰身世憂從中來感成此解兼寄次米

敗蘆卷雪。長汀晚、微霜尙戀歸屨。煙籠野樹。亂鴉驚起。暮笳淒咽。酒懷漸歇。奈歡意、都如墜葉。弄空波、寒星數點。鷗外半明滅。知否西窗下。一片秋聲。夜吟應怯。相思天末。又望斷、庭陰新月。北雁無書。算只悔、當時輕別。甚銀牋、一寸爲寫恨萬疊。

南浦 答衣谷兼以爲別

江上雁繩斜。酒初闌、早又斷腸今夕。無語咽寒雲。漂零久、忍問西湖消息。六橋煙月。

那時曾弄梅邊笛。落葉如潮。秋寺晚。都是夢中遊歷。而今蕉萃南朝。算斜陽燕子。似曾相識。莫更上離亭。荒煙外。殘柳絲絲愁織。重逢記得。蘼蕪一抹。傷心碧。只恐鐙  
淚疏雨夜。瘦損茂陵詞客。

菩薩蠻 同蘋湘尋青溪微波已寒。芳草未歇。蔣山一角搖落空翠。各成此解。斷橋寒渡秋蕭瑟。絲絲殘柳搖空碧。野戍約鷗邊。蘆笙吹暝煙。疏鐘江寺晚。霞外  
弦詩遠。黃葉下如潮。一峯眉翠凋。

長亭怨慢 漱泉有淮南之游甚難爲別。因倚此解送之。春水方生子亦將歸  
江上不自知其繁絃促柱也。

又殘夢。東風吹醒。幕上離亭。斷腸誰省。疏柳微黃。數聲寒笛亂雅暝。碧雲何處。渾墮  
入斜陽影。迴首望平蕪。只一角。城陰愁凭。銷凝怕落邊屐悄。忘卻舊游門徑。西窗  
暗雨。忍猶憶。翦鐙同聽。算我亦。客思如潮。待重載。空江煙艇。且緩緩催歸。說與子規  
應肯。

迷神引 過露筋祠叢樹荒煙愴然成弄

水佩風裳寒未翦。門外嫩陰籠碧。揚靈何處。湖上煙如織。柳濛濛。斜陽卷。畫旂溼。一  
粥蘋香采。春渡寂。廢殿薜蘿叢。暮雲入。太息湘靈。莫鼓錢郎瑟。灌木淒迷。殘鴉泣。  
怒潮流恨。算千古。空嗚咽。更菰蘆中。疏星晚。起魚笛。缺月墮無痕。歸怨魄。曲曲奏神  
絃。近寒食。

曲游春 上巳孤清春江小泊南朝舊恨渺渺於懷因成此解

一舸春愁起。被軟潮吹斷。深淺無據。閣住餘寒。怕東風暗卷。濛濛酥雨。舊約湔裙誤。  
問何似。六朝眉嫵。使碧雲。幾葉遮留。難喚冶桃前渡。冉冉薄陰淒楚。恁怨草愁波。  
人在南浦。弱柳微黃。怕穿煙乳燕。半銜離絮。夢墮斜陽路。悄不是。舊聽鶯處。無奈中  
酒時光歸期又阻。

探芳信 重過寶應城北舊居景物荒寒泫然欲涕撫玉田西泠春感韻

揜空晝。記款雁絃詩。呼蛩絮酒。奈蓬蒿徑悄。西風漸非舊。屏山影裏珠塵散。不獨斜



陽瘦。近黃昏。月蛻虛廊。煙蟠廢甃。寂寂暮寒驟。賸敗葉、侵階冷蘿垂岫。問訊青琴。梅邊斷腸否。十年贏得西州淚。門外重回首。更無聊、數盡昏鴉暝柳。

琵琶仙

己巳三月予羈建康十四日之夜暝飲已醉同蘋香漱泉過長橋坐

磐石上新月娟娟弄清影遠笛掩抑欲吹之墮起尋南苑廢池晚風盪愁碧  
荇藻交映沈寥無人煙語亦寂一星漁火明滅菱蘆閒如聞山鬼幽嘯者相  
與罷去沿緣至青溪遙山微茫雲樹隱隱可辨時有權歌掠波往來使人絕  
去世俗營競漏三下乃歸因成此解紀之時漱泉將歸淮南子亦欲去建康  
聚散不恆良會未易得離索之感慨焉憑生不自知其詞之愴惻也

顰月籠寒。奈相見、舊日東闌愁凭。溪上空揜。微雲蘋波澹無影。酸一點、離心似酒。被前浦、雁聲吹醒。斷甃通潮。遙嵐閣雨。幽恨銷凝。問何處、怨鶴啼煙。但涼翠濛濛。溼蘿磴。依約遠山眉樣。待霜娥開鏡。風笛冷。春欺倦柳。賸斷橋、幾縷搖暝。早又深燭單衫。悄歸漁艇。

徵招 微雨乍寒積陰成痾孤羈白下冶春欲闌譜此寄滋泉仲修拂青

薄寒庭宇愁如水和雲釀成淒楚乳燕背斜陽算春無歸處嫩陰渾欲暮又迷了冶  
桃前渡一碧東園舊痕空盪斷萍零絮離緒胃平蕪微風外聲聲晚鶉尤苦吹夢  
墮淮西怕闌珊無據六朝君莫妒只禁受恨煙顰雨待相見悄揜重簾共翦鐙深語

梅子黃時雨 送滋泉良甫之淮南兼寄拂青同漱泉賦

倦柳搖晴正疏雨半闌人在南浦怕一片涼雲帶愁流去草長波平天遠斷腸不是  
春歸處空延竚幾點峭帆飛下孤嶼淒楚冥冥芳樹望荒城不見來夢先阻問前  
度劉郎銷凝何許輸與離亭今夜笛倚寒吹得蘋花聚漚邊路甚時共尋煙語

壺中天 題心巢師春歸杖履圖

煙蘿無恙問春歸幾許幽人先覺宛轉溪橋晴翠瀉輸與閒鷗棲託屋借林園泉因  
筓引差可團蒲著獨隨霞往一襟眞想絲邈還憶四壁絃歌東風飄警舊夢渾如  
昨甚日白田殘月裏許我重攜松屨謝笠衝寒呼筇溯遠來踐琴邊約南雲歸晚故

山應有猿鶴。

菩薩蠻

九日薄飲既闌同蘋湘徘徊長橋雲波明瑟愴然賦此

西風縷縷吹衰帽雲痕閣夢空煙梢酌酒問斜曛黃花瘦幾分遙天銜斷碧南雁無消息暝色赴危闌歸潮弄峭寒

琵琶仙

冬十二月十又三日研孫歸湘中惘惘言別夜更與蘋湘飲酒半沿

緣長橋下煙月微茫寒水自碧淒然其爲懷也因成此解並寄滋泉伯琴仲  
修芾卿

鐙暈虛堂算人似病葉飄零難久離緒吹入荒煙空簾斷腸又淒綠暗孤帆自倚莫聽到冷猿啼後遠樹冥冥晴川歷歷無那憊憊更殘夢飛墮淮南怕雲影銷凝漸非舊今夜酒醒何處向遙岑迴首應也弄湖陰缺月有一繩斷雁歸否爲問茸帽禁寒共誰消受

一枝花

曉經秦郵過故居作

帆影收殘驛。問訊瀛邊消息。未黃寒柳外。曉風急。湖水湖煙。一抹傷心碧。甚處尋秦七。衰草微雲。依然舊日詞筆。霜重城陰溼。歸路暗驚非昔。東偏三五畝。薜蘿宅。十載塵顏。算只有顏波識。俊游忘不得。認禿樹荒祠。乳雅猶帶離色。

琵琶仙 往與拂青過畫川講院諧際甚歡未幾別去秋九月以事來白田拂青臥病苦不得出予亦意緒闌珊不復一問陳迹後更有海陵之役孤舟野泊時涉遐想撫此以寄拂青強起聽之當爲予悄然以悲也

何事西風又吹我。一點征帆東下。無那寒驛。鐙昏沈沈怨遙夜。秋色裏。青袍似草。算離恨。不堪重寫。倦倚煙篷。霜空雁杳。誰共情話。最惆悵。石老雲荒。漸忘卻城陰舊游治。賸有一弓殘月。映晴川如畫。添幾許。枯荷敗葦。便夢迴。誤了亭榭。爲語沙際輕鷗。甚時來也。

水調歌頭 送漱泉歸淮南並爲伯琴芾卿問

朔雁下平楚。江上峭帆開。勞勞南北何事。茸帽暗塵霾。幾點疏林倦鳥。一抹亂山斜

照分手石城隈。今夜揚州月。橫笛弄潮來。前游地。歸不得。重徘徊。西窗暗雨乍歇。銀燭漸成灰。爲問潘郎。淒緊更念劉郎。蕭瑟相見且銜杯。歲晚莫迴首。殘客尙天涯。

擣練子

殘夢斷。暝煙空。自起霜天數斷鴻。依約舊時攜手地。小樓連苑月濛濛。

玲瓏四犯 閏十月十五日之夜飲蘋湘許酒闌蘋湘送予長橋下澹月如煙  
寒水一碧可鑑數家樓閣搖盪疏影雅似淮西舊游去年與漱泉時復有此  
今漱泉已歸寶應予與蘋湘亦意緒非昔生不百年清游有幾使夜夜有月  
已非今夜成迹一逝渺不可追感賦此解並寄漱泉

隔浦暗燈。孤城清角。天涯能幾相見。斷橋西去。月照影驚蕭散。而今俊游漸嬾。算煙波再來都換。一別浮塵。十年漂梗。芳序黯將晚。無人地。憑闌徧。望淮南。落木離緒何限。夜闌潮信穩。夢與輕鴻遠。曾攜手處銷凝甚。又千里。霜空雲亂。誰更遣。愁來怕。尊中酒淺。

霜葉飛 冬十一月二十三日漱泉來自寶應相見歡甚而歲序將闌予又將歸海上南朔異趣曠若相代黯然其爲懷也於是漱泉之歸曾賦此解爲別因更倚此以和之

斷腸時候。微陰斂，歸雲猶戀孤岫。寒潮帶雨下青溪，正峭帆移後。怕折盡、天涯倦柳。亂鴉聲緊斜陽瘦。恁歲晚重來，漸石老苔荒，俊游無那非舊。還又晴雪空江，悄呼魚艇，與君能幾攜手。年年斷羽向西風，怨去鴻何驟。算客裏、相逢未久，離心先自酸於酒。莫更凭危樓望，海樹如煙，者邊回首。

換巢鸞鳳 恭甫移家秦淮賦此柬之

九曲池頭乍書囊鏡檻。來伴輕鷗款煙通列岫。坐月揜層樓。而今裙屐幾淹留。甚時更尋南朝俊游。閒雲換，恁一抹，尙沾吟袖。攜手相識久。三筆六詩，前度劉郎又盟。研平波，籠燈虛閣，輸與者般消受。我亦春江載扁舟。數弓知傍幽棲否。記重逢，待明年、燕子歸後。

暗香 晚登燕子磯寄蘋湘漱泉

數聲怨笛。又無端喚我來尋陳迹。點點峭帆半帶殘陽下荒驛。幽壑潛蛟自舞。渾怒卷銀濤千尺。甚絕磴一綫侵雲。猶有晚樵識。歸客正惻惻。數斷角牘烽。總是離索。俊游記得春草如煙上吟屐。茸帽西風漸暝。空望極危岑寒碧。算舊日攜酒處去潮更急。

徵招 題夢軒師江上聞箏圖

離聲鷦帶歸潮起。天涯冷帆初轉。夜鶴引冰絃。恁霜空雲亂。玉尊休更款。怕贏得、一衿幽怨。昨夢西津。雪迴孤櫂。暗塵先換。謾遣此時情。哀彈咽。桓郎漸驚蕭散。墜緒入荒煙。翦涼颼不斷。曲中秋正遠。又添了、隔江啼雁。峭歌揜水驛。鐙淒奈舊懷都倦。

滿江紅 同二泉師登金山作

攜手危嵐賸舊隱。重到未荒汀洲外。亂帆孤壘。何限淒涼。北府興衰歸逝水。東山哀樂付殘陽。奈十年兵甲倦登臨。秋樹蒼。漂零久。思故鄉。百端恨。對茫茫。算白漚無

恙。尙識清狂。更倚天風凝望極。大江東去海雲黃。問甚時歸去。理漁竿。煙嶼旁。

角招 丹陽隱公橋弔張將軍國梁同夢軒師賦

下空晝。歸帆乍揜。危橋野鳥。僂僂斷垣。波外瘦。廢塔暝煙。猶挂疏柳。將軍去後。早恨咽。樵童漁叟。一角孤雲渺渺。帶叢笛不勝悲。向城陰迴首。知否。大招賦又。蟲沙甚處。遺怨歸橫岫。暗苔寒碧透。斷甲埋沙。哀笳催堠。家山似舊。忍客裏來澆尊酒。譜入神絃共奏。怕斜日。拂靈旂。黃昏驟。

徵招 題空幃鑑月圖同漱泉賦

酒醒香斷。眠還起。依依那時懷抱。素魄尙籠煙。奈修簫人杳。倚寒鐙暈小。算虛幌。淚痕猶照。獨下閒階。滿身梧影。絮蟲聲悄。換了。一分秋。淒涼意。紛如亂雲難掃。幽夢已無憑。又疏星沈曉。暗塵驚漸老。怕孤館。不禁重到。碧天峭。過盡南鴻。問寄愁多少。

齊天樂 題夢軒師金城柳色圖

暝煙搖夢。孤城閉。依依舊游如此。廢驛霾雲荒隄。咽雨誰遣。飄零身世。前塵易逝。使



墜絮爲萍。更無秋蒂。側側微波。再來總是斷腸地。顏垣尙銜莫紫。暗風吹戍角。猶縮羈思。繫馬輕陰。調鶯舊曲。不分而今憔悴。危闌更倚也。應念攀條。酒邊書記。一抹殘陽。亂鴉啼倦壘。

淒涼犯 再題夢軒師江上聞箏圖

峭帆半掠。微雲遠。聲聲暮帶離索。去湖乍弄。煙沈斷戍。暗迴清角。芳尊謾酌。甚情緒、中年漸覺。想天涯、歌長夢窄。往事漸零落。無那空江暝。幾許銷凝。雁啼幽壑。歲華未晚。怎青衫、便成飄泊。莫倚冰絃。怕愁裏、桓郎瘦削。待鐙昏、曲冷更與湖舊約。予初成此詞師未許之。因復譜徵招一章。今師已矣。補錄於此。安得起師而正之也。

江南好

青溪曲。穉柳不勝春。獨自吹香橋下過。晚鶯如夢絮如塵。惆悵更何人。

浣溪沙

點點歸帆望不齊。亂鴉啼後暝煙低。酒闌時節更淒迷。一片空波萍乍暖。二分殘

月柳初穉。莫將幽夢過淮西。

江南春

風料峭。月冥濛。波生前渡碧。花謝去年紅。西樓一夜聽鶉鴉。春盡重簾閒夢中。

百字令 題秦淮秋泛圖

兩行倦柳。帶溼煙搖暝。牽人羈緒。小簾重簾斜。月裏閱盡興亡無數。自笑疏慵。鶯初  
燕晚。未問蕭娘渡。江南秋色。斷腸空在紈素。還記墜葉輕潮。嫩涼時候。與客攜尊  
俎。無奈勞勞亭下笛。又喚扁舟西去。水驛燈昏。愁長夢窄。總是分攜處。甚時重到。酒  
零落如雨。

江南好

庭院悄。雨過嫩苔肥。燕子不來簾影暗。綠陰陰裏試單衣。獨立又斜暉。

憶王孫

菰蒲獵獵雨潺潺。一角湖光如玦環。幽鳥晴雲自往還。莫憑闌。酒醒江南春正寒。

浣溪沙

一抹西風未夕暉。輕煙遠樹正依依。舊游荒了釣人磯。燕子風微桃葉瘦。魚兒水長荻芽肥。晚春爭得不思歸。

江南好

三月莫何事更干卿。草長鶯飛春水皺。勞勞亭下五清明。東望不勝情。

臺城路 題簫聲鬢影圖

嫩陰簾幕微雲斂。添來一聲幽咽。舊曲吹寒。空匳照影。又是黃昏時節。花消酒祓。算如此清狂。候蛩能說。莫弄參差。夕陽滿地墜殘葉。西風片帆又別。漢南秋色晚。相望愁絕。夢醒荒橋。塵棲廢館。瘦盡當年新月。清歌未歇。怕聽到更闌。漸驚華髮。俊約無憑。杜郎心暗折。

江南春

香定後。酒闌前。綠陰濃似畫。黃月澹於禪。南朝一片傷心地。小簾輕袞人未眠。

南鄉子

一葉碧雲輕。建業城西雨又晴。換了羅衣無氣力。盈盈。獨倚闌干聽晚鶯。何處是歸程。脈脈斜陽滿舊汀。雙槳不來閒夢遠。誰迎。自戀蘋華住一生。

江南好

清夢破。何處叫春禽。乍暖乍寒雲更嬾。熟梅時節晝愔愔。立盡一樓陰。

渡江雲 壬申冬十二月十四日大雪漱泉歸寶應夜坐樓上汲汲無歡追念

次米感賦此解並寄漱泉

西風吹暮雪。寒禁水驛。倦客慘將歸。峭帆迷寸碧。木落淮南。望斷片雲飛。梅邊舊約。算只有。飢鶴斜暉。愁歲闌。又成輕別。負了釣人磯。堪悲。江空天遠。石老煙荒。問黃鑪往事。應念他。哀絃自理。濁酒同攜。重招楚魄。知何處。奈竟夕。空起相思。眠未穩。朝來帶眼都移。

浣溪沙

何處春殘不杜鵑。雨昏煙澹落花前。銷魂時節又今年。三月東風歸似客。一江春水遠於天。更無人上木蘭船。

江南春

春寂寂。思厭厭。薄寒人中酒。微雨燕歸簾。庭陰竟日東風峭。吹滿櫻桃花一匳。

江南好

春去也。極目更何堪。日落孤帆天樣遠。荒坡冷驛柳毵毵。離思滿江南。

疏影 莫愁湖上荷花甚繁六月十日厚卿芷洲端甫季子小虞爲仲子壽予

與芾卿以瘡作未與越日芷洲以詞來倚枕和之兼寄漱泉寶應寶應南溪此花數十里不斷往與亡友毛次米數得相羊水佩風裳次米時有所會今年十年無此游矣

羅衣乍索。有暮愁幾許。常負游歷。一舸來時。雲葉吹涼。湖陰自起漁笛。香紅不斷。微波遠。但望極。江南江北。早片蓑。約去落磯。更壓冷煙荒碧。猶記菰蒲倦夢。暝香澹。

似雨飛上詞筆。卻怨西風。十載飄零。此意渾如殘菂。何時一問鷗邊路。怕落盡、漸成秋色。恁朗吟、夜壑歸來、忍說那人消息。

清波引 盟心古井圖同漱泉各賦半闋

秋聲淒楚。又驚醒、宿雅起舞。碎桐搖雨。揜鐙黯無語。斷磬絮吟蟀。慘共宵深機杼。自看寒井沈沈。忍冰雪、此終古。肇慶凝塵漫數。舊闌影、今在甚處。海雲歸否。認苔際庭宇。荒墳渺千里。我亦傷心孤露。賸有殘月西樓。爲吟愁句。照

高陽臺 甲戌中冬予有夔州之役漱泉送予江上賦此別之

人去天寒。江空歲晚。與君攜手層嵐。帶一分酸。離心未飲先酣。十年水驛煙郵慣。奈而今、不是江南。盪秋魂、一尺荒波溼了征衫。桓郎已自傷搖落。問歸鴻聲裏。此別何堪。短鬢難搔。衰楊一樣毵毵。秋來髮種種落且竟有數莖白者昔潘安仁三十二賦秋興有二毛之歎予正似之。斜陽尙在孤城角。近黃昏、不見征帆。待何時、月下幽坊。

玉塵重譚。

三姝媚 荻港道中作

斜帆天際小。對蕭蕭荒陂。尙銜殘照。斷塔搖煙。戰半林黃葉。似愁難掃。幾點輕瀉。應笑我、塵棲茸帽。故壘西邊。霜角吟秋。鬢絲催老。知否蘿陰孤嘯。怕閉了、哀絃。更添淒悄。舊約匆匆。問片雲涼嶼。甚時垂釣。莫上層樓。人漸遠、江南寒早。一寸相思難寄。征鴻又杳。

玲瓏四犯 寄漱泉季子

別浦亂峯。荒城殘壘。清游今更悽斷。澹黃樓外柳。不似秋魂短。霜前翠尊同款。最難忘、謝家池館。幾疊哀彈。一襟幽恨。都作夢雲散。西風冷帆初轉。望晴嵐楚甸。難慰心眼。一封江北信。欲寄無歸雁。蘋花謝後斜陽暝。漸愁與、涼煙俱遠。渾不管、青衫早、緇塵又浣。

霓裳中序第一 孤舟夜泊寒月微茫海上斷鴻邈無消息愴然賦此  
涼蟾弄翠壑。卸卻征帆潮又落。秋樹乍驚夜鶻。但煙暗戍旂。星垂江閣。音書漫託。怕

去鴻猶怨漂泊。愁無語、一鏡廢驛。冷笛勸孤酌。天角片雲寥邈。歎似鐵、重衾正薄。宵來歸夢更惡。葉響幽坊。雨過涼幕。舊游渾似昨。奈負了、霜前素約。頻延佇、春迴征岸。寄我小梅萼。

壺中天 經黃州赤壁下示洪雨樓

楚江一笛甚勞勞。吹我去舟如葉。已是漢南秋色晚。況又懷鄉時節。隋壁欹雲。冷溪垂雨。不共殘僧說。東坡去後。暗潮猶自嗚咽。攜手更上層樓。黃州鏡裏。晴靄橫孤堞。輸與西來今夜鶴。管領蘆邊斜月。平野荒昏。亂峯寒燒。迴首添淒切。哀絃重奏。酒人還是輕別。

垂楊 漢南道上煙水淒絕。寒柳蕭蕭似閱人。搖落者因賦此解。他日漱泉見之。當亦以爲有桓郎之感也。

西風野水。賸幾株暝柳。牽人羈思。慘綠無多。笛聲吹向空煙裏。天涯何限傷心地。畫疏影、殘陽頽寺。悔年年、輕暖輕陰。負晚春游騎。憔悴孤帆自倚。漸霜落漢南。冷峯



無際。斷送秋魂。一九斜月驚鴉起。荒荒津堠人千里。歎雙鬢、飄蕭如此。相思甚處微黃。淒暗葦。

瑣窗寒

二十一日過湘南一小湖微陰作寒垂垂有雪意遠峯數點如野鳥

掠帆去沙水明瑟時有漁舟三兩溯洄菰蘆中湖上邨落柴門晝閉不復知  
世有勞人也

一櫂西風。蘋鄉秋老。冷紅猶積。昏鴉去翼。尙帶霜前離色。卷南湖、千疊凍雲。峭帆影瘦殘岫碧。漸寒汀水落。荒邨人語。最傷孤客。征篷又暝。便送盡歸潮。已非江國。漁天斷葦。似我年年蹤迹。問煙波、舊時釣徒。雁程倦柳。應未識。奈吹寒、戍角聲聲。夜壑招楚魄。

暗香

十二月五日大雪舟過峽中萬山皆縞素其上雲氣迷濛與天一色山

半楓柏蕭蕭時露丹碧下則奔濤千尺如噴銀沫野鷗數點拍拍過江去此  
身恍在冰壺曾不知世俗塵壻此西征最勝處亦予三十二年中第一奇遇

也擬作峽中泛雪圖先爲此解紀之

朔風正峭。又一篷夜雪。江空人杳。幾片凍鷗。不管殘寒下雲表。休訝潘郎鬢點。算愁外、青山俱老。望萬里、溼粉乾坤。疑是素蟾照。歎帽更一嘯。指石際冷楓。慘綠多少。軟紅盡掃。猶勝當年剡溪櫂。贏得閒身畫裏。知碧宇、瓊樓重到。甚峽影、懸似練。玉龍自繞。

水調歌頭 題蒯子範先生坐翠微圖

公也古循吏。杖節出夔州。千家山郭如畫。嵐翠上南樓。天遣婆婆老子。消受隱囊紗帽。來領峽中秋。萬里控邛僂。何用覓封侯。梧竹暗。風日美。足淹留。中興絳灌何限。四顧邈無儔。卻有渝童巴女。歲歲朱旂銅鼓。韎韐拜前驕。我起爲公舞。一嘯看吳鉤。

浣溪沙

陌上何人控玉驂。輕陰漠漠柳毵毵。羅衣初試又添寒。中酒心情閒似燕。禁煙天氣困於蠶。渾如庾信在江南。

攤破浣溪沙

采盡江蘼客未歸。一湖春水碧差池。湖上高樓樓上月，照天涯。舊夢欲憑歸燕說，新愁只有落花知。獨在玲瓏簾幕底，立多時。

卜算子 屈沱女須擣衣處

楚甸晚蕭蕭。橘柚寒無際。斷續清砧斷續猿，實下三聲淚。月暗女蘿叢。山鬼窺鏡至。巴峽秋濤下汨羅，猶似申申詈。

琵琶仙 舟中望白帝寄漱泉

天際征帆甚愁裏。過卻巫山巫峽。斜照還上層樓。興亡問啼鴉。凝望極、哀湍壞道。漸忘了、漢家陵闕。城上荒砧。沙邊斷磧。遺恨猶咽。漫回首、聽雨僧廬。數鐙下寒蟲共淒絕。剛是帶圍消損。奈西風輕別。歸雁遠。題書甚處。又一林、掃盡殘葉。料也中酒高歌。唾壺敲缺。

秋宵吟 柝聲

擁孤衾。罷遠笛。酒醒霜寒人寂。微吟悄。漸北斗闌干。數聲悽惻。夜烏啼。冷月碧。數盡瓊壺殘滴。淒還緊。記伴我年年。廢郵荒驛。清梵空山。共點點、驚回楚魄。抱關人老。聽雨秋深。一夜鬢毛白。短夢渾難覓。葉響初闌。蟲語又咽。問西風、輦路提鈴。南內誰與訴怨抑。

浣溪沙

同翰卿過次泉齋中

花氣冥濛欲破禪。紋簾茉莉靜娟娟。薄寒時節鎮相憐。越釀夜傾鸚鵡杓。秦篝曉試鷓鴣斑。劉綱夫婦本神仙。

暗香

題家書後

酒闌江閣。甚輕衾似水。羈人先覺。夢到淮南。澹月微霜下。簾幕長是歌離賦別。休更卜。鏡前紅夢。算幾日。鬢影都華。雙袖也應薄。樓角正蕭索。記伴我微吟。數徧寒柝。沈郎瘦削。曾倚鑪熏與調藥。孤負機中錦字。湘水闊。征鴻難託。便夜夜歸去也。忍教見卻。

甘州 乙亥除夕作

甚匆匆。百歲隙中塵。天涯又相催。正春鐙下了。亂山殘雪。來照深盃。惆悵雞聲馬影。人隔楚雲隈。簫鼓娥兒曲。孤抱難開。還念故園今夜。趁辛盤薦後。西望徘徊。揜銀荷不語。獨自撥寒灰。總休卜。鏡中消息。算歸期。先負綺窗梅。思千里。向東風祝。莫放春回。

鳳凰臺上憶吹簫 答次泉

虛幌籠寒。疏鐙閣夢。淹留楚客須驚。正試香天氣。中酒心情。同是江南倦羽。空望斷、雁外歸程。漂零久。百年身世。莫問秋萍。銷凝錦官春色。趁一舸輕潮。來聽鶉聲。又小屏山裏。雙鬢吹笙。占取藤蘿新月。還說與、巫峽孤青。君知否。書囊鏡檻。足換浮名。

摸魚子 憩園探梅柬次泉

款重門。玉尊初罷。疏香時度簾隙。西闌一樹垂垂發。消得何郎詞筆。春正寂。算劍外漂零。花與人俱客。孤雲片石。使夢到庭陰。有人應妒。羈思冷湘瑟。年時事。負了苔

邊游履。相思偏在故國。忍寒一夜吹橫玉。只有素娥曾識。忘不得。是初淥輕烟、孤艇江南驛。東歸甚日。去七里溪光。畫眉啼處。與子弄寒碧。次泉嚴州人

長亭怨慢 鈴聲

自江左甘郎歸後。倦上征鞍。數聲催又。馬色侵寒。雁聲搖夢下孤堦。月殘風曉。嗚咽到、蕭蕭柳。敗鐸警虛檐。也似此、將停還驟。依舊。曳驚沙落木。負了玉鞭垂手。郎當自語。向零雨、劍門禁受。莫更賦、曲裏黃驄。怕聽到、淒涼時候。只斷塔棲塵。一樣霜中。孌懣。

霓裳中序第一 丙子夔州元夕次泉被酒不歡與予蹋月上南城迺還至城

東坳望峽門。一道斜界秋練赤。甲白鹽諸山搖落。寒翠積畔夕煙舒卷。若團雪市囂漸遠。惟聞灘聲瀾瀾。與人語相亂。予與次泉或嘲或諷。各有身世之感。彼汨沒黃塵者。當不復閒如吾兩人也。因各以此解紀之。

孤蟾下倦驛。落盡江梅春是客。城上夜烏正寂。漸星暗戍樓。烟沈荒磧。誰歌楚魄。罷

玉尊腸斷今夕。空凝望、峽門秋練。一道界寒白。游歷柳邊坊陌。有箔影、釵光似織。年年歸計未得。曲榭懸鐙，小檻橫笛。斷雲迷故國。忍重問、傳柑信息。君休歎、圍鑪兒女。尙守杜陵宅。

浣溪沙

一角西樓盡日陰。溼雲如夢上青琴。薄寒時候厭登臨。單舸來時前渡暝。細禽啼處落花深。傷春傷別又而今。

高陽臺

次泉先德曾守夔州。勿勿二十年矣。次泉復客於此。其所居卽竹馬嬉游處也。酒邊花下時有身世之感。予哀其遇賦此廣之。

角斷譙門。梧寒幕府。何郎重到銷魂。騎竹歡游。而今石老雲昏。堂前燕子無歸處。渺難尋、舊日巢痕。悄無言、弔月吟秋。不爲聞猿。百年富貴春婆夢。問黃雞未唱。誰醒前塵。寶玦珊瑚。爭知少小王孫。長攜手地新煙換。奈當時、倦柳都髡。共溫存、歲晚江空。且倒清尊。

憶江南

春欲盡。何處不銷魂。稚柳輕潮催小舸。畫簾微雨揜重門。寂寂又黃昏。

河傳 同次泉登夔州南城

城闕愁絕。落花時。野戍殘旂雨微。峽中一春無雁飛。相思。北來音信稀。十二青樓臨大道。春漸老。處處生芳草。杜鵑啼人未歸。路迷。片帆吹又西。

聲聲慢 舫聲

游絲弄暝。波影搖寒。傷春人在蘭舟。倦枕重聽。無奈夢與雲流。東風一枝正緩。算垂楊、猶學輕柔。淒咽處、帶斜陽遠水。脈脈悠悠。記否瞿唐清曉。賦劍南愁句。水調應差蕩漾如煙。添了隔浦蓮謳。誰招五湖舊隱。倚征篷、欲訴還休。人去也。恁沙邊、驚起野鷗。

壽樓春 過二泉師宅示蘋湘

招梅邊秋魂。自素絃折後。雨暝煙昏。賸有羈鴻留印。野鵲啼春。幽徑悄、行無人。曳練



裙。誰哀王孫。恁題扇橋荒。敲碁墅冷。腸斷昔時塵。青谿曲。空斜曛。記映波叢笛。款  
月芳尊。怎又霜凋孤館。草生重門。還自念。蠻參軍。似野萍。飄零無根。甚馬策重撾。西  
州淚痕。棲角巾。

浣溪沙

銀葉香銷夢未殘。謝家池館雨潺潺。更無人處莫憑闌。桃葉歌闌雙槳遠。柳花吹  
盡一簾閒。愁蛾不似鏡中山。

石湖仙 江上晚霞圖用白石壽石湖居士韻爲薛丈題

春歸煙浦。有天半朱霞。標映高處。塵海此迴帆。望蓬萊、三山自去。詩情何在。且付與  
素歌蠻舞。容與共岫雲。野鶴終古。澄江一繩散綺。更重吟、宣城俊句。記得杭州。幾  
度畫船聽雨。酒浣塵襟。鏡消秋縷。好移琴柱。頻寄語。前身合在瓊府。

百字令 可園花瑞圖爲雨生題

小園清晝。又繁英如繡。細禽啼處。委佩褰纒無恙否。莫問楚宮殘舞。暖玉交杼。溫磨

比鄂寫入陔南譜。春長人壽。白華詩句重補。記取謝屐尋秋。霜前叢菊。曾蹋修蛇路。輸與闌陰雙蛺蝶。省識東風無數。交呂攀嵇。因羣拜紀。春色偏孤負。甚時花下一尊同醉芳醕。

浣溪沙 六月十日同厚卿達泉雨田游愚園柳影荷香淹留竟日賦此紀之一角南園掩碧暉。嫩蟬高柳畫簾垂。晝陰陰地憺忘歸。乍展明漪涵鏡檻。又移殘篆上琴絲。藕花如雪讀君詩。

一萼紅 楚寶讀書也園極水木之勝爲圖紀之予賦此詞用白石老仙韻楚寶倚樹歌之當知予別有懷抱也

北城陰對鍾陵一角。曉色碧於簪。虛閣分苔。疏泉引筧。塵鞅還又銷沈。斷橋外、靈旂卷雨。忍問取、離獸與哀禽。楚魄誰招商歌正激。獨自登臨。贏得亂蟬高樹。共琴書換日。澹到禪心。顧子鴨子幽棲。鄧熙之侯。飢走三徑。誰更相尋。且同拭、龍泉起舞。算關右、頻調萬黃金。不爲秋來鬢絲。已是霜深。

琵琶仙 己卯清明同游古林庵祭管巽之先生同修竹便娟池塘一碧丙子

夔州東屯之游正復似之賦此東同游並懷漱泉

挑菜餘寒載尊俎。共覓南朝陳迹。何處修竹荒祠。便娟弄春色。垂柳暗、輕煙散入。忍重問、五侯坊宅。曲理哀絃。文搜敗篋。都付悽惻。記夔府、啼鳩催歸。又飛雨朝來下。征驛。輸與暗塵千里。數年年游屐。春漸遠。巢痕換也。算再來燕子如客。那更斜日東城。有人愁寂。

浣溪沙 題棲霞殘碑便面

狎客樓空莽夕煙。段侯舊宅竟誰邊。尙留殘字委榛田。欲起布公參一指。俗書姿媚有無閒。阿誰解脫北宗禪。

瑣窗寒 題嫩冠夫人遺篋爲幼蓮賦

有客尋秋。塵封鏡檻。怨棠休蒨。團團似月。懷袖當年曾見。展銀箋、千疊冶雲。舊題俊句珠網。怕雙棲江表。空簾弔夢。妒他新燕。畫圖視我。算露晚星初。半遮人面。殘

紈牘楮。贏得韋郎腸斷。揜瑤笙、碧城舊游。夜涼鶴背歸太晚。奈并刀、不翦柔情。宛轉  
縈似繭。

前調 雪後再過二泉師宅示蘋湘

霽雪生寒。瘦筇招我。去尋陳迹。歸潮自碧。送盡何郎詞筆。倚東闌、留取斷雲。酒邊獨  
自橫怨笛。記重門款後。梅陰攜手。夜來初積。相逢更苦。問葛帳、淒風有誰追惜。庭  
荒墅冷。負了當時游歷。耿無言、古蘿自春。舊題敗壁蛛網蝕。算匆匆、莫付哀彈。百歲  
如過翼。

西河 題建侯江上春歸圖用美成韻

游歷地。年年燕子能記。廢池喬木。厭言兵角。聲又起。誰擣馬策過西州。青蕪迴首無  
際。暮帆影。愁更倚。鄉心一縷初繫。雜花生後。亂鶯飛。夕陽倦壘。蟲編蠹簡。渺秋煙。  
爭禁清淚如水。與君執手。醉舊市。游塵襟。長于南里。共話滄桑。身世算庾郎歸也。  
斷腸詞賦。都付瀟瀟吳船裏。

洞仙歌 題陳寅谷還研圖

一卷斷碧，有鸚仙倦眼，曾識荆南舊池館。記詞甄白石，格仿黃庭，晴窗底，一片松濤初展。搗來驚羽化，石老雲荒，孤負香束墨西伴。誰易米家山，長物摩挲，似舊雨、秋宵重見。算我亦青氈昔同遺，恁輦下人歸，塵封篋衍。先子沒於燕，遺命以研界贈。

壽樓春 予共祖兄弟四人，予次在末，兩兄並早世，小春從兄亦旅沒臨安，其幸而在者，小艘從兄耳。兄生道光丁亥閏五月七日，一尊爲壽，輒以五月代之。其閏者，道光丙午咸豐丁巳同治乙丑光緒丙子，迨今甲申而五矣。往在己未從兄歸里中，舍陳氏西樓，庚申依兄南村，暨來江表，兄亦繼至，每話舊游，歷歷如昨。而兄年五十有八，予亦越四十，諸父諸兄罕有存者，南村既易主，陳氏樓亂後墟矣。上下三十年疇昔弦誦之地，遂不可問。世變日亟，予亦少少衰而兄神識聰彊，過予遠甚，爰賦此解以紀之。

羅西堂青袍，算端陽閏後，芳俎頻邀。卻趁漚移前席，燕歸新巢。驚五度、風吹簫。又渡

頭重歌離騷。記曲沼蓮疏。曾樓梧冷。夢與斷雲遙。同懷感。心忉忉。奈淮南清角。浙右驚濤。賸有衰髯如雪。古荆初苞。還執手臨江皋。願百年同棲蓬蒿。任海內風塵。從兄去尋涪麓樵。予家舊在涪山之麓

憶江南 題何雪園先生出處十二圖

冬學晚。弦誦在南鄰。快雪蕭蕭假凍雀。落梅香裏證聞根。何地不程門。立雪聽經芳甸外。游牧憶前塵。在手一編無覓處。斜陽脈脈草如茵。阿世笑平津。牧豕遺經平林織。荷斧幾經過。重向蘄陽山下去。一繩幽徑入雲多。猶唱鐵樵歌。山樵供饌寒正峭。曉渡此擔簦。本是同根枯菟集。相攜來蹋一溪冰。鶴骨極峻嶒。河冰負渡闌暑後。竟夕走雷聲。擁鼻微吟秋樹下。一篝冷碧碎於星。何事更囊螢。蚊香照讀殘雪夜。樵路去佺佺。獨荷一囊尋舊迹。飛鴻指爪認微茫。一曲賦迷陽。雪夜負米前路暝。澹月上塵襟。記得楚辭吟怨句。一篇山鬼重相侵。惻惻女蘿陰。宵征遇鬼黑石渡。戍火正淒迷。鬼雨冥冥山月墮。短衣匹馬又淮西。孤憤咽征鼙。六州夜壙

容吏隱。講肆日消磨。獨自鬱姑臺上望。薄雲如絮水如羅。青眼且高歌。漢雲遠眺  
襄水曲。五載滯儒冠。匡鼎說詩應共解。侯芭載酒若爲歡。霜色一臺寒。秋風裙屐  
淹藥裹。楚客愴將歸。一點斜帆和雁遠。離心爭逐片雲飛。有淚上征衣。鹿門歸帆  
塵夢斷。禪榻證無生。北斗初橫雲漠漠。碧天無際鶴裝輕。吹下步虛聲。塵寰夢覺

憶舊游

乙酉三月二十四日阻風三義壩客桃源時屢泊於此今二十年矣

二泉師之沒亦一終星城郭猶是人民已非何必丁令威化鶴歸來而後云  
爾哉感觸前塵愴然賦此

記斜帆送暝。破帽欺寒。曾幾經過。認取羈鴻迹。又空波卷絮。冷雨吹蘿。酒邊漸覺春  
盡。誰按百年歌。但漠漠車塵。瀟瀟鈴語。懽少愁多。消磨舊游歷。算列騎防秋。夜幕  
橫戈。各有聞雞感。正星垂平野。冰斷寒河。庾郎賦筆無恙。枯樹此婆娑。奈倦旅淮南。  
吳霜半入青鏡。幡。

百字令

登黃樓有懷漱泉

斷虹初霽。倚層樓、送盡南來征轍。不見長河千尺瀉。只見驚沙吹雪。病葉欺蟬。虛檐舞蝠。夕照相明滅。高城凝竚。天涯芳草將歇。淒絕江上離心。鬧紅一舸。處處聞啼鴉。重到羽衣橫笛地。此樂更無人說。四十三年。渾如電抹。秋鬢今騷屑。故人歸否。鄉愁應上眉纈。

甘州 答漱泉玄武湖見懷之作卽用其韻

去南鴻、影裏望江城。秋色向人明。算衰楊斷岸、枯荷殘瀲。曾照星星。還共探春湖上。單舸蹙霜稜。負了漚家約。曉日漁罾。爲報北來何事。只酒邊芒角。消盡吳菱。夢淮東舊迹。煙草一程程。又臨醒、白沙如雪。問荒山、疲馬幾時乘。君歸也。燈前疏雨。且覓初醒。

齊天樂 題程與九望雲圖

春暉知在閒庭宇。回頭漸迷平楚。枚宅巢鶻。韓臺絮蟀。都是舊曾游處。斑衣漫舞。甚淮水東邊。白雲終古。獨自看天。斷箋忍續采蘭句。彭城又成閒阻。變陰晴衆壑。纔



散還聚。出岫無心。歸村易失。莫忘垂綸前渡。鄉愁正苦。指秋樹蕭蕭。葉聲如雨。問訊  
漚家。有南來倦羽。

水龍吟 秋暮悼退齋時沒且三月矣用稼軒體以代大招

秋兮燈暈虛堂些。愁兮絮寒蟹些。誰招楚魄。香凋酒殢。碧山荒些。說劍談玄。疏髯如  
雪。憶南岡些。奈乘風歸也。鶴裝烟駕。蕭蕭振。衰楊些。春盡兮空江些。相逢共。御離  
觴些。白沙黃竹。重尋斷夢。冷殘陽些。退筆埋雲。哀弦咽雨。劇淒涼些。朗吟兮夜壑。百  
年過翼。齊彭殤些。

浣溪沙 題仲瑩畫

獨抱秋心此命騷。庭陰修竹晚蕭蕭。更誰清話似參寥。鏡裏白雲閒似夢。尊前黃  
葉下如潮。遠峯眉翠未全凋。

清平樂 題小艘兄詞後

羈鴻無迹。一卷吹空碧。老去填詞愁惻惻。付與戍笳漁笛。夢迴春草萋萋。嫩寒猶

勒征衫。安得對牀清話。一鏡疏雨淮南。

百字令 得少符吳中書賦此答之丁亥試燈日也

空階飛霰。算東陽、帶眼朝來都緩。一紙綿綿思遠道。比似此情還短。屢徑蘿凋。劍池楓落。莫弄參差筦。春燈初試。峭寒猶戀孤館。悽惋攜手叢祠。霜前絮酒。曾送南征雁。廿載重逢青鬢改。愁與吳雲俱亂。淮上秋山。彭城夜雨。獨我腸堪斷。故人休問。暗塵不上行卷。

滿江紅 心谷將歸海上賦此留別依韻答之

鏡檻書囊。算千里、來依下走。奈消得、茶烟禪榻。鬢絲非舊。瞥電光陰吹野馬。浮雲世事成蒼狗。甚百年、聚散水中漚。無何有。春漸上。澹黃柳。塵漠漠。征帆皺。又草生南浦。傷離時候。二月輕陰閒似夢。一湖新綠濃於酒。載歸艫。乳燕共桃根。琅邪叟。

前調 再疊心谷韻送紀堂姪歸江寧並呈小艘兄

微雨初收。又淮甸、征車東走。芳草外、游絲白日。冶春如舊。去住三年同社燕。菀枯萬

物皆芻狗。問園基、折屐謝庭游。今何有。吾衰也。蕭蕭柳。塵面在。觀河皺。況一們草從。晨星凋候。歸計尙遲。江上櫂。盛年莫放尊中酒。算到來、白髮話更闌。鍾陵叟。

齊天樂

往在乙丑爲宿遷王子沅題一行看字得百字令調今忽忽二十三

年矣其孫果亭復出眎予醜惡不足觀乃拉雜之更用卷中傅味琴先生韻賦此解子沅既久謝賓客同題者若二泉師還之丈亦化爲異物聚散存沒之感不能無愴於中揜卷一歌不自知其詞之怨抑也丁亥秋八月六日

廿年夢斷淮西路。重來冷篁凋處。曲逕蛄啼。平皋鶴怨。天上澹無塵慮。吳雲倦羽。奈折了哀絃。秋聲如訴。隕籀蕭蕭。夜闌不是翦燈語。當時酒人墜雨。怕重招楚魄。難理羈緒。月暗銀牀。霜淒玉筍。江草江花何許。披圖更苦。算斷碧空簾。中仙曾晤。一研詒將。有琅邪勝侶。謂果亭

壽樓春

題實父山塘聽雨圖兼訊歙坡

收沙邊輕帆。正蕭蕭一弄。秋在江南。知有瘦腰沈約。斷腸何戡。家楚甸。羈吳嵐。算此

情柔如春蠶。去十里蓮涇。和愁不斷。和淚上征衫。還遲我。霜中龕。奈魚天易暝。雁書空緘。一樣阻風中酒。倦懷都芟。物如此。人何堪。對野橋。衰楊毳毳。問瘦碧詞人。西窗甚時來共談。

百字令 題黃豪伯印度辨方圖

雲橫西極。自經馱白馬。杳無游屐。沙度繩行三萬里。厲我摩秋健翮。祇樹千盤。恆河一線。放眼乾坤窄。使星宵朗。侏儻羅拜前席。聞道衛藏傳烽。紛爭蠻觸。誰展籌邊策。玉斧分疆知許事。一笑風前岸幘。倚劍空同。乘查博望。回首成陳迹。須彌芥子。新圖爭忍重譯。

掃花游 題陳沅小象

橫塘舊曲。又一騎南征。碧雞春窈。夕烽正褻。向玉關卷甲。和雲先到。故國煙空。贏得修蛾自掃。楚歌悄。恁篋篋罷彈。素月雙照。迢遞春漸老。算解敝蘭因。野鶻啼早。隊歡似草。只眉樓一角。同此孤抱。證取叢祠。卻恐南荒雁杳。畫圖渺。漫重吟。怨紅悽調。

百字令 盤屋路山夫坏卜宅山陽城北閣潛邱著書處也邊頤公亦嘗居之

名之曰葦西草堂歸安張叔憲度爲作拜詩圖予賦此解詩指潛邱也

葦西一舸。是晉祠遺老、舊譚經處。汲冢墜文如掃葉，不辨何今何古。一卷烟空，百年電謝，有客重凝佇。琴歌誰續。沙邊羈雁能語。記否交頤攀張，負乾坤清氣，來守窮章句。一任淮南塵瀆洞，贏得墊巾麾塵。枚宅孤吟，韓臺罷釣，莫誤尋秋路。披圖根觸，甚時還叩幽宇。

一萼紅 題楚寶竹居圖次白石韻

冶山陰對一叢寒玉散，髮此斜簪。虛白初生，輭紅不到，何有塵海飛沈。恁佳日、清芬自誦，采丹實、知有九苞禽。虛閣凌霞，層臺款月，曾共登臨。一自北來仗策，奈年時孤負，酒賦琴心。空翠烟霏，古苔霜蝕，猿鶴無計重尋。算抱此、干霄勁節，忍一卷、虛牝擲黃金。待到西窗再來，已是秋深。

百字令 集玉田句題蓉曙申江話別圖

天涯倦旅。月下笛。甬東積翠。山舍倚危樓。一笛八聲。甘州散人來否。臺城路爲湖天賦。社燕盟鷗詩酒共。蝶戀花。欵杏花。花下作肯。被水雲留住。清波引。湖湘送別。廉使斷碧分山。瑣窗寒。悼王碧山。平波卷絮。高陽臺。西湖春感。卻是陽關路。虞美人。憶柳曲東瀛柳色。臺城路。寄太白山人陳又新。依依心事最苦。齊天樂。遷居涼意正滿西洲。聲聲慢。與碧山泛舟煙隄小舫。又題夢窗自度曲。如把相思鑄。卜算子。欲趁桃花流水去。唐多令。懷西湖。只恨翦燈聽雨。甘州。錢周草窗西歸。萬里潮生。桂枝香。送葉賓州東歸。一番春減。龍吟曲。客中留別友人。遠思愁徐庾。摸魚子。寓澄江喜魏叔舉至。雁書休寄。念奴嬌。懷響友。此時愁在何處。又客中送友。

霓裳中序第一 題遲庵師散花圖

繩牀佇澹月。虛閣籠寒塵。事闋清暇。更袖梵夾。正簪列乍疏。爐熏初爇。明璫素襪。想步虛聲在瑤闕。諸天迴。繽紛隊雨。款款上吟篋。騷屑。煩襟難雪。願授我。維摩半揭。拈花來證慧業。別墅彈碁。小檻棲帟。華鬢吹一霎。有寶樹。靈禽自答。還凝望。東山重

起莫斷世閒法。

浣溪沙

天際斷霞魚尾鮮。一繩南雁送歸舷。孤他楚竹與湘煙。波亦未生霜未落。漢川西望柳如絲。舊游重到十三年。

憶江南 題吳華卿一詩一研圖

清芬渺。三泖昔栖遲。斷石不隨雲景幻。一編重把瑣窗西。惻惻夜烏啼。

浣溪沙

總轡扶桑日不紅。漫吹羌篴怨東風。而今離訊斷南鴻。穠李搏雲欺弱植。香蘭咽露揜深叢。底須重問碧翁翁。

春在愁中與夢中。晚鶯雛燕各西東。東皇無計惜殘紅。乍采靡蕪棲曲徑。又攜芍藥下疏櫳。恁時相見太匆匆。

瓊島冥冥隔霧中。蘭橈去後綠波空。舊湔裙處一相逢。化鶴千年無翼返。靈犀一

點有心通。莫將消息誤東風。

幾日偷窺宋玉牆。吳孃學步劇郎當。更扶殘夢下瀟湘。燕外笑桃和雨散。鶯邊舞

絮逐風狂。爭知前度有劉郎。

齊天樂 三月九日作

庾郎先自傷遲暮。東風又吹羈絡。別嶼帆空。孤譙角暗。贏得斷萍零絮。鶻啼正苦。奈雨暝煙昏。夢歸無據。雙屐纔迴。李花又送隔牆去。彈碁昨經別墅。是誰持急劫。將斷還誤。客燕無依。羣鶯自擾。爭忍東皇孤負。哀絃漫撫。恁彈澈霜辰。更無人寤。望極扶桑。海天渾未曙。

百字令 乙未清明

阮郎游屐。算年時、蹴徧軟紅香土。剗地東風能幾日。又見飛英如雨。北渚鷗閒。南園螻鬧。春色渾無主。吹愁不醒。羽觴還醉芳杜。記否二曲人家。朝朝冷食。誰疊叢祠鼓隄。上蹋青歌未歇。只有當年張緒。槐火方新。榆錢自擲。莫問湔裙處。望中華表。再



來遼鶴能語。

徵招 仲弢前輩將經洛而南祖之斜街兩浙館暗雨冥冥悄焉欲絕賦徵招  
一闋送之並東子培子封叔衡

微陰正揜銀灣路。將離共尋尊俎。春思已闌珊。又西窗聽雨。杜蘅愁不語。任煙際、笑  
桃紅舞。丁令心孤。沈郎腰瘦。恁時情緒。去去。洛川游。只贏得、春暉百年長駐。杜宇  
莫催歸。問南歸何處。海桑知幾度。便相見、不堪重數。馮高望、萬里乾坤。託醉鄉分付。  
浣溪沙

織室栖雲事有無。金錢十萬也應輸。一衿離緒又黃姑。紫府丹書除舊籍。紅牆碧  
漢渺靈圖。盈盈脈脈近何如。

高陽臺

網戶常扃。雕櫳不暝。望中煙水淒迷。舊約湔裙。無人自弄參差。花開陌上歸猶緩。算  
殘鶻、五夜休啼。夜何其。天上人間。一樣相思。鈿車去後梨雲冷。只燈邊閣夢。笛外

歌離卷盡紅心，爭禁寸草春暉。雙飛乳燕，渾無主，怕湘簾、一桁重垂。莫偷窺、明鏡塵生，憔悴誰知。

長亭怨慢 送及之歸六合

又聽到、清宵啼鴉。驀上離亭，柳絲吹雪去。國心禁煙，天氣峭寒咽。卅年陳迹，爭忍向、燈前說。說也黯銷魂，算不是、傷春傷別。淒絕。正江南三月，草長鶯飛時節。春暉自永，莫更念、海桑塵劫。只我願、夢化吳雲，逐天際、歸颿如葉。怕割取吳雲，難展離愁千纈。

百字令 乙未七月十八感賦是日亡婦五十生日也

哀蟬正咽，掩虛堂、又隕霜前衰葉。小簾輕衾，眠未得、況復嫩涼時節。楚魄難招，吳趨莫問，陳迹如煙滅。滄桑塵事，夢迴爭忍重說。百歲能幾光陰，斷腸分手，兩度聽啼鴉。錦瑟華年休更數，可奈冰絃都折。薊北雲孤，淮南草暗，回首成騷屑。潘郎老矣，鬢絲今又將雪。

滿江紅 題子威南窳春牧圖卽用其見投韻

城上春陰正。俯仰、今古自斟。菰蘆外、軟紅如駛。煙語重尋。萬里乾坤無伯樂。龍媒伏櫪。孰知音。算此情、遙挹石湖仙。深復深。扶桑夢、傷我心。槃阿歎、且孤吟。奈一鞭斜照。觸撥塵襟。望斷遼東游牧地。年時鑄淚有黃金。甚柳邊、六轡正逍遙。調似琴。

浣溪沙 題江建霞所藏屈翁山手書崇禎宮詞冊

一老纍然蹋野陰。漢家城闕劇蕭森。鵲啼鶴唳又而今。遺蹟半淪皋羽研。行吟還抱水雲琴。更無人識黍離心。

江南好 伊園八詠爲六舟丈賦

伊園好。寸草向春暉。永憶射湖棲隱地。晨馨夕絜戀庭闈。曾補白華詩。春暉草堂  
伊園好。宛在薜蘿叢。修竹便娟涵太古。一龍一虎且從容。道不以聲通。溫雪山房  
伊園好。秋色在東籬。絢爛幾經歸冷淡。陰凝方始慎幾微。此義更誰知。東籬  
伊園好。一室小於舟。載取圖書虹貫月。底須人海更湛浮。容與任天游。容與

伊園好。喬木幾經秋。朱萼絳趺歌粲粲。謝家玉樹冠南州。式好永無尤。移華永好  
伊園好。如締漢陰交。力少功多成世運。機心機事日相高。抱甕敢辭勞。抱甕廬  
伊園好。靜待月華明。照澈大千諸色相。我人生佛了無營。何用學無生。待月處  
伊園好。一撫少文塵。萬里河山同聚米。百年身世本勞薪。等是倦游人。臥遊廊

浣溪沙

戊戌人日夢與禮卿及二客鬪詩牌。予得句云芳草碧沾游子屐。夕

陽紅到小姑祠。既覺乃續成此解紀之

記否江東倦羽栖。擘牋重過畫樓西。蒯侯風調似當時。芳草碧沾游子屐。夕陽紅  
到小姑祠。夢迴爭得不淒迷。

百字令

沔縣謁諸葛武侯祠

陣雲似墨。揜叢祠。常與軍山終古。廢壘蕭蕭。依沔上。萬壑松濤猶怒。鶴下層霄。猿吟  
邃谷。彷彿靈旂駐。宗臣遺象。望中猶想綸羽。記否古驛沙黃。風斜雨驟。遲我西征  
賦。世事如碁。經幾劫。不數三分割據。起陸龍蛇。處堂燕雀。爭得南陽顧。倚天舒嘯。石

琴煙際重撫。

賣花聲 題陳衡山梧月山館圖

庭際碧梧輕。霽月籠明。一枝一葉總秋聲。但到秋聲聽不得。聽也凋零。琴緒斷還生。故國霜清。絮蟲莫更不平鳴。北斗漸闌書漸遠。南雁無情。

百字令 丙午七月二日菱湖觀殘荷。臞齋前輩用白石老仙均成此闕。予亦

繼聲兼憶東華舊遊玉堂天上不知其詞之怨抑也

塵纓乍濯。湖晴湖一角。與鷗爲侶。湖外龍山青萬疊。江草江花無數。萼苦房空。蘋疏蓋揜。纔過廉纖雨。翠尊易竭。倚舷還賦愁句。遲暮極目天端。瓊樓無恙。我欲凌風去。記否昆明清露曉。墜粉尙零前浦。亂蕊爭榮。孤根自轉。曾共蓬瀛住。夢迴青瑣。與君重問煙路。

百字令 再用白石老仙韻答臞齋前輩秋風乍起江上鱸肥倚鐙歌之不啻  
廣招隱矣

蕙風初霽。且方舟容與、招攜勝侶。十里冷紅香不斷。菰葉蘋花誰數。雁戶延秋。魚天弄暝。中酒人如雨。晚蟬高樹重吟白石新句。歸暮銀漢將斜。元戎小隊。紫陌鳴鞭去。廿載蓬飄人海裏。負了畫橋煙浦。楚甸腸迴。吳霜鬢點。商略編茅住。荷衣遲我。底須留滯征路。

金縷曲 題次珊前輩日照樓餞別圖用臞齋前輩均

北望浮雲疊。記樓陰、斜陽欲暝。脂車將發。衿上酒痕猶未浣。已遠漢家宮闕。忍重話、軟紅煙月。蒼狗白衣經幾變。更倚天、長劍商歌闕。渾不爲、傷春別。江南叢樹棲巖列。算年時、杜陵奔走。漸空皮骨。諫草如風傳宙合。世事爭禁千蝸。問朝士、貞元幾絕。霜隼摩秋凋勁翮。況相逢、雙鬢都成雪。鐵如意、擊將裂。

金縷曲 再疊前韻送伯平前輩之吳門

天際山重疊。黯銷魂、霜高木落。飄輪催發。聞道百官翻舊譜。知否官箴王闕。且消受、滄浪風月。楚尾吳頭翮竹馬。奈秋禾、生耳民心闕。玉尊罷、慘將別。經年幸廁楊盧。

列。算難忘。蓬萊文筆。建安詩骨。熱惱漸蠲。機漸泯。一任秋蠅夜蝸。正起舞。塵纓都絕。富貴浮雲。非我願。願孤舟。歸釣寒江雪。重話舊。唾壺裂。

浪淘沙 題唐慕潮梧院秋痕圖

冰簟嫩涼生。斷夢難成。一庭梧影劇淒清。依約舊時攜手地。淡月籠明。憶否曲闌凭。琴語初停。亂蟲莫更作秋聲。零露漸晞星漸轉。楚魄頻驚。

半塘定藁

運藁





王鵬運（道光二九——光緒三〇）

字幼遐。號半塘。晚號鷺翁。廣西臨桂人。同治九年舉人。以內閣中書累遷至禮科掌印給事中。直諫。十年。疏數十。皆關係政要。告歸。寓居揚州。以省墓道。蘇州病卒。精研詞學。爲近代宗匠。生不憚款。抑塞。悉寄於是。嘗校定唐宋元名家之作。哀刻爲四印齋詞。世稱善本。

序一

半塘詞嘗刻於京師。爲丙丁戊三集。今刻於廣州者。乃君哀其前後七稿。刪汰幾半。僅存百許首。自定本也。予校讎既竣。而序之曰。同在人海之中。相遭而爲友。相友而又相知。而忽焉以逝者。莫不以爲人事之至悲。況乎夙以文字相切劘。共歷患難。及其別離。商訂舊業。言笑若親。而甫接其書。遽聞其死者。此予所由摧傷感歎而不能自己也。始予在汴梁。納交君。相得也。已而從學爲詞。愈益親。及庚子之變。歐聯隊入京城。居人或驚散。予與同年劉君伯崇。就君以居。三人者。痛世運之淩夷。患氣之非一日致。則發憤叫呼。相對太息。既不得他往。乃約爲詞課。拈題刻燭。於喁唱酬。日爲之無閒。一藝成。賞奇攻瑕。不隱不阿。談諧閒作。心神灑然。若忘其在顛沛兀艱中。而以爲友朋文字之至樂也。比年君客揚州。予來粵東。蹤迹乖阻。書問時月。相往還。每有所作。必以寄示。予謂君詞於回腸蕩氣中。仍不掩其獨往獨來之概。君乃大以爲知言。今年春。郵寄小象。屬摹卷端。謂令人他日得見此老鬚眉。其風趣如此。方冀易

一二歲予解組北去。從君襄羊山水閒。各出所作相質證。此樂正未有艾。未幾而君訃至矣。悲夫。悲夫。君天性和易而多憂戚。若別有不堪者。旣任京秩。久而得御史。抗疏言事。直聲震內外。然卒以不得志去位。其遇厄窮。其才未竟厥施。故鬱伊不聊之概。一於詞陶寫之。君詞導源碧山。復歷稼軒夢窗。以還清真之渾化。與周止庵氏說契若鍼芥。其必名於後。固無俟予之贅言。而零縑遺墨。燦然如新。逝者不可復作。抑將何以爲懷耶。他日伯崇見是編。其感喟又當何如耶。歸安朱祖謀。

序二

頃年老僕自謫所歸。寓家羊石。於是老友古微侍郎督學來此。蓋自京師別去。且十年不翅矣。一昨甫相見。侍郎則驟語僕曰。給諫王幼霞今客死蘇州。幸得其遺詞。皆手定。將爲之刊印以行。僕聞之。驚悲與侍郎同心哀之。遂請其集以歸閱焉。皆曩昔臺閣餘暇時。朋舊文酒宴集。搭拍應副。若不越乎流連光景之情文。其爲僕所親見。吮毫伸紙者。泰半也。今再讀其遺詞。幼眇而沈鬱。義隱而指遠。臚臚而若有不可於

名言。蓋斯人胸中別有事在。而犖然不能行其志也。與僕同。脫幼霞能稍濡忍事。未可知。乃決然侘僚以去。寧流落至死。一瞑而不視。豈謂非慷慨扼腕獨立不屑之士也歟。僕今既老醜閒廢。幼霞復彫喪。人閒世尙何者堪把玩留戀。況浮漚文字之閒乎。乃吾侍郎獨不閒。故舊死生之故。爲幼霞謀遺集之傳。而繇邈乎其情。僕爲之悵焉動一念矣。侍郎曰。日吾且開雕。然則非君序之不可。於是乎言之。而益增吾悲。

光緒甲辰冬十月。南寧鍾德祥。

# 半塘定稿

臨桂王鵬運佑遜

袖墨集 丙戌至己丑

掃花游

豐臺菊花零落同槐廬粹父泥飲叢祠倚此索和

彎環十八是丹鳳城西賣花邨路。舊游憶否。又蒼煙偷換。穠春歌舞。好約來遲。一片秋聲在樹。自凝佇。歎著意訪秋。秋轉無據。釀酒重弔古。記往日詞人醉香深塢。遠山翠縷。尙依稀認得。那人眉嫵。倦倚西風。誤卻紅牙舊譜。喚歸去。聽叢祠暮天鐘鼓。

毛西河姬人曼殊豐臺張氏女也

摸魚子

瑟軒前輩閱近作拜新月詞有句云釣竿百尺綴珊瑚不羨麒麟閣

上圖欲取鼇魚斫作膾問君何處覓渚沽蓋櫜括詞中語也倚此奉答

鎮無聊。一尊相屬。罪言君試聽取。管城食肉都無相。妄意鳳脩麟脯。君且住。問鯖合侯家。勝得齋鹽否。書空自語。歎臣朔常飢。將軍負腹。奇氣向誰吐。麟閣上往事不

堪細數。算來圖畫難據。高平博陸皆人傑。屬國爾來何許。休起舞。使燕頤權奇無覓。侯封處。歌子和汝。縱掣得金鼈。鬣髦未掃。莫慰此情苦。

滿庭芳 篝燈夜坐忽聞清歌墜懽悵觸渺兮予懷也

風露高寒。蛩螿怨抑。夜闌人倚燈篝。暗塵驚落。何處發清謳。已是潘郎老去。青衫在。鬢減花羞。十年恨。無端悵觸。腸斷舊風流。風流。彈指處。畫中人遠。夢裏春柔。料記曲當時。紅豆還留。倩取窺簾淡月。悲懽事。一例全句。霜華重。丁丁漏水。銀箭咽潛蚪。

秋宵吟 霧雨釀寒秋光向盡和鶴公

冷雲低。敗葉委。又到秋光婪尾。東園畔。記醉綠酬紅。餞春曾幾。思纏絲。意旖旎。撩亂愁絲難理。西風悄。又霧雨冥迷。釀寒如此。賴有黃花。共晚節。傲霜未已。故人書斷。海客談空。何物令公喜。安得滄江裏。一葉淩波。深入萬葦。泝空明。弄笛船唇。歌闋明月正在水。

金縷曲 霜露既至雲物皆秋獨絃哀歌用杼予懷詞成以示巢隱曰此秋聲

也爲之擊節

寂寞閒門閉。又天涯、歲華如此。旅懷孤寄。蛇燕嬌鶯前日事。依舊空階絡緯。更著甚、管絃清脆。薜荔叢深。猿狖嘯。料靈均、應恨歌山鬼。還禁得、幾憔悴。海山煙樹蒼茫裏。自成連、刺船歸後。果移情未。白眼看天星與月。但見樓臺彈指。問高處、闌干誰倚。漫遣鈿箏移玉柱。鑄相思、枉費黃金淚。聽嘹亮、鴈聲起。

青山溼徧

八月三日譙君生朝也。歲月不居。人琴俱往。納蘭容若往製此調。

音節淒惋。金梁外史龍壁山人皆擬之。傷心人同此懷抱矣。

中秋近也。年時棖觸。雙笑行觴。記得木樨香裏。倚青匳。特換明妝。更喁喁、吉語祝蘭房。願年年、花好人同健。醉花陰、不羨鴛鴦。誰信皋橋賃廡。飄零天壤王郎。任是他生能卜也。難禁得、此際神傷。二十三年斷夢。霜侵鬢。誰念無腸。看依然、兒女拜成行。只不堪、衰草殘陽外。醉棠梨、淚血沾裳。明月無端弓勢。宵來空照流黃。

臨江仙 己丑除夕

爆竹聲中催改歲。年年此夕殊鄉。天涯兄弟各相望。幾時歸去。談笑醉春觴。已是向平昏嫁了。名山願好誰償。休從鏡聽卜行藏。春花秋月。流轉任風光。

蟲秋集 庚寅至癸巳

太常引

畫闌秋氣與雲平。病起怯衣輕。吟思底淒清。聽依約、蛩聲鴈聲。寧馨老子，十圍便腹。空洞儘容卿。青眼幾時橫。看山色、新來瘦生。

卜算子

盼到月輪圓。夜夜期三五。誰信清光欲滿時。偏被纖雲妒。七十二鴛鴦。交頸花閒住。誰信成雙作對飛。賸遣孤鸞舞。

長亭怨慢 寒夜飲水芝支館用壁上龍壁山人詞韻索省旃和

漫商略。愁長宵短。滿目風塵。素襟誰浣。歲晚冰霜。中年絲竹。意何限。願花長好。爭信我風懷減。許事不須知。看月與、清尊俱滿。依黯認酒痕猶是。早是酒人星散。清寒



對影漫贏得，笑人鬪晚。儘依依，照座銀荷也。羞對年時心眼。倩簾幙橫枝，長笛夜寒相伴。

采桑子

闌干彖曲閒凝佇。日影東廊。月影西廊。一霎寒溫值底忙。小園貯得春多少。花要生香。葉要生香。那禁東風柳絮狂。

水龍吟 平生嗜睡成癖讀天籟集睡詞深有契於予懷者戲用原韻以誌賞

心

舉頭十丈塵飛。人間何許埋愁地。頽然一笑。玉山自倒。春生夢寐。我已相忘。蕉陰覆鹿。槐根封蟻。歎無情世故。倉皇逐熱。問誰識於中味。漫說朝來拄笏。最宜人。西山晴翠。何如一枕。忘機息影。黑甜鄉裏。萬事悠悠。百年鼎鼎。付之酣睡。待黃鸝三請。窺園乘興。倩花扶起。

念奴嬌 登陽臺山絕頂望明陵

登臨縱目對川原。繡錯如接襟袖。指點十三陵樹影。天壽低迷如阜。一霎滄桑。四山風雨。王氣銷沈久。濤生金粟。老松疑作龍吼。惟有沙草微茫。白狼終古。滾滾邊牆走。野老也知人世換。尙說山靈呵守。平楚蒼涼。亂雲合沓。欲酌無多酒。出山回望。夕陽猶戀高岫。

味梨集 甲午乙未

滿江紅 送安曉峯侍御謫戍軍臺

荷到長戈已禦盡。九關魑魅尙記得。悲歌請劍。更闌相視。慘淡烽煙邊塞月。蹉跎冰雪孤臣淚。算名成終竟負初心。如何是。天難問。憂無已。真御史。奇男子。只我懷抑塞。媿君欲死。寵辱自關天下計。榮枯休論人閒世。願無忘。珍惜百年身。君行矣。

八聲甘州 浚伯愚都護之任烏里雅蘇臺

是男兒。萬里慣長征。臨歧漫淒然。只榆關東去。沙蟲援鶴。莽莽烽煙。試問今誰健者。慷慨著先鞭。且袖平戎策。乘傳行邊。老去驚心鼙鼓。歎無多憂樂。換了華顛。儘雄

虺瑣瑣。呵壁問蒼天。認參差、神京喬木。願鋒車、歸及中興年。休回首、算中宵月、猶照  
居延。

水龍吟 乙未燕九日作

東風不送春來。如何只送邊聲至。斷雲閣雨。簾櫳似夢。冷清清地。鑪火慵溫。唐花欲  
謝。惱人天氣。更無端、清角乍淒還咽。直爲喚、新愁起。記得年年燕九。鬧銅街、春聲  
如沸。香車寶馬。青紅兒女。白雲觀裏。節物驚心。清游誰續。好懷難理。算勝他、鐵甲衝  
寒墮指。向沙場醉。

金縷曲 二月十六日紀夢

夢境非耶是。是分明、親承色笑。融融洩洩。晴日房櫳周旋久。左右孺人穉子。恍歷歷、  
少年情味。懊恨晨鐘催夢轉。擁寒衾、往事零星記。賸點點、行行淚。不堪衰鬢成翁  
矣。試回頭、卅年彈指。悲懽夢裏。難得宵來團圓樂。情話依依在耳。似遠別、恩恩分袂。  
若是九原仍骨肉。算此身、此日翻如寄。非耶是、問誰會。

清平樂 次園公韻

百年草草。玄髮無多了。負手長空看過鳥。青鏡本無塵到。逍遙我笑南華。華胥夢裏誰家。好是春風浩浩。吹開吹落千花。

虞美人

春衣欲試寒猶重。愁是東風種。閒拋金彈打流鶯。不道天涯蕩子，尙關情。屏山可有人行處。禁得愁如許。拚教花落舞山香。誰向曲中，念取惜春陽。

念奴嬌 星岑爲題戴笠圖殷殷以事功相助勉倚調賦謝並致媿辭

男兒墮地。看風雲咫尺。幾曾心死。也識荒雞聲不惡。無那鬢星星矣。鉛杵生涯。權椎事業。俯仰猶餘恥。篋中鳴劍。夜深休吐光氣。堪歎得失雞蟲。百年未滿。寸寸變強似。坐對畫圖心語口。裴笠諒非難事。邱壑因循。塵埃襯襪。微尙仍虛寄。媿君良厚。拂衣行釣雲水。

唐多令 四月初九日作

春樹噪昏鴉。春城咽暮笳。正紛紛、紅雨迷花。都是東風來往路，恁回首，便天涯。簾  
幙幾重遮。深深燕子家。莫思量、舊日繁華。紙醉金迷誰會得，已春色，一分差。

祝英臺近 次韻道希感春

倦尋芳。慵對鏡。人倚畫闌暮。燕妒鶯猜，相向甚情緒。落英依舊繽紛，輕陰難乞，枉多  
事。愁風愁雨。小園路。試問能幾銷凝。流光又輕誤。聯袂留春，春去竟如許。可憐有  
限芳菲，無邊風月。恁都付、等閒花絮。

玉漏遲

望中春草草。殘紅卷盡，舊愁難掃。載酒園林，往日游情倦了。幾點飄零花絮，做弄得，  
陰晴多少。歸夢好。宵來猶記，鶻鷲親到。尾長翼短如何，算愁裏聽歌，也傷懷抱。爛  
錦年華，誰信春殘恁早。留取花梢日在，休冷落，舊家池沼。吟思悄。此恨鷓鴣能道。

點絳脣 餞春

拋盡榆錢，依然難買春光駐。餞春無語。腸斷春歸路。春去能來，人去能來否。長亭

暮。亂山無數。只有鷓鴣聲苦。

南鄉子

爛醉復奚疑。紅瘦偏憐衆綠肥。聽徧禽言行不得。誰知。坐看春光冉冉歸。底事有成虧。一曲英皇遠別離。待把長竿浮大澤。依依。雲水微茫意轉迷。

鶯啼序 子苾示讀同叔問登北固樓用夢窗韻聯句之作觸我愁思仍用原

韻奉答

無言畫闌獨凭。黯吟懷似水。絮風悄。換到鷓鴣聲亂。紅飄盡殘蕊。聽幾度、邊笳自咽。鄉心遠。逐南雲墜。悵風塵、極目栖栖。總是愁思。沈醉休辭。浮名過羽。底英雄、豈子儘空外。歸鴈聲酸。碧山人遠。莫至。恁天涯。登臨弔古也。雲裏帝城遙指。算長堤。芳草萋萋。解憐幽意。新詞讀罷。琴筑蒼涼。想寤歌獨寐。清嘯對江山形勝。坐念當日名士。新亭。暗傾鉛淚。飄輪電卷。驚濤夜湧。承平簫鼓。渾如夢。望神州。那不傷愁悴。風沙滾滾。因君更觸前游。驚心短歌聲裏。長安此日。斗酒重攜。且吟紅寫翠。慢省念。關山

飄泊海水橫飛。怕有城烏喚人愁起。與君試向危樓凝睇。綠陰如幙。芳事歇。惜流光。誰解新聲倚。從教淚滿青衫。俯仰蒼茫。恨題鳳紙。

鷓鴣天 偶欲爲詞率成五十五字索解人不得也

喚取花前金叵羅。醉時了。醒時歌。東風去住無憑準。奈爾雞聲馬影何。雲慘淡。雨滂沱。金城楊柳白婆婆。不知生意誰矜惜。銷得先生老茗柯。

八聲甘州 芳菲已歇。懽事去心。濁酒孤吟。悽然念遠。不識一聲河滿。視此何如耳。

其年年。花底說春歸。今年倍傷情。倚闌干不語。水分新綠。天蹙遙青。點檢奚囊題句。賸得瘞花銘。消受清和意。簾額塵輕。愁裏漫聽鷓鴣。算天涯啼徹。都是離聲。悵故人不見。落日自高城。更休逐。孤雲南望。但平林。如薺野煙生。家山遠。寫朱絃恨。誰弔湘靈。

南鄉子

斜月半朧明。凍雨晴時淚未晴。倦倚香篝溫別語。愁聽。鸚鵡催人說四更。此恨拚今生。紅豆無根種不成。數徧屏山多少路。青青。一片煙蕪是去程。

徵招 過觀音院追悼疇丈用草窗九日懷楊守齋韻

林梢舊灑西州淚。驚隨暗塵飛到。吟思滿蒼煙。恨倚闌人渺。殘僧驚客老。問哀樂、中年多少。冷落招提。夢痕重省。晚鐘催覺。翻幸錦鯨游。胡笳怨、不入高山琴調。愁影亂兼葭。儘長歌鼓帽。凌雲書勢好。與誰證、酒邊孤抱。料今夜、月落梁空。定斷魂、淒照。

驀山谿

流雲試雨。潤逼琴絲緩。池館綠陰濃。炫金英、小槐黃綻。營巢燕子。日永哺雛忙。鑪煙定。漏聲遲。涼意生羅扇。懷人斷句。閒劃闌干徧。不是愛言愁。一回吟、一程人遠。試燈時候。數過棟花風。曾幾日。又新蟬。此恨憑誰遣。

齊天樂 薰風南來殘暑自退星岑以新作見示依調奉酬時六月五日

鳳樓西北關情地。喁喁酌花私語。聽雨前番。歸雲此夕。已是不禁離緒。荷衣漫與。問



雙槩來時，舊逢懽處。比翼鷓鴣，爲誰顛倒意如許。旗亭題句尚在，風流人共說。江上孫處。醉墨空揮，穠春易失。月偃虛堂如霧。淩波路阻，早負卻辜芳。斷腸尊俎。夢影迷離。曉鐘驚覺否。

一斛珠

雨饜風虐。寒山如睡，何曾覺。黃花輕負重陽約。離恨誰知，人遠鴈難託。當時心力空拋卻。天涯原在紅闌角。愁濃莫戀郁膠薄。入骨相思，禁得幾回錯。

徵招 得夔生白門書卻寄

鴈聲催落空梁月。淒然頓驚離緒。料得據梧吟，鎮沈冥誰語。露荷彫枉渚。更休問，采香儔侶。賴有西山，向人依舊，數峯清苦。獨酌不成懽。霜風緊，落葉打窗如雨。蕭瑟對江關。憶蘭成詞賦。秣陵秋幾許。定愁滿，古臺煙樹。夜堂悄，有夢從君。化斷雲千縷。

一叢花 長夜薄病短夢頻回窗月鄰雞清寒入骨用東坡病起韻

睡鄉安穩夜如年。燈乳綴花妍。虛堂漏定吟魂悄，枕函靜，思落誰邊。羅幙徘徊，紋疏

皎潔。應是月輪圓。薄寒依約上屏山。塵夢淡於煙。老懷不耐雞聲惡。儘長路、鞭影爭先。爲報鄰鐘。暫時休打。容我五更眠。

鶯翁集 丙申丁酉

鶻蹋枝 馮正中鶻蹋枝十四闋鬱伊恹恍義兼比興蒙嗜誦焉春日端居依

次屬和憶雲生云不爲無益之事何以遺有涯之生三復前言我懷如揭矣

落蕊殘陽紅片片。懊恨比鄰。盡日流鶯轉。似雪楊花吹又散。東風無力將春限。慵把香羅裁便面。換到輕衫。懽意垂垂淺。襟上淚痕猶隱見。笛聲催按梁州徧。

斜日危闌凝佇久。問訊花枝。可是年時舊。濃睡朝朝如中酒。誰憐夢裏人消瘦。香

閣簾櫳煙閣柳。片霎氤氳。不信尋常有。休遣歌筵回舞袖。好懷珍重春三後。

風蕩春雲羅樣薄。難得輕陰。芳事休閒卻。幾日啼鶻花又落。綠牋莫忘深深約。老

去吟情渾寂寞。細雨檐花。空憶燈前酌。隔院玉簫聲乍作。眼前何物供哀樂。

漫說目成心便許。無據楊花。風裏頻來去。悵望朱樓難寄語。傷春誰念司勳誤。枉

把游絲牽弱縷。幾片閒雲。迷卻相思路。錦帳珠簾歌舞處。舊懽新恨思量否。  
誰遣春韶隨水去。醉倒芳尊。忘卻朝和暮。換盡大隄芳草路。倡條都是相思樹。蠟  
燭有心燈解語。淚盡昏焦。此恨銷沈否。坐對東風憐弱絮。萍飄後日知何處。  
幾見花飛能上樹。難繫流光。枉費垂楊縷。箏雁斜飛排錦柱。只伊不解將春去。漫  
許心情黏地絮。容易飄颺。那不驚風雨。倚徧闌干誰與語。思量有恨無人處。

卜算子

影照小像倩潏生作圖先之以詞

構景未須奇。要稱蕭閒我。邱壑中間謝幼輿。此意平生頗。湍急倚山攔。峯削將雲  
裏。雲淡山虛水自清。終老斯鄉可。

阮郎歸

擬浣花

雛鶯啼去怨春殘。餘香襟袖斑。朱絃辛苦再三彈。心期深訴難。金鴨冷。黛蛾攢。依  
依山上山。將離花好自愁簪。由他紅半闌。

浣谿沙

題丁兵備丈畫馬

苜蓿闌干滿上林。西風殘秣獨沈吟。遺臺何處是黃金。空闊已無千里志。馳驅枉抱百年心。夕陽山影自蕭森。

鷓鴣天

笑裏重簪金步搖。鸚哥學語儘能嬌。祇愁淡月朦朧影。難驗微波上下潮。 淺十色。燭三條。東風從此得愁苗。靈蕤祕記分明在。回首神峯萬仞高。

鬪莎行

荷淨波涼。草枯塵細。一年最是秋容易。生憐花鴨儘能言。橫塘冷暖真知未。 落窠吟情。刁騷涼吹。耽閒偏識愁滋味。白波浩蕩指鷗天。紅闌那角秋無際。

減字木蘭花

婆娑醉舞。呵壁無靈天不語。獨上荒臺。秋色蒼然自遠來。 古人不見。滿目荆榛文字賤。莫莫休休。日鑿終爲渾沌憂。

金縷曲 辛峯至自汴梁出示所作和稼軒詞數十篇讀之喜不自禁卽用稼

軒韻題此索和辛峯將就鹽官於淮南以覲事漸留度歲離台之感雖不能無慨於中而風雪聯牀歌聲相答此樂亦平生得未曾有也

心事從何說。算平生、等閒銷盡。酒漿裘葛。回首麻衣十年恨。淚盡隴山冰雪。暗循徧、絲絲華髮。何物向禽兒女累。負歸雲、夢渺瀧岡月。聽夜雨、共蕭瑟。暫時攜手還輕別。望江湖、風塵瀕洞。星萍離合。一度相逢一回老。冷語淒然砭骨。且莫對、寒檠愁絕。四海子由真健者。慣商歌、斫地鐸如鐵。霜竹冷、爲君裂。

沁園春 島佛祭詩豔傳千古八百年來未有爲詞修祀事者今年辛峯來京度歲倡酬之樂雅擅一時因於除夕陳詞以祭譜此迎神而以送神之曲屬

吾弟焉

詞汝來前。酌汝一杯。汝敬聽之。念百年歌哭。誰知我者。千秋沈瀼。若有人兮。芒角撐腸。清寒入骨。底事窮人獨坐詩。空中語問。綺情懣否。幾度然疑。玉梅冷綴苔枝。似笑我吟魂盪不支。歎春江花月。競傳宮體。楚山雲雨。枉託微詞。畫虎文章。屠龍事業。

淒絕商歌入破時。長安陌。聽喧闐簫鼓。良夜何其。

又 代詞答

詞告主人。酌君一觴。吾言滑稽。歎壯夫有志。雕蟲豈屑。小言無用。芻狗同嗤。擣麝塵香。贈蘭服媚。煙月文章。格本低。平生意。便俳優。帝畜臣職。奚辭。無端驚聽。還疑道詞亦窮。人大類詩。笑聲偷花外。何關著作。情移笛裏。聊寄相思。誰遣方心。自成咨舌。翻訝金荃不入時。今而後。倘相從未已。論少卑之。

滿江紅 郎兒爲予卜生壙於譙君墓次賦此以志他日當徧徵同人和作刻

之山中爲半塘增一故實似視螭背豐碑風味差勝也

笑揖青山便從此。雲歸也得。試認取。半塘東畔。峯巒闔闔。陶令未開三益徑。扈君早辦千秋宅。更無煩。記荊告山靈。應相識。碑漫擬。征西勒。冢未近。要離側。只隨宜呼取。酒人詞伯。與雷酒人及詩人黃香圃墓皆相距不遠地下竟償借隱願。區中何日勞生息。和長吟神往白楊風。秋蕭瑟。漢屬君。甄文曰持節使者北宮衛令。扈君千秋

之宅建武二十八年五月丙午工李邑作見蘆浦筆記二

摸魚子

以彙刻宋元人詞贈次珊承賦詞報謝卽用原調酬之

莽風塵雅音寥落孤懷鬱鬱誰語十年鉛槧殷勤抱絃外獨尋琴趣堪歎處恁拍到紅牙心事紛如許低徊弔古試一酌前修有靈詞客知我斷腸否文章事覆瓿代薪朝暮新聲那辨鐘缶憐渠抵死耽佳句語便驚人何補君念取底斷譜零縑留得精神住停辛佇苦且醉上金臺酣歌擊筑雜選任風雨

齊天樂

讀金陵詩文徵所錄疇丈遺箸感賦

一從玉局飛仙去清琴久塵淒調落月牽愁驚濤撼夢誰訪茂陵遺稿虛堂夜悄尙彷彿平生奮髯悲嘯莫賦招魂惹他幽恨到華表堂堂忠孝大節叢殘文字裏誰證孤抱郭泰人師灌夫弟畜慚負鍼砭多少元亭夢杳歎我亦無端鬢絲衰早彈淚西風霜空孤鶴渺

祝英臺近

古微見示新作吟諷不能去口依韻成此不足言和也

袖藏鉤。花覆局。一一墜。懽記。箏雁塵封。傭覓箇人字。是誰玉笛飛聲。星辰昨夜。又容易。夢雲吹起。憶前事。爭信冷落琴心。相如倦游矣。吹絮拈花。愁多讖無計。早知中酒光陰。困人如此。悔輕到。碧油簾底。

蝸知集 戊戌

臨江仙 枕上得家山二語漫譜此調夢生於想歌也有思不自知其然而然也

歌哭無端燕月冷。壯懷銷到今年。斷歌淒咽若爲傳。家山春夢裏。生計酒杯前。 菲屋石田荒也得。夢歸猶是家山。南雲回首落誰邊。擬呵湘水壁。一問左徒天。

瑞鶴仙 古微移居上斜街鄰顧俠君小秀野草堂卽查查浦故居也賦詞徵

和因憶咸同間吾宗龍壁翁居此時適得王元章墨梅十二巨幀遂榜其西齋曰十二洞天梅花書屋事見龍壁山房庚申集藉廣古微所未備並以諗後之志東京夢華者俾有考焉



翠深天尺五。認秀野風流。銀灣斜處。閒鷗淡容與。是百年見慣。騷壇旗鼓。春風背宇。想生香。梅花萬樹。正南窗。暖入橫枝。約略洞天雲古。凝佇。朋牋韻事。拄笏高情。承平簪組。藤交陰嫵。誰共覓。舊題句。勸先生莫忘。玉壺觴我。華備新詩賞雨。怕窺檐一角西山。笑人自苦。

念奴嬌 和仲淵似園小坐用玉田韻

餘寒猶滯。甚槐街喧徧。報晴鐘鼓。芳節三分都過二。闌檻幾家春聚。漁父桃花。王孫芳草。休問年時路。西山今日。高樓心事無數。那得卻掃如君。不知許事。自適閒中趣。老境閒門。思種菜。未要木奴千樹。長劍慵看。酒杯擲下。飛夢滄洲去。化爲兩鳥。忘機共狎鷗鷺。

鷓鴣天 詠燭

百五韶光雨雪頻。輕煙惆悵漢宮春。祇應憔悴西窗底。消受觀書老去身。花影暗。淚痕新。郢書燕說向誰陳。不知餘蠟堆多少。孤注曾無一擲人。

浣谿沙 疊韻答次珊

許事人閒未要知。杜鵑聲裏日遲遲。低頭臣甫更無詩。身世相看原蟣蝨。文章何處不駢枝。楚蘭腸斷獨醒時。

萬里長風萬里沙。晚晴消息散餘霞。百年趨趁是生涯。短鐮未妨行處荷。戒香不放定中斜。且拈新句酌新花。

西河 燕臺懷古用美成金陵懷古韻

游俠地。河山影事還記。蒼茫風色淡幽州。暗塵四起。夢華誰與說興亡。西山濃翠無際。劍歌壯。空自倚。西飛白日難繫。參差煙樹隱觚棱。薊門廢壘。斷碑漫酌望諸君。青衫鉛淚如水。酒酣擊筑訊舊市。是荆高。歌哭鄉里。眼底莫論何世。又盧溝冷月。無言愁對。易水蕭蕭悲風裏。

水龍吟 分韻賦白芍藥得後字

倚闌獨殿羣芳。肯將顏色隨紅瘦。冰壺凝液。玉槃承露。蝶窺蜂逗。壓架醪醑。吹簾柳

絮影迷階。恨彩鸞信渺。月斜煙淡。知甚處。香來驟。歌舞揚州最好。正春濃。瓊花開後。含顰欲語。將離有恨。粉痕微皺。和露簪餘。嬌分素曆。酥凝纖手。只鬢絲老去。西園寂寞。把韶華負。

綺寮怨

以疇丈鶴公所書聯吟詞卷屬叔問作感舊圖於後卷中同人惟瑟

公與予尙無恙而十年久別萬里相望歎逝傷離不能已已用美成灑體以寫嗚咽

莫向黃墟回首。斷歌催恨生。聽燕語似惜華年。行吟處。蘚徑塵凝。東風吹愁不去。空贏得。淚墨懷袖盈。憶舊游。望渺孤雲。人天感。歎息還自驚。想念素襟共傾。闌千萬里。花前惜別同憑。顧影伶俜。賸華髮對山青。江關故人無恙。試說與。若爲情。今宵酒醒。空梁月落處。愁更明。

鷓鴣天

讀史偶得率成二闕

卅載龍門世共傾。腐儒何意占狂名。武安私第方稱壽。臨賀嚴裝促辦行。驚割席。

憶橫經。天涯明日是春城。上尊未拜官家賜。頭白江湖號更生。  
羣彥英英祖國門。向來宏長屬平津。臨歧獨下蒼生淚。八百孤寒媿此君。  
促歸輪。壯懷枉自託風雲。劇憐彩鷁乘濤處。親見蓬萊海上塵。 傾別酒。

又 續讀史吟補錄端午次日作

屬國歸來重列卿。楊家金穴舊知名。似傳重訂冰山錄。那得長謠潁水清。  
仙仗入。篋書傾。空令請劍壯朱生。好奇事盡歸方朔。殿角微聞叩首聲。

太常引

綠槐蟬咽午陰遶。殘夢尙婆娑。不是愛婆娑。這幾日。風多雨多。  
迎涼散帶。銷憂擊柱。醉醒一行窩。攬鏡意蹉跎。歎白髮。催人幾何。

塞翁吟 風雨時至溽熱如火綠杉見投新詠率賦以常報章昔紫霞翁論擇

腔謂此調衰颯戒人毋作然邪許相勞與興會飄舉者聲情自異得失之故  
願與綠杉相尋於絃外也

萬木酣風處。空際暮色蕭森。暗雨氣。小樓陰。聽高下蟬吟。雷聲忽送千山響。驚破衆竅如暗。看一霎。斷雲沈。卷舒本無心。清琴。商歌歇。苔痕細數。香徑渺。前游重尋。任逐熱。長安襪。襪自高臥。世覓羲皇。散髮抽簪。濃霧未解。望裏懸知。猶鬱疏襟。

醉花陰

姬人抱賢嗜誦宋元人小詞夏夜燈火不可親偃臥北窗令回環循

誦時復入聽亦迎涼幽致也

臥聽清吟銷篆縷。抵得紅簫否。香挹素馨微。方麴疏簾。不辨涼生處。老嬾心情渾漫與。賸訂花閒譜。學道未應妨。笑問維摩。可是朝華誤。

水龍吟

戊戌小除立己亥春夢湘同作

歲寒禁慣冰霜。隔年翻訝春何早。錦旛颭處。玉梅香裏。酌春一笑。春遣儂愁。儂將春負。悶懷丁倒。算重城煙景。花明柳媚。原未覺。繁華少。大塊文章誰假。占春先。翠蛾兒鬧。番風無賴。催完芳信。便催人老。金埒游情。玉壺吟思。莫教閒了。看忘情彩勝。盈盈弄影。向釵梁裊。

校夢龕集 己亥

東風第 枝 己亥人日社集四印齋賦得人日題詩寄草堂

句占花先奉歸雁後銷凝。感事如許。絕憐開寶詩人感時幾縈別緒。多情梅柳似解惜。城南幽旅憶彩牋。迸淚題殘。頓觸亂愁千縷。醒醉裏。盛年暗度。歌哭外。舊游何處。已拚書劍飄零。老懷倦裁秀句。天閒一我。更媿爾。高三十五。只小窗。慵夢橋西。約略歲朝吟趣。

清平樂 十四日晨起意有所會率筆書此以俟賞音

花閒清坐。坐久渾忘我。好句自來還錯過。斷續幽禽如和。邈然山水虛深。昭文欲鼓無琴。誰信百年泡幻。等閒一刻千金。

驀山谿

塵緣相誤。大錯何鑄。歸夢碧山遙。水雲空。人閒難住。落梅如雪。拂面作春寒。登廣武。泣新亭。先我傷心許。雨巾風帽。著酒長安路。老至厭悲歌。炙銀簧。玉鞞寒。百

年浩蕩。憔悴惜初心。飛鳥外。落霞邊。那是愁來處。

玉漏遲 百穫亭夜宴有贈

清歌花外裊。卅年綺夢。無端驚覺。影散優曇。那似情塵難掃。棖觸春衫淚點。又雛燕。泥人癡小。新恨悄。渭城還唱。何戡淒調。幾度顧影臨風。問舊日當歌。是何年少。花落花開。詩裏劉郎輕老。愁訴貞元軼事。只我也不禁潦倒。休暗惱。明朝鏡霜添了。

念奴嬌 日望樓春眺有懷仲弓

東風吹面。又等閒春色。三分過二。懽事難期。花易老。莫放闌干閒裏。怨極書空。愁來說夢。舊曲還慵理。春雲無恙。林鶯休訴憔悴。遙指一角飛檐。百年裙屐。盛江家亭子。韋杜風煙天尺五。銷得流光如水。經醉湖山。笑人魚鳥。自惜登臨意。小桃紅綻。嬌然知向誰媚。

楊柳枝 擬花閒

賦裏長楊舊有名。卽看眉樣亦傾城。春風輕入朝元閣。莫更思量作雨聲。

飛絮空濛鎖畫樓。年年寒食聽離留。爭信龍池三二月。片風絲雨欲驚秋。

齊天樂 馬神廟海棠百年故物也春事方酣意古微日吟賞其下不能無詞

擬此待和

豔陽初破瓊姬睡。依稀沁園軼事。繡幄圍鴛。簫臺駐鳳。隔斷香紅塵世。繁華夢裏。記別殿承恩。綠章催霽。幾番花風。舊時香色底憔悴。承平歌舞漫憶。儘燒殘絳燭。密意誰會。海燕移家。仙雲換影。贏得嬌娥清淚。殷勤步綺。莫付與鶯鄰。妒春桃李。黃月簾低。倩魂縈倦蕊。

鳳凰臺上憶吹簫 社集香草亭賦簫

明月依然。玉人何處。畫橋流水參差。記短歌催酒。惜別年時。休問笛家舊譜。寒食近。煙柳絲絲。憐消受。分香手汗。浥潤脣脂。孤飛野雲迹渺。還一舸煙波。自和新詞。問歲寒疊鼓。春夢應迷。何事潛蛟夜舞。歌慷慨。懷古增悲。頻吟弄。夫君未來。要眇誰思。

三姝媚 四月十日病起偶過咫尺村回憶年時吟事甚盛此時好夢難尋孤游



易感不知來者之何如今也賦寄叔問蘇州叔由蕪湖

東園花下路。記盟香年時。倦賡零句。病起心情。洗芳林厭聽。夜來風雨。開到將離。春自老。無人爲主。蝶鬧蜂喧。遮莫紛紛。總過牆去。杜宇催人休苦。問廢綠迷津。勸歸何處。花影吹笙。敞畫簾空憶。月明前度。那得流光。將恨與。頽波東注。日斷停雲靄鷁。清琴自語。

渡江雲

清真集中諸調夢窗多擬作俊茂處能似之言外絕不相襲四月十

有八日意有所觸偶拈是解

流紅春共遠。夢迷紫曲。風迫海雲飛。近來沽酒伴。除指青旗。那處繫斑駁。黃金鑄淚。記弄珠。江上人回。懷舊吟。笑持明鏡。流影共徘徊。天涯殷勤別緒。只有何處。黯愁生清渭。回首憐。蓬萊雲氣。都隔紅埃。東風無奈流鶯老。那更禁。鷓鴣聲催。休采擷。江南紅豆誰栽。

徵招 夔生自廣陵游鄂賦詞寄懷卻和

幾年落拓揚州夢。樊川倦游情味。一笛落梅風。又吟篷孤倚。江山仍畫裏。祇無那。暮天愁翳。白恰飄零。紅簫岑寂。暗銷英氣。迢遞。楚天長。懷人處。扁舟舊時曾繫。黃鶴倘歸來。問飛仙醒未。行歌休弔禰。怕塵泥。素襟殘淚。斷雲碧。醉拂闌干。正夜空如水。

三姝媚 次珊瑚讀唐人息夫人不言賦有感於外結舌而內結腸先箝心而後箝口之語賦詞索和聊復繼聲亦盍各之旨也

靡蕪春思遠。采芳馨愁貽。黛痕深斂。薄命憐花。倚東風羅袖。淚珠偷泫。暝入西園。容易又。林禽聲變。那得相思。付與青蘋。自隨蓬轉。惆悵羅衾。捫徧。便夢隔。懽期。舊恩還戀。芳意迴環。認鴛機錦字。斷腸緘怨。縷縷絲絲。拚裊盡。香心殘篆。漫想歌翻璧月。臨春夜滿。

鷓鴣天 向與二三同志爲讀史之約意有所得卽以是調紀之取使吟諷久而不忘人事作輟所爲無幾今年四五月閒久旱酷熱咄咄閉門再事丹鉛漫成此解並告同志毋忘前約爲之不已亦乙部得失之林也

注籍常通神虎門。書生恩遇本無論。鬼神語祕驚前席。輓轅謀工拾後塵。空折角，笑埋輪。寓言秦鹿底翻新。可憐一闕成何事。贏得班姬苦乞身。

金縷曲 六月十六夜日望樓對月

此夕真無價。俯危樓、羅雲四卷。玉槃高掛。裊暑人閒銷欲盡。涼韻未秋先借。又銀漢、沈沈西瀉。凝白闌干塵不到。是天然、愛酒能詩社。凌浩渺、最宜夜。乘風敢擬游仙也。檢塵襟、卅年緇素。暫時陶寫。玉宇瓊樓歸路迴。高處清寒猶怕。莫輕放、花閒三雅。狂態姮娥應見慣。倚商歌、漫惜知音寡。看獨鶴、正來下。

唐多令

掠鬢練花長。筠棚卷夕涼。晚風輕、煖玉生香。記得酒闌新月上。頻倚醉、近釵梁。老去不禁狂。通簾泥舊芳。話青樓、殘夢荒唐。知是溫柔知薄倖。好持似、少年場。

滿江紅 辛峯沒於泰州七月三日設奠成服賦此招魂老懷慘結墨淚俱枯矣

淚灑椒漿。誰信道、望風酌爾。試屈指、天涯骨肉、祇今餘幾。一箇那堪今又弱。諸孤藐爾。知何似。最傷心、愁病念兄衰。書新至。對牀約、歸耕計。投老待君料理。甚無端、噩夢驚人至此。地下倘仍親舍伴。固應勝我。悽惶耳。賦招魂、如墨海雲昏。魂來未。

臨江仙 擬稼軒

暮北朝南忙底許。多時齒冷樵風。先生疏放是天慵。醉鄉閒日月。安穩住無功。注籍黃齋三百甕。腐儒食料原充。思量無地著窮通。忘機秋水觀。得意大槐宮。

減字木蘭花 擬樵歌

人生行樂。老子婆娑歌帶索。蒼鶴參軍。竿木逢場底是真。壺公知我。獨醒何人真。計左。夢繞雲屏。一桁山如故國青。

卜算子 擬蕭閒

把酒酌黃花。人盡陶彭澤。三徑無資也是歸。此意誰能得。漫誦北風詩。自媿南邨宅。憑仗秋山爲解嘲。明秀森寒碧。

點絳脣 擬秋巖

莫更憑高。闌珊草色天涯暮。亂山無數。雲意閒如許。一葉扁舟。夢到尋詩處。愁延佇。斷鴻聲苦。寂寞龍湫雨。

戀繡衾 擬梅谿

淡蛾山色入畫真。撲游衫，都是翠痕。寫不盡、幽修意。把詩魂，分付斷雲。輭紅眯眼長安市。底相看，還似故人。乍憶得、妝臺畔。點吳娘、眉黛暈新。

浣谿沙 擬梅屋

漸覺新寒上被池。曲屏山亞夢雲敲。團團明月影愁窺。試展眉圖迷眼繭。暗移裙袂惜腰肢。刀圭難已有情癡。

阮郎歸 擬清谿

小窗西日透紋紗。飛塵生影花。似聞將雨報林鴉。啼聲清潤些。風蕩漾。樹天斜。晴光憎暮霞。臥驚殘溜響檐牙。煖瓶新試茶。

庚子秋詞 庚子

蹋莎行

彩扇初閒。疏砧催斷。雲山北向征人遠。驚塵莫漫怨飄風。岫眉好試新妝面。夢境  
迷離。心期千萬。絲絲縷縷愁難翦。不辭舞袖爲君垂。瑣窗雲霧知深淺。

訴衷情 用夢窗韻

水雲如夢阻盟鷗。煙草亂汀洲。寂寥幽意誰會。愁入曲江秋。空攬鏡。漫登樓。暗吳  
鉤。青山隱几。烏角尋鄰。臣甫低頭。

謁金門

霜信驟。消得驚秋人瘦。昨日紅蓮今日藕。斷腸君信否。人世悲懽原偶。休怨雨雲  
翻覆。寶玦珊瑚珍重取。五陵佳氣有。

南鄉子

山色落層城。不爲塵多減舊青。只有看山前度客。愁生。獨倚高樓眼倦橫。檐角暮

雲停。懷遠傷高淚欲傾。昨夢橫汾西去路。聲聲。塞鴈驚寒不忍聽。

### 關河令

邊聲沈沈鴈共語。作一天愁緒。望極關河。寒深雲欲度。天涯何限舊侶。枉自戀、樓臺高處。斷夢都忘。衾塵誰念取。

### 胡擣練

年年芳事厭唐花。夢想江梅煙蘂。誰信銅瓶冰合。愁對寒雲壓。老夫無味已多時。凍酒和愁頻呷。寄語寒香休怯。好趁元綏臘。

### 虞美人 題校夢龕圖

往與漚尹同校夢窗詞成。卽擬作圖紀之。今年冬見明王綦畫軸。秋林茆屋。二人清坐。若有所思。笑謂漚尹曰。是吾校夢龕圖也。不可無詞。因拈此調。圖作於萬曆丁酉。乃能爲三百年後人傳神寫意。筆墨通靈。誠未易常情測哉。光緒庚子十月記。

檀欒金碧樓臺好。誰打霜花稿。半生心賞不相違。難得劫灰紅處。畫圖開。清愁閱  
對闌干起。自惜丹鉛意。疏林老屋短檠邊。便是等閒秋色。儘堪憐。

遐方怨

槐葉落。露槃空。夢怯催妝。夜闌不聞長樂鐘。玉蟾香鬢冷西風。恨隨嗚咽水。御溝東。

鋸解令

駐雲誰按酒邊詞。翠袖冷。殘釀未喚。新鶯舊燕自家春。底與較。夢長夢短。隔花淚  
眼。爛錦年芳盼斷。東皇未必負春人。只蕩得。暗愁一點。

玉樓春

好山不入時人眼。每向人家稀處見。濃青一桁撥雲來。沈恨萬端如霧散。山靈休  
笑綠終淺。作計避人今未晚。十年緇盡素衣塵。雪鬢霜髯塵不染。

又 和小山韻

落花風緊紅成陣。睡重不知春遠近。箏絃聲澀鎖慵調。燕語情多羞借問。屏山苦



隔天涯信。咫尺關河千萬恨。樓前芳草遠連天。望眼不隨芳草盡。  
閒雲何止催春晚。遮斷望京樓上眼。犀簾有隙漏香多。鮫帕無情盛淚滿。柔腸已  
逐鷗絃斷。風外闌干憑不援。歸來十九醉如泥。禁得良宵更漏短。  
不辭沈醉東風裏。笑解金魚能值幾。四條絃語軟於煙。一桁簾痕清似水。醉調銀  
甲寒侵指。只有翠尊知客意。酒雲紅暈襯微渦。解向歌塵凝處起。

定風波 和瞻園韻

愁裏清尊莫放停。笑看伶鋪是歸程。繞樹奇鷓啼不止。曾幾。舊時春色酒邊青。識  
字毫端通畫意。審音筇畔得宮聲。活計安排支枕睡。誰醉。生先無夢也無醒。

山花子

天外冥鴻不可招。十年心迹負團瓢。老境蒼寒誰慰藉。月輪高。嬾到冬山惟耐睡。  
愁呼濁酒等閒澆。賴有梅梢春信逗。兩三椒。

唐多令 衰草和穗平

難刻是愁根。連天沒燒痕。漫萋萋、回首青門。陌上銅駝如解語，定相向、怨王孫。別恨共誰論。憑高空斷魂。更無煩、臘鼓催春。不見潛行悲杜老，曲江上、幾聲吞。

浪淘沙 自題庚子秋詞後

華髮對山青。客夢零星。歲寒濡响慰勞生。斷盡愁腸誰會得，哀鴈聲聲。心事共疏檠。歌斷誰聽。墨痕和淚漬清冰。留得悲秋殘影在，分付旗亭。

春蟄吟 庚子辛丑

尉遲杯 次漚尹寄弟韻

和愁凭檻曲冷，迤邐斜陽影。淒迷一角殘山，心事遙天催暝。飛鴻送響，驚獨客、空堂酒初醒。颭清霜、幾葉宮槐，亂鴉如墨棲定。誰念舊日神州，看青暗、齊煙九點寒凝。清渭東流無消息，衰淚與、銀瓶水迸。長歌斷、悲風自發，正塵黯、銅駝泣露梗。問柴桑、甚日歸來，就荒空憶三徑。

天香 鹿港香

百和熏薇。千絲裊玉。氤氳小葉初展。翠鏤筠筒。炷添螺甲。約略海南春淺。溫磨半袖。渾不數。牟尼珠。點檢西谿舊製。根觸玉臺殘怨。絕憐麝塵擣徧。怕蠻腥。等閒還染。算只翠篝留得舊情一綫。芳訊依然月底。甚泛入。槎風似天遠。纖縷縈簾。南雲夢翦。香以施氏製者爲上。其封題曰氤氳奇柗綫。

齊天樂 鴉

城南城北雲如。紛紛颭空零亂。落日呼羣。驚風墜翼。極目平林恨滿。蕭條歲晚。是幾度朝昏。玉顏輕換。露泣宮槐。夜寒相與訴幽怨。新巢安否漫省。繞枝棲未定。珍重霜霰。壞堞軍聲。長天月色。誰識歸飛羽倦。江湖夢遠。記噪影橋竿。舵樓風轉。意緒何堪。白頭搔更短。

驀山谿 夢中得句與此解起調適合因足成之

和愁帶恨。憑得闌干破。消息問梅魂。料傷春未應偏我。寒灰心死。猶自撥陰何。堪絕倒。子桑琴。裏飯知誰過。催年臘鼓。不聽情猶可。吟袖貯寒多。共西山。凍眉深鎖。微

茫斗外。愁認帝王州。自醉酒。問東皇。真箇春回麼。

金明池 荷花

東華塵土。惟四時芳事。差可與娛。三百年來名流觴詠屢矣。今年夏秋以還。高臺曲池。禾黍彌望。遑問一花一葉哉。春風當來。舊游如夢。閉門蟄處。益復無聊。偶憶屐齒常經芳事最盛之處。各賦小詞以寄遐想。蓋步兵之塗既窮。曲江之吟滋戚。已嗟乎。慈仁之松。廉墅之柳。足以堅歲寒而資美蔭者。既邈不可得。卽秋碧春紅。媚茲幽獨。亦復漂搖如此。風月有情。當亦替人於邑也。

環佩臨風。樓臺寫影。咫尺璇源。路近秋色共。湖光無際。疏香背。冷雨暗引。記年年。翠陌籠鞭。是幾度。神往菰蘆深隱。算冷眼雲山。忘機鷗鷺。省識吟邊幽恨。忽漫飛塵。驚掠鬢。怕水佩風襟。舊情難問。芳時換。哀蟬曲破。花夢短。野鴛睡穩。裊空煙。復道垂楊。望太乙仙舟。歸期難準。賸泣露敲槃。飄零鉛淚。悄共銅仙偷搵。

八犯玉交枝 寄園朱藤

門掩青槐。架敲朱珞。曲徑倩痕低亞。惟有玲瓏檐外月。慣見琴尊瀟灑。尋芳攜酒。最憐才魄銷沈。花前吟事憑誰話。長記采香辜。蔓年年初夏。惆悵舊日樓臺。翠陰覆處。黯然愁對鴛瓦。問誰信、東風裊娜。也分占、滄洲殘晝。儘輸與、梨雲影謝。腥塵不灑。紅闌罅。只夢憶繁枝。天池甚日歸來也。予舊籍山陰。徐文長天池書屋青藤。聞至今尙存。

夢橫塘 野鳧潭蘆花

短碣飛雪。別浦流雲。暮天涼意初覺。野色遙連。暗隔斷、紅香城郭。刻意尋秋。不堪愁鬢等閒迷著。憶扁舟舊隱。月落潮生。游情倦。風波惡。江亭記得春歸。正迷離萬綠。雨潤闌角。短笛聲催。秋更說。蹋青前約。最憐是、鷺鷥斷鴈。聚影澄潭。怨飄泊。付與霜楓冷紅獨舞。媚西風。簾幙。

淒涼犯 用白石韻

夕陽一抹。風簾靜。清吟不盡蕭索。鈿車寶馬。懽情轉首。恨生清角。傷春夢惡。斷紅沁、

殘陽影薄。甚怱怱、珠旛彩勝。障眼總塵漠。休念開元日，尺五城南，蹋歌聲樂。麝塵濺處，顛鸞龍寶釵零落。海樣鶯花，俊游事、銅駝記著。只疏梅、月底弄影，志負約。

花犯 用清真韻

渭城西絲絲倦柳，催人試愁味。雪欺霜綴。休更說腰肢。風外纖麗。玳筵舊日清歌倚。投壺天正喜。尙彷彿、雲屏寒淺。添香偎繡被。梨園至今散如煙。風塵共弔影，驚心彫悴。腸暗斷、凝碧上、管絃淒墜。東風颺、落花似雪。誰更識、龜年愁病裏。算付與、龍鍾雙袖。潛痕清瀉水。

念奴嬌 二月十二日妙光閣下感賦

沈屯雲亂，倚闌干、愁對春山顏色。芳事無情翻有信，依舊小桃紅坼。鳥語關關，簾痕黯黯。容易繁華擲。樓臺無恙，到來多少塵隔。漫憶楚客當年，朋牋花底，秀語分寒碧。吹淚庭槐親酌取。此是滄桑會歷。落日琴聲，遙天蜃氣，新恨誰銷得。迴腸斷盡，隔籬休送殘笛。

滿江紅 敬書岳忠武王贈吳將軍寶刀行墨蹟後

雷雨空堂。驚展卷、龍蛇起陸。瞻拜處、凜然如見。劍光盈軸。灑氣縱橫山欲撼。交情鄭重杯相屬。想夜闌、盾墨灑淋漓。歌還哭。暗嗚氣。悲涼曲。千萬徧。循環讀。歎王刀可假。何堪重辱。悵望千秋人不見。相尋一轍車還覆。問誰歎。雪涕和哀歌。燕臺筑。

倦尋芳 初夏和溫尹

晚花颺蕊。新漲添痕。芳序輕換。寂寞東園。春事去來誰見。點屐長愁。苔徑滑。穿林驚又禽聲變。掩簾櫳。試香心宛轉。暗灰殘篆。看檻外、沈陰如墨。惻惻生衣。寒意猶戀。漫想薰風。腸斷綠雲天遠。午枕時敲。歸夢熟。屏山閒倚。吟情倦。話相思。付空梁。調雛雙燕。

長亭怨慢 和忍盦春盡書懷之作

更休憶、綠陰前度。門巷惜惜。亂愁如據。燕子飛來。舊巢塵浣。定淒楚。一襟幽恨。吹不斷。閒風雨。忍淚對流紅。看送到、春潮何處。無語。望停雲靄靄。尙戀夕陽高樹。江湖

夢影暗愁逐，春城風絮。訴不盡，似水心情。向鷓鴣聲中分付。漫回首，西山腸斷，青青眉嫵。

南潛集 辛丑至甲辰

水調歌頭 初至金陵諸公會飲秦淮酒邊感興索瞻園蔥石積餘和

微風轉城曲，涼意乍先秋。不知今夕煙月，何事爲人留。欲訪齊梁陳迹，但見珠歌翠舞，燈火夜光浮。孤嘯倚舷立，釀酒酌沙鷗。興亡事，醒醉裏，恨悠悠。微茫空外雲氣，直北是神州。爲問青谿舴艋，來往撇波雙槳，載得幾多愁。漫灑新亭淚，吟思渺滄洲。

滿江紅 朱仙鎮謁岳鄂王祠敬賦

風帽塵衫重拜倒，朱仙祠下。尙彷彿，英靈接處，神游如乍。往事低徊風雨疾，新愁黯淡江河下。更何堪，雪涕讀題詩，殘碑打。黃龍指，金牌亞。旌旆影，滄桑話。對蒼煙落日，似聞叱咤。氣驚蛟鼉欲挽，悲生笳鼓民猶社。撫長松，鬱律認南枝，寒濤瀉。道光

季年河決開封舉鎮惟岳祠無恙壬午扶護南歸曾夢游祠下



月華清 壬寅中秋

金粟浮香。冰輪碾玉。閒庭風物如畫。弄影婆娑。一笑襟塵都灑。倩西風、丁屬姮娥。休更遣、羅雲縈惹。愁話憶年時。斷夢醒來還怕。難忘瑤臺清暇。是佳約。延秋朋牋催研。把淺懷人自酌。孤光遙夜。試說與、鏡裏悲懽。儘銷得、吟邊陶寫。慵借問游仙枕畔。彩鸞誰跨。

念奴嬌 疊韻酬漁公

津梁疲矣。且相從一飽。茆檐不托。輸與閒閒雲意嬾。不似客游輕作。殘霸關河。悲秋時節。對酒渾忘酌。綺懷微倦。滿前新句慵索。何必憔悴蘭成。江潭賦就。始解傷搖落。官柳垂垂。低颭影。能值幾絢絲絡。白髮閒搔。青山長往。萬事風鳴鐸。故人書報。菊花期就前約。

驀山谿 午發桃源明日抵清河矣

東來十驛。漸報郵籤。鷺埃嬾於人。定憐客。往還何驟。老懷蕭散。隨分傲霜風。算心

事。白鷗知遲我江湖久。襟塵歷歷。香凝長安酒。大道直如繩。倚南轅。黯然而首。不夷不惠。料理著閒身。吳波闊。楚天長。好試扁舟手。

水調歌頭 淮安舟中

唱我遠游曲。喚起大魚聽。百年知幾行樂。莫視酒杯輕。記取明朝重九。訪古文游臺畔。黃菊重尋盟。吟嘯霜風裏。破帽恰多情。弔王孫。淮水曲。酒還傾。叢蘆風過瑟瑟。似作不平鳴。身計正須溫飽。底用登壇開國。一擲徇浮名。試看冷滄波。鷗夢不能驚。

聲聲慢 辛園小憩同旭莊

雜花鋪繡。淺草裁茵。憑闌野色浮空。敗柳枯荷。商聲遞入金風。愔愔載花載酒。對閒園。纔識秋容。悄相向。借吳波漲綠。與洗塵紅。誰唱白銅鞮曲。趁如雲嬌馬。流水西東。橋下龜魚。也應驚到吟筇。風光自延倦客。倚殘曛。閒數疏鐘。海天迴。寄愁心。煙外斷鴻。

霜葉飛 海上喜晤溫尹用夢窗韻賦贈時溫尹持節嶺南予適有吳趨之行

恩恩聚別離緒黯然矣

酒邊孤緒。游情倦。閒雲自戀江樹。槎風欣送故人來。香汛梅根雨。歎冉冉。流光迅羽。殘灰愁憶昆池古。好寄似南枝。嶺上早春回。莫負玉娥幽素。回首秋鬢驚塵。觚棱北望。黯然腸斷愁賦。白頭不擬此重逢。喜入鐙唇語。看驛柳、煙絲颭縷。吳篷先載閒鷗去。賸夢君滄江上。霓節干雲。使星明處。

鷓鴣天

登玄墓還元閣用叔問重泊光福里韻

雲意陰晴覆寺橋。秋聲瑟瑟徑蕭蕭。五湖新約尊前訂。十月輕寒畫裏銷。憑翠檻。數煙橈。一樓人外萬峯高。青山閱盡興亡感。付與松風話市朝。

齊天樂

泊舟光福故友許鶴巢郎中鄉里也感題此解

峭帆乍轉橫塘路。湖山頓驚愁眼。雙崦茶煙。四橋松雨。曾記吟邊深繆。梅林弄晚。訪醉墨題香。紫簫聲斷。喚起秋魂。荒荆何處舊池館。滄波相對欲絕。亂雲攜酒處。愁繫孤纜。臨頓前盟。東華舊侶。誰識塵衫游倦。斜陽淚滿。聽啼鳥花閒。故情輕換。怨笛

難招。虎山孤鶴遠。翁尙書詩目鶴巢爲虎山一鶴

水龍吟 惠山酌泉

黛眉不點吳娃。淩波獨秀空煙際。疏林霜染。深蹊苔澀。虛堂瀾綺。濺沫跳珠。清聲瀉玉。石鱗荒翠。自憑闌照影。古人不見。閒愁逐。輕鷗起。一桁竹鑪煙細。臥聽松。箏瑟淨洗。孤懷誰說。臨風把盞。低徊問水。斜日游船。古陰秋苑。笙歌催醉。喚銅瓶載取。歸來重試。在山泉味。

洞仙歌 吳江楓老以雜樹閒之尤鮮麗可玩舟中讀玉詮詠葉諸詞卽用其

調以誌幽賞

疏黃敗綠。愛寒林江步。掩映吳楓冷紅舞。炫秋容。最是徑轉帆迴。鴉背閃。點點夕陽明處。暮山嵐翠斂。持底明妝。認取籠煙幾行樹。老去綺情刪。溝水東西。愁更憶。題瓊殘句。儘豔入詩心。比春花。歎誰識。麝霜。歲寒良苦。

念奴嬌 道暑焦山自然庵爲庵主六公題如此江山圖用東坡赤壁韻

雲埋浪打。想髯翁當日吟邊風物。問訊江山無恙否。目斷巖巖蒼壁。斷續驚濤。聯翩游屐。好句留冰雪。焦仙醒未。爲予喚起英傑。最是根觸愁心。禪天梵放。雲外清笳發。撲地蒼煙飛不起。海氣浮空明滅。秋色西來。中原北望。天遠青如髮。孤光不改。多情祇有圓月。

木蘭花慢

歸德訪西陂故址

緯蕭圖畫裏。記親見、草堂幽。甚浴鴨池荒。棲鶯柳老。春淡成秋。汀洲釣人居處。有平泉樹石記中收。賸得殘山一角。冷煙低冑閒愁。悠悠往事問沙鷗。文采宋黃州。是少日兵戈。承平觴詠。投老菟裘。扁舟待盟舊隱。悵暮天、無際亂雲流。怕有夷歌夜起。驚心慵聽漁謳。

浣谿沙

老去耽游藉息機。四年三度此停騑。巫山仍隔楚雲西。野驛風高塵漠漠。首春寒重霧霏霏。醉呼濁酒自添衣。

詞 哀 碧 齋

運 彥



陳 銳

字伯弢。號寰碧。湖南武陵人。嘗學詩於鄧彌之王壬秋。雅好爲詞。追摹二晏柳周。入其堂奧。夔笙嘗題其詞云。沈著冲澹。一洗鉛華靡麗之習。無矜鍊之迹可尋。卻無一字不矜鍊。格高律細。允稱法乳清真。抗手西麓。惟是可爲知者道耳。又有寰碧齋詞話。持論亦多精切。

哀碧齋詞

武陵陳 銳伯發

望江南

春不見。孤負可憐春。淡柳鎖愁烟漠漠。小闌扶恨水粼粼。往事已成塵。人不見。孤負可憐人。花下又逢三月雨。夢中猶隔一條雲。風露夜紛紛。

鷓鴣天

尺碧晴絲繫玉驄。畫樓西畔記相逢。眉愁暗閣啼時雨。臉暈微生酒後虹。臨水怯。對花慵。奈何郎也奈何儂。郎行只在斜陽外。閒卻闌干一角紅。

暗香

怨塵凝碧。自黯然不掃。眉邊春色。有美一人。曉起臨妝耿相憶。偏是團圓鏡裏。早換卻。從前標格。算別後。點臂宮砂。紅潤見歡迹。消息。又寂寂。空卜斷玉釵。寫偏飛帛。枕函夢滑。衣帶無情有寬窄。誰解人生恨事。總付與。孤燈寒滴。便再世。相聚也。那能



記得。

浣溪紗

花外敲門喚酒遲。春愁先到綠楊枝。客懷更不自矜持。泊懶填詞。黃昏微雨上燈時。

往日風流疑作夢。而今漂

一擲年芳等急梭。歡愉時少別時多。相思如水不堪搓。自緊雙蛾。今宵愁極奈明何。

倚去未妨鬆兩鬢。啼來兀

簾捲東風又一聲。峭寒吹瘦玉樓笙。心心眼眼許多情。地帶春醒。爲誰惆悵。清明。

芳草閉門黏夢影。梨花滿

微命相看百可憐。喁喁私語小扶肩。一雙愁色壓闌干。覺寶鉤寬。新來消瘦莫相瞞。

試腕暗驚珠串重。圍腰還

絕代容華小謫人。淡妝斜佩送青春。自澆杯酒醉花神。徧燕泥新。回頭歡怨總成塵。

冷雨欺他鵲血熱。故巢尋

遶佛閣

酒波一翦。蛾綠借暈。渦笑深淺。蛟靶痕滿。背燈斜搵。嬌疑怕人見。醉眠愛晚。還說別後。偏怎宵短。佳約幽繾。畫屏素月。香消水沈篆。曉閣漏壺滴。鐵馬珠箏敲碎片。何限豔塵。漂零心與眼。問隔枕秋聲。孤凭誰慣。斷魂今斷。怕翠羽林啾。芳夢吹散。拂愁絲、鏡霜新染。

又 風雨不時景物悽異羈人登覽有斷腸之音

午晴未準。霜葉匝地。秋色淒緊。巾幘慵整。碧天縱目。汀洲雁無信。堞樓獨凭。烟瘴滅沒。瓊海千頃。蠻唱悽迴。莫帆落處。潮回蜃家艇。烏宿四山黑。倦旅蓬飄迷故徑。長痛墓門。陳根連露井。問樹遶慈烏。哀怨誰聽。客歸須定。願笠子長鑱。黃獨同命。澣征衫。淚痕如綆。

一萼紅 寒燈

錦屏隈。有孤檠淺照。風急雪還催。搖影膏輕。垂頭穗重。寒透今夜蘭臺。乍相值、亭亭

不語。盼雁足、悽立幾曾回。繪彩流光，魚龍生戲，何處蓬萊。聞道九華歌散，怕相思一豆，剔盡成灰。微火多情，餘花自笑，空歎春謎難猜。暗根觸、兒時況味，教誰見、牆角替人哀。弟一丁寧，鬧蛾莫又飛來。

燭影搖紅 寒衾

鴛館單栖，被池一榻，憐春淺。淒涼聽雨，總無眠。咽水更蚪轉。兩字相思，畫慣意絲絲，捱宵望旦。去時風月似鐵，多年冰蠶曾見。四角平鋪，貼胸擁背，今嫌短。重重錦爛，是天涯、夢隔牀頭遠。懷裏餘香未散。剩啁啾、羅浮浸眼。向空斜抱，細數歸期，綺羅庭院。

瑣窗寒 寒柝

刮地初霜，臨關半月，亂鴉飛盡。逢逢響徹，危燭戍樓烟燼。碎鄉心、三更四更，一更一點歸期近。想提燈窄巷，老兵傳語，月光如凝。宵迴悲同省。但急節和礮，嚴聲催枕。晨鐘未動，誰報曉天鴻信。自無人、深院漏沈。小龍覷竹遙吠影。總輸他、斷木中空，賺

得殘年恨。

水龍吟 寒鐘

大千春色飄殘。世尊寂聽。渾如睡。搖搖斷杵。碧雲欲暮。寒山轉媚。烟際懸音。霜前送梵。盪空無地。忽奔濤萬壑。一時都到。閭浮界。松風起。落月烏啼。鷗尾。隔重城。夢遙難寄。曉天百八。高樓何限。景陽清淚。上界燈幡。故宮龍象。鏗訇愁思。又西頭打鼓。朝朝莫莫。入離人耳。

探春慢 寒角

荒霧懸旌。冷風臥鼓。蛩尤宵墮平野。一壘嚴霜。連天曉奏。吹散胡羣牧馬。多少清商怨。借兜勒。烏烏共寫。輪臺昨夜軍聲。老兵驚起愁話。長是悠揚壯峭。催捲甲。疾驅弓折難把。幕府琵琶。龜茲罽粟。不共別情閒冶。餘響歸鏡外。聽斛律。牛羊來下。自恁單衣。南山留扣脩夜。

垂楊 寒齋

漁邨夜覺。正柳隄細漲。鯉魚風小。楚竹安排亂流低。罩潛蛟悄。鳴榔生長瀟湘道。識無際、浪花深窈。甚茸蓑、冷坐灘頭。歎近來魚少。圓網平鋪了。了。戲霜蟹出沙。冒絲青嫋。拽起還拋。一燈沈照鷗天曉。浮萍四角吹如掃。盪沫雨、中央縹緲。祇年時插腳泥塗。吾亦老。

玲瓏四犯 寒硯

鸛眼凹深。記淡墨題詩。花氣熏晝。幾日霜毫。吟案冷鋪氈繡。呵手坐費摩挲。祝片石、暖雲生酒。甚淚蟾、鑄就相思。空盼泮冰時候。十年磨鐵波紋皺。照方池、寸心灰勾。冬烘苦被兒童笑。短篋隨人後。誰拭半面凍塵。曾貌寫漳臺春瘦。且莫教焚卻。乘醉也。一濡首。

浪淘沙慢 滬上送易由甫用清真韻

送君路、潮奔極浦。霧壓荒堞。歸興無端自發。清歌卽席乍闋。看鬢角眉尖愁共結。柳條碧、素手親折。料此後風萍逐流水。人天事、悽絕。清切。古今望眼空闊。對浩蕩神

州沈陸恨。付與霜雁咽。休更說江湖。朋舊輕別。豔才易竭。銷幾回、來去春花秋月。平地羌笳悲風疊。樓臺好。勝游漸歇。拂明鏡、嬋娟圓又缺。問夢覺、十萬鶯花。甚玉色、傷心一夜青絲雪。

慶宮春

寄懷文叔問舍人蘇州用草窗韻

修鶴梅崦。零鷗荷蕩。畫船幾聽吳雪。催老清歌。驚春狂淚。市簫何限悽咽。夢游如絮。莽萬里、烟塵頓合。京華北望。鼓角南來。壯肝都裂。昔時倚醉承平。怒馬鮮裘。俠情雙絕。朱顏照水。而今鷓鴣。怕見海潮生月。舊題團扇。肯憐我、歡場攜別。山中芳杜。遠道相思。不堪親折。

東風第一枝

武昌客舍送宋芸子赴長安

袖海龍吟。巢阿鳳羽。文章當日雄絕。壯遊幾換桑田。憤懷暗悲錯鐵。人間何世。恰值我、江關時節。算分手、薊北湘南。早辦十年離別。行倦也、玉驄愁咽。春半也、杜鵑啼血。眼前去路誰除。客中醉顏易熱。飛緜萬點。莫吹逐、天涯頭白。祇送君、一片相思。夢

遶舊京明月。按此調不宜作入聲臨別息息不暇更改久益不能割愛矣自記

絳都春 春汎黃浦

吳天遠秀。盪綠波一鏡。杳朗無塵。望裏畫樓。此時愁絕。送春人。穠桃淡柳紛相引。燕歸容易黃昏。好花空發。垂絲自結。負了芳辰。幾歲江關賦本。但奔驢共命。唳鶴招魂。故館夕陽。滄桑留影。照金尊。臨流急淚休輕搵。眼前誰辨清渾。便催烏榜。東風醉拾釣綸。

鶯啼序 辛丑之歲余在京口防幕懷歸未歸適寧鄉洪未聘刑部來寓北固

山寺時相過從一日偕飲酒樓洪忽不樂因述曩於邗江舟中聽鄰婦歌曲極酣豔纏感之致十年以來東西蓬轉重有家國之難久不再聞此聲吾儕老大故可想已余聞言方有所觸相與增感酒罷洪用夢窗韻填此視余聊復泚筆和之

春江送愁更闊。甚抽刀斷水。浪花似片片柔情。急流還蹴連蕊。酒衫重、塵痕未泮。箏

船曉月陳歡墜。想桃根、雙楫臨風。幾觸離思。烏鵲南飛，畫鼓夜統，感從軍蕩子。枕函夢、曾說飄零。玉聰消息難至。悔殷勤、封侯誤覓。換年鬢、滄桑彈指。剩狂歌、譙隱樓頭。問天何意。邯鄲過客。未聘小印。襖被僧房。聽疏鐘不寐。還暗省、維舟邗上。抑掩幽哽。隔座琵琶。燭龍催淚。分明在眼。家殘國破。竄身來向江干哭。看新蒲、野老都憔悴。何堪捉臂。當場促管傳楮。惱人鷓鴣天裏。知音自惜。邂逅填詞。總惹紅怨翠。君不見、孫劉栖憩。若箇英雄。很石苔荒。亂鴉驚起。瀟湘波淼。歸歟何日。風流搖落。悲宋玉。寫蘭荃、休更微聲倚。蒼茫第一江山。第一相思。縮來寸紙。

十二郎 烟雨樓在滌湖中其左背郭西連鴛鴦湖爲禾中第一勝境用夢窗

垂虹亭韻題意

絮雲蘸水。放郭外、嫩晴如凝。喚翠笛吹烟。銀匏攜酒。同上南湖釣艇。軋啞菱歌。清香裏。暗艣歇。鷗眠纔定。看過雨苕荷。通波亭榭。漸忘塵境。佳興。吳儂澣罷。淡妝窺鏡。自鹿去蘇臺。蠡施偷嫁。誰向鴛鴦顧影。恨眼傷高。綺才消別。愁接越來潮冷。呵素壁。



醉墨分題。付與塔鈴搖暝。

浣溪紗 題王幼遐給諫春明感舊圖時同客滬上將別矣

一卷生綃拂酒塵。歌吟曾見太平春。貞元朝士更無倫。夢裏河山鶯寂寂。望中樓閣雪紛紛。北風殘笛送車輪。

一去燕臺暗恨生。詞人幾輩似晨星。也知喬木厭譚兵。撥甕浮蛆新世界。看花啼鳥舊心情。銅仙清淚爲誰傾。

隔雨飄燈更不歸。畫闌惆悵幾多時。問君行李又何之。佳會也如錢易散。閒情惟與伎相宜。中年禁得鬢成絲。

解連環 余去杭州巴陵方湘賓用夢窗贈石帚韻見詒詞意深美行已六日始克和此奉寄

悵然愁結。盪輕雲不散。莫天無極。乍佩解。花下逢君。費重贈。斷腸寸箋春色。絮點飄烟。畫船去。六橋南北。祇孤山片石。鶴語夜寒。惹儂長憶。狂名盛年一擲。指湖隄素

月。曾照蘇白。悔浪游。我輩來遲。對剩葉零枝。怨紅吟碧。望眼傷高。看飛動、龜門秋汐。  
問襟塵、唾痕凝酒。幾回賺得。

雨霖鈴

題張次珊通參詞餞圖用屯田韻

西風清切。又疏簾底菊蕊都歇。關河萬里如霧。堪回首處。東門臨發。夾道衣冠送酒。  
但攜手、悽咽。念故陌、銅狄青蕪。熱淚經天灑空闊。江南帶水留人別。自掩關、酌客  
銷佳節。三千奏牘何用。金馬夢、漢宮殘月。此意冥冥。爲語雲中、增繳休設。算最有、烟  
柳無情。莫與寒蟬說。

秋思耗

題庚子秋詞和次珊依夢窗韻遙寄朱古微閣學

衰影經秋側。看露華如澡。菊寒無色。笳散暮鳥。燈催邊馬。塵合天窄。聽長樂鐘聲。送  
人幽夢共歎抑。黯去魂、冤化碧。料故國三千。玉顏清淚。共指夕陽深處。數番追憶。  
今夕。青燈自滴。對豔詞、彩筆重飾。舊時猿鶴。分明猶在。定誰髮白。歎一縛輕條。培風  
無計。摧勁翼。問過客。應不識。但夜雪江南。梅邊吹怨。寄得望隔。吟箋硯北。

玉燭新 詠梅用美成韻

江雁人歸後。乍夢遶南枝。草堂詩就。嫩晴綴玉。勝簪處。一縷香魂還漏。樓臺似舊。但絳雪、憑闌消候。殘角裏。又是黃昏。無言暗籠烟袖。芳苔淚鎖冬春。漸老去難攀。故鄉知否。素娥漫鬪。臨水照。那似天然清瘦。何郎句秀。想月夜。林邊搔首。聽鶴語。招手仙雲。高寒細奏。

燕山亭 北上感道旁垂柳

驚眼樓臺。笳角四鳴。似我經年游處。新綠漸垂。別後長條。纔有舊眠鶯侶。不解傷心。儘攀折。尋常來去。延佇。但廢陌斜陽。送人無語。還念衰笛榆關。拂金輦遲歸。暗塵迷路。行宮月到。一種思量。佳期被他耽誤。有限柔情。恨不似。遙空飛絮。啼宇。腸斷也。一聲聲苦。

買陂唐 題朱古微侍郎斜街補屋圖爲查查浦故居馬平王定甫亦曾寓此

剩西山。露皴烟嫵。簾簾猶認殘照。斜街一箇詩人屋。堆賺亂愁如草。春又老。正往日

尋常鶯燕迷昏曉。塵龕自掃。對淺壁荒燈。高城晶月。支枕憶年少。東華夢、前輩風流未杳。藤花曾共吟笑。玉珂金馬扶歸夜。還補滄桑詞稿。君莫惱。君試問、晚晴查浦一字定甫誰同調。神州坐嘯。讓老子婆娑。朝衫脫卻。將去換清醪。

一萼紅 送吳仲樸布政量移畿輔

蔣山陰。洗新秋片雨。朝綠似抽簪。官柳扶鞍。京塵換袂。行役幾判升沉。謾回憶、庚桑舊壤。話畏壘、餘粒有栖禽。去後樓臺。來時父老。攜酒憑臨。聞道五湖佳約。用文叔間和石帶奉贈詞意。恁高雲澹灑。出岫何心。孤夢攀天。殘呻匝野。畿甸荒迹堪尋。待爭覩、芄芃膏雨。祝苗黍、隨地種黃金。試聽衢謳。吳波咫尺烟深。

木蘭花慢 奉和朱侍郎見贈之作

話滄波路斷。又燕市看花回。指苑樹栖鴉。城蒿臥馬。春斂餘悽。宮池去人未遠。祇驚塵、黃日隔天涯。閒淚臨風自落。宦情如霧都迷。參差相見更何期。譚笑憶當時。有直閣吟箋。斜街畫本。曾和荒詞。軻離舊游漫問。但過江、名士鬢成絲。慚愧歸無三徑。

折腰還道相宜。

長亭怨慢 壬寅歲杪半唐老人受儀董學堂之聘其詞有曰鷗鷺莫驚猜試  
認取盟書一紙時在秦淮妓家屬和此調僅得半闕今夏過揚一夕盤桓云  
將爲西湖之游且促成之而未能也秋間余臥疴秦郵乃倉猝聞君噩音初  
都未稿既讀北海文叔問吳門書始復痛絕酒壚人眇悲逝自悲取續前聲  
比于紉謳之無節半唐有靈其識我否也

未拋卻、一年春計。對酒當歌，舊狂重理。檻外東風，流鶯呼我，定何意。燈初茗後，才領  
略、江南味。醉眼問花枝，已暈入、鴛紅窗紙。身寄。歎江關老去，怕說故山烽起。紅橋  
廿四，且分付、杜郎憔悴。甚倦旅，一別西湖，卻來傍、要離眠地。祇無恙黃墟，憑弔先生  
歸只。

尉遲杯 早春返櫂白門信宿邗上言愁無據用夏劍丞澀韻寫之

碧湖汎怪扶頭，可可春初釀。東風又皺微波，吹成嫩涼如簾。翠芳人豔，臨水照，欲放

眉還斂。歎今年、彩筆紅銷。賦愁淒入江菰。宵來惜取流光，殘燈外酒魔，暗答詩鬢。  
夢雨飄檐，靈潮捲瑟，危旆窄魂同閃。憑誰見，扶桑東瞰，祇覺後孤蓬鶯聲黯。引邗溝，  
一道垂楊，睡色平黏沙荻。

看花迴 秦郵晚眺春意荒寒用夏劍丞太守韻

片雲低渡淮水，莫景激碧。正有箇人望遠，凭柳外高樓，樓上斜日。湖山罨畫來去，嬌  
魂迷向值。春困久，半晌還醒，亂鶯啼夢度林隙。思往事，飛花更急。歎冷落、謝娘瑤  
席。誰記清歌一闋，送紫陌黃驄，塵暗天北。酒旗歷亂眼底，登臨懷故國。總江淹未銷  
減，莫賦傷心色。

慶清朝 園夜坐涼奉懷楊駢卿給諫

檻曲通雲，溪流鑑月，相思不隔重城。匡牀散髮，坐久人意恹恹。一覺綠陰雨過，夜光  
如水簟如冰。招涼處，圃亭似舊，換了蟲聲。因羨賦歸最早，解繡衣林下，野趣旋清。  
蒔花種朮，老去何限關情。莫是倦譚世事，眼前螿雀幾堪驚。文游近，甚時折柬，重門

吟觥。

又 駢卿和詞年衰而吟甚健可喜也次韻奉教

十萬買鄰三分種竹。擁書便抵專城。吟邊鬢雪。寧鏡還惜惺惺。爲想茂陵臥久。正宜消渴與調冰。槐風裏。短鎗角扇。試聽泉聲。淮海俊遊易歇。賦大山招隱。意愈神清。追攜恨晚。忙際空說閒情。幸不到門觸熱。啗哈流汗令人驚。抽簪去。願陪玉局。同汎金觥。

瑞龍吟 扁舟衝雪至下關入城歲晏江南寒寂可想傲夢窗體賦成此解

秣陵岸。遙望凍樹髡煙。磊沙鋪練。推篷一帶平潮。暮鴉四起。荒城半掩。步帷濺。因念上街泥雨。怒蹄衝汗。誰知瑟縮氈裘。短轅坐我。清吟自遣。來去江淮何事。鬢絲催老。年光飄轉。爲說昔時梁園歌舞都換。英辭妙墨。眼底鄒枚賤。還孤憶。弓衣繡句。羊醪清醺。抵死風吹面。萬山動影。空花歷亂。笛裏天涯遠。愁絮裏。江南何時吹散。挂檐素月。窺人游倦。

拋球樂 二首

三月春寒乍雨晴。客愁新燕一身輕。花前顧曲音猶澀。簾角偷香夢不成。咫尺闌干路。負你斜陽半晌情。

自到江南春事乖。少晴多雨半塵霾。後湖張網逢魚泣。南曲看花被燕猜。柳絮驕人甚。偏逐東風舞一回。

木蘭花令

亭皋一雨成秋樹。目送芳年隨水去。相思一夜夢南雲。遠徧天涯多少路。 縑機塵黯鴛鴦杼。妾意匏瓜悲獨處。向來祇恨不曾閒。今日方知閒更苦。

朝中措

愁中見了笑溶溶。花襯碧螺峯。妝罷這般熨帖。夢回恁地惺忪。 千篇詞賦。半生歌哭。擬付阿儂。何日滄波一舸。眼前已是西風。

西平樂 登雞鳴寺眺古傷今之作



樹杪臺城霧中幕。府彌望路插青郊。清角還來。暮潮初上。愁聲盡捲前朝。歎霸國山川似舊。宮井燕支未湫。春燈燕子。看來一例沈銷。爭說東山絲竹。殘局裏。臥起也無聊。令威重到。蘭成易老。一髮江南。魂斷誰招。空竚想。蘅州露夕。羅洞花時。便有漁翁載酒。野客攜琴。官裏何將捉爾曹。歸去未歸。泥涂久滯。松菊徒荒。對此躊躇。物換人非。東風淚溼湘皋。

高陽臺 春初步至莫愁湖憩勝棋樓慨然吟望

寒水籠煙。荒碕繫艇。女牆遮卻紅塵。未到花時。湖邊已有游人。青楊淺覆東西岸。步畫闌。都是回文。恨沈沈闌外高樓。樓外黃昏。江南自昔無愁地。甚年來吟眺。但有傷春。絕豔驚才。輸他若箇名存。魚天一片前朝影。喚翠娃。收拾垂綸。恁淹留。誤了歸期。自倒空尊。

鶴沖天 晉太康九年畫鶴塲硯拓本爲鄭文焯題

宮井廢。殿基積。遼海夜飛回。冢中名士幾人灰。餘恨涅青苔。鑿詩龕。眠畫幘。到眼

片雲秋瑩。此時江左說漂零。殘淚寫誰聽。

眉嫵。師曾世兄新婚將別詞以慰之卽送其赴日本用白石韻

漸蘋花。偎水。葦葉飄烟。風浸送歸眼。執手丁簾下。辭巢語。叮嚀人似秋燕。翠襟共款。訴近來。游迹多感。鎮相望。日出扶桑表。定儂意先暖。身世歌筵將散。幾漢瀕荀爽。吳下張翰。沈陸龍蛇起。移舟住。神州誰寄孤纜。鬢霜又點。禁片時。人遠天遠。算孤負。深杯。殘醉裏幾回見。

楊柳枝 十首

行人頭白柳條青。始恨春風不世情。若有當時豪賭興。長楸還試馬蹄輕。二月隋隄水皺池。流鶯已在最高枝。一般飛絮無才思。卻任東風剗地吹。擲盡榆錢送好春。弓彎舞袖鬥時新。妝成未免多輕薄。牽惹香街十里塵。殘局湖山絕可憐。十年林燕故依然。酒旗畫角斜陽裏。猶自殷勤纜別船。西望長安道路遐。朱樓碧瓦切清笳。勸君莫忘關山苦。啼過枝頭有莫鴉。

玉虎絲沈不可牽。樓陰搖曳帶秋千。長宵那有羊車過。脈脈啼烏上井闌。  
儘有風流似昔年。幾回恨雨復嘯煙。生來不入靈和殿。恐被君王一晌憐。  
短棹天涯酒易醒。曉風殘月有詞名。自從錯到江南路。冷眼看人幾送迎。  
已分漂零更不歸。心中眼底事多違。英雄若箇桓宣武。空對江潭泣十圍。  
露皎煙黃夜欲深。白門燈火恨沈沈。牆頭去盡閒車馬。老我安排鍛竈吟。

掃花游

冷楓笑客。照悴影吳波。素霜新染。寺門半掩。拂危牆。蘚壁。舊題詩黯。醉眼登高。怕有  
山魘晝瞰。憩游暫。聽林葉亂鴉。飄送歸帆。回望秋荏苒。驀古事。今情盡來荒檻。莫  
愁繫纜數齊梁。殘照畫帘斜颭。看慣江南。剩祇狂吟未減。翠微暗。獨踟躕。負他長鏡。

紅林擒近

秋色已瀟灑。客心方鬱陶。宿莽帶城郭。長風送江皋。我欲憑虛矯領。上覽紫極金霄。  
邈然孤鶴與翱。羣仙答笙璈。汗漫徒快意。冷落且登高。英雄出手。當筵祇合持螯。

任紅桑成海。蒼雲變狗。洞庭歌闋浮大瓢。

夜飛鵲 李曉暎罷職閒居。重有鼓盆之戚。詞以慰之。

滄波望歸路。君意何之。林葉下雁聲遲。尊前狂念已消盡。單衣依舊塵緇。相將賃虛廡。但文園多病。宋玉長悲。尋常巷陌。趁秋高。過我填詞。堪羨掛冠能早。隨意汎江湖。一舸鷗夷。誰料西風吹汝。哀蟬不斷。玉篋都迷。鳳幃暗月。隔泉臺。怎照相思。歎誰人無死。何天可問。莫更歔歔。

六幺令 九日登高用清真仙呂調寫意

萬蟬收響。官柳驚涼燠。臺城幾行秋影。漸萎前朝綠。詞客哀時未了。自惜登臨促。羣山如簇。斜陽一瞬。淒絕興亡舊遊目。因念陶公歸去。斗酒懷松菊。佳節且暫淹留。那得公田熟。天外浮雲笑我。百事多拘束。安排筇竹。紅萸相識。取次明年醉醞醑。

綺寮怨 題鶴道人沾上詞卷

對雨當風殘夜。早涼吹上衣。暗舞榭、數點狂香。征塵裏、怕見花飛。當年旗亭畫壁。黃

河唱麗日春送悽。念醉中、玉笛羌條。關山遠、怨曲當寄誰。悵望去、天一涯。昆明舊事。何堪再夢銅犀。露泫雲淒。有蟬淚、灑高枝。滄江故人都老。且漫譜、冷紅詞。悲君自悲。相思待盡處、蠶又絲。

還京樂 寄易實甫武昌用清真韻

素秋迴。見說棕鞋布襪。休更理。歎故人江表。廿年客路。登臨空費。記雁邊鷗際。高吟白日哀湍委。送倦眼何處。可灑看花晶淚。向黃塵底。自嗟卑。慚老狂朋。漫問平居。知甚興味。無端怨闊恩疏。恁分明。舊時牛李。似而今。都燕雀依林。餘艎去水。倘協東籬。約簪霜來共顛顛。

竹馬子 甲午應試都堂會與張子馥鄭叔問聯句和柳七詞擊鉢分曹致多

懽賞茲子馥化去久矣余與叔問吳天相望亦正寥落可憐有憶前塵仍用

柳韻攄感

看殘靄、縱橫長蘆散亂。冷鷗依渚。歎神京去遠。斜川別久。催人寒暑。最憶城北胡

術分題對酒。上林鶯序。驅馬送君行。問塵埋張緒。風流何處。自此成幽阻。朝華倏謝。夜螢空聚。江南歲歲延佇。誰撫韓陵私語。剩得庾信哀時。一篇枯樹。臨水傷遲暮。重簾畫燭。待話秋魂去。

塞翁吟

散髮尋秋水。還照野客龍鍾。畫闌外。綺霞臃。閒去聲暮靄青紅。情人最好秦淮住。清露夜澣芙蓉。汎錦瑟。換秋風。訴弦柱。西東。怱怱前歡逝。針樓夢窄。新會渺。蓬山路重。有懷裏。江郎恨賦。又堪對。小別銷魂。短燭孤篷。垂楊繫穩。冷酒荒波。沈醉霜楓。

惜紅衣 漚尹侍郎叔問舍人屢言江南之游迨秋不果但有愁望適兩君先後書來兼示倡蘇近作勉賦寄意仍用白石韻

冷訊通蘆。清愁餞菊。雁邊風力。細寫鱗箋。江天印遙碧。登臨倦眼。空佇望。來游佳客。秋寂。琴調酒歌。說殘年。栖息。長安古陌。飄駭塵飛。冠裳半淩藉。浮雲斷送。故國指西北。萬一阮狂嵇嘯。重認五陵登歷。料夢華無恙。悽絕夕陽鴉色。

滿路花 和映奩詞韻

梅嬌乍逗簪。苔密初勝屨。下廊裙帶重。微風揭。無言有意。不許人撩撥。斷紅生半靨。驀地回頭。此時教恁拋撇。歌紈啼素。淚染相思篋。殘灰書細字。看看滅。爭知恨網。不爲春蠶設。今後從休說。着甚纏綿。儘伊無箇銷歇。

齊天樂 重遊滄浪亭

館梧霜葉秋飛盡。高城雁迴初響。半潦通橋。層煙冠石。吟屐蕭蕭孤上。寒鐘又放。送天末潮音。替人悲壯。倚徧危闌。舊遊誰共訴心賞。文章流寓自古。水亭風詠地。空肅遺像。土木移形。衣冠換目。時事幾翻新樣。沈吟片晌。指吳會浮雲。晚生千嶂。待語西施。越絲愁細網。

惜紅衣 白石此詞日字非韻也。叔問獨以爲當。叶姑徇其說。重和一首不足。

以云勇

短巷衝霜。高樓礙日。暮寒猶力。繫馬閭門。垣苔破荒碧。栝盤送老。都看賤。年光如客。

心寂歌散酒闌。學禪龕居息。狂花綺陌。多半殘春。隨風墮茵藉。零香斷夢。衆國蟻  
柯北難得。美人無恙。重共水沿山歷。莫但悲游事。冷落一江楓色。

壽樓春

題張彥雲娟鏡樓圖卷子

春之人翩然。記驚鴻顧影。要眇疑仙。幾向微波通問。畫屏尋歡。攘皓腕。歌幽蘭。抗和  
子。旁皇無端。但鏤想靈犀。鑄芳麗琬。留照鏡中年。三生事。花如烟。有珠囊舊物。脂  
譜新編。最念離鸞光隱。小蛾春寒。心上月。何時圓。拚豔才。消磨嬋娟。便金屋安排。盈  
盈並肩。卿可憐。

燭影搖紅

吳門春雨得王夢湘潯陽書并和叔問見懷詞根觸舊遊不能無

作對叔問益念夢湘也仍同夢窗韻

門掩昏燈。離觴斟酌愁深淺。城根一夜雨。漂花春老。吳孃院。撥盡鑪灰坐暖。數皋橋、  
羈遊影徧。舊人誰證。吟鬢星稀。禪心泥濺。江上楓青。琵琶還訴天涯怨。眼前同調  
已無多。休作尋常看。夢裏行雲未散。采江離。橫塘寄遠。清明過了。糝絮光陰。年年萍



捲。

應天長 連雨有歎用夢窗韻

風竿轉暝。雲絮蘸空。沈陰徧灑郊陌。正見燕寒巢幕。銜泥話春色。烏衣巷。前度客。定識我、秀眉吟窄。舊塵在、一片殘衫。酒暈青碧。哀樂念今昔。不到中年。不信世情隔。但憾箸書緣絕。咿唔撫空壁。滄波路。歸思寂。早倦聽、下亭淒笛。賦愁了、冷雨檐花。清漏初滴。

霜花腴 用夢窗自製腔韻酬和叔問

數椽借宅。傍小城、先生坐隱危冠。花市呼圍。笛家邀步。柴門閉也應難。醉鄉儘寬。料陸沈、不到尊前。但詞人、漸作流星。過江烟雨曉光寒。芳節最傷吟望。問吳宮消息。總付鳴蟬。白石烟波。紅梅亭榭。何期冷落朋箋。遲君放船。溯美人、秋瀨娟娟。近楓橋、夜火攜歸。五湖同夢看。

瑞龍吟 春光向盡古微先生邀同張次珊褚伯約鄭叔問諸君集於聽楓園

拍照聯詞極客中之清致。余方有俗役未終席輒去。越日賦此奉酬。仍用清真均。

吳園路。仍見鏡沼開萍。罽亭攢樹。年年抱月飄烟。翠裙鬥草。春歸甚處。共延佇。還念舊家人渺。燕巢當戶。天教借宅東偏。煮茶聲裏。樵青寤語。衰鬢不堪重照。晚襟交手。風燈紅舞。爲道近來音書。人事多故。浮雲望極。吟斷江關句。知誰問。黃金賦稿。青門遊步。嘯侶從君去。對花對酒。翻縈黯緒。恁解愁千縷。扶醉眼。催歸歌唇銜雨。怨香夜溼。迷空霏絮。

小重山令 賦楊花答叔問殷勤之意

密雪輕絲舞作球。西園斜日下。沒人收。無端才思說風流。尋春盡。滿地是閒愁。吹不上枝頭。還能將別淚。灑江州。昨來纔有幾萍浮。東西水。隨處且淹留。

瑞龍吟 和叔問餞春

平江路。還向廢苑尋烟。斷津攀樹。依依帆角青山。送春正在斜陽盡處。黯愁佇。誰

見小城棲隱。蓬蒿生戶。天涯倦客重逢。覩簾燕子。關情對語。年少京塵多暇。扇裙  
翩影。狂歌酣舞。空歎素緇衣新。何似人故。冷紅瘦碧。惆悵題襟句。而今共、吳根貰酒。  
皋橋聯步。慨想歸田去。撫琴命操。離憂萬緒。催老嗟霜縷。無計挽、門前榆錢飛雨。莫  
教便作泥中輕絮。

水龍吟 枇杷詞舊無傳作梁溪舟中偶一爲之

果林翠晚。山深梅肥。時節初過了。洞庭平望。東谿勝處。爛晴垂曉。膚擬雲腴。皮兼沙  
白。核誇單好。自蜀都賦罷。唐宮帖後。誰誤寫。琵琶稿。天與蠟。兄名早。勝尋常。許多  
梨棗。經霜滌蕊。憑薰釀實。甜香滿抱。千樹黃金。但愁摘盡。園丁偷飽。憶板橋西去。隔  
花門閉。有才人老。

雲起軒  
詞

運彰



文廷式（咸豐六——光緒三〇）

字芸閣。號道希。江西萍鄉人。少負才名。光緒庚寅進士。由編修遷翰林侍讀學士。李鴻章頗禮遇之。甲午之役。廷式主戰。反劾鴻章畏葸。鴻章嫌之。授意御史楊崇伊疏劾。遂削職。戊戌後。密旨捕治。逸去不知所之。工駢體文。詩詞尤超拔。

序

詞家至南宋而極盛。亦至南宋而漸衰。其衰之故。可得而言也。其聲多擘緩。其意多柔靡。其用字。則風雲月露紅紫芬芳之外。如有戒律。不敢稍有出入焉。邁往之士。無所用心。沿及元明。而詞遂亡。亦其宜也。有清以來。此道復振。國初諸家。頗能宏雅。邇來作者雖衆。然論韻遵律。輒勝前人。而照天騰淵之才。溯古涵今之思。磅礴八極之志。甄綜百代之懷。非窘若囚拘者。所可語也。詞者。遠繼風騷。近沿樂府。豈小道歟。自朱竹垞以玉田爲宗。所選詞綜。意旨枯寂。後人繼之。尤爲冗漫。以二窗爲祖。視辛劉若仇讎。家法若斯。庸非巨謬。二百年來。不爲籠絆者。蓋亦僅矣。曹珂雪有俊爽之致。蔣鹿潭有沈深之思。成容若學陽春之作。而筆意稍輕。張皋文具子瞻之心。而才思未逮。然皆斐然有作者之意。非志不離於方罫者也。余於斯道。無能爲役。而志之所在。不尙苟同。三十年來。涉獵百家。摧較利病。論其得失。亦非捫籥而談矣。而寫其胸臆。則率爾而作。徒供世人之指摘而已。然淵明詩云。兀傲差若穎。故余亦過而存。

雲起軒詞序

之。且書此意以自爲其序焉。光緒壬寅十二月。萍鄉文廷式。

雲起軒詞

萍鄉文廷式芸閣

采桑子 記西湖舊遊

水西山北閒遊處。翠蓋招涼。紅袖拈香。雁外鷗邊易夕陽。石牀自掃松陰冷。臥想秋江。幾許清狂。潘鬢年來也自霜。

點絳脣 避暑

扇力微微。晚風乍喜吹衣帶。蘭臺賦在。一霎炎光改。蒔竹當窗。畫意憑誰會。吟天籟。琴聲自解。曲罷龍歸海。

河傳

宵靜。燈燼。月臨窗。瓜架蟲聲送涼。怨君憶君清漏長。羅裳。近來銷舊香。錦字書成情默默。親手織。要勝春花色。繭多絲。柳多枝。罌罌。曉風千里吹。

長相思



鈿篋篋。纖指柔。一曲吳歌不上喉。時時錫倦眸。錦纏頭。金帶鉤。細喘輕嚶博得不。誰知離別愁。

浣溪紗

縹眇眉痕憶遠山。一春愁思不曾閒。斷雲祇在有無間。原是花身應惜惜。猶凝竹淚記斑斑。小樓今夜恰輕寒。曲曲闌干淡淡雲。蘭儀蕙質杳難分。卸釵聲溜隔簾聞。釀雪庭陰愁意緒。聽香牀角倦嚙呻。不成幽夢枕微溫。

虞美人 乙未四月作

無情潮水聲嗚咽。夜夜鶻啼血。幾番芳訊問天涯。不道明朝。已是隔牆花。夕陽送客咸陽道。休訝歸期早。銅溝新漲出宮牆。海便成田。容易莫栽桑。

念奴嬌

一村臨水。乍迎風含笑。野桃春媚。穠豔波光相映發。惆悵無情有思。燕子不來。東風

容易目斷芳塵委。高鬟愁極更煩箏響料理。休說前度劉郎重來不見鎖赤城霞氣路轉峯前征騎影。咫尺便迷千里。芳草連雲巖花拂袖驛館空庭閉。悶來無寐。庾詞聊託麻紙。

夜遊宮

疏雨困眠孤館。薄衾冷、漏籤時斷。溼羽投林鳥已倦。斂秋心、白雲巖、黃檨峴。瑟瑟湘波遠。動吟思、楚歌聲怨。濁酒深杯且自勸。渺關河、意難忘、君試忖。

高陽臺 和半塘乙盦韻卻寄

靈鵲填河。驚烏繞樹。秋來一樣心期。簾額風輕。金鑪篆裊香微。雲樓霧幕參差起。黯瑤情、未許人知。寫銀箋、四角中央。難寄離思。淒涼茂草褰衣處。儘江河日暮。淚下連絲。猛拍闌干。憑他蝶醒鶯癡。重陽蕭索青蕪國。來信云七夕前三日得信在重陽日故有此句恁霜寒、籬菊能支。莫教人、剗盡瓊華。留映新眉。

阮郎歸 湘舟卽事

玳筵別酒未曾醒。飛帆過洞庭。哀猿啼急雨冥冥。君山何處青。木葉下，蕙蘭馨。嬋媛帝子靈。十年蹤跡楚江萍。煩君鼓瑟聽。

訴衷情 湖孺水退衰草冬晴來時渺漠無涯之境不知何往矣篷窗暇筆爲

賦此詞

人閒日日有滄桑。湖草只尋常。依然舊日鷗鷺，便換水雲鄉。 假紙帳，對茶鐺。細思量。月華金鏡，風捲銀濤，一樣瀟湘。

點絳脣 重九

風緊天高，興來欲射雲閒雁。平蕪楚甸。漠漠清霜染。 不省題糕，也少悲秋伴。登臨健。蘭芳菊豔。高想橫汾宴。

卜算子 水仙花

香靜玉盤安。影薄銀屏繞。白石清泉偶遇之，不礙花光小。 唱徹大江東。此意無人曉。若見湘皋解佩時，我自拌花惱。

鷓鴣天

蝶夢遽然別有天。蠅鑽故紙幾何年。在山遠志何如草。入世忘憂不藉萱。身外物。句中玄。一回攬鏡一欣然。川如碧玉山如黛。不是吳兒也叩舷。

憶江南 詠雪

天欲暮。旋覺白光寒。銀闕半空俄隱現。瓊林萬樹各飛鱗。何處是三山。行且止。茸帽據征鞍。任是梅花開遍也。不曾春夢落人間。詩思已闌珊。

邁陂塘 惜春

任啼鴉。苦催春去。春城依舊如畫。年年芳草橫門路。換卻王孫驄馬。愁思乍。甚絮亂絲繁。又過寒食也。殘陽欲下。好飛蓋西園。玉觴滿引。秉燭共遊夜。瓊樓迴。孤負緘詞錦帕。銅仙鉛淚休瀉。落紅可及庭陰綠。付與流鶯清話。歌舞罷。便熨體春衫。今日從棄捨。雕鞍暫卸。縱行遍天涯。夢魂慣處。猶戀舊亭榭。

清平樂 有憶

畫羅雙鳳。素舸曾相送。一夕梨雲無好夢。簾外月明如汞。桃根桃葉誰憐。江南好暮秋天。贏得樓頭指點。木蘭可是郎船。

賀新郎 丙戌都中與汪莘伯聯句之作迄丙申中秋乃於漢口志仲魯前輩書

中得此故紙詞雖不工姑錄存之以誌鴻爪

天末春將老。過清明、海棠開罷。柳絲吹少。道希幾日子規啼不住。棖觸離人懷抱。汪兆銓莘伯看一片黏天芳草。道希綠到平蕪將盡處。又斜陽雲外青山繞。空望遠。長安道。莘伯故人此際應西笑。還念我麻衣飲墨。緇塵撲帽。道希十載詞場供跌宕。贏得中年近了。莘伯況歲晚。江湖潦倒。豪竹哀絲蒼生志。儘昂頭。付與蘇門嘯。龍氣在。鴻飛杳。道希

沁園春 隱括楚詞山鬼篇意以招隱士

若有人兮。在彼山阿。澹然忘歸。想雲端獨立。帶蘿披荔。松陰含睇。乘豹從狸。且挽靈修。長懷公子。薄暮飄風。偃桂旗。難行路。向石茸捫葛。山秀塞芝。最憐雨晦風淒。更

猿狖宵鳴聲正悲。悵幽篁久處。天高難問。芳蘅空折。歲晏誰貽。子或慕予。君寧思我。欲問山人轉自疑。歸來好。有華堂廣讌。慰爾離思。

念奴嬌 安埜地觀劇紀事

衣瓜夏五。試于闐新樂。柘枝蠻鼓。七寶樓臺彈指現。乍染繽紛花雨。釧動聲輕。釵橫光顫。寶靨明星互。天河不隔。盈盈咫尺無語。爲問拾翠洲邊。明璫未解。可要陳思賦。結綺臨春朝復夜。贏得東昏千古。海綠非春。雲香何葉。迴首蘅皋暮。維摩病也。憑誰問訊天女。

蝶戀花 戲贈陳伯嚴同年

細雨輕塵春窈窕。看盡紅嫣。自覺孤芳好。繫馬垂楊臨大道。更無人處多幽草。六曲屏山歸夢繞。油壁香車。何計迎蘇小。紈扇無情金鈿杳。高樓日日東風老。

金縷曲 壽李木齋前輩卽送其還京之作

把酒爲君壽。論世間、高名曼福。似君稀有。但使雍容平進取。黑髮便躋台斗。況才力、

淵涵地負。默數吾鄉誰健者。定瓊瑤、玉佩追歐九。曾小試、揆天手。周南留滯今非久。卻回顧、天吳罔象、濤飛山走。指點齊州煙點外。朱鳥迴吟霜味。震大地、洪鐘一吼。喚醒市朝紅紫夢。看東方、耿耿蒼龍宿。天莫醉、賜鶉首。

敘頭鳳

嬌波溜。纖腰瘦。仙裙百幅香羅皺。乘鸞舞。流鶯語。瑤觴飛贈。修羅天女。舉。舉。舉。花簪鈕。瓜盛斗。綠雲深處重攜手。青冥路。神霄侶。幾時清聽。天風琴譜。許。許。許。

醉太平

征衫酒澆。香衾夢遙。陽關四疊魂銷。折長亭柳條。年光易凋。山川自遼。行人白髮飄蕭。過當時板橋。

浪淘沙 赤壁懷古

高唱大江東。驚起魚龍。何人橫槊太怱怱。未鎖二喬銅雀上。那算英雄。杯酒醉長空。我尚飄蓬。披襟聊快大王風。長劍幾時天外倚。直上崆峒。

瑣窗寒 九江旅舍中秋無月風起浪飛江聲撼枕愁不得眠得詞一首參用

周美成瑣窗寒月下笛二調音節倚聲之家未必謂然龍吟雁哀如似相答

明晨且遊廬山以滌塵慮故未語紀實云爾

暑綰延涼。霜篷點水。暮吳朝楚。閒汀沙鷺。識我慣行羈旅。響驚颿。簷鐵夜鳴。怨蟲敗壁聲更苦。怪素娥淒斂。深宵不放。一痕光吐。酒所看今古。對斗柄芒寒。滿江清露。琵琶自語。誰似當年白傅。倚危闌。愁見浪花。海雲正起。郎勿渡。且淹留。獨翫屏風。九疊朱鳳舞。

八聲甘州 送志伯愚侍郎赴烏里雅蘇臺參贊大臣之任

響驚颿。越甲動邊聲。烽火徹甘泉。有六韜奇策。七擒將略。欲畫凌煙。一枕菅騰短夢。夢醒卻欣然。萬里安西道。坐嘯清邊。策馬凍雲陰裏。譜胡笳一闋。淒斷哀絃。看居庸關外。依舊草連天。更回首。淡煙喬木。問神州。今日是何年。還堪慰。男兒四十。不算華顛。



高陽臺 塵

燕幕回春。蛛簷冒絮。陌頭認取新妝。幾日驪歌。餘聲猶在雕梁。迴颺輕颺菱花影。有箇人、寶瑟淒涼。檢紅箋、細寫相思。淚黯千行。洛神賦後清才減。久低徊羅襪。想像明璫。香界微聞。紅樓隔雨相望。重尋壞壁留題句。感潘郎、鬢已如霜。祇宵來、千里雲開。應共清光。

浣溪紗 旅情

畏路風波不自難。繩牀聊借一宵安。雞鳴風雨曉光寒。秋草黃迷前日渡。夕陽紅入隔江山。人生何事馬蹄閒。用山巨源語

祝英臺近

翦鮫綃。傳燕語。黯黯碧雲暮。愁望春歸。春到更無緒。園林紅紫千千。放教狼籍。休但怨連番風雨。謝橋路。十載重約鈿車。驚心舊遊誤。玉佩塵生。此恨奈何許。倚樓極目天涯。天涯盡處。算祇有濛濛飛絮。

廣謫仙怨 聞之唐明皇登駱谷之時有思賢之意是以終戡大亂旋返舊京  
余以爲明皇見機早規入蜀故雖倉皇遷徙而事勢昭然不然靈武之衆焉  
得嗣君勤王之師孰爲標目登谷遐覽意在斯乎屢遷而存古有明鑒寶康  
之意今更廣之

玄菟千里烽煙。鐵騎縱橫柳邊。玉帳牙旗。俊遁燕南。趙北騷然。相臣狡兔求窟。國  
論傷禽畏弦。早避漁陽鼙鼓。後人休笑開天。

木蘭花慢 送黃仲弢前輩解官奉親赴大梁卽題其載書泛洛圖

春明門外路。看迤邐。接天涯。任當道豺狼。處堂燕雀。起陸龍蛇。莫邪且藏匣底。飽河  
魚。洛筍卽爲家。滿載英光書畫。閒吟嵩少煙霞。京華聚散等搏沙。世事一長嗟。是  
楚澤椒蘭。齊邱松柏。秦國蒹葭。靈槎不浮天上。鑄玲瓏。無術教皇媧。他日劉郎重到。  
玄都認取桃花。

天仙子

曲曲闌干淺淺池。風定簾鉤不上絲。玉人春睡損羅衣。雲護密月來遲。誰見風流絕代姿。

草綠裙腰山染黛。閒恨閒愁儂不解。莫愁艇子渡江時。九鸞釵。雙鳳帶。杯酒勸郎情似海。

望江南

遊俠好。結客過邯鄲。孔雀羅裙擎玉筯。鵝兒錦帕覆雕鞍。騎出萬人看。遊俠好。遠出不須糧。偶憶蒲萄過大宛。閒尋芝草渡扶桑。何處是他鄉。遊俠好。不願執金吾。寶瑟歌成三婦豔。銀鎗舞急萬人呼。賭酒更擲蒲。遊俠好。雄劍動星文。易水行時虹貫日。扶餘王後氣成雲。此局未輸君。遊俠好。縱獵玉驄驕。金彈戲拋林外雀。珠弓曾射水中蛟。千里極蕭條。

八歸 答子培沈刑部贈別之作

洪流帶郭平蕪紆。南陌乍染濃碧。斜陽淺映城闌處。猶認亂鴉催暝。飛燕愁夕。葵

麥參差春色老。好料理、江湖歸楫。恰難忘、載酒經過。寂寞子雲宅。誰信蒼梧路阻。憑將心事喚醒西京銅狄。鬢蛟潭底。拜鵲林下。此意無人知得。向東風擣麝。吹起香塵。遍今昔。鈴聲緊。別愁如海。曠野星稀。蒼涼歌主客。

三姝媚

王幼霞侍御見示春柳詞未及奉和又有送行之作賦此闕答之

鶯啼春思苦。看湖山紛紛。尙餘歌舞。折柳千絲。帶酒痕猶沁。錦襟題句。倚遍危闌。澹暮色、飄殘香絮。似繡園林。一霎鵑聲。便成今古。當日花驄聯步。共遊冶春城。踏青歸路。夜半承明。聽漏聲疑在。萬花深處。可奈東風吹不散。濃霧淒霧。好記靈和舊恨。清商自譜。

賀新郎 贈黃公度觀察

遼東歸來鶴。翔千仞。徘徊欲下。故鄉城郭。曠覽山川方圓勢。不道人民非昨。便海水、盡成枯涸。留取荊軻心一片。化蟲沙。不羨鈞天樂。九州鐵。鑄今錯。平生儘有青松約。好布被。橫擔柳栗。萬山行腳。閭闔無端長風起。吹老芳洲杜若。撫劍脊。苔花漠漠。

吾與重華遊玄圃。遭迴車。日色崦嵫薄。歌慷慨。南飛鵠。

又 贈梁節菴

髻也今殊健。舉世間。雞蟲得失。魚龍曼衍。盡付莊生齊物論。一例浮雲舒卷。任蘭佩、多憎獬犬。白眼看天蒼蒼耳。古今來。那許商高算。問長夜。幾時旦。酒酣更喜綸巾岸。記當日。軍謀借箸。尙方請劍。誰道神州陸沈後。還向江湖重見。情不死。春蠶自繭。黃竹歌成蒼馭杳。悵天荒地老。瑤池宴。斜日下。淚如霰。

踏莎行 題明葉蕙綢鴛鴦夢傳奇崇禎丙子刻本

英憲傳經。光威聯句。一家詞賦堪千古。誰知中女更多才。銅駝別有傷心處。傳奇作於崇禎丙子而其言云。若論世道荆棘銅駝煞多感慨是易代之感實有前知又云奈荆棘成叢誰敢指北極半天螭竦亦警句也。紫玉成煙。紅簫未譜。一痕斷硯留眉嫵。仙盟佛證總無聊。薰風獨據珊瑚樹。借用葉小鸞詞句。

南歌子 閨情

日上紅蕖麗。霜前赤棗收。蓮汝在心頭。郎情休便冷。未經秋。  
鐵鹿沈長索。金蟾齧碎香。荀令好兒郎。絨情親寄與。耳邊璫。  
豆挾長縈荻。桐花未燥枝。龍笛月中吹。就中阿那意。許儂知。  
髮髻花安髻。玲瓏鏡織衣。春暖蝶雙飛。纔醒還復睡。下羅幃。

翠樓吟 歲暮江湖百憂如擣感時撫己寫之以聲

石馬沈煙。銀鳧蔽海。擊殘哀筑誰和。旗亭沾酒處。看大艚、風檣峨軻。元龍高臥。便冷  
眼丹霄。難忘青瑣。真無那。冷灰寒柝。笑談江左。一笥能下聊城。算不如呵手。試拈  
梅朵。茗鳩栖未穩。更休說。山居清課。沈吟今我。祇拂劍星寒。敲屏花妥。清輝墮。望窮  
煙浦。數星漁火。

春光好 新年

新酒熟。早梅妍。久晴天。貼燕黏雞坊宅遍。又新年。  
休憶壺瀛舊事。且將詩酒隨緣。  
家計無多生願足。五湖船。

西江月

削竹閑裁菊枕。煮茶自洗椰瓢。一燈搖夢雨蕭蕭。苔院更無人到。世翳已除眼纈。愁塵不上眉梢。布衣來往秀江橋。休問五陵年少。唐吳融詩五陵年少如相問阿對

泉頭一布衣

側犯 詠梅用白石道人詠芍藥韻

乍來又去。幾時得共孤山住。疏雨對綴玉繁枝。換春句。天寒倚翠袖。杳漠無尋處。仙語想洞戶。雲開暫迴顧。空階雪凝。鶴向天風舞。應約個。美人來。華月映雕俎。信遠難期。暗占花數。甲帳簫鸞。十眉重譜。

好事近 湘舟有作

翠嶺一千尋。嶺上彩雲如幄。雲影波光相射。蕩樓臺春綠。仙鬢撩鬢倚雙扉。窈窕一枝玉。日暮九疑何處。認舜祠叢竹。

如夢令

出字闌干纔倚。銀字箏弦親理。臨過十三行。便有驚鴻心思。年紀。年紀。可是莫愁織綺。

霜葉飛

丁酉冬閒聞粵中故人如葉蘭臺陳孝直陶春海輩先後凋謝余少

長嶺南一時名流咸得款接如許涑文侍講顏夏廷兵備則父執也李仲約侍郎久相識後爲余朝考師張延秋姚檉甫兩編修林楊伯明仲兩主事許天倬副貢陳慶笙秀才諸人並文酒追從樂數晨夕十餘年來僅有存者新阡宿草杳漠何期誠知天道變衰早死未爲不幸特文字之習猶不能忘海上客遊爲填此闕譜入笛聲當不減山陽之賦也

海風吹老敲簷樹。幽窗涼夜偏早。前塵依約越中山。問甚時重到。憶俊侶、英遊不少。金鞍寶馬呼鸞道。更珠江浩渺。良月灩、笙船衆花。齊映歡笑。因甚耆彥風流。十年前後。新墳盡長秋草。江山滿目淚沾衣。是而今懷抱。算不及、魂歸朱鳥。波濤萬頃珠沈了。待近約、梁鴻去。謂梁節菴踏遍千山。萬山斜照。



南歌子 詠蝶

著雨花如繡。尋芳爾最忙。夕陽影裏自成雙。卻省是誰春夢、繞迴廊。曾向仙山住。休誇綺閣妝。阿儂春倦懶顛狂。且對蘭蕤、消受一絲香。

鷓鴣天 贈友

萬感中年不自由。角聲吹徹古梁州。荒苔滿地成秋苑。細雨輕寒閉小樓。詩漫與。酒新籌。醉來世事一浮漚。憑君莫過荆高市。滹水無情也解愁。

少年行 日本藝妓瓢箪書來戲題其後日本人謂葫蘆曰瓢箪

清曠映雪。纖腰貼地。東日照名姝。教剝瓜犀。戲堆臘鳳。情態半憨疏。還相問。近來消息。懷得漢書無。如此壺天。儘留人住。我欲再乘桴。李清照詞我欲乘桴趙松雪詞

我欲乘桴浮到日華東

虞美人

眉上雅黃釵上鳳。壓得春愁重。竹梢清露滴闌干。中有湘娥、幽淚不曾彈。鶯慵蝶

倦都無賴。薄恨屏風外。博山鑪子篆香熏。不信鑪煙散後作行雲。

玉樓春

南來北去經行慣。歷歷關河長在眼。仙山無樹鶴書稀。滄海生波龍穴淺。袖中贖  
有陰符卷。醉裏不辭游俠傳。借如李令擁旌旗。何似顧榮搖羽扇。  
洞天福地何森爽。芝草琅玕日應長。浩歌華月碧山閒。九點齊煙如在掌。清狂試  
演霓衣唱。自扣銅鈺神益王。一杯舉手勸長星。江水滔滔前後浪。

念奴嬌

答皮麓雲同年見贈之作麓雲時掌教江西經訓書院又所著有尙

書大傳疏證尙書今文疏證孝經鄭注疏證等書故詞中及之

十三年事似波流電激不堪重攬。幾度京華聯客袂。幾度江鄉清讌。虎觀談經。麟臺  
奏賦。之子瀟湘彥。枯桑海水。近來添入詩卷。呼酒重話離情。簷花糝席。細雨孤鴻  
遠。君自有琴彈不得。清廟明堂三歎。巾卷充街。金絲在壁。未信功名晚。幽蘭花發。風  
鳥特地徐轉。

臨江仙 壬午廣州舊作

伏雨初收。闌檻潤。葛衫蕉扇新涼。一年休負好時光。詩教蠻婢讀。酒對馬軍嘗。他日誰修輿地志。嶺南卽是吾鄉。異名掇拾補羣芳。龍牙和粥碗。鶯爪壓釵梁。

浪淘沙

半捲水精簾。漏靜香添。薄寒已是換吳絳。鏡裏修眉天上月。比似纖纖。閒檢道書籤。嬾卸花鈿。嬌羞卻趁翠帷前。坐又不成眠。又起。良夜厭厭。

鷓鴣天 王幼霞御史得其友人由江南揚寄江總殘碑因作秋窗憶遠圖屬

題爲賦此闋

壁滿花穠世已更。讀碑猶記擘箋名。屋梁月落懷人夢。易水霜寒變徵聲。家國恨。古今情。鏡中白髮可憐生。君知六代恩恩否。今夕沙邊有雁驚。

鷓鴣天 卽事

劫火何曾燎一塵。側身人海又翻新。閒憑寸硯磨龔世。醉折繁花點勘春。聞柝夜。

警雞晨。重重宿霧鎖重闌。堆盤買得迎年菜。但喜紅椒一味辛。  
臘鼓聲中醉一杯。世情不復強安排。錯從蟻穴聞牛鬪。自縱鸞天任燕猜。  
看傀儡。賣癡獸。草頭木腳滿槐街。祥雲輝映三千界。曾見崆峒訪道來。

鬲溪梅令 詠鸞枝花

妝臺長記別離時。小橫枝。幾度疑桃辨杏。眼迷離。玉纖勻淡脂。  
未歸遲。自把玉簫閒倚。月明吹。錦衾春思迷。女牀何處覓鸞栖。

虞美人 題朱艾卿洗馬同年小像

臨風玉樹青春裏。省可青春意。畫堂端笏奉安輿。不是張梨周棗、賦閒居。  
華芝生。柱鼻禽唳。使有朱霞思。男兒好好畫凌煙。纔稱風流張緒、想當年。

鷓鴣天

著意尋春春已闌。東風一夕轉輕寒。玉驄踏徧長安陌。爲戀殘紅小駐鞍。  
黃鵠舉。白鷗閒。須從塵外看青山。花冠不羨天香馥。坐弄裊瀛祇一丸。

上西樓

紅愁綠怨誰家。夕陽斜。青草池塘閣閣數聲蛙。攬清鏡。理殘鬢。別情賒。此夜月明霜信到天涯。

風流子 江樓夜眺

捲書拋短枕。江樓迴、倚檻看疏星。但峭風透幌，麗譙聲急，溼煙迷渚，漁火光冥。渺何許。山蕪添秀色。湘篴接餘馨。檀板自歌，一九月暗，玉觴豪舉，八表雲停。沈憂無端起。哀鴻怨舉，世有耳誰聽。天際水何澹澹。山自青青。算滄海生桑，春歸漢燕，汗隄無柳。秋老隋螢。祇恐銅仙淚盡，露冷金莖。

水龍吟

落花飛絮茫茫。古來多少愁人意。游絲窗隙，驚飈樹底，暗移人世。一夢醒來，起看明鏡，二毛生矣。有葡萄美酒，芙蓉寶劍，都未稱、雲生志。我是長安倦客，二十年、輾紅塵裏。無言獨對，青燈一點，神遊天際。海水浮空，空中樓閣，萬重蒼翠。待騁鸞歸去，層

霄迴首。又西風起。

長亭怨慢 和素君韻寄遠

聽黯黯、長安夜雨。那是儂家。放教歸去。槩短窗虛。夢魂彷彿到江浦。愁生無定。應是有、生愁處。寄遠織瓊花。渾不省、涼蟾天宇。凝竚。祇蘭紅波碧。依約謝娘眉嫵。文園病也。更堪觸、傷春情緒。便月痕、不上菱花。儘難忘、衣新人故。但乞取天憐。他日剪燈深語。

蝶戀花

一片閒愁無處著。空裏游絲。直任風飄泊。望斷闌干天一角。夕陽那似春魂薄。青鳥無端傳密約。玉印檀痕。莫負香香諾。王母桃花開又落。彩雲夢遠閒池閣。

臨江仙 廣州舟中作

嶺外尋春春景異。木棉處處開花。鶻聲人語共咿啞。蠻神依檉栝。水市足蠔蝦。一曲招郎才調好。道光閒招子容。孝廉作粵謳詞甚淒麗。閒聽蛋女琵琶。翦風絲雨送。

歸鴉。近來情性別。不弔素馨斜。

摸魚子

記瑤臺繡襦甲帳。阿儂十載曾住。檀槽一曲當筵醉。別遇散花天女。情淡泞。偏絮絮。星星向我深深訴。蓮心太苦。怕如水年華。傲人心性。無地可安附。聰明錯。解慮落花風雨。酒闌別樣酸楚。廣平那是心如鐵。也擬梅花一賦。還自語。看禪榻茶煙。未稱迎桃渡。離愁萬縷。正清曉江潭。淡雲籠月。黯黯碧空去。

減字木蘭花 郴江舟中

萬山明月照我孤舟。正愁絕。若待無愁。除是湘江更不流。鴻南燕北。別後年光成惜惜。不信淒涼。看取潘郎鬢上霜。

清平樂 擬唐人

沈思夢裏。一枕嬌雲膩。似醉如矜眠又起。的的可郎心意。征衫別淚千行。不浣爲惜餘香。夜夜相思無寐。羅幃況值初涼。

南鄉子 題易碩甫洞庭眺月圖

雲散晚山青。又泛扁舟過洞庭。月下一聲吹鐵笛。淒清。祇恐魚龍不慣聽。紅燭夜冥冥。靜寫秋光入畫屏。寄語幽蘭兼白芷。芳馨。可解騷人萬古情。

滿庭芳 江永舟中偕易碩甫聯句用周美成韻

去國裝輕。催年鼓疊。離人與月難圓。碩甫江寒浪淺。千里上孤煙。道義寫出離騷古意。斲冰雪。石瀨濺濺。碩甫乘風去。無歸也好。同泛謝公船。義殘年。懷舊隱。梅花幾樹。竹屋三椽。碩甫於廬山築屋隱居半載故詞及之祇大千雲影。飛落襟前。義欲倩湘靈海若。理瑤怨。同訴冰絃。碩甫琴音悄。馮誰徵調。喚醒老龍眠。義

青玉案 旅況

東風綠遍江南草。偏作客、長安道。寒入燈花愁悄悄。漏聲淒緊。雲容慘澹。不是天將曉。飢飈齧案栖鴉叫。坐惜霜華鏡中老。別院管絃聲正鬧。驚殘短夢。關心搖落。簾外花多少。



蝶戀花

幕地閒愁千萬疊。似絮如絲，盡向心頭結。疏雨透窗燈欲滅。和衣臥聽寒更徹。經歲悠悠魚素絕。誰料關情，心比秋潭潔。易買華鬢天上月。難酬佇苦停辛節。

臨江仙

我所思兮江上路。因風贈與瑤華。玉樓天半捲朱霞。飛鴻將遠夢，一夜到伊家。強忍閒情情轉切。淚痕彈溼窗紗。相思相望各天涯。知卿憔悴甚，不忍問桃花。

浣溪紗

雲母窗中覩阿環。輕鬟彷彿認遙山。惜春春在有無閒。顛倒無端看紫鳳，然疑不定悵青鸞。寂寥情況且加餐。

點絳脣 望月

無著秋光，依空誰住山河影。靈懷修迥。祇有仙娥靚。太乙朝迴，玉露晨霄警。齋宮請。疏麻折盡，萬歲千秋肯。

紫府清遊。飢來偶噉金盤棗。靈妃窈窕。迴顧羅幃笑。一段琴心萬古知音少。歸來好。玩茲芳草。自寫黃花照。

### 南樓令

何處秣陵春。江波送遠人。感情深、淚漬紅巾。未到鶯啼先惜別。風水闊、隔天津。  
義山詩一江風水隔天津。微雨問湖濱。斜陽弔孝陵。泛秦淮、春水方生。卻想歡期渾是夢。憑綺語、駐芳塵。

### 虞美人 題李香君小像

南朝一段傷心事。楚怨思公子。幽蘭泣露悄無言。不似桃根桃葉、鎮相憐。若爲留得花枝在。莫問滄桑改。鴛鴦瀟灑一雙雙。欲采芙蓉、憔悴隔秋江。

### 永遇樂 秋草

落日幽州。憑高望處。秋思何限。候雁高鳴。驚麀晝竄。一片飛蓬捲。西風萬里。踰沙越漠。先到幹難河畔。但蒼然、平原目極。玉關消息初斷。千年祇有。明妃冢上。長是青

青未染。聞道胡兒。祗連每過。淚落笳聲怨。風霜頓改。關河猶昔。汗馬功名。今賤。驚心是。南山射虎。歲華易晚。

浣谿紗

濃睡方醒日已斜。翻嫌晴色晃窗紗。郎前紕繆故些些。少可英雄偏說劍。特矜顏色愛評花。世閒兒女怎如他。

纔啓朱櫻轉自緘。柔腸似結解應難。感郎情重畏郎慙。也解避嫌防後悔。時將薄怒掩深慚。此時輕別阿誰甘。

小醉歸來夜已分。新茶潑乳捧殷勤。夢回初覺髮香熏。昵枕低幃千種態。向時矜重霎時親。細看濃翠拂輕鬢。

雨浥綉桃特地鮮。春嬌濃發鏡臺前。含羞含恨不能言。如此風流天賦與。暫時惜別總濟然。郎情認取枕函邊。

窈窕疏花憶淡妝。遠山如寫畫眉長。那堪微雨溼衣裳。夢好渾忘銀漢迥。書來曾

帶繡檀香。相思無底不能量。

清平樂 冬日

川流晝夜。逝者如斯也。纔見日光飛野馬。旋已三商漏下。紛紛甕裏醯雞。何如一枕希夷。喚起歲寒松柏。吾將與爾同歸。

更漏子

翠蠶疏。丹榭老。萬事不如歸好。蟲唧唧。雁嗷嗷。碧天無限高。倚闌望。江海上。落日寒雲莽蒼。望不極。思何深。滄波千萬層。

水調歌頭 病中戲答友人

卿用卿家法。我與我周旋。胸中一事無礙。便算小遊仙。借問封侯萬戶。何似買田二頃。耕鑿賴天全。可笑蘭臺史。祇欲勒燕然。衆生病。吾亦病。不關禪。靈光皎皎孤映。空水共澄鮮。說法何須龍象。相笑從他蝸鬻。總付大中千。倦卽曲肱臥。火宅已生蓮。

高陽臺 爲江建霞題太常仙蝶圖

柳外輕盈。花間綽約。滕王圖繪難真。乍集閒庭。些些情意關人。江郎自有生花筆。寫蘧仙一段丰神。記當年相見靈山。可是君身。建霞先數年於虎邱曾見之羅浮我亦曾清夢。有落花萬片。雨積如茵。不似京華。污衣十丈緇塵。殷勤欲問西王使。遍人間。何處宜春。祇憐他。薄酒微熏。膩粉初勻。

慶宮春

岸葦平潮。渚蓮銷粉。暮雲作盡秋色。涼入空江。蕭蕭夜雨。短篷清溜自滴。記曾分手。黯春緒。垂楊未碧。山圍依舊。偏是孤燈照愁今夕。旅懷坐對茫茫。白髮新添。此情誰識。連環解贈。凌波去後。嶺竹斑痕猶積。袖羅香減。悵天遠。難憑雁帛。初寒清警。幽夢醒時。隔江聞笛。

木蘭花慢 寄上元王木齋

木齋。余故交也。才氣橫逸。風期雋上。余典試而木齋落解。以同考未薦。非余之咎。作此慰之。因以誌別。

聽秦淮落葉。渾不盡。暮秋聲。況清歌寂寂。斜陽黯黯。客思沈沈。題襟。那回去後。阻燕  
吳。迢遞六年心。攜手河橋又別。依然酒幔空青。前度別時。木齋策馬。追送江干。朗吟  
唐人竇叔向夜合花開一律。衆爲黯然。男兒何不請長纓。揮劍荆龍庭。祇麻衣入試。  
金門獻賦。那算功名。藏形不妨操畚。學兵符。須入華山深。四野荒雞喚曉。萬重飛雁  
迴汀。

蘇幕遮

研生塵。琴結網。一枕新涼。心墜滄江上。斗柄低垂。天宇曠。耿耿秋河。不隔蓬萊仗。  
掩銀屏。迴玉帳。約略年時。環佩傳清響。和夢和愁。閒自想。落葉聲琤。誤聽黃雞唱。

菩薩蠻

蘭膏欲燼。壺冰裂。寒帷瞥見玲瓏雪。無奈夜深時。含嬌故起辭。徐將環佩整。相並  
瓶花影。斂黛鏡光寒。釵頭玉鳳單。啼鶯喚起羅衾夢。柳絲無力春愁重。曉枕困相思。憑春說與伊。語深良夜促。燈穗

飄紅粟。迴面淚偷彈。此情郎忍看。  
千花百草尋常見。綺樓別寫芳華怨。雲影護瑤臺。碧桃千朵開。畫屏金鳳舞。對對  
芝光吐。凝照倍增妍。佯矜未肯前。  
情深不惜明璫解。淚珠還沁鮫綃在。雲島翠翹低。沈沈蕙思迷。畫橋秋色淺。落葉  
重門掩。別久倍思量。錦衾初夜長。

蝶戀花

若使他生真箇有。拚卻今生。情與秋俱瘦。月影籠紗霜拂袖。紅閨此夜涼初透。最  
是聞歌兼中酒。鏡裏芙蓉。一霎容消受。曇誓深深天聽否。綢繆洛浦神歸後。幾  
裊裊茶煙心緒亂。漠漠輕輕。魂在梨花苑。料得海棠春睡倦。夢回愁聽鶯聲顫。  
日浮生偏聚散。祇有情深。不似天河淺。瑤井轆轤聲宛轉。斑駁那繫垂楊岸。  
九十韶光如夢裏。寸寸關河。寸寸銷魂地。落日野田黃蝶起。古槐叢荻搖深翠。  
惆悵玉簫催別意。蕙些蘭騷。未是傷心事。重疊淚痕緘錦字。人生祇有情難死。

點絳脣

惜別經年。惜惜長憶卿知否。近偎羅袖。密意花房逗。借看釵鸞。私招纖纖手。端相久。眉痕依舊。只是黎渦瘦。

齊天樂 秋荷

幾時不到橫塘路。西風送秋如許。豔冷紅衣。涼生太液。羅襪塵侵微步。嫣然一顧。尙低側金盤。暗擎仙露。祇恐銷魂。錦鴛飛入白蘋去。蟬聲又嘶遠樹。有人惆悵極。如怨鞿旅。葦亂波橫。蕤疏翠落。誰信秋江能渡。嬋娟日暮。願玉笛清商。漫吹愁譜。護惜餘香。月明深夜語。

好事近

一片碧雲西。夢裏瑤姬宛在。整頓平生心事。向嬋娟低拜。鮫綃別淚凝紅冰。猶憶舊時態。道是不曾消瘦。但頻拈羅帶。

綠意 聯句寄仲魯編修志鈞卽詠其事



湘花夢影。可西風昨夜。幾回吹醒。梁鼎芬星海曾記盈盈樓上黃昏。瞥見遊春鞭鐙。廷式開窗笑語紅襟燕。道莫負海棠棲穩。芬天涯別有桃源。誤了瓊枝芳訊。式太息琴絲笛譜。縱彈盡不似舊時人聽。芬暮雨蕭蕭。此日江南。簾卷疏花微病。式香鑪熏徹相思字。又半晌。月明更靜。芬祇無聊。白雁橫天。說與淒涼風景。式

浪淘沙

寒氣襲重衾。似睡還醒。鑪香靜。燕夜沈沈。起視階前明月影。雲合如冰。歲序使人驚。染盡緇塵。寂寥空草太玄經。別有蒼茫千古意。獨坐觀星。

摸魚兒 爲黃仲弢題吳彩鸞騎虎圖

倚蒼巖。翠藤無路。琅玕芝草誰問。天風忽振疏林外。覩此煙鬟霧鬢。斜日冷。倩白虎從容。遠上匡廬頂。松花滿徑。看銀漢迴波。石梁飛瀑。一嘯萬山應。吾家事。千古風流仙境。何人摹入金粉。簫聲可似秦樓鳳。甲帳瑤臺借隱。環佩整。羨兒女情癡。也有神仙分。清貧自晒。買十幅雲箋。喚誰彩筆。重爲寫唐韻。

巫山一段雲

繫肘香囊在。同心綵勝遙。東風吹滿綠楊橋。離魂一度銷。記得星眸寶靨。醉裏花枝微顫。明燈迴照下幃羞。隨郎不自由。

桂殿秋

吹玉笛。過江干。十分春思已闌珊。曉風殘月無多地。便作天涯柳絮看。

臺城路 湘中送星海還粵

笛聲吹冷關山月。離情與天俱遠。客裏年光。愁邊節物。贏得滿襟依闕。湘雲絮亂。化一縷輕煙。欲迷春眼。祇有孤芳。嫣然不受暗塵染。明朝江上望極。片帆欲沒處。煙水瀾漫。此地相逢。何時重見。楚水吳山越岸。迴腸已斷。更苦雨酸風助。成淒惋。珍重芳華。綠蕉心未展。

滿庭芳 擬秦少游

蘸水蘭紅。黏天草碧。征帆初過瀟湘。別時不覺。別後轉淒涼。前路煙波浩渺。行行遠。

觸緒堪傷。雲閒雁。月明孤影。愁絕楚天長。思量他日事。心期暗卜。燈穗成雙。但千萬丁寧。莫損年芳。牢繫同心結子。五湖約。頭白何妨。風兼雨。夢魂難度。敲枕聽寒江。

賀新郎

別擬西洲曲。有佳人、高樓窈窕。靚妝幽獨。樓上春雲千萬疊。樓底春波如縠。梳洗罷、卷簾游目。采采芙蓉愁日暮。又天涯、芳草江南綠。看對對、文鴛浴。侍兒料理裙腰幅。道帶圍、近日寬盡。眉峯長蹙。欲解明璫聊寄遠。將解又還重束。須不羨、陳嬌金屋。一霎長門辭翠輦。怨君王、已失苕華玉。爲此意、更躑躅。

高陽臺 西湖

落葉浸愁。涼颺警醉。衰楊恰似眉彎。病起秋深。雲煙一倍清孱。憑闌冉冉斜陽下。有斷魂、分付湖山。乍超然、精爽飛揚。不似人間。蓬萊清淺今何許。但歌殘黃竹。信杏青鸞。爲問逋仙。孤山誰伴荒寒。苧蘿村下相逢地。想月娥、依約嬋娟。又高城、鼓角聲催。策馬孤還。

齊天樂 題高氏甕芳錄

烽煙已靜聞鐘鼓。開編尙堪零涕。大地平沈。長星晝出。虎口逃生何地。微臣自異。列八甕庭前。舉家同死。碧血誰收。千年魂魄化精衛。淒淒石城遺曲。更堪悵觸我。無限傷喟。傅燮孤兒。陽源後裔。一樣悲涼身世。年光逝水。問漢上銅仙。幾回清淚。聽徹荒雞。攬衾中夜起。

阮郎歸

誰傳消息問天台。桃花開未開。白雲縹緲月徘徊。阮郎來不來。烏作使。鳩爲媒。當時玉鏡臺。十年養就鳳凰胎。何勞燕雀猜。

浣溪紗 擬唐人

著意佯人思不禁。寒燈相對夜沈沈。此時何必是同心。凝視酒痕侵素靨。近前香氣透羅襟。不情端恐負神明。

采桑子

木蘭開後閒相憶。靜夜如年。好夢如煙。月落參橫更不眠。當時銀燭知愁思。意遠如天。語轉如禪。可奈秋花別樣妍。

醉花陰 吳淞道中重九

雨入寒潮愁思悄。客裏重陽早。消息誤黃花。采采江籬。終不盈襟抱。空濛草樹吳江道。也覺秋陰好。去路忽沈吟。一舸飄然。可信鷗夷老。

點絳脣 戊戌重九是日霜降

青女司霜。無風無雨過重九。無人送酒。看月呼田叟。臨水登山。此恨年年有。君知否。羲皇去久。更在陶潛後。

踏莎行 爲人題照

淡淡修眉。盈盈潤臉。無言恰似筵前見。花房肯釀蜜脾濃。春衫尙惜檀痕染。月幌休燈。風廊卻扇。畫屏十幅鮫綃展。雁聲孤館醉醒時。一場愁緒思量遍。

菩薩蠻

簾波輕漾屏山悄。錦衾夢斷聞啼鳥。此際覺春寒。繡羅衣恁單。幽蘭凝露重。江遠蘋花共。愁極夜如年。靜看鑪上煙。

齊天樂 正月二十五日遊龍華道中梅花盛開然天寒春遲孤豔迴絕二月二十日再遊則桃花如海夾岸楊柳新綠垂陰菜花初黃梅花亦未盡落江南春色使心怵怵乃知時光感人非寄之語言不能自己也

芳塘水暖鳧翁浴。初桐嫩遮窈窕。碧瓦雲騫。香車露拂。人意不禁春嬈。垂楊自嬾。映千頃霞光。亂翻晴昊。可似前番。淡妝臨水數枝裊。層闌倚空縹緲。凭高望不極。飛燕能到。屢逕遺鈿。旗亭解佩。何處荒煙殘照。蕭郎漸老。記不起當時。冷香懷抱。苦恨鵲聲。勸儂歸去好。

漁家傲 古意贈今人

妾願苧蘿村下住。浣紗不共東家女。十頃荷花三里霧。迷歸路。盈盈隔水誰能渡。不願吳王宮裏去。陽春一曲青春暮。人世繁華卿信否。渾無據。金牀月落烏啼樹。

踏莎行 爲人題照

舞蝶嬌春啼鶯促曙。玉溪曾賦銷魂句。嫦娥衣薄不禁寒。宓妃腰細纔勝露。香印成灰。雲縞賸縷。紅箋好共盈盈語。落花難伴綺羅春。勸君休向陽臺住。末二句用玉山詩見夷堅志已集上

憶舊遊 秋雁 庚子八月作

悵霜飛榆塞。月冷楓江。萬里淒清。無限憑高意。使數聲長笛。難寫深情。望極雲羅縹緲。孤影幾回驚。見龍虎臺荒。鳳皇樓迴。還感飄零。梳翎自來去。歎市朝易改。風雨多經。天遠無消息。問誰裁尺帛。寄與青冥。遙想橫汾簫鼓。蘭菊尙芳馨。又日落天寒。平沙列幕邊馬鳴。武元衡詩萬里楓江莫問程

臨江仙 金陵憶別

檀板聲停簫吹咽。玉驄門外頻嘶。背人無語斂雙眉。別離情緒。撩亂萬千絲。不道天河能間阻。此心桃葉應知。臨明一陣雨霏霏。淚霑紅袖。江上早寒時。毛文錫詞遙

思桃葉吳江碧便是天河隔

蝶戀花

手捲眞珠雲影瘦。不怕春寒。祇怕春歸驟。水遠山青凝望久。幾重芳樹遮亭堠。似錦年光渾異舊。爲問東君。好與誰相守。燕嬾鶯嬌知恨否。綠陰陰處初長晝。每到河橋臨泊處。百草淒迷。總礙行人路。迴棹卻尋前日渡。汪汪新漲歸程阻。人世幾回傷歲暮。春也鶯飛。秋也蟹啼苦。欲解閑愁愁萬緒。寒窗臥聽瀟瀟雨。

虞美人

鷺冠敲側蠻腰裊。佯就郎懷抱。阿儂衣薄曉寒欺。憑仗些兒酒力、自禁持。餘香染袖人何在。夢隔珊瑚海。琵琶湖畔水涵空。祇有寒梅、斂恨向東風。琵琶湖近日本西京

滿江紅

雨挹輕塵。山檻外、春痕初綠。頻悵望、方空一抹。弄簫人獨。花影任教如意舞。鶯聲已



是將離曲。算只有、落絮與遊絲。飛相逐。簪素柰。歌黃竹。年漸老。歡難足。試開箱。檢取石榴裙幅。歸夢不知天近遠。清愁乍滿江南北。問此際、憊憊爲何人。眉峯蹙。

清平樂

巴陵有二喬墓。殆不足據。喜其亭檻軒朗。草樹幽秀。聊爲題之。

佩環聲杳。日暮巴陵道。眉樣君山青未了。一例湘娥縹緲。當年夫婿英雄。而今荒草吳宮。休問香魂在否。年年點綴春風。二喬墓今改題小喬墓亦不足據。故不如仍其舊名。

卜算子 新柳

雪意化春雲。池水生新皺。一樣眉痕兩樣描。月影初三瘦。莫到短長亭。未是愁時候。惆悵黃鶯抵死催。春思濃如酒。

謁金門

秋未老。樹樹夕陽都好。霞錦雲羅黏遠草。碧天開畫稿。別後許多懷抱。又是黃花開了。落葉西風人悄悄。雁回書不到。

念奴嬌 旅思

杜鵑啼後。問江花江草，有情何極。曾是燈前通一笑，淺鬢輕籠蟬翼。掩抑持觴，輕盈試翦，此意難忘得。如絲如絮，東風吹去無力。因念久客天涯，端居多感，蕭瑟青蕪國。懷抱向人何處盡。臥聽林風淒寂。經卷楞嚴，琴聲賀若，靜翫鑪煙直。微寒隕蕊，瑤華追溯堪惜。

攤破浣溪沙

竹粉黏青露點衣。柳絲吹白水平池。爲報游人休草草，惜芳時。臨鏡祇應江月照，舉帷莫使楚雲疑。不道平生惆悵意，有人知。

念奴嬌 亂後京津樂籍大半南渡李伯元茂才於酒肆廣徵四十餘人爲評騭殘花之舉爲賦此詞

江湖歲晚，正少陵憂思，兩鬢衰白。誰向水精簾子下，買笑千金輕擲。淒訴鶻弦，豪斟玉斝，黛掩傷心色。更持紅燭，賞花聊永今夕。聞說太液波翻，舊時馳道，一片青青。

麥。翠羽明璫。漂泊盡。何況落紅狼籍。傳寫師師。詩題好好。付與情人惜。老夫無語。臥看月下寒碧。

點絳脣

水際春回。曲闌環合。庭陰翠。縠紋波細。石罅看魚戲。宛宛韶光。著處佯人膩。春知未。青蕪滿地。易惹天涯思。

玉漏遲 辛丑七夕

嬾尋天上巧。夜闌愁對。碧窗秋悄。細數更籌。重憶舊時懷抱。多少。人間別恨。渾不解。金風來早。靈約杳。一痕淡月。籠雲淒照。羨他碧漢無波。便萬歲千秋。後期難了。自軫琴心。漫託彩鸞同調。一晌夢遊處。恰又似。浮槎仙島。人易老。南樓幾番清嘯。一晌句。周草窗用五字句。今從之。

思佳客 古意

十幅湘簾窳地垂。千株楊柳麴塵絲。玉人手把菱花照。絕代紅顏欲贈誰。花子薄。

翠鬢低。輕紗吉了。稱身宜。苧蘿女伴如相問。莫道儂家舊住西。  
沈佺期詩千載紅顏持贈君

感皇恩 中秋

梧葉碎秋光。小窗眠醒。自理琴書碧天靜。文園病減。尙怯西風清勁。祕盜聊試水、煎春茗。故人何在。曲闌空凭。料損多情舊心性。冰匳愁展。今夜月明如鏡。斷腸楓落也、吳江冷。

疏影 秦淮有所贈

涼蟬隕葉。正碧波渺渺。秋在城堞。酒所淒涼。相喚移船。華燈掩映佳俠。宜城放客多愁思。寫不盡、琴心三疊。數合懽。製就齊紈。誰料未秋先篋。坐對江湖興杳。便當自此去。同理舟楫。卻恨青銅華髮。星星那稱絳脣丹靨。從渠自向空王懺。恰難忘、散花香裊。甚四弦、解訴飄零。歌畔淚珠盈睫。宜城放琴客。詩見顧況集。記柳惲事。吳夢窗詞。曾用宜城放客字。

南鄉子 病中戲筆

一室病維摩。且喜閒庭掩雀羅。煑藥繙書渾有味。呵呵。老子無愁世則那。莽莽舊山河。誰向新亭淚點多。惟有鷓鴣聲解道。哥哥。行不得時可奈何。

凭闌人 詠水仙花

秣駟芝田經幾時。袖裏明璫光未已。華燈寫澹姿綽。嬌饒知似誰。

鷓鴣天

明月多情上綺疏。伴儂無寐四更餘。朦朧世態休看鏡。撩撥清愁且著書。螢火暗。雁聲孤。露光浮。白夜涼初。桂宮曾寄千千信。爲問仙娥憶得無。

清平樂

春人婀娜。春恨吟難妥。一縷醲香熏意可。獨倚雲屏閒坐。林間百種鶯啼。玉階撩亂花飛。生怕襪羅塵沓。黃昏深下犀帷。

疏影 爲思惠齋主人題蓬萊春影圖

煙螺想髻。更柳疏楓密。芳思無際。縹緲空山。可是曾來。瞥見瑤階仙侍。人言海水三  
清後。有瓊瑟、玉杯重遺。恰無聊、化作朝雲。一霎滄波迢遞。幾度花開花落。對霞影  
猶憶。靚妝明惠。石逕苔封。化鶴人歸。黯淡蕊珠文字。浮萍偶值原無定。好認取、天花  
遊戲。奈夢回、雨瀉高簷。窗外葉聲如悴。

樵風樂府

蓮氣



鄭文焯（咸豐六——民國七）

字俊臣。號小坡。又號叔問。晚年自署大鶴山人。先世爲高密鄭氏。清初改隸正黃旗漢軍。至文焯始復姓。光緒乙亥舉人。卜居吳中。間參大府幕。行醫鬻畫自給。長於金石考據音律詞章之學。著有大鶴山房集。



瘦碧詞序

國朝肇興文學武功並盛。自天潢以訖蘭錡。稱詩者亡慮千數。至填詞則二百數十年。僅成德容若承齡子受兩家。豈其道博壹要眇。爲造物所靳。故鮮能工。抑審音定律。其事甚難。山澤之癯。或擅厥長。而爲舉世之所廢歟。叔問家世蘭錡。累葉通顯。先德清芬。不異寒峻。門生故吏。託蔭烜赫。或相招要。去之若浼。憑藉雖高。睇青雲而不赴。樂貧不改。寂朱門而自賀。以貴公子孫。羈滯吳下。姿格散朗。神思蕭閒。雖陳蕃解榻。北海標門。怡然嘯傲。玉暉霞舉。塵纓俗組。染迹而化。經籍竅奧。日寓卽解。文章恢麗。駸乎范沈。嘗究音呂。頗喜爲詞。所得輒經奇。固多淒異之響。而夷猶淡遠。清曠騷雅。怨而不怒。哀而不傷。故嘗論其身世。微類玉田。其人與詞。則雅近清真白石。余與君鄉舉齊年。俱在弱冠。迨遇江表。忽及壯齡。兩人者卓犖偏世。皆有遺天下輕萬物之心。閱世寢深。傷於哀樂。且以承平年少。胥疏江湖。行吟菰蒲之中。與瀛鷺爲伍。淒寒感人。又嘗讀書傳。慕古高人烈士。若范蠡梁鴻。要離者流。而吳中多有其蹟。相與

選履擊擢。旁皇求索於無人之境。呼嘯精靈。悅與晤言。昔人謂滯其所資之累。擁其所適之性者。吾兩人非邪。君詞體潔旨遠。句妍韻美。以爲詩樂失傳。詞延一線。宋暢其本根。元亡於歧路。自後南北作者。率以短聲逞其纖筆。安蔽乖方。汔今益靡靡而不可紀。君才力雄獨。進復古音。少作琴言一卷。以傷綺棄之。既別一年。始刊瘦碧詞二卷。郵寄示余。其追譫兩宋。精辨七始。抉微諦奧。梳節披奏。聽於無聲。眇忽成律。使樂官比響。不累於詠歌。文士摘華。靡淆於絃笛。故能鬱伊善感。和平蕩聽。颯颯洋洋。契靈樂祖。容若子受。固將愧其前轍者也。余嘗舉似君。詞之爲道。言外意內。哀樂橫生。涕笑交沸。百靈奔赴。萬感寂會。邈接神思。妙遺言詮。今君審律如此。其力足以破造物之所靳。其才足以興舉世之所廢矣。漢壽易順鼎實父敘於大梁。

瘦碧詞序二

元明以來。詞學衰息。迨本朝萬氏詞律出。而后人知詞之不可無律。然萬氏止取諸名家之詞。排比以求其律。而律之原。固未之知也。戈順卿氏踵其後。似視萬氏所得

有進矣。乃戈氏深於律，而不甚工於詞。讀其詞者惜焉。夫律之不知，固不足言詞。而詞之不工，又何以律爲。高密鄭小坡，孝廉精於詞律，深明管絃聲數之異同。上以考古燕樂之舊譜，姜白石自製曲，其字旁所記音拍，皆能以意通之。余嘗戲謂君真得不傳之祕於遺文者也。乃其所爲詞，又何其清麗婉約，而情文相生歟。如繞佛閣壽樓春諸調，皆不易作，而誦之抑揚頓挫，淪淪移人，豈非深於律而又工於詞者乎。小坡爲吾故人，蘭坡中丞之子，顧以承平故家，貴遊年少，而淡於名利，牢落不偶，喜吳中湖山風月之勝，僑居久之，日與二三名俊，雲唱雪和，陶寫性靈。余每入其室，左琴右書，一鶴翔舞其間，超然有人外之致，宜其詞之工矣。光緒十四年歲在戊子仲冬之月，曲園居士俞樾。

### 冷紅詞序

叔問居士宏博精敏，著書滿家，出其緒餘，尤長倚聲。同時詞流，如中實夢湘，未之或先也。夫詞非聲也，而託於聲，自制氏云，徂采風不下，協律之事蓋寡，諷諭之道忽焉。

居士於詞導源樂府。振騷雅於微言。掩周姜而孤上。余讀而愛之。未嘗釋手。于時公車鷹集。廣陌塵喧。薊城之榆莢晨飛。燕池之柳條晚綠。訪東京之舊事。惟餘夢華。過通德之高門。先知世學。投轄留飲。刻燭分題。舉東海以爲楮。指西山而送嘯。有慚蓬蓽。託植修麻。生長葭蘭。非無雜佩。然且飾無鹽而齊姝女。引牛鐸以應黃鍾。略仿鏗鎗。無嫌唐突。居士嗷嗷。若未遑也。旣而謂余果知詞者。自茲已往。年與志迫。哀與樂盈。名惡乎修。情惡乎正邪。余曰不然。是誠在我。夫言以足志。樂以宣滯。世莫我知。而無悶之誼明。天下宗予。故棲棲之行苦。然內切情於孤吟。則體充矣。外取感於同聲。則道宏矣。今居士發言芬悱。按拍厲清。寄窈窕之深哀。諧聲文於浩倡。詞雖小道。必有可觀。綜厥生平。抑又未已。方與子屏絕語言。惕陰畏壘。江南罷弄。蒼梧不謠。遂使夫誨淫之子。矜其側豔。螫性之夫。騰其詼調。俗儒雞駭。蔽所未見。是以紅友斷斷於校讎。皋文臨簡而鄭重。誠恥之也。武陵陳銳。甲午立夏。篝燈寫訖。

往昔鄧辛眉從孫月坡學詞。鄧父語余曰：詞能幽人，使志不申，非壯夫之事。盛世之音也。余竊笑焉，以爲才人固甘於寂寞。傳世無怨於涼獨，使我登台鼎，不如一清吟遠矣。特病不工詞，不恨窮而工也。未三五年，天下大亂，曩之公卿多福壽者，相繼傾覆。而詞客楚士，流轉兵間，憔悴行歌，不妨其樂。余亦漸收攝壯志，時一曼聲，既患學者粗率，頗教以詞律。東南底定，海氛未起，於天津行轅，得見叔問中書。叔問貴公子，不樂仕進，乞食吳門，與一時名士游，文章爾雅，藝事多能，而尤工倚聲。吳門孫君故國也。前五十年，孫君與如冠九以詞唱和於潯陽廬山間，佳句猶在人口。冠九則叔問鄉前輩，再前則成容若。湛淪盛時，而詞冠本朝。鄧丈所言，吁其驗矣。余交叔問，又將廿年，而時事愈變，吳越海疆，不能有歌舞湖山之樂。余居三閩之徂土，無公子之離憂，樵唱田歌，一銷綺思，窮則至矣。詞於何有？鄧丈之言，其猶衰世之盛耶？叔問遠來徵文，輒述師友身世之感，以告之。時光緒壬寅夏四月五日，王闓運題於長沙城中湘綺樓。

# 樵風樂府

高密鄭文焯叔問

## 齊天樂 登虞山興福寺樓

夕陽呼酒登臨地。尊前故人還是。水國無花。山城自綠。望轉征蓬千里。行歌倦矣。更一片秋魂。亂雲扶起。醉袖飄蕭。海風吹下劍花細。天涯此樓似寄。畫闌零落處。都爲愁倚。佛鼓荒壇。神鴉廢社。今古蒼茫煙水。吳絲漫理。正波上鴻飛。數峯清異。坐盡林陰。甚時重夢至。

## 躡莎行 重別次湘和白石道人江上感夢之作

官閣煙寒。客帆風軟。吟邊屬景愁邊見。歸心爭共蜀雲飛。夢痕總被吳波染。殘酒單衣。殘燈淚綫。亂山挂雨尊前遠。江南水闊別離多。斷魂分付孤舟管。

## 湘月 山塘秋集分題得壞塔

夜鈴語斷。更斜陽瘦影。誰問今古。獨立蒼茫鎮。古老一角青山無主。衰草叢生。枯楓

倒出時見歸禽度。殘烽零劫。仗他半壁支柱。長見峭倚荒天。淒涼如筆。寫愁邊風雨。不許登臨怕倦客。題徧傷心秋句。臥影空丘。招魂破寺。賸有孤雲駐。夢痕飛上。故王臺樹何處。

八聲甘州 西樓九日

喚吟邊、瘦月替珠燈。扶魂上西樓。歎芳時俊侶、尊前掇送。墜夢難收。又是黃華勸客。須插少年頭。一夜涼風思。綠減汀洲。笛外亂峯無語。甚秋腸寸裂。還聽吹秋。想湖亭多宴。歌淚迸波流。自銷凝、斷襟零佩。賸水雲、冷社兩三鷗。休重倚、畫闌高處。殘醉題愁。

虞美人

斷魂空畫相思影。細語成悽哽。鸚哥猶喚舊坊名。幾度尋春、簾幕誤人迎。年時繫馬門前柳。樹更如腰瘦。月隴懸淚夜盈盈。長見小樓、圓夢到天明。

摸魚兒 金山留雲亭餞仲復撫部酒半聞江上笛聲起於亂煙衰柳間感音

而作不自覺其辭之掩抑也

渺吳天、覓愁無地。江山如此誰醒。亂雲空逐驚濤去。人共一亭幽靜。斜月耿。怕重見青尊、中有滄桑影。吟魂自警。對潮打孤城、煙生壞塔、笛語夜淒哽。招提境、還作東門帳飲。中流同是漂梗。當年擊楫英雄老。輸與過江魚艇。愁暗省。換滿目胡沙、蠻氣連天迴。苔茵坐冷。任怪石能言、荒波變酒、莫更賦離景。

東風第一枝 和梅谿春雪韻

玉鬪新梅。珠敲暗竹。江春半釀寒暖。粉雲幾處愁深。素波者番恨淺。尋香舊徑。趁細屨、弓痕輕軟。怕笛邊、誤約飛花、閣住小簾歸燕。沙草際、漸迷望眼。風絮裏、暗銷醉面。乍看舞鶴閒庭。又尋印鴻故苑。吳篷誰倚。畫淡遠、山眉如綫。更鏡娥、含淚窺人。夢想縞衣重見。

右瘦碧詞。舊刻二卷。凡六十七首。刪存七首。

菩薩蠻



宮花不見人憔悴。朝朝洗面燕支淚。樓閣易斜暉。綠塵箏雁飛。空階銷玉冷。燕立秋千影。隔院騎聲來。臥屏紅扇開。

晚紅秋冷夫容苑。鴛鴦頭白花應見。山黛可憐顰。故宮眉樣新。有人妝淡薄。縞袂垂深幕。青鳥驀飛來。報君雙鳳釵。

畫樓殘點和簫咽。鏡中秋見人如月。雙陸賭金環。別時相贈難。舊紅寬臂縷。妝罷長無語。明日鬪花風。爲誰梳洗濃。

年年織錦紅窗老。繡裙空染南園草。夢裏送香車。好春歸別家。手栽池上樹。難繫斑駁駐。悔不種夫容。花時還妒儂。

移家愛住青溪裏。東風綠盡湔裙水。殘雪驛橋西。淺深郎馬蹄。花前和淚送。鸞帶行煙重。夢斷錦衾知。曉寒孤起時。

瑤臺長是遊仙駐。殘金銷盡雕輪路。帳殿柳如煙。水漂花滿船。驚波風雨急。夜夜青禽泣。只道海能填。西山無石銜。

過花簾燕驚紅落。一牀殘夢東風薄。春老不還家。刺桐牆外花。江南沙草暖。鏡水歌眉淺。雙笛出煙蘿。畫船涼月多。  
平江風色連三月。酒醒又近紅樓別。獨自莫傷春。新年見舊人。安排雙淚眼。長送春歸晚。斜月過西池。隔闌花自移。

惜秋華 惠山

輦繡山街。翠溶溶一鏡。秋妝環照。向晚畫船。相將載愁多少。夫容不管啼紅。暗墜落、煙輕波小。淒涼正斜陽送客。湖亭重到。仙夢絳都杳。記燈簾俊語。鳳鬢香裏。問紫曲。誰解憶聽歌人老。而今白石清泉。倚玉瓶。亂峯如笑。幽悄。誤夢尋燕昏鶯曉。

留春令 中秋夜紅樓離席

鏡華空滿。怨紅都在。舊時羅帕。早是銷凝淚無多。怎留向、臨歧灑。枕上陽關催夙。駕。忍今宵歌罷。從此西樓翠尊空。願明月、無圓夜。

點絳脣 西樓感夢

秋館黃昏小風香陣欺裙蝶。近霜花葉著意紅雙疊。多少新愁。夜夜西樓月。傷今別。月圓時節。長是佳期闕。

虞美人

鏡屏香冷夫容薦。花趁人凝澹。問誰下馬看梳頭。長是畫簾高捲、臥清秋。宿妝留得新眉在。人意依前改。一溝脂水繞樓東。中有幾行閒淚、往來紅。

瑞龍吟 春怨用清真體

橫塘道。還記碎鏡流花。斷裙黏草。多情三百紅闌。爲誰約住。東風不到。曠吟眺。休問玉梅門巷。舊家英妙。而今著破春衫。唾華淚粉。銷凝滿抱。依黯殘雲心事。過江如夢。清歌催老。惟有酒邊青山。曾見年少。狂香豔迹。零落蘭成橐。無人聽。西園冷詠。南樓清嘯。料理傷春早。幾回付與鶯沈燕悄。爭說還鄉好。離笛怨。歸魂將花千繞。夕陽故國。曲中人杏。

芳草渡 江南早春重遇中實感夢而作

昨夢裏見別後湘皋。又生蘭芷。正夜窗愁雨。燈花報有人至。悵悵攜手地。銷年華多麗。水驛晚省是重逢。各自憔悴。慵倚畫闌缺處。猶有傷春當日淚。曠吟望吳雲。斷草萋萋恨千里。亂山側帽。算楚客舊狂能理。展醉眼一笑尊前老矣。

一萼紅 光緒壬辰人日用石帚淳熙丙午人日詞韻題其西湖遺象

石湖陰。想梅邊墮翠。曾上小紅簪。經醉殘山。傷春舊月。無奈風過簫沈。漫回首。垂虹載雪。喚夢醒。空有繞枝禽。笠澤煙寒。玉峯雲暗。悽絕重臨。賓主百年無幾。問浮湘入沔。去住何心。南渡風流。東州雅舊。遺事休更追尋。算歌曲。江湖送老。抵當時。鍋裏幾銷金。待訪城西馬塍。只見花深。

玉樓春

梅花過了。仍風雨。著意傷春天不許。西園詞酒去年同。別是一番惆悵處。一枝照水渾無語。日見花飛隨水去。斷紅還逐晚潮回。相映枝頭紅更苦。

因循遊計春過半。幾度黃昏歌酒散。此時淚眼向花枝。不待飄零腸已斷。舊遊臺

榭年芳換。卻爲傷高倚徧。水裙油幕趁清明。招得春魂何處見。  
遊絲抵死依風轉。繞徧天涯猶恨短。一春醉夢誤人歸。殘酒醒時春又晚。  
在秋千半。蹴起飛花紅一片。銜花燕子不知愁。暗度芳心過別院。  
曉鶯簾外啼紅處。明月不留花影住。起來弄笛過西橋。宿粉狂香吹滿路。  
惜春心苦。貪逐韶光過百五。杏牆殘萼待歸簪。深雨閉門花亂舞。  
路人不

浣溪紗 清明載酒山塘重記所見

花氣溫溫趁艸柔。禁煙晴晝水如油。酒邊殘夢十三樓。  
暫見不如成久別。舊歡無計破新愁。來時春草去時秋。  
斜日朱樓對捲簾。笛中人意柳纖纖。亂絲著地被愁黏。  
花影蹋歌紅步障。水香試酒白涼衫。一春費淚與江南。  
池館新晴語細禽。墮釵曾傍藥闌陰。經年同夢不同心。  
近水吹香春澹薄。移花步影夜清沈。月圓時節到而今。

拂水東風劇有情。柳花當面化流萍。天涯吟髻幾時青。殘燭已銷無用淚。清歌猶作奈何聲。西樓人去恨長醒。

蹋莎行

雨意垂垂春事適盡紅樓曲餞爰託於音

蘭氣疏襟竹聲涼幕。臥枝紅裊金釵落。五更殘雨酒醒時。羅衾正似人情薄。帳燭香銷。琴尊淚閣。夢來真悔重逢錯。去年花落舊亭臺。西風不減東風惡。

采桑子

凭高滿面東風淚。獨立江亭。流水歌聲。銷盡年涯不暫停。歸來自掩香屏臥。殘月新鶯。夢好須驚。知是傷春第幾生。銷魂最是皋橋水。花雨冥冥。歌淚盈盈。不解西流總費聲。畫船煙泊經遊地。燈火高城。絃管殘更。無奈明朝酒易醒。

三臺令

春雨。春雨。滴到無聲更苦。紅樓酒醒天涯。相送舟前落花。花落。花落。還較去年輕薄。

春水。春水流盡一年花淚。綠陰明日池塘。可待重來斷腸。腸斷。腸斷。殘月茜窗人澹。  
拜星月慢 吳俗以中元節賽神虎丘傾城士女彌日讌歌極晝船簫鼓之盛  
余落南十四年感秋倦遊無復輕詔之樂曩與中實兄弟嘗棹烏篷聽歌斟  
酌橋畔載月而歸輒有佳詠清事今廢久矣賦此悄然

虎氣高秋。鷗夷遺恨。斷送山塘七里。走馬吹花。帶歌聲流水。酒醒處。付與黃昏一片  
燈火。滿地飄零。鈿翠步屨人歸。總西風憔悴。倦追尋。畫舸魚龍隊。中年近。早辦登  
臨淚。不見柳色蘇臺。換秋煙蕭寺。墜疏鐘。月落城烏起。扁舟夜。暗傍蒹葭樣。莫更向。  
碎玉闌干。爲傷高獨倚。

玲瓏四犯 壬辰中秋翫月西園中夕再起引侍兒阿憐露坐池闌歌白石道  
人玲瓏雙調曲度鐵洞簫繞廊長吟鳴鶴相應夜色空寒花葉照地顧景淒  
獨依依殆不能去遂做姜詞舊譜製此明日示子苾以爲有新亭之悲也宋  
譜雙調煞聲以中呂上字爲夾鍾商按詞原律呂四犯夾鍾商犯夷則羽爲

仙呂調亦中呂上字住商犯角爲夾鍾閏角歸本宮爲夾鍾宮卽中呂宮調也。周清真所歌別是大石調一曲梅谿草窗並效其體與此不同。近世詞人樂工莫達斯旨矣。

竹響露寒。花凝雲澹。淒涼今夜如此。五湖人不見。故國空文綺。歌殘月明滿地。拍危闌。寸心千里。一點秋槩。兩行新雁。知我倚樓意。參差玉生涼吹。想霓裳譜徧。天上清異。鏡波宮殿影。桂老西風裏。攜槃夜出長門冷。漸銷盡。銅仙鉛淚。愁夢寄花陰見。低鬟拜起。

木蘭花慢 八月十八日汎月石湖鄰舟感遇

晚涼花積水。送秋老。越來溪。歎故苑滄波。汎天鏡裏。曾見鷗夷。淒淒黃昏未了。漸歌闌。人似水東西。自有暗香隨袖。殘紅爲惜新題。文漪步綺輕移。銀燭背翠尊攜。念別後湖山。幾回同夢。雲散鴻飛。依依蘭橈醉解。澆啼痕。猶在去年衣。明月無多圓夜。有情偏向人低。



湘春夜月

最銷魂。畫樓西畔黃昏。可奈送了斜陽。新月又當門。自見海棠初謝，算幾番醒醉。立盡花陰。念隔簾半面，香翻影答，都是離痕。哀箏自語，殘燈在水，輕夢如雲。鳳帳籠寒。空夜夜、報君紅淚。銷黯羅襟。蓬山咫尺，更爲誰、青鳥殷勤。怕後約、誤東風一信。香桃瘦損，還憶而今。

浣溪紗

著酒芳心不自持。小雲雙枕帶花移。今年春早夢先知。梅萼有情紅到骨，柳條無恨翠舒眉。水堂新月舊相期。無事傷心獨費情。落梅風裏掩重局。春衣一桁細香零。詞譜當歌和淚教。燈窗無睡枕肩聽。水邊花外雨冥冥。

雨霖鈴 甲午人日載雪西庵

江城春霽。趁東風、早畫舸初試。歌眉鏡裏仍見，曾攜手處，都縈愁思。夢換繁華，舊恨

共明月千里。但暗憶紅萼盈簪。玉笛吹寒夜重起。娃鄉自古銷魂地。漫倚闌。一霎成顛顛。年年虎山橋下。花發處。冷香隨水。水縱無情。應帶傷春。幾點清淚。算只有、吟袖弓腰。解得流連意。

### 玉樓春

春陰多誤花時節。昨夜東風猶有雪。那知天意著詩情。新見虎山橋上月。十年舊賞音塵絕。重賦橫枝和淚折。淒清心事付紅簫。暗惜歌前人近別。

### 木蘭花慢

梁谿晚泊和黃竹齋

問綠汀杜若。誰解爲。恨人栽。歎京袂遊塵。吳霜歸鬢。客悶難排。扁舟放愁縱遠。好湖山、何意亂離來。斜月還聞鄰笛。落花休點吟杯。水香亭榭憶秦淮。歌權晚頻催。念繡額簾花。羅心燭燼。殘夢徘徊。西風謝堂去燕。賸巢痕、還占舊樓臺。待把錦書寄與。柔波九曲腸回。

### 鶯啼序

甲午仲秋薄遊江淮瓜步晚渡與子苾舟中連句和夢窗此曲

西闌乍過桂影。倦秋醒閉戶。酒邊淚、分付黃花。客燕何意來暮。擢歌遠、吳山自碧。晴  
雲望轉淮南樹。悵荒灣、殘柳春前。枉作風絮。叔問寶扇才疏。畫簾十二。換紗煙縠。  
霧鏡波曉。還照離妝。玉容空在。紈素。繡帷寒、愁鬆雪腕。暗銷盡、深盟紅縷。理芳情。搓  
做柔絲。綰他閒鷺。子蕊桃根舊曲。醉耳重聽。過江尙倦旅。歎十載、杜郎吟賞。又斷  
魂處。翠黯紅淒。矮篷眠雨。二分月色。瓊簫吹破。多情贏得天涯老。更漁燈、趁喚瓜州  
渡。登臨恨晚。荒螢亂點。迷樓照地。一片焦土。叔問春風粉黛。曉日綾紈。賸寸蘿片  
苧。笑拾得、才人餘唾。幾樹官梅。客裏狂吟。雪中低舞。扁舟此去。無情煙水。清歌何處  
催夢覺。感華年、分算成絃柱。隋堤鴉散斜陽。故國庭花。有人唱否。子蕊

又 登北固樓感事再和夢窗

西風又聞鶴唳。動秋聲在水。海東日、照滿津亭。浪花飛作雲蕊。戍笳引、樓船暝合。荒  
譙夜火城烏墜。歎南遊、孤旅滄波。久斷歸思。叔問關塞音書。數馳急羽。感新愁帝  
子。笑仙術、空說乘槎。采芝人久未至。莽中原、貔貅萬帳。問何日、龍旗東指。且銜杯、狂

嗅茱萸。醉來何意。子苾登臨罷酒。北顧倉皇。念枕戈不寐。霜月悄。幾回起舞。到此  
驚見。第一江山。費人清淚。神京杳杳。非煙非霧。雞聲殘夢。催哀角。攪迴腸。一夜成懽  
悴。冥鴻自遠。重攜倦客扁舟。汎愁鏡。波天裏。叔問。燐燐野燒。逼射甘泉。照萬松失  
翠。暫小覓。林亭同憩。側帽行吟。老柳祠荒。亂鴉風起。金焦兩點。檐牙浮碧。空梁歸盡  
遼海燕。繞危闌。休向曛黃倚。傷心大樹飄零。更戀遺弓。恨題滿紙。子苾

浣溪紗 秋夜聞隔牆按歌

秋病無名廢酒尊。水西亭榭易黃昏。獨經遊地最銷魂。花影自行橋上月。笛聲如  
見曲中人。燕梁何處起清塵。

謁金門

煙浪惡。花滿海山樓閣。遼鶴無書雲漠漠。故宮春夢薄。莫惜舞人零落。長袖爲君  
重著。墮地鸞釵成密約。捧觴千日樂。花窵地。紅玉枕山雲膩。良夜好天濃睡裏。蠟盤空轉淚。  
妾似楊花飄墜。郎是一江

春水容易東風無好計。少年須著意。  
斂鳳墜。人意不如初會。圓月後逢歌舞地。斷腸明鏡裏。  
先是君心難恃。恨不玉顏先悴。恩重嬌多情易費。枕函花有淚。

浣溪紗 乙未山塘寒食

春半餘寒未減衣。綠莎汀澱燕來稀。夢期何事鎮相違。  
一簇簾花殘月地。數行門柳宿煙枝。畫船燈火夜歸遲。

鬪草闌干晚櫂移。好風香出畫羅衣。隔花臨水見腰肢。  
病枕久虛胡蝶夢。歌樓猶唱鷓鴣詞。疏狂多誤少年時。

齊天樂 白石碧山詠物之作多取是調託興深美因效其體賦蟹

半生諳盡江湖味。西風更無腸斷。蓼溼衰燈。蘆灘短舍。夜市秋聲零亂。橫行未徧。歎身世搏沙。蜺螺羞伴。恨滿吳波。噴珠盡作水花散。  
彭彭甲兵腹滿。待誰呼郭索。蟹海秋戰。菊訊霜肥。橙香雪老。邵付重陽吟淺。新詩好換。憶鄉味經年。故溪清淺。月落

潮生一匡愁碧染。

鷓鴣天 中秋後二日越來溪夜汎

露脚斜波月上遲。鏡中曾見越來時。湖光一片傷心碧。卻與吳兒作水嬉。飛畫鷁，引金蠶。羅旂香榦燭龍隨。歌塵只是黃昏散。愁滿風蘿野粉吹。

巖桂秋香晚尙花。順陽舊墅問殘霞。五湖自送鷗夷去。風月依然屬范家。浮白勸。

比紅誇。有人低唱倚蒹葭。曲中解得銷魂句。不羨谿頭越女紗。泊舟行春橋侍兒南。

柔歌余湘春夜月詞音節淒異

蹋莎行 送子苾入陝時以庶常改官爲懷遠令

連權湖山對牀風雨。吟壇十載更相主。已憐憔悴盡中年。那堪離亂成孤旅。鷓鴣外。

吳雲馬頭秦樹。大江東去人西去。嚴關百二舊經行。不愁夢失尋君處。

壓酒春燈掩歌秋扇。江南已是無腸斷。曲中莫作水風聽。尊前便有關山怨。經醉。

池亭臨分箋管。西園芳草隨人遠。黃金縱得贖蛾眉。胡沙應換春風面。

蜀錦裁篇。吳皋飄寓。佳遊頓失城南侶。橋邊烏鵲縱分飛。隴頭鸚鵡能言語。柳雪官程。圖書家具。扁舟明日長安路。多君一縣好青山。支頤手板供愁句。子苾僑吳城南烏鵲橋。

南浦蘭情。西崦梅訊。好春良月離天近。十年空負過江名。一官直抵飛花溷。山縣愁鬢。雪鬢衰鬢。才人自斷漂零分。它時好載鬱林歸。只應片石銷殘恨。

湘月 八月十五夜聽雨泉橋水樓憶己丑中秋與如闢諸子被酒夜上靈巖最高峯醉臥琴臺雲氣四合仰見明月破空而飛如銅鏡礮石礫然有聲遠望漁火錯雜雲水中光景奇絕予踞危石屐步不能支捉雲狂呼衣袂盡溼明日題詩寺壁而去勿勿十年遊舊二三零落殆盡此樂不可復得今夕何夕懷往傷高不知酒悲之何從也

桂陰小樹。隔紗櫺聽水。如坐雲霧。細雨檐花奈曲裏。總是瀟瀟愁緒。楓驛初鴻。柳橋殘燕。畫燭裁秋句。西闌休倚。數峯相對清苦。猶憶臥酒琴臺。磨空一鏡。照青山今

古塔影蒼寒。問石上、招得秋魂來否。踢葉虛廊，采香斷徑，事與孤雲去。淒然良夜，夢遊凝想，仙侶。

慶宮春 重登西樓月下聞雁寄懷湘潭王壬老

衰草蟲天，斷雲魚浪，去帆望轉湘碧。秋影初鴻，江蘼罷采，月明空怨遙夕。翠疏紅冷，記曾占、西樓賦筆。雕闌仍在，愁倚黃昏，水風殘笛。楚蘭一曲傷心，恨魄難招，霧蘿煙薜。江山文藻，登臨老淚，故國何堪陳迹。綺疏芳卷，定寄我、寒梅水驛。行雲歌盡，白眼青天，舊狂誰識。

鷓鴣天 余往來鄧尉山中廿餘年矣獨愛青芝一塢林嶂秀岫人迹罕交有終焉之志未逮也還泊西庵因賦是解

樹隱湖光望轉明。巖深晚桂尚飄馨。十年秋髻輸山綠，依舊看山夢裏行。煙澹宕，月空冥。下庵濛雨上庵晴。眠雲無地青芝老，虛被樵漁識姓名。結夢疏雲泛渚蘋。霜林秋色豔於春。山中種樹書堪讀，世上繁華迹總陳。驚歲晚。



負閒身。石芝鶴語舊知津。紅桑海畔花爭發。一掬微波見綠塵。

右冷紅詞。舊刻四卷。始己丑。訖丙申。凡一百四十五首。刪存五十六首。

楊柳枝

永豐坊畔翠雙枝。和淚移來近玉墀。不是傷春詞客在。故宮誰得妒腰肢。  
才作風花又水萍。一生好計只飄零。可憐憔悴章臺路。送盡離人眼尙青。

望江怨 題北樓春餞圖

東風笛。惜別殘紅舊衫溼。登高懷故國。畫簾飛絮煙江夕。空尊泣。不見笛中人。斷雲和夢覓。

蘭陵王 江上逢北使寄書和清真

片帆直。春草連江自碧。吳亭外、飛絮亂鴉。冉冉離天可憐色。青山戀去國。應識。長安舊客。歸鴻盡、回首暮雲。一紙京書淚盈尺。經年尙萍迹。歎夢墮吟鞭。香冷歌席。殘花殘酒過寒食。看十里村杏。數行門柳。東風吟恨徧水驛。甚天限南北。幽惻。暗懷

積念帳鏡塵空。廊屨音寂。前遊到處成愁極。但逝水光景。過風簫笛。沈沈孤館更夜盡。斷漏滴。

又 秋柳和清真

去波直。殘柳參差颺碧。蘇臺路。曾掃墜鈿。浣地柔條盡秋色。依依問水國。頻憶。長亭送客。西風裏。攜手四橋。空綠不添漲三尺。春光總陳迹。記絮裏。簾旌。花捲帆席。汀洲萍實經年食。嗟兩鬢銀綰。一聲金縷。離魂飛度遠近驛。送秋老江北。心惻。亂愁積。奈舞袖飄零。歌扇沈寂。相思到骨情何極。念馬上殘夢。酒邊孤笛。單衣鉛淚似暗雨。夜半滴。

踢莎行 采蓮曲

花券裁紅。香筒吹綠。輕拏踢徧江南曲。蓮心苦裏尙回甘。藕絲斷後從誰續。翠帔銀泥。鈿筐金粟。牽雲曳雪相思屬。弄波莫便采珠還。露房秋淚紅盈掬。

玉梅令 城南網師小築故瞿氏園也咸豐庚申亂後中江李使君眉生治園

爲宅以近滄浪亭號蘇東鄰博古自娛簡放絕世余以疏狂僑舊雅奉閒逸  
數預竹林之游今眉生下世十餘年矣林亭舊隱時見官儀賓戲囂塵無復  
高致感時悼往不能無西園之思也園中殿春簷最勝因以錢仲文詠故王  
維堂前芍藥詩意寄慨於詞云

滄波舊苑。又入清風券。春陰護傍家池館。有藥闌幾曲。掩袂再來看。珍叢未謝。夢雲  
已遠。吳縑蜀錦。新詩能換。十年事。暗驚雨散。問山陽舊侶。到此更誰過。空鄰笛。繞  
花吹徧。

綺寮怨 宣武城南夜集感事和清真

白眼看天如醉。夢雲誰喚醒。糝綺陌、舞絮狂塵。傷春淚、漫灑新亭。微茫西山一角。滄  
波底、日落山更青。但怪他、片石無言。冤禽恨抵死填海。盈曠望去天幾程。珠宮舊  
事。仙才枉說飛瓊。月冷風清。羽衣譜、斂愁聽。茗茗鳳樓殘點。獨立盡、五更情。漂花滿  
城。東風不到處。花又零。

還京樂 戊戌春應都堂試到京聞有客述焦山僧樓詞扇見者輒吟翫不去

手蓋余甲午秋感事作也今又將騎款段出國門放歌於東南山水間不復與僮兒爭道旁苦李矣和清真韻感而賦此

放愁地說與滄江舊曲誰重理。縱翠紗籠句。白雲笑我。仙才空費。又故山歸後。殘春事與浮名委。鎮斷送明日。陌上看花閒淚。向清波底。見文章流錦名花。訴盡東風。零落舊味。堪嗟冶葉倡條。傍凡門。豔數桃李。恨迢迢。拌玉劍埋雲。金刀斷水。料得西樓月。窺人還自憔悴。

夜飛鵲 出南郭門望西山和清真別情

城南有情月。知我悽其。臨別更送清輝。吟邊白髮已愁盡。京塵依舊縑衣。煙霄曠迴眺。看仙山樓閣。海戍旌旗。長安夢短。過津亭。酒醒偏遲。身似十年江燕。簾幕易秋風。殘社空歸。休問烏衣故國。尋常陌巷。重到應迷。數峯缺處。倩蒼雲。補向天齊。但紅桑成畝。青蕪變海。弱水還西。

驀山溪 半塘翁嘗愛誦美成此曲與瞻園同年連和之今別翁浹旬已沾口

樓居連雨不寐兼聞梧州亂耗爰次韻寄懷不獨旅逸之感也

吟邊燈火。夢熟城南路。歸騎每侵晨。月初沈、西山缺處。殘燧滿袖。都是別君詞。空愁語。休延佇。酒醒天涯去。飄零到此。客枕高樓雨。鶴唳似驚風。渺甌蠻、瘴江戰鼓。扁舟不繫。一夜故園心。杯未舉。愁先注。白髮緣千縷。

月下笛 戊戌八月十三日宿王御史宅夜雨聞鄰笛感音而作和石帚

月滿層城。秋聲變了。亂山飛雨。哀鴻怨語。自書空、背人去。危闌不爲傷高倚。但腸斷、衰楊幾縷。怪玉梯霧冷。瑤臺霜悄。錯認仙路。延佇。銷魂處。早漏洩幽盟。隔簾鸚鵡。殘花過影。鏡中情事如許。西風一夜驚庭綠。問天上、人間見否。漏譙斷。又夢聞孤管。暗向誰度。

鶯啼序 秋感和夢窗豐樂樓韻

滄洲半殘畫稿。認河山錯綺。自槎客、豔說仙瀛。浪疊愁滿空際。蜃嘘起、樓臺幻境。金

銀夜氣渾無霽。怪塵昏。蠻海驚鷲。趾影都墜。陳迹蒼黃。對酒看劍。向青天漫倚。漢宮月。猶過邊亭。墮榆飛盡寒翠。最銷凝。昆池劫墨。石鱗泣。秋稜荒水。閱年涯。三淺蓬萊。此身何世。長安似弈。局外樵柯。睡境正深美。幽恨切。數聲啼鳥。夢裏誰見。覆雨翻雲。楚天疑事。西山縹緲。香霏一片。玉龍哀變。清商曲。漏沈沈。燭背簾垂地。拋殘舊舞霓裳。獨坐繁霜。淚花溼紅縈緯。宮槐翳日。苑柳扃煙。念鳳樓久遲。但夢繞。瑤池仙步。鶴怨猿猜。望斷層城。玉梯十二。驕雲滿眼。森森冠佩。江關投老。詞賦客。歎京塵。空染憂時袂。傷心孤燕。巢林亂葉。迷歸夕陽故里。

秋思耗 半雨樓聞雁和夢窗

衰帽西風側。驟雁聲。催送暮城寒色。燈院雨昏。晚花中酒。愁浸腸窄。倚歌扇。高樓四絃和淚訴。掩抑見數峯。江上碧。想故國雲橫。幾行歸盡。又作早秋南旅。有情堪憶。殘夕。檐鈴斷滴。喚素娥。澹洗鉛飾。怕聞鄰笛。明朝窺鏡。鬢華暗白。誤舊約。青鸞信乖。春夢如過翼。念遠客。應慣識。漫歲晚稀逢。重門無字。寄得恨隔霜榆塞北。

憶舊遊 己亥五日浮家西崦信宿石壁精舍見湖壩漁家垂燈疊鼓饒有節

物感時賦此

正梅風轉溽。麥浪吹涼。晴泛吳橈。未了尋幽興。賦枇杷晚翠。一掬金拋。五湖料理三  
畝。多事誤青袍。悵聽水燈前。看山枕底。夢境茗茗。蕭條舊蘭若。問煙雨樓臺。誰換  
南朝。賸有蒼黃壁。壓頗黎萬頃。斷劫難銷。淒其五日情事。殘醉虎山橋。歎滿地滄波。  
漁舟夜笛何處招。

浣溪紗 從石樓石壁往來鄧尉山中

一半梅黃雜雨晴。虛嵐浮翠帶湖明。閒雲高鳥共身輕。山果打頭休論價。野花盈  
手不知名。煙巒直是畫中行。

慶春宮 橋西新營後溪植援雜花幽樹經秋成陰時有冷客登樓釀飲蕭然

託寄輒付僮歌

窗岫遙青。簾波空翠。臥臨畫裏江城。斜月琴牀。低花衣桁。枕溪疏綺多明。幾枝霜艣。

暮寒迸。西樓雁聲。小闌紅袖倚徧珍叢。玉笛誰橫。歌塵一片淒清。別岸垂楊。曾見藏鶯屏燭。秋啼鏡花春影。賦愁空費閒情。舊遊吟境。夢雲隔、蓬萊幾程。仙才自惜。莫枉山中猿鶴知名。

滿庭芳 西館新陰花枝可擷勿勿不知春過半已

行錦花陰。隔紗春語。好風香出梅梢。翠塵簾捲。新樹過人高。休惜年芳晚晚。滄洲夢、輕付吳橈。低回處。江南舊燕。零落謝堂巢。東風還似客。梨雲粉冷。蕙雪紅銷。近清明歌酒。愁欠誰澆。一臥西樓聽雨。閒情倦。別枕笙簫。前遊續。山塘載月。斟酌過橫橋。

又 江上餞春

南雪蘭襟。東風茸帽。舊情人比花狂。江城畫裏。樓閣隱垂楊。可奈春霏冉冉。都換了、新綠池塘。銷魂地。殘紅有恨。還作燕泥香。年年春盡日。疏燈聽雨。總是他鄉。縱清歌緩客。怕近離觴。早識芳心一點。收拾與、蝶粉蜂黃。今宵夢。吳波半翦。應附北歸航。

沁園春 虎山橋重泊秋晚登眺



衰柳西灣。冷楓南塢。秋橫野航。見秦眉天鏡。乍驚離合。越鬢水枕。能令低昂。殘竊空  
丘。故宮成沼。贏得漁樵買醉場。清尊對。賸一螺頑碧。虎老山荒。蒼涼重檣。鷗鄉。漸  
紅葉吹寒。零雁行。記五湖雪糞。探梅詩瘦。兩掩霜籠。報橘書香。寸岫仙雲。尺渡塵海。  
一笑登高理舊狂。移家好。信石芝堪采。勝賦滄浪。

龍山會 虎丘作重九時自光福里迴舟和君特載酒雙清之作

塔影窺林罅。落雁汀煙。畫艣霜花亞。虎山橋上月。移夢近。還過雲泉亭下。衰帽側高  
秋。墮巾趁。山容淡冶。最銷凝。吳篷暮雨。歌前暗灑。因憶舊節題香。蹋醉花街。倚少  
年驕馬。倦遊狂態盡。珠箔墜。獨自飄燈殘夜。人事水東西。凭高淚。流紅迸瀉。漫歸吟。  
冷楓賸有一瓢詩桂。

虞美人 題紅橋歸騎畫扇

澹煙洗得春山瘦。眉嫵從誰鬪。橫橋西畔小桃枝。一自插花人去。怨開遲。馬蹄芳  
草。經遊地。重到銷魂易。紅樓長占柳陰陰。只是柳條不繫少年心。

賀新郎 秋恨

暗雨淒鄰笛。感秋魂、吟邊憔悴。過江詞客。非霧非煙神州渺。愁入一天冤碧。夢不到、青蕪舊國。休灑西風新亭淚。障狂瀾、猶有東南壁。空掩袂、望雲北。雕闌玉砌都陳迹。黯重扃、夷歌野哭。晦冥朝夕。十萬橫磨今安在。贏得胡塵千尺。問天地、榛荆誰闢。夜半有人持山去。驀崩舟、墜壑蛟龍泣。還念此、斷腸直。日落羌笳咽。認一行、高鴻盡處。五雲城闕。滿眼驚塵還鄉夢。重見昆池灰劫。更馬上、琵琶催發。露冷橫門移盤去。甚金仙、也怨關山別。愁寄與、漢家月。故人抗議多風烈。漫銷魂、題詩隴樹。誰旌奇節。易水空成填恨海。西北終憂天缺。但目盡、平煙區脫。不信天心渾如醉。好江山、換了啼鵲血。長劍倚、向誰說。

菩薩蠻 望月有懷

桂宮寂寞花前後。天階玉露金風驟。雲外小驂鸞。也愁高處寒。夜明秋半鏡。暗缺山河影。燈火夢長安。覺來西笑難。

謁金門

行不得。鬣地衰楊愁折。霜裂馬聲寒特特。雁飛關月黑。目斷浮雲西北。不忍思君顏色。昨日主人今日客。青山非故國。留不得。腸斷故宮秋色。瑤殿瓊樓波影直。夕陽人獨立。見說長安如弈。不忍問君蹤迹。水驛山郵都未識。夢回何處覓。歸不得。一夜林烏頭白。落月關山何處笛。馬嘶還向北。魚雁沈沈江國。不忍聞君消息。恨不奮飛生六翼。亂雲愁似幕。

漢宮春 庚子閏中秋

明月誰家。甚今年今夕。多事重圓。移盤夜辭漢闕。貯淚銅仙。珠簾畫棟。倒寒波、空影如煙。魂斷處。長門燭暗。數聲鶯雁蠻弦。還見山河殘影。恁磨成桂斧。補恨無天。淒涼鏡塵頓掩。雲裏嬋娟。東華故事。祝團圓、歸夢空懸。凝望久。蓬壺翠水。西流好送槎還。

玉樓春 城西樓晚眺

驚煙連海掀風色。遼雁秋稀音信隔。王孫芳草不成歸。綠徧天涯無路陌。懸懸愁眼迷雲北。到處登臨懷故國。夕陽樓上好青山。只是黃昏留不得。

雨霖鈴 恨別和柳屯田

并刀難切是離腸。恨夢雨都歇。繁華似水流去。回首處、車塵臨發。冷落關河，送遠有、孤雁悽噎。念舊苑、衰柳寒煙。玉笛吹愁滿空闊。銅駝陌上傷今別。更斷魂、客裏催佳節。黃昏滿地花影。依約見、故園秋月。萬里清霜。休問香篝翠被誰設。卻怨入、簾底西風。付與殘蛩說。

摸魚兒 滬江送春詞

更尊前、幾回西笑。茫茫時事如許。長安一雨分新舊。惟有夕陽無主。春思苦。怕花滿紅桑、無地悲離黍。春歸甚處。但殘燕空林。亂鶯芳草。總是斷魂路。嗟遲暮。休倚蘭成詞賦。江關贏得孤旅。高樓縱續笙歌夢。愁帶北來笳鼓。鄉信阻。想寂寞珠簾。尙捲

西山雨。淒絃自語。恁冷淚成波。荒波變酒。澆徧趙州土。

燕山亭 題自畫薊門秋柳圖

衰柳空城。羌笛數聲。溼了樓臺煙雨。珠箔四垂。客燕迷歸。棲老綠陰無主。弱不禁攀。更愁唱、陽關西去。凝佇。賸舊苑歌塵。暗飄金縷。還記驕馬章臺。正花拂長堤。麴波隨步。而今莫問。解舞腰肢。淒涼故宮誰妒。便喚春回。忍再見、倚簾吹絮。歧路。腸斷也、一絲絲苦。

御街行 紅橋飲席感少年事

峭寒翦翦風如水。又亂颭、花陰碎。月明橋上玉闌干。曾見凭春羅袂。好天涼月。依然昨夜。只是人憔悴。當時何限風流地。儘賺得、銷魂計。年來對酒怕聞歌。換了疏狂身世。分明襟上。唾花醉粉。都作今朝淚。

過秦樓 後溪連雨新濕平橋一樓臥臨城西陂船舫皆從几案間過晚霽見

月水光花影澹然空寒有懷丁酉秋石壁山望湖臺夜遊流連光景動踰歲

時遭世亂離。遊情匪昔感。時屬景不自知其詞之淒異也。

過雨檐花透。風窗竹露點。翠梧金井。林梢小閣。曲枕溪流靜。綠盪胸千頃。簾捲夜近。銀河秋浸天階。水明星靜。欠追涼綺袖。一枝橫玉滿身雲影。迴憶處。月氣湖煙空。臺搖落。上下臥臨清鏡。淩波弱步。溼霧香鬢。夢斷數峯青迴。年事如今暗驚。燕草天荒。吳楓江冷。但孤雲遠水。愁入離痕淚枕。

### 玉樓春

春風秋月資遊計。獨我尊前長費淚。幾生心苦到詞人。風月只供惆悵地。繁華故國今何世。滿目山河成古事。小樓孤燭夢回時。著枕愁來無處避。

### 楊柳枝

數行煙柳薊門春。離袂經年惹麴塵。莫爲西風搖落早。灞陵猶有未歸人。長條如帶水縈環。難繫離愁百二關。羨爾巢林雙燕子。秋來暫客尙知還。暫理愁眉試半妝。舞衣疊淚損宮黃。晴絲繞徧天涯路。不爲離人續斷腸。

迴雪吹花唱大堤。弓腰鬪罷夢長啼。身輕不及枝頭絮。猶逐東風舞向西。  
亂絲歧路苦愁縈。翦翦輕風別有情。一夜雪絲吹滿帳。教人春夢不分明。  
夾道分堤翠浪生。湖山歌舞總堪驚。只今一片斜陽樹。賸有宮鴉啼數聲。  
煙洗風梳碧可憐。秋深猶咽五更蟬。誰家殘月滄波苑。時見漁舟網碎鈿。  
故國年芳換綠塵。樓臺多是別家春。狂花一陣過無影。亂入宮城不避人。  
水明帳殿月如煙。翠縷連雲掛玉泉。香輦不迴秋又晚。棲烏頭白近霜天。  
破曉殘鶯出禁林。飛花寒食雨沈沈。章臺自古牽行色。莫爲離多減路陰。  
樓閣春深雪不寒。關山秋早笛初殘。一般畫出傷心色。漫作隋堤落照看。  
纖纖新翠帶愁顰。零落弓彎舊舞人。底事臨風眠未起。靈和不是漢時春。  
拂徧京塵宰地驚。風條雨葉不勝情。西園已自無多樹。一夜傷秋轉費聲。  
平居誰分解傷春。競賭長楸走馬身。寂寞空城飛絮盡。羌笳吹起六街塵。  
高秋蕭瑟思何堪。昔樹空悲憶漢南。任是婆娑生意盡。不辭風雪老江潭。

浪淘沙慢 江南早春鄧尉山梅垂垂欲發因憶己丑秋方舟載酒與湘潭王  
壬秋二三同志山澤行吟連句和清真此曲極歲晚清逸之娛勿勿舊遊奄  
踰一紀年荒時難俊侶飄零今見園中南枝初葩斜月在水將治舟討春西  
磧閒。淒獨之感哀斷成歌再和清真繞枝三帀興言昔懷益以重予離憂也  
墜月悄、花光練結。夢繞西磧。倒影浮杯盡綠。吹香點袖自碧。想載雪、橫江澆大白。正  
暝蹋、一葉蒼茫。又數峯、青入短篷笛。煙水弄愁色。脈脈。旅懷仗酒能釋。歎遊舊零  
落如花雨。孤絕尋芳客。認石屏苔屐。依稀陳迹。眼前好景。空繞枝、百轉愁腸都窄。年  
事換、傷春殘稿。西園約、夢境頓隔。翠禽啼、繁英滿路陌。似淚粉、亂點東風。悵恨極。清  
歌更有何人拍。

右比竹餘音。舊刻四卷。始丁酉。訖辛丑。凡一百六十二首。刪存五十二首。  
玉燭新 小春海棠

夢窗詞手稿有是題丁香結一解。江南冬燠。春卉再花。而海棠益淒麗可玩。



因依夢窗題格賦之。

冰綃和淚浣。又夢喚春回。繞花千轉。鳳窠織就同心錦。肯爲傷秋腸斷。嬌霞半面。趁醉夜、珠簾重捲。催冷豔、還照珍叢。愁凝蠟盤紅短。依依睡起西闌。怪海國狂塵。舊芳都換。倚寒翠袖。應自惜、鏡裏過時勻染。移春小檻。問月地、雲階誰見。休再覓、顛嫁東風。妝成恨晚。

法曲獻仙音 靈巖覽古次韻夢窗

妝濯池花。步鳴廊葉。晚色蒼涼。僧院亂石牛羊。古臺麋鹿。江楓黯愁霜點。近水市菱歌起。吳聲鎮哀怨。曠懷遠。問鴟夷。載春何處。怱悵地。一徑舊香。恨染箭引越來谿。射晴波。秋練如翦。廢柳殘蟬。替宮魂。歌舞腸斷。算繁華成沼。故國青山還見。

八聲甘州 琴臺據吳故宮離城之上舊志所謂高可見三百里洵登覽之逸

地也。余與半塘老人西崦迴舟。從木瀆步上絕頂。高誦君特秋與雲平之句。一時豪傑陵轢。今古因乘興。更作天平之遊。時已暮色蒼然。共和吳詞相與。

徘徊而不能去

溢巖霏。弄晚點荒寒。漁燈兩三星。歎風流殘霸。湖山靈氣。空葬傾城。一鏡吳波變沼。  
花雨洗蠻腥。片石興亡恨。玉軫無聲。惟有西江明月。照故宮殘夢。梧葉催醒。奈登  
臨愁眼。還向此山青。更誰吹。烏棲哀調。喚暮鴻。煙際落盧汀。餘情寄。白雲題句。連步  
天平。

湘月 天平山上白雲亭酌泉晚眺欲尋遠公石屋不果歸路看紅葉泊鷺飛

洪作

亂峯喚客。引幽筇。蘚步飛上空翠。舊賞林亭。更暝蹋。到地秋聲紅碎。裂壁通樵。崩崖  
辟鳥。風谷鏗環佩。斜陽屏畫。舞楓欲共天醉。別有石竈松煙。半坳雲乳。瀉連筒珠  
綴。滴盡吳根。怕化作。一朶滄波殘淚。巖迹臺荒。湖光鏡冷。秋思生高袂。靈扁何許。雨  
花夾磴飄墜。

天香 石濤和尚爲勝國楚藩之裔以詩畫逃禪高逸絕世海鹽陳氏藏其所

製鼻煙壺以西藏貝多樹子爲之。上有程松門刻小象并壺銘。余愛其樸栗古致爲賦一解。乞得此壺亦香國中鼻功德也。

薰亞金絲香。參玉壘。沈沈冷麝如水。故國茄花。王孫芳草。盡化海山雲氣。半囊唵藹。空悟破。枯禪一指。休問壺天。日月銷磨。苾芻身世。拈來信多妙諦。貯烟煨。寫經餘事。歎息百年碩果。等閒匏繫。萬感都成蠟味。西洋人名盛煙瓶曰蠟。但愁惹。西來暗塵起。更倦殘熏。生酸老淚。

蘭陵王 舊社老友張兄子苾薄宦秦中。勿勿十年。以癸卯三月歿於大荔。今墓有宿草。已其室人曾氏季碩才豔。有詩名蚤卒。吳下同。人爲之下葬於橫山。傷心之極。致欲歌其事。輒哀斷不能聲。茲誦研生中實兩使君輓詞。皆和清真。此閱觸緒。悲來感音。而作不自知其涕之何從也。

斷腸直。春夢池塘自碧。吳箋恨。零落舊題。別後湖山總無色。淒涼戀去國。同識。蜉蝣過客。低徊處。春樹暮雲。江鯉沈沈素書尺。南遊共萍迹。記載雪連橈。吟月移席。一

官直等嗟來食。愁萬里蓬轉。十年匏繫。長安漂泊似傳驛。但魂繞關北。哀惻歲時積。歎蜀錦江空。秦鏡塵寂。瑤華玉匣傷心極。怕腹痛迴軫。感音鄰笛。招魂何處淚萬點。當酒滴。

念奴嬌 甲辰仲夏半塘老人過江訪舊重會吳皋感遇成歌以致言歎不足之意

小山叢桂。問淹留、何意空歌招隱。自見淮南佳客散。雞犬都霑仙分。碧海三塵。白雲孤抱。不羨靈飛景。仙才誰惜。世閒空舐丹鼎。我亦大鶴天邊。數峯危嘯。一覺松風枕。三十六鷗盟未遠。獨立滄江秋影。詞賦哀時。湖山送老。吟望吳楓冷。梅根重醉。舊狂清事能領。

鷓鴣天 余與半塘老人有西庵卜鄰之約人事好乖高言在昔款然良對感述前遊時復悽絕

據榻吟數往。夜窗檝馬警秋眠。可憐燕市尊前月。又共吳雲夢裏天。回首處。

一澗然。小山招隱有新篇。淮南幾樹留人桂。縱得攀援不得仙。

秋老山橋虎氣沈。霜風呼酒舊登臨。梵鐘出樹巖扉迴。漁火通波雨塢深。連權路。

五湖心。別來三見冷楓吟。白雲定識非生客。莫枉芝崦鶴夢尋。

諫草焚餘老更狂。西臺痛哭恨茫茫。秋江波冷容鷗迹。故國天空到雁行。詩夢短。

酒悲長。青山白髮又殊鄉。江南自古傷心地。未信多才累庾郎。

浣谿沙 甲辰中秋後二日晚晴放舟石湖觀越城橋下串月明日將從胥口

探桂山中不預此遊蓋五年矣

谿上曾聞渡越兵。亂流猶似怒蛙鳴。蒲風杉雨戰秋聲。梧夢只今空故苑。菱歌依

舊繞離城。長橋人散月孤明。

花豔連橈度鏡光。滿湖絲管水飛香。月明何恨預興亡。莫攬清歌悲小海。更催秋

夢落橫塘。波空塔影自淒涼。

煙夕涼波起白蘋。薦紅落粉盡歌塵。依稀山黛可憐顰。一舸誰尋蝦菜路。千絲空

羨鱗殘鱗。無多秋事屬閒人。

夜午看山舊寺樓。別來巖桂五經秋。好花涼月醉扶頭。一水又平橋畔路。幾人曾

預鏡中遊。山陽殘笛更吹愁。

聽水聽歌醉夢間。秋衣零露夜忘還。拍浮人與白鷗閒。餘興好探花裏市。舊情不

斷枕邊山。半篷風色過梅灣。

舊泊橫橋花覆船。酒燈人語隔湖煙。紅簫腸斷十年前。經醉谿山如此夜。後逢花

月奈何天。漫吟秋扇黯悽漣。

鷓鴣天 胥口是范蠡從人五湖處秋夕覽古有懷

雲物淒清秋滿湖。遺愁夢落故宮梧。西江終古無情碧。送了鴟夷便沼吳。煙草迴。

水禽呼。越谿寒雨戰菰蒲。扁舟賺得西施去。枉費良金寫作圖。

高陽臺 伯弢見過將尋鄧尉看梅之約余病未能勿勿別去念其白門寥落

賦以寄懷

燈市星闌。橋浜雪老。傷春倦賦登臨。舊燕重逢。十年猶自巢林。渡江柳眼青如許。見故人、江上愁心。感前塵、珠箔寒飄。鏡縷頽侵。東風又綠離憂草。記捐芳楚佩。題淚吳襟。夢冷銅駝。可憐人事俱沈。五湖未了扁舟興。怕亂愁、遠比花深。掩園扉、行藥歸來。一枕春陰。

鷓鴣天

細語檐禽破曉霏。竹聲涼翠夢先知。酒醒一枕紅蘭淚。染取蠻箋賸寫詩。幽事淺。世情稀。閒花飛盡見高枝。一春雨橫風狂過。綠徧池塘無是非。

清平樂

舊寒如水。波織簾花碎。小雨櫻桃紅漲地。猶是去年天氣。貪眠笑比吳蠶。東風醒醉長兼。判卻一春悵悵。爲誰腸斷江南。

二郎神 和湘綺翁西安北苑題壁

夕陽舊苑。又過客、曼歌離黍。想雲近仙居。昏昏龍氣。空鎖千門勝署。漫說長安堪西。

笑儘夢逐。京塵飛去。嗟殿柳燕歸。宮槐蟬斷。暗聞鈴語。前度畫輪移雉。玉塔班鷺。看地轉天迴。終南古黛。不減西山翠。漢月懸秋。秦雲媚晚。銷得楚狂題句。但暗憶彩筆曾干氣象。白頭非故。

一萼紅 春餘夏始園卉向殘檐果垂熟綠陰如夢舊雨不來卽事和白石此解以寓興

晚簾陰。又韶紅換景。闌藥已抽簪。芳援疏籬。珍叢疊架。天似殘醉沈沈。乍過雨。櫻桃爛熟。款好語。檐際下幽禽。舊賞林亭。俊遊羣屐。呼酒誰臨。還念庾郎顛顛。託臨江故宅。倦賦愁心。萍迹鷗輕。松巢鶴老。塵外吟境堪尋。待新句。琅玕徧刻。有清籟。相和冷敲金。寫入谿山畫圖。閉戶雲深。

滿江紅 乙巳之秋誅茅吳小城東新營所住激流植援曠若江村歲晚悽寒流離世故有感老杜卜居之作聊復勞者歌其事云

竹隔橋南。有竹裏。人家小菴。依約似。浣花門徑。數椽幽僻。居近梅家西市隱。補吟桂



樹東城植。念歲寒、何意老江村。今非昔。懷舊隱。三高宅。空遐慕。五噫客。歎百年枯  
苑。一般陳迹。歸燕猶尋斜日壘。閒鷗且占滄波席。待到門。春漲櫂歌來。漁榔集。

法曲獻仙音 園居春盡病起聞雨述懷

詩骨裁花。酒香行藥。徑曲蒼苔埋步。暗燭吹煙。冷篝銷雪。惜惜晚寒簾戶。甚夢也和  
天瘦。空塔夜還雨。悄吟緒。占吳根。小城一角。牆柳外。依約遠山黛嫵。絮捲陌塵飛。  
放東風。鶯燕無主。故國樓臺。映滄波。空賸歌舞。怕雕闌都換。更倚傷春高處。

鷓鴣天

水竹依稀濠上園。蒼煙五畝絕塵喧。半牀落葉書連屋。一雨漂花船到門。寒事早。  
戀清尊。狸奴長伴夜氈溫。老來睡味甜於蜜。爛嚼梅花是夢痕。

西子妝慢 吳小城

越絕書。城周十二里。高四丈七尺。門三。皆有樓。吳地記引虞覽家記云。吳小  
城白門。闔閭所作。秦始皇時守宮吏燭燕窟。失火燒宮。而門樓尙存。是知小

城卽吳宮之禁門。又謂之舊子城也。歷漢唐宋以爲郡治。舊有齊雲觀風二樓。並在子城上。爲郡僚賓燕之所。見之唐賢歌詠獨多。明初惟餘南門。頽垣上置官鼓司更。郡志載今自乘魚橋至金姆橋而東。高岡迤邐。是其遺址。城四面舊皆水道。卽子城濠。所謂錦帆涇也。其東尙有故蹟。號爲濠股。今余之所經構。證以圖經。此間乃兼有其勝。五畝之居。刻意林谷。旣擁小城。聊當一丘。涇之水又資園挽。可以釣遊。不出戶庭。而山澤之性以適。豈必登姑蘇。望五湖。始足發思古之幽情耶。分題賦此。因併及之。

山送月來水漂花。出一片吳墟焦土。坡陀衰草。下牛羊。鎮蒼涼。廢譙沈鼓。青蕪漫賦。歎殘霸。都傾一顧。話遺塵。有故宮歸燕。傷心高處。登臨阻。玉檻瑤梯。夢斷香屣步。只餘秋色。過牆來。做愁顰。岫眉當戶。霜笳暗度。恁吹徹。觚稜無主。賸荒丘。夜夜啼烏更苦。

念奴嬌 錦帆涇

一濠賸綠。有當年、西子凌波塵影。分得香谿三尺玉。曾試春風宮錦。仙步翩鴻。豔歌浮鷁。轉燭空明鏡。漂花暮水。繞城猶作荒哽。休問金姆橋邊。滄波故苑。遊鹿苔蹊。冷越網千絲。腸共斷。輸與菱娃煙艇。疏蓼棲霜。衰荷戰雨。門外秋光迴。漁磯分席。隔籬時喚清飲。

小重山令 雨落春閒竹窗散帙見彊村翁和紫霞舊詞清興難同年事易盡

記去年樵風園聽雨正此時也

一雨添花作地衣。傷春春不見。夢依稀。吳蠶猶續去年絲。相思老。休織斷腸詞。酒醒昔遊非。西園題恨處。幾斜暉。扁舟心事白鷗知。清風過。長掃竹間扉。

惜紅衣 中秋夜彊村翁踢月見過秋花宛變襟韻清浹因和白石自製無射

宮一曲兼寄伯宛舍人滬上

醉枕銷涼。吟箋度日。枉拋心力。灑袂清風。苔扉款深碧。涼蟾似水。還解伴、江城秋客。沈寂。留坐桂叢。憶年時遊息。蕭條巷陌。蹋葉迴廊。題愁亂紅藉。相思夢老。海國望

雲北。料得舊盟鷗鷺。省慣倦遊來歷。奈後逢良夜。空照屋梁顏色。

又 秋來久不得伯宛消息。感歎歲暮。胥疏江湖時。無延引之者。昨彊老書來述其將治北裝。秋期遠踐復事遠遊。悵然繼聲白石不能無西園之思也。

別夢催秋。遊情展日。倦吟餘力。聽雨殘尊。檐花汎湘碧。書期間阻。空佇想。淞濱幽客。音寂。江燕晚棲。覓巢林休息。京塵故陌。滿眼驕雲。詩狂久聲藉。飄零恨似去國曠南北。可憶亂離山水。老境不堪重歷。算壓裝紉素。添作一江行色。

又 彊村翁早退遺榮。舊有吳皋卜鄰之約。竭來滬江皇皇未暇。近將移家小市橋。吳氏聽楓園。先以書來商略。新營作蒼烟寂寞之友。卻寄此以堅其志。再和白石。

玩月來時。乘濤去日。試帆風力。倦臥滄江。淞波翦愁碧。吳縑換句。頻寄慰。東園書客。蕭寂。吟伴歲寒。卻移枝棲息。花蹊柳陌。舊賞亭池。苔茵翠堪藉。佳鄰買斷。水國小橋北。漫說五湖三畝。林下幾人身歷。趁冷楓題醉。不羨隔牆春色。

又 歲晚有懷繼歌以寫

舊思停雲。高歌送日。感秋頹力。隔雨江樓。冥鴻怨遙碧。蘭芷淚把。憑寄贈。長安遊客。  
淒寂詩夢倦尋。說風流都息。銅駝廣陌。粉醉金迷。狂塵總陵藉。鞞吟睠念。上國海  
山北。耐得一丘吾老。不數十洲颺歷。但歲寒尊俎。誰賞菊叢佳色。

又 涇上幽居覽古悲秋有江山搖落之感疊用舊韻寄慨於言

側帽高秋。題襟勝日。舊狂才力。倦賦登臨。松關臥荒碧。江空歲晚。天付與。樵風園客。  
清寂滄海夢還。覺龍吟波息。珠塵綺陌。棲老年芳。如今草堪藉。高樓望斷。舊國渺  
西北。依約廢陂衰柳。猶識越兵來歷。對小城烟樹。紅入夕陽無色。

又 白石道人製此曲覽淒清之風物寫故國之離憂余嘗考訂故譜證以管

色可略而言其所謂以無射宮歌之者當屬入聲商調曲見之唐段安節樂府雜錄別樂五音圖詞中凡入聲字律綦嚴匪盡闕夾協例其旁譜煞聲用

下凡及五字則依無射宮之本律而寄煞於太簇角半律之清聲初唐樂書

要錄所稱凡管長聲濁不例者以清聲並之是也白石自度曲多緣飾唐譜此其義例爾茲與彊邨翁連情疊韻數相唱于有類元白詩筒故事因以舉似感此古音往復依永淒然其爲秋也

斷闕吟秋。連筒計日。費人歌力。怨疊清商。衰蘭薦寒碧。旗亭舊僧。空送老江南詞客。幽寂。雲水唱酬。託微波通息。苔錢萬陌。買盡閒愁。傷秋鬢蓬藉。青蕪夢繞。舊國雁行北。漫憶十年塵事。滄海幾回親歷。賦桂叢招隱。分半石芝山色。

驀山谿 吳城小市橋宋詞人吳應之紅梅閣故地也橋東今爲吳氏聽楓園水木明瑟以老楓受名紅葉池亭不減舊家春色且先後並屬延陵於勝地若有前因彊村翁近僦其園爲行窩翁所著詞聲滿天地折紅梅一曲未得專美於前也爰託近意歌以頌之

故家喬木。門巷橋通市。市隱有林巒。記聽秋冷。楓疏綺定。巢新燕。胥宇報先聲。輕夢占。舊樓臺。解道遷鶯喜。紅梅一曲。詞客風流地。霜葉勝花妍。算吳歌好音能繼。漁

樵爭席。輸與海鷗閒。秋色裏。許平分。早辦爲鄰計。

踢莎行 丁未秋夕石湖醉泊登千巖觀玩月有憶昔年連權之遊

桂影篩金。竹聲碎玉。西風涼到文波縠。鏡花曾見夜妝紅。巖霏不上秋眉綠。 踢月  
谿橋題雲礪屋。傷心易觸登臨目。清歌如水夢如塵。舊遊腸斷無因續。

臨江仙 潯陽歲除

歲歲無聊當此夕。那堪聽雪關津。一杯藍尾怕霑唇。離聲殘雨夜。歸思亂山春。 帝  
里風光饒節物。老來夢迹都陳。梅花應笑渡江人。寒燒官燭短。愁試客衣新。

燭影搖紅 江春殘雪試燈初夜有憶吳市舊遊和夢窗元夕微雨韻寄伯弢

彊村蘇州

雪黯江城。滿湖嵐氣春寒淺。上燈樓閣晚晴初。簫鼓誰家院。蜜苣圍香正暖。夜蛾愁、  
行雲蘸徧。舊情無奈。踢月歌沈。淩波塵濺。 轉燭年端。雨聲空切吳娘怨。小梅落靨  
又東風。偏趁天涯看。憶別皋橋酒散。寄橫枝。江南夢遠。暗聞笛語。早晚歸舟。花香篷

捲。

水龍吟 皋橋水樓曲宴醉別瞻園會余歲暮有九江之役載雪過白門願言  
不從賦此感歎

出門一笑橫江。酒醒重問皋橋旅。殘釭厭夢。離杯銜淚。傷春歧路。三十年前。相逢同  
是承平俊侶。換滄波身世。雲愁海思。算萍梗。知人苦。不信蘭成老去。賺狂名。蕭條  
詞賦。江山如此。文章何用。英雄無主。獨立蒼茫。樓船西下。清淮東注。欠胡牀爲弄。梅  
花笛裏。喚青溪步。

瑞龍吟 聽楓園餞春席上和清真

尋詩路。還記小市蒼煙。舊家紅樹。依稀殘月。殘花麗情俊賞。銷凝是處。曠吟竚。猶  
有定巢新燕。占春簾戶。留連晚色。年芳畫屏翠燼。餘香共語。前度京塵遊袂。酒邊  
聯唱。花間愁舞。重見斷魂天涯。人換新故。江郎恨筆。休倚傷春句。飄零又。南樓罷飲。  
西園歸步。世事浮雲去。老懷到此。茫茫萬緒。不絕情如縷。和淚挽。東風哀絃連雨。夢



歌怨疊。一江萍絮。

又 衰碧先生和清真是闕見示懷古傷春高健處不減耆卿風格繼聲報之  
西橋路。還認故苑飄花。小城敲樹。悽悽江國年芳。怨紅淚粉。魂銷甚處。悄延佇。休  
念舊狂清事。鏤香題戶。悲來一曲回風。滿汀墮蕙。零絃自語。空度春光流景。引杯  
看劍。愁多慵舞。腸斷庾郎哀吟。知爲誰故。推煙唾月。何用驚人句。傷心見。新亭老淚。  
臨江遺步。轉燭繁華去。酒醒自理。悲歡墜緒。年鬢催霜縷。歸夢繞。沈沈荒臺雲雨。楚  
天恨隔。夕陽飛絮。

霜花腴 懷夢窗楊柳閨門故居卽用其自度曲韻

過江舊客。悵倦遊。浮生誤了儒冠。西館花飛。南橋萍老。吳城久住偏難。水天夢寬。奈  
燕歸。飄泊依前。歎巢痕。閱盡東風。夕陽喬木想高寒。京國舊居如驛。又金閨柳色。  
幾換吟蟬。華屋空丘。神州沈陸。茗茗此恨誰箋。夜鐘到船。認故山。愁黛連娟。感年芳。  
送老秋詞。斷雲和夢看。

一萼紅 園夏卽賞

半陰晴。帶雲容。雨意。梅熟。又江城。簾桁凝煙。庭除潑水。空想歌扇花縈。漸衣潤、添香滿。鴨費熨帖。春恨總難平。鬪草人歸。采蘭天近。誰喚愁醒。依約一年芳事。奈新期舊賞。節物堪驚。尋夢蕉迷。追涼竹醉。閒晝長解塵纓。看高柳、池塘自碧。怕重見、江燕共秋零。最憶清風故人。一枕詩聲。

聲聲慢 雁庵撫部晚秋宴席

庭柯疏桂。井榦寒梧。蕭森幕府清秋。楚佩蘭情。相將珠履風流。戟門夜澄如水。詠凝香、傳徧吳謳。追雅宴。勝雲開東閣。月滿南樓。回憶霜臺舊柏。映花明旌節。江國鳴騶。白髮丹心。吟湘夢繞神州。一池晚蓮紅汎。點餘波。容有閒鷗。延勝賞。好湖山、尊俎借籌。

又 秋雨酬瞻園同年

荒苔綦迹。落葉詩聲。孤檠聽雨江關。寂寞魚龍。滄波獨放鷗閒。西風庾愁催賦。臆空

園。棲老霜菅。念遊舊。有詞壇白雪。幕府青山。楚客悲秋何限。只斑斑竹淚。迸付蕉彈。銅狄摩挲。曾歌漢月移盤。南雲夢華重聚。薦吳尊。休汎衰蘭。曠吟望。鎮哀時。相共歲寒。

又 秋晚索居簡彊村有懷京國舊遊

檐花殘雨。廊葉新霜。愁聞秋盡啼蛩。水石高閒。琴尊歲晚稀逢。隔江亂雲催暝。臥空山。獨對寒松。倦遊感。話遼天歸鶴。湘浦來鴻。一夢驚塵漢闕。記金坡劍履。折檻家風。清淺蓬萊。仙槎換了漁篷。栖栖五湖心事。放虛舟。伴老雲東。正淒悄。見斜陽。天外數峯。

高陽臺 園夜寒尊與彊老清話待月溪堂有煙水蒼茫之感明日賦此索和

連榻聽松。過門看竹。相期放迹林巒。一臥滄江。秋光幾換顏顏。淒淒夜雨黃花淚。更爲誰、彈滿西闌。恁銷沈、玉海珊瑚。不挂漁竿。曾傳交讓池邊樹。有吳僑並宅。偕隱高閒。片席鷗波。應通鶴夢清寒。歸雲已是忘機地。漫醉拋、屋裏青山。最知心、斜月窺

尊長送君還。

滿庭芳

新治西寮歲晚。敍意輒題一解。時戊申十月。

鄰寺霜鐘。故城煙柳。曠如家住江村。半谿黃葉。老樹自知門。胥宇還來舊燕。花落後、爲補巢痕。閒情有。白鷗留客。呼取隔籬尊。樓臺誰是主。夢中槐蟻。總付秋魂。算扁舟身世。猶繫吳根。向晚青山更好。人外想、林屋風存。生涯託幽居水竹。漁釣長兒孫。

月下笛

寒夜聞牀下蟋蟀感憶

落葉閒階。秋聲徇了。爲誰吟苦。霜蟾挂戶。漏籤遲。帶愁度。王孫已是無魂斷。更何意、淒涼自語。正機絲淚織。轆轤腸轉。耿耿殘曙。凝竚尋秋處。記鬪草金籠。舊家兒女。閒情換日。歲寒時事如許。蟲天萬感。沈沈夜。忍重聽。空簾暗雨。漫招悵。說與燈前事。夢也無據。

迷神引

看月開簾。驚飛雨。萬葉戰秋紅。苦霜飄雁落。繞滄波路。一聲聲。催笳管。替人語。銀燭

金鑪夜夢何處。到此無聊地。旅魂阻。睠想神京。縹緲非煙霧。對舊河山。新歌舞。好天良夕。怪輕換華年柱。塞庭寒。江關暗。斷鐘鼓。寂寞衰燈側。空淚注。蒼苔雲端隔。寄愁去。

安公子

急雨驚鳴瓦。轉檐風葉紛如灑。閉戶青山飛不去。對滄洲屏畫。換眼底。衰紅敗翠供愁寫。窺冷檠。半落吟邊燧。正酒醒無寐。悵悵京書題罷。到此沈沈夜。爲誰清淚如鉛瀉。夢想銅駝。歌哭地。送西園車馬。歎去後。闌干一霎花開謝。空怨啼。望帝春魂化。算歲寒南鶴。解道堯年舊話。

木蘭花慢 己酉閏春園梅盛開時彊村翁以特徵不起高臥空齋因置酒招之極意吟賞有林下相從之樂賦以見志

閉門春不管。又何處。放春來。自臥雪西園。垂垂江樹。空老莓苔。徘徊。冷香水驛。甚長安。花事等閒催。欲把一枝寄與。好風吹向誰開。安排澗曲林隈。尋蠟屐。薦吟杯。歎

舊家紅萼。幾番羌管。搖落池臺。高懷歲寒共守。勝看人、調鼎費羹材。認取逋山斜月。莫教鶴夢輕猜。

御街行 送春

誰家故苑東風樹。樓閣花深護。慣將芳恨語流鶯。不惜花枝高處。那堪一夜。人間春夢。百轉留難住。夕陽流水漂香去。殘淚紛如絮。畫闌十二可憐春。無奈借人歌舞。黃昏易散。沈沈簾影。一片西山雨。

蝶戀花

春雨晚來過一陣。送了清明。有限花番信。又是傷春天氣近。陰晴半日都難定。見說好春新值閏。如夢如醒。依舊年時病。人事音書誰與問。遊絲舞絮空添恨。幾日層城春漏洩。小檻調鶯。宛轉新柔舌。好夢不堪春後說。空林猶有啼鶉血。蘭麝罷熏山枕熱。酒醒闌干。滿面楊花雪。羌管有情吹不徹。亂雲過影中庭月。花月一春供幾醉。染柳熏梅。費盡鉛華水。簾幕塵塵如夢裏。爲誰斷送傷心地。不

信東風能換世。過半韶光。招悵無多事。題淚花枝難遠寄。燕鶯空訴留春計。落盡江梅春已半。浪蕊狂花。不到傷春眼。一夜金鈴消息斷。只供蜂蝶喧塵亂。陌上馬蹄梁上燕。解惜香泥。已是韶紅變。斜日簾櫳人不見。藤蕪雪老誰家苑。

高陽臺 己酉重午西園飲席感懷

梅雨團金。蘭風灑翠。吟觴又汎香蒲。鬪草闌干。餘薰更滌芳裙。宮魂枉續長生縷。誤舊情、臂約紅疏。感年光明鏡波心。不鑄顏朱。汨羅一片傷心碧。作中流、簫鼓遺恨江魚。清些難招。沈哀欲變吳歎。江潭自古蛟龍惡。但怨魂、綠老汀菰。鎮銷凝、節物淒涼。午醉誰扶。

鷓鴣天 見舊家樓上燕巢感憶

寂寞梁塵翠網縈。隔花曾聽下簾聲。綢繆去補誰家屋。飄泊今憐故主情。泥墮處。舊聞箏。春風秋月總堪驚。謝堂只是尋常見。未信巢林誤此生。

采桑子

竹聲到枕涼如許。翠溼紗幮。香斷燈孤。冰簟銀牀一夜疏。曉來獨步穿花去。羅袂沾濡。滿把明珠。始覺前谿過雨初。雨簾不捲初疑夜。夢地模糊。竹醉花扶。過枕茶聲午睡餘。故人久斷江干信。借問庭梧。秋意何如。一日西風一日疏。

竹馬子 秋江離席

尋橋柳、荒溼城蕪古苑。去波孤艇。見帆明渚鳥。燈昏驛樹。嵐光催暝。陡覺畫角生哀。秋聲在水際空離景。對此戀前遊。繞迴闌憑斷。斜陽紅冷。萬感成幽阻。良辰易失。賞心難併。天涯頓雪雙鬢。愁入西風淒哽。但憶舊扇歌塵。小屏詩夢。人隔瀟湘迴。尊前雁落。滿目關山影。

陽臺路 送客晚歸城西陂攬景成詠

暮山遠。見倒空翠溼。雲開萍面。蕩荒灣。雨氣衰荷。秋在水燈紅颭。愁殺渡江人。醉裏解攜。夢隨波轉。離聲斷。又暗催。湘絃鴻陣零亂。獨繞橫橋歸路。澹一水、漂花舊苑。



片帆風影。尙映帶、凭高闌檻。銷魂又、寒林墮月。寂寞小城西畔。空簾捲。亂蟲天。如聞  
哀歎。

八聲甘州 江皋野宴重別龍馬里叟

度高城。夕吹抵陽關。一聲九迴腸。正霜隄衰柳。煙汀墮蕙。夢落蒼茫。到此登臨送遠。  
攬景惜離觴。滿眼滄波淚。流盡三湘。同是江湖蓬轉。奈庾愁染鬢。空點吳霜。羨秋  
篷歸釣。猶及著芙蓉。想芳洲、蘋花自采。但寄情、鷗鷺莫相忘。空凝佇。楚天孤雁。寂歷  
南翔。

蝶戀花 己酉中秋夜雨

好月一年能幾見。待得圓時。抵死雲遮徧。可惜良宵天不管。酒燈暗雨深深院。梧  
葉灑階愁萬點。不聽清歌。已是無腸斷。舊節惟酬雙淚眼。西闌一夜秋聲滿。  
長憶紅樓離夜語。月滿芳尊。賞月人徧去。自見月圓無此苦。年年情恨天難補。欲  
喚姮娥憑說與。淚溼花枝。故作黃昏雨。後夜相看腸斷處。一彎又被愁眉妒。

蘭陵王 題北齊蘭陵王墓碑

慶湖遺老集有題此碑詩五言。附考云。墓在滏陽西南十里。道占其東。夏潦所湊。壠已半圯。碑字大兼寸。隸法有古氣。而不著書人。文乃盧思道也。是知碑在宋時已堙翳於犁田行潦間。宜自來金石著錄家所未見。近人南匯沈氏僅得一殘拓。趙攜叔據以入寰宇訪碑補錄。以標手失敝。并年月及所出地未之詳審。蓋道光間碑始發見其半。墨本絕少。其墓在今磁州城南。與高翻碑相近。迨光緒中葉。好事者因拓翻志。搜討及之。乃獲傳世。豐碑屹然。文字奇古。余藏有精拓完本。碑陰首刻王第五弟太尉安德王經墓興感詩五言。書體勁茂。詩有激楚之音。所謂獨有魚山樹。鬱鬱向西傾。其義卽隱寓失取關西之遺恨。長恭以芒山之捷。功高震主。卒以煇薨。讀其飲藥呼天。嗚啞對鄭妃之言。吁可哀也已。歿後。鄭以頸珠施佛。廣陵王使贖之。延宗手書以諫。而淚滿紙。證以此詩。望碑墮淚之辭。其忼慨悲歌。篤於同氣。亦足多也。今

詞有越調蘭陵王。凡三段二十四拍。卽長恭著假面與周師戰於金墉。武士共歌謠之。爲入陣曲者。此其遺聲也。毛升謂紹興初。都下盛行清真詠柳蘭陵王慢。西樓南瓦皆歌之。凡三換頭。至末段聲尤激越。惟教坊老笛師能倚之以節歌者。余因和周詞。卽以詠題蘭陵王碑。爲東山繼聲。亦一雅故也。

壠楸直。西向魚山更碧。殘陽外。衰草亂鴉。猶作蒼茫陣雲色。歸魂念報國。空識青蠅弔客。英雄淚。長使滿襟。花落荒丘委三尺。豐碑感陳迹。贖蘚墨留銘。樵采分席。城南空見烏爭食。嗟百戰身世。一坏榛莽。邯鄲今古夢裏驛。眺風雨原北。哀惻古懷積。但樂府聲流。旋凱歌寂。啼鴿夜月悲何極。更玉樹同壤。紫庭孤笛。千秋華表有墜露。帶恨滴。

瑞鶴仙

桂叢香到枕。漸透簾。蛩語涼煙催暝。林容早霜近。悄江天過雁。庭階紅冷。重門夜迴。鎖秋聲。詩愁萬頃。更冥冥。滿地歌塵。拍徧畫闌誰應。還聽。頽檐飛雨。亂葉昏燈。替

人幽哽。羈魂未醒。奈猶是。去年病。歎人間有限。淒涼風物。偏與多情管領。莫吟殘、鏡裏花枝。夢來照影。

拜星月慢 秋夜聞笛和清真

潤逼煙紗。涼添山枕。待月簾陰竹暗。笛語飄來。隔燈痕鄰院。悵流景。漸覺銀牀玉簟。疏冷。露葉霜花明爛。照水秋魂。繞空廊誰見。鏡屏中。尙識吳娘面。無人唱。暮雨清尊畔。莫問翠冶紅驕。總行雲催散。燕重來。寂寞西風館。年華淚。錦瑟聞長歎。但夢地。百轉。飄輪。觸回腸欲斷。

踢莎行

曳柳蟬疏。黏莎螢小。過雲流響初鴻到。上燈花影隔窗深。下簾月氣侵階悄。琴思吟銷。茶香夢裏。露牀滴翠凝清篠。年光有味是新涼。不堪獨夜悲秋早。

六醜 芙蓉謝後作

又年芳催老。悄立徧闌干危碧。怨花後期。無言花暗泣。黠地誰惜。更灑黃昏雨。水環

風佩數斷紅消息。羅裳自染秋江色。繡帳纔遮。珠茵旋積。盈盈怎堪搴摘。只輕朱薄粉。愁上簪幘。西園霜夕。照清池宴席。步綺凌波地。成往迹。尊前換盡吟客。縱仙城夢見。玉顏非昔。釵鈿墜。似曾相識。終不向、一鏡東風媚晚。鬢邊狼藉。飄零恨、獨在江國。怕舊題、錦段重重淚。無人贈得。

彩雲歸 九日城東亭登高

危亭鎖翠倚崇岡。帶虛嵐、故國斜陽。看冷楓暮色餘霞散。波路迴、暝入秋鄉。更堪催小城寒信。到西風雁行。向此念、舊遊天遠。立盡昏黃。茫茫登臨百感。鎮銷凝、海漲塵荒。昨宵酒醒何處。殘笛又繞空梁。甚百年、悲秋未了。只恁風物淒涼。傷心是、簪到黃花。綠鬢先霜。

雪梅香 亭皋見月曠然起故園之思

雨初歇。憑高極目送荒寒。攬征蓬千里。煙光澹著愁顏。秋盡林皋。到殘月、夜明樓閣。起虛瀾。雁聲落。笛裏人家。猶夢關山。無端。換離景。一片傷心。畫出應難。水闊天低。

望中故國雲還亂。葉從風訴飄泊。晚花凝露淚闌干。歸來後、滿鏡清霜。腸斷誰看。

蹋莎行

樹老知門。山寒近屋。一年風物供吟足。秋聲到地總無名。和愁題上闌干曲。夢換紗櫺。吟殘畫燭。空階雨斷蛩聲續。霜前籬菊爲誰黃。人閒秋鬢無重綠。

夜半樂 秋盡夜聞雨有懷

暝寒中酒情味。江天漠漠。秋盡仍連雨。繞舊綠闌干。覓愁無處。砌蛩乍咽。城烏旋起。滿廊黃葉飄零。散風還聚。背暗燭。敲簾作人語。

夜窗又到雁陣。獨掩低幃。更添沈炷。霜堞隱、羌笳淒淒危曙。淚凝叢菊。魂縈蔓草。幾回夢裏登臨。亂山歧路。渺京國、蒼茫見煙霧。此際追感。少日狂遊。舊家歌舞。念俊約經時動離阻。恁蕭條、空歎雪滿梁園賦。驚歲事、一臥滄江暮。畫樓天遠孤雲去。

慶春宮 冬緒鞞吟

紅葉家林。蒼煙鄰寺。歲殘未了秋聲。門柳鴉寒。庭莎蛩老。浸霜月氣冥冥。夜窗燈暈。

鎮搖落山川舊情。傷心年事。何限繁華。不抵飄零。追思結客幽并。連騎雲驕。看劍星橫。誰分蕭條。哀時詞賦。過江無淚堪傾。暮鴻天遠。奈重拍燕歌。自驚。一生怙悵。拚與江南。空老蘭成。

雪梅香 夢半塘老人

影淒寂。虛梁落月。暗驚逢。悵孤鴻天外。哀絃響絕秋空。遺世高情。謝猿鶴。過江餘淚。送蛟龍。敘愁闊。少別千年。猶是怱怱。幽蹤曠延佇。薜雨蘿煙。夜嘯誰同。送客衰蘭。漫悲舊曲。回風。故國傷心。渺天北。暮雲何意。戀江東。沈沈恨。一枕關山。魂繞青楓。

念奴嬌 己酉除夕

夜闌酒醒。縱天涯有夢。無家歸得。三十年來。怙悵地。最是銷魂今夕。舊瀝梅灰。新籠竹火。節物供愁色。寒窗燈在。隔年紅淚猶滴。誰分有限生涯。傷心餘事。作江南詞客。只道東風能換世。腸斷故園消息。蠻雪零箋。燕塵衰帽。觸緒增悽寂。朝來看鏡。對花空笑頭白。

石州慢 水邊籬落忽見橫枝病起尋春感時悽異

竹外橫斜。猶是去年春在江國。垂垂雲老煙疏。一樹暗催頭白。西崦舊賞。總誤天際輕陰。山橋誰倚傷心碧。悵悵又黃昏。但詩痕愁覓。追憶故宮春夢。點額人歸。墜鈿消息。空有翠禽啼恨。花間曾識。瓊枝未寄。那更連雨淒寒。飄零不待南樓笛。繞樹再來看。怨東風無力。

念奴嬌 友人見示江南春圖兼寄金陵懷古之什感事因題

酒旗風影。漾迴波。不斷春愁千斛。中有過江名士淚。銷得新亭一掬。老子婆婆。英雄割據。莫舉傷高目。江南春好。送人惟有哀曲。誰念玉塵風流。虛玄談未了。神州沈陸。空弔金城衰柳色。依舊江潭淒綠。故國鶻聲。荒山龍氣。終古蒼黃局。歌塵如夢。野花開徧陵谷。

祭天神 題歸鶴圖爲彊村翁作

歎歲寒殘雪誰堪語。換蒼苔、舊步荒江橋上路。西園夢後重尋。牘有閒鷗侶。奈滄江、



照影依依階前舞。寂寞送孤雲去。漫追惜、仙客歸來誤。江山在、人物改、一霎成今古。念茫茫、蟲沙陳迹。天海風聲。獨立斜陽自斷凌霄羽。

滿庭芳 庚戌除夜聽雨守歲有懷京師風物之盛荏苒三十餘年無一到眼  
天時人事有足悲者今夕何夕不覺老懷之根觸也

街鼓新雷。衣篝香霧。歲華銷盡愁邊。小城梅訊。春思破蠻箋。更聽疏林過雨。寒宵伴、孤鶴無眠。空贏得、屠蘇飲分一醉。老來便。悽然催向曉。綠窗兒女。還擁燈前。怕新披曆日。驚換星躔。長記神京瑞景。何時再。雲物瞻天。今休說。松風閉戶。猶有著書年。

陽春曲 憶梅西崦

晚來風。朝來雨。心事問春誰託。一塢雪垂垂。西崦路。夢地經慣被花覺。暝寒猶惡。看未足。野橋疏萼。須信舊識青山勝。傷春等閒籬落。記歌繞珍叢。行雲暮。曾倚竹。空憐翠薄。而今遺芳獨坐。怨書期。訴與遼鶴。扁舟奈有素約。怕笛裏。江城蕭索。待扶醉。滿把東風影。沈沈夜酌。

又 春江題夢

綺羅叢芳菲節。春到夢中鄉國。凝澹畫樓人。行雲斷、翠袖重倚暮寒惻。幾年相憶。曾醉蹋鳳城燈夕。誰念繫月黏花仗。東風總愁無力。悵流水鈿車繁華地。空冷落、珠塵綺席。天涯傷春不見。翦梅枝、怨寄遙驛。憑闌對此歎息。更淚盡、離亭殘笛。看歸雁、更帶冥冥雨。西山自碧。

浣溪沙 春雨渡江有憶

一雨春江徧綠莎。去帆風疾晚生波。亂流欲渡奈愁河。長是人情不如鳥。青禽填海鵲填河。縱成遺恨也情多。

又 聞雨憶山中春事

舊泊湖亭唱蹋莎。暗香添酒淚添波。兩山愁損鏡中螺。莫待登臨傷往事。更無哀樂費清歌。一年風雨爲春多。

卜算子 辛亥歲始春故人治舟相約觀梅於鄧尉諸山雨雪載塗余以畏寒

不出因憶山中討春舊遊次韻白石道人梅花八詠以示同志一丘一壑自謂過之若所作則儻歌無復雅句也

低唱暗香人。舊識凌波路。行盡江南夢裏春。老興天慳與。橋上弄珠來。煙水空寒處。萬頃頗黎爛玉盤。月好無人賦。虎山橋跨湖通東西兩崦林壑尤美常年看花舊泊地也憶乙巳元夕攜侍兒可可吹笛橋上波月連珠如鏡中遊光景奇絕

瑤步起仙塵。鈿額添宮樣。一閉松風水月中。寂寞空山賞。詩版舊題香。盛蹟成追想。花下曾聞玉輦過。夜夜青禽唱。玄墓山聖恩寺爲南巡舊頓四宜堂有仁廟書松風水月今石刻猶在又還元閣上詩版刻沈歸愚宋牧仲諸名公鄧尉探梅唱和之作

數點歲寒心。百尺蒼雲覆。落盡高花有好枝。玉骨如詩瘦。臥影近池看。露坐移尊就。竹外何人倚暮寒。香雪和衣透。柏因社在五峯西麓鄧司徒廟四古柏舊與陽山龍母祠晉柏西山福源寺梁松並稱奇蹟花蔭老樹下古雪布覆人影皆碧

枝亞野橋斜。香暗巖扉迴。瘦出花南幾尺山。一塢蒼苔靜。夢老石生芝。開眼皆奇景。大好青山玉樹埋。明月前身影。青芝塢面西曠。一小丘升陟。不十步而盡攬西南諸峯之秀於看梅。尤宜嘗欲營墓田於此。舊題有眠雲無地青芝老。虛被樵漁識姓名之句。念此慨然。

一權過湖西。曾載雙崦雪。踢葉尋花到幾峯。古寺詩聲徹。林臥共僧吟。樹老無花折。何必桃源別有春。心境成孤絕。安山東有坳里相傳古寺中。多南宋時老梅香色奇豔。壬午春從虎山橋趁魚艇過湖五六里。直西入曲港。水盡便得一山。因訪詩僧泯高。莎坐鼓琴。緗英藉地。琅然如扣哀玉。極山澤幽渺之思。又湖陰連山皆桂叢。翠陰蔽虧。亦一絕境。惜茲遊之不能再也。

刻翠竹聲寒。掃綠苔文細。四壁花藏一寺山。香國閒中味。對鏡兩蛾顰。想像西施醉。欲喚鴟夷載拍浮。可解傷春意。蟠螭山築立湖中。四絕孤秀有石壁。大可數畝。天作畫屏。兩山橫黛。宛然西子窺鏡。一顰山上有望湖臺。營借中實子復乘月臥石上題墨。

殆徧余年例看梅信宿此山舊句多在吟口

雲疊玉棱棱。琴筑流澌咽。漫把南枝贈北人。隴上傷今別。秀麓夢重尋。泉石空高

潔。臺上看誰臥雪來。獨共寒香說。彈山近湖陰。亂石疊翠爲萬峯。臺明趙宦光大書石

樓二字刻其上。傾崖架空雲濤四盪。山坳修竹疏挺。石泉澗然。最爲勝處。時僉子恪士

山中看花還將有提學隴西之役。因寄慨於江南一枝

初月散林煙。近水明籬落。昨夜東風犯雪來。夢地春拋卻。最負五湖心。不爲風波

惡。笑看青山也白頭。一醉花應覺。白浮近法華漁洋兩山。余愛其名。嘗以花時從石壁

寺門前衝雪泛舟。升眺七十二峯。如浮杯在几案。故韻未及之。山舊多梅林。環西麓。皆

水田。使盡其四肢之敏。從事一山。可以卒歲。余初南遊。便欲買此山。棲遯懷之。有年。高

蹈終違。勿勿不知老之將至已

念奴嬌 曩與同社張兄子復觀梅玄墓山中。嘗次韻白石是闕。爲山僧覺阿

題梅花庵圖。遊客輒見而和之。今春彊村映菴諸子過此山樓。見舊題感歎

不置亦連句屬。和余既衰嬾未預。斯遊誦其詞。不禁傷春懷舊。交慨於心。因復悵然繼作。

夜寒鶴夢。正沈沈雲海。猶呼愁侶。自見傷春花濺淚。此恨都無年數。笛步波遙。詩痕雪在。曾臥山樓雨。苔闌如繡。勝看紗影籠句。長憶一別文園。蜀絃腸斷。空送孤雲去。欲寄隴頭春不到。綠徧行吟煙浦。古寺遺芳。小橋疏影。留伴樵風住。遊塵重省。亂花多少歧路。

瑞鶴仙 落梅

虎山橋下水。問幾時銷盡傷春清淚。花前舊吟袂。繞闌干如夢。東風還是相思未寄。薦青尊、高寒自倚。恁飄零、畫角聲中。忍見送春桃李。何意煙橫雪亂。數點芳心。爲誰顛顛。苔茵漫綴。無人見。斷魂地。歎垂垂一樹。江南遺恨。不到靈均楚佩。但黃昏、寫照空池。兩三瘦蕊。

摸魚子 小城晚眺

壓危闌、亂山空翠。盡成衣上雲霧。壞宮芳草尋常見。不用凭高懷古。回首處。渺一髮  
中原。挂在斜陽樹。傷春更苦。想瓊島花飛。玉樓簾捲。天半起簫鼓。蒼茫裏。時有東  
風雁度。沈沈遼海歸路。已憐柳色悽羌笛。猶報玉關春阻。江上暮。又落絮吹愁。散作  
千家雨。吳魂自語。但滿地驚波。兩三點雪。棲老舊鷗鷺。

念奴嬌 秋雨連江哀時書事

舊家樓閣。賸斜陽一綫。沈沈簾影。海上忽聞風雨至。平地奔濤千頃。大澤鴻哀。荒塗  
龍戰。身世滄洲迴。塵中回首。五湖何處煙艇。因念蜀客船迴。高江急峽。淚溼聽猿  
枕。不待山川搖落後。秋氣都成悲境。衰草連雲。驚煙到海。灑袂西風冷。飛輪腸轉。夜  
闌殘夢誰醒。

早梅芳近 辛亥中秋後三日澹菴招同彊村汎舟越來谿尋石湖居士故蹟

自橫塘載月而歸

水蒨疏。霜葉冷。一塔招提境。歌鈿塵斷。畫舸波閒。見明鏡。故橋鷗鷺迹。壞壁龍蛇影。

宋孝宗書石湖兩大字今猶在巖西壁。看雲歸鳥沒。客思正孤迴。緩清觴。攬素景。秋倦登臨興。侵谿漁火。蹋月菱謳半煙暝。淚添波入酒。夢破山橫枕。漫重來。載愁湖上艇。

臨江仙引 九日有懷瞻園時方辟兵海上用耆卿仙呂宮賦此

暝蹋小城路。亂鴉策策。班馬蕭蕭。暮塵起。時聞鼓角荒譙。漂搖對江樹冷。墟煙悄。落日漁樵。傷心地。正萬方多難。潦倒登高。魂銷。衰蘭委佩。回首清些難招。念東門蕪廢。北渚萍飄。蕭條。歎茱萸會。風波阻。去國迢迢。悲秋淚。換滿江。鄰淥。胸塊誰澆。

慶春宮 同羈夜集秋晚敍意

霜月流階。蕪煙銜苑。戍笳愁度嚴城。殘雁關山。寒蛩庭戶。斷腸今夜同聽。繞闌危步。萬葉戰。風濤自驚。悲秋身世。翻羨垂楊。猶解先零。行歌去國。心情寶劍。淒涼淚燭。縱橫臨老中原。驚塵滿目。朔風都作邊聲。夢沈雲海。奈寂寞。魚龍未醒。傷心詞客。如此江南。哀斷無名。



水龍吟 送秋

故園從此無花。可憐秋盡誰家苑。連城江氣，傷心一白，飛蓬夢遠。鶴老雲孤，蟲悽天瘦，歲寒空戀。怪西風容易，者般搖落，爭留待、東風轉。不信江南腸斷。放哀歌、楚聲先變。山川猶是，英雄安在，登臨恨晚。野戍殘燐，江烽危照，蒼茫望眼。但愁波到海，何人借與，快并刀翦。

又 昔東坡謂淵明先生讀史述九章夷齊箕子蓋有感而云余考其蜡日篇發端於風雪餘運終託之章山奇歌其詩皆當在元熙禪代時作時先生年已五十有六遂以江濱佚老遯世自絕其志可哀也已何意去此千五百餘年舊國之感異代同悲患難餘生行年差合今之視昔身世共之而變端之來心存目替其愴悅殆有甚焉輒擬東坡取陶詩入詞遺意作越調水龍吟歌之

我懷栗里高風。醉來無復逃名地。黃農宇宙，荒唐一夢，人閒何世。八表同昏，孤雲自

遠茫茫天意。歎滄江白髮。酒醒甚處。空回首。山河異。直道傷心往事。百年中、眼看能幾。如何轉燭。支離南北。餘生至此。落木悲秋。殘尊送臘。感時危涕。念故山薇老。誰歌采采。向斜陽裏。

永遇樂 春夜夢落梅感憶因題

江驛迢迢。片時枕上。春事如許。亂插晴霄。低橫野水。悽斷東風主。枝南枝北。眼看搖落。不爲翠禽啼住。攬遺芳。瓊瑰滿抱。覺來頓成今古。虛堂酒醒。傾城消息。誤盡故山風雨。玉砌雕闌。傷心還見。繫馬郊園樹。人閒空有。曉寒一曲。誰信隔紗煙語。任淒涼、南樓夜笛。送春舊處。

水龍吟 人日尋梅吳小城有懷關隴舊遊

故宮何處斜陽。只今一片銷魂土。蒼黃望斷。虛巖靈氣。亂雲寒樹。對此茫茫。何曾西子。能傾一顧。但水漂花出。無人見也。回闌繞。空懷古。別有傷心高處。折梅枝。怨春無主。隴頭人在。定悲搖落。驛塵猶阻。報答東風。待催羌笛。關山飛度。甚西江舊月。夜

深還過爲予清苦。

楊柳枝 賦小城梅枝

誰家笛裏返生香。傾國風流解斷腸。頭白傷春無限思。不應此樹管興亡。  
到地春風不肯閒。南枝吹盡北枝殘。吳宮多少傷心色。占得牆東幾尺山。  
采香徑裏晚煙空。濯粉池邊曉露叢。一樣故宮春寂寞。可憐無地看東風。  
縞衣月下見前身。隔世驚逢絕世人。怱悵谿南數枝雪。爲誰開落與江春。  
輕朱薄粉試妝新。漫比西施鏡裏春。可惜君王殘霸業。只教換得兩蛾顰。  
江樹猶傷舊國春。肯因冷澹與時新。風來誰撼千林雪。一洗人間桃李塵。  
萬枝寒玉照谿橋。鶴語今年雪未銷。自占東風故城曲。淒涼煙月屬前朝。  
一點芳心作意酸。預知年事有彫殘。只應從此無花著。勝與松筠守歲寒。

虞美人

題燕池落花圖池在京西丹棱泔舊名西湖發源玉泉山度圓明園

宮牆東流入清河水經注所謂薊縣西湖綠水澱淡燕之舊池者也

西園舊是滄波苑。幾度臨花宴。蓬萊宮闕總生塵。猶有一湖春色、解留人。當年湖  
上遊仙迹。換得傷心碧。麝塵蠹粉滿亭池。悵悵倚簾人去、未多時。  
斷紅一片宮溝水。春皺波難起。夜聞風雨葬傾城。須信人閒天上、等飄零。雕輪寶  
馬城西路。轉燭空煙霧。流鶯休覓上陽花。已是綠陰芳草、徧人家。  
樓臺返照空明鏡。更落西山影。狂香野粉滿天愁。斷送東風、一翦水西流。朝朝洗  
面燕支淚。染作丹稜水。淒涼還問畫中人。誰分故園、從此見殘春。

右茗雅舊稿四卷。始壬寅。訖辛亥。凡一百七十三首。刪存一百十首。

禮邨語業

運筆



朱祖謀（咸豐七——民國二〇）

字古微。後改名孝臧。號滙尹。又號彊村。浙江歸安人。光緒癸未二甲一名進士。歷充國史館協修會典館總纂。累遷至禮部侍郎兼署吏部侍郎。出爲廣東學政。早歲工詩。及交王鵬運。乃專力於詞。抗古邁絕。海內稱宗匠焉。嘗輯刻唐宋金元詞爲彊村叢書。其自著者俱見彊村遺書中。

序

語業二卷。彊村先生晚年所定也。曩者半塘翁固嘗目先生詞似夢窗。夫詞家之有夢窗。亦猶詩家之有玉溪。玉溪以瑰邁高材。崎嶇於鉤黨門戶。所爲篇什。幽憶怨斷。世或小之爲閨襜之言。顧其他詩。如何匡國分。不與素心期。又曰。夕陽無限好。祇是近黃昏。豈與夫豐豔曼睪競麗者。竊以爲感物之情。古今不易。第讀之者弗之知爾。先生早侍承明。壯躋懋列。庚子先撥之始。折檻一疏。直聲震天下。旣不得當。一抒之於詞。解佩纒以結言。欲自適而不可。靈均懷服之思。昊天不平。我王不寧。嘉父究誥之愾。其哀感頑豔。子夜吳趨。其芬芳悱惻。哀蟬落葉。玉溪官不掛朝籍。先生顯矣。觸緒造端。湛冥過之。信乎所愛者廣。發乎一人之本身。抑聲之所被者有藉之者耶。復堂老人評水雲詞曰。咸同兵事。天挺此才。爲聲家老杜。余亦謂當崇陵末葉。廟堂厝薪。玄黃水火。天生先生。將使之爲曲中玉溪耶。迨至王風委草。小雅寢聲。江濱飛遜。臥龍無首。長圖大念。隱心已矣。懂留此未斷樵風。與神皋寒吹。響答終古嚮之瘖口。

嚙音。沈泣飲章。腐心白馬者。且隨艱難天步以俱去。玉溪未遭之境。先生親遘之矣。我樂也。其無知乎。我寐也。其無叱乎。是又諷先生詞者。微吟焉。低徊獨抱焉。而不能自己也。甲子嘉平月。遯堪居士張爾田引。

跋

右彊村語業三卷。前二卷爲先生所自刻。而卷三則先生卒後據手稿寫定補刊者也。先生始以光緒乙巳。從半塘翁愔。刪存所自爲詞三卷。而以己亥以前作爲前集。曾見庚子秋詞春蟄吟者爲別集附焉。後又增刻一卷。而汰去前集別集。卽世傳彊村詞四卷本是也。晚年復并各集。釐訂爲語業二卷。嗣是不復多作。嘗戲語沐勛。身丁末季。理屈詞窮。使天假之年。庶幾足成一卷。而竟不及待矣。傷哉。先生臨卒之前二日。呼沐勛至榻前。執手嗚咽。以遺稿見授。曰。使吾疾有閒。猶思細定。其矜慎不苟如此。茲所編次。一以定稿爲準。其散見別本。或出傳鈔者。不敢妄有增益。慮乖遺志也。壬申初夏。龍沐勛謹跋。



# 彊村語業

歸安朱孝臧古微

長亭怨慢 葦灣重到紅香頓稀和半塘老人

儘消盡涉江情緒。風露年年。國西門路。紺海涼雲。昨宵飛浣石亭暑。亂蟬高柳。淒咽斷。寶洲譜。莫唱惜紅衣。算一例、飄零如雨。遲暮。隔微波不恨。恨別舊家鷗侶。青墩夢斷。枉贏得、去留無據。試巡徧、往日闌干總無著。鴛鴦眠處。賸翠蓋亭亭。消受斜陽如許。

鷓鴣天

夢裏雲屏度幾重。蘭期猶煖舊懽叢。燈飄繡扇花如睡。歌咽金船酒不釀。春寂寂。恨怱怱。鳳城涼信又歸鴻。緘情欲託天邊月。知道高樓雨是風。

暗香 秋宵倚闌月華如水記去年留滯江上蓮史餞我於託鵠水榭正此日也傷離念遠不能無言

素天煙邈。點去鴻兩兩。碧雲樓角。夢約不來。一翦微波渺難託。傷別傷秋未算。還點鬢新霜經著。漸逗入、隔歲相思。花底歇深酌。誰覺背虛幕。正不耐夜吟。玉繩低絡。五湖計錯。鄉國鬻花漸非昨。何況空江畫槳。悽盪損、蕭娘眉萼。待寄語、江上水。月華又落。

祝英臺近

燭花涼。鑪穗重。妝面半簾記。羅扇恩疏。消得錦機字。絕憐寬褪春衫。窄偎秋被。楚雲重。夢扶不起。酒邊事。因甚一夕離悰。潘鬢竟星矣。相憶無憑。相憐又無計。願將心化圓冰。層層摺摺。照伊到、畫屏山底。

水龍吟 四印齋賦白芍藥分得肯字

寶闌春去多時。玉奴猶倚東風困。濃姿淚洗。伶俚不許。雨酥煙暈。素靨消塵。冰綃委佩。強支嬌俊。自謝郎去後。銀毫蘸淺。瑤臺路。無人問。相謔湔裙未肯。伴醪醑。殿將芳訊。西園後日。薦紅無數。漸吹成粉。何況飛瓊。將離歌罷。素鸞無信。向月明空見。一

枝凝露。惱新霜鬢。

解連環 七月十四日坐雨有作

雨涼無極。傍西池漸浥。畫屏猩色。悵倦旅。呼酒闌干。數不斷。唳鴻遠天如墨。亂葉流紅。暮鷺散。鴛鴦蹤迹。對飄煙暗燭。卷畫古簾。悄然鄉國。綠窗已拚怨抑。又天涯樹。樹哀響攙入。便有約。重夢香叢。怕前地。漂花總凝愁碧。打盡枯荷。幾曾減。秋塘波力。但贏得。鏡稜淚點。斷雲共滴。

鷓鴣天 九日豐宜門外過裴村別業

野水斜橋又一時。愁心空訴故鷗知。淒迷南郭垂鞭過。清苦西峯側帽窺。新雪涕。舊絃詩。惜惜門館蝶來稀。紅萸白菊渾無恙。只是風前有所思。

齊天樂 馬神廟海棠白年物也花時寥寂半塘翁吟憶見貽依韻報之

錦窠春溼紅雲透。恁恁故宮芳事。冷甃延嬌。溫泉罷浴。催換東風人世。嬋媛夢裏。尙刻意新妝。洗煙梳霽。妒極瑤臺。玉妃無語正愁悴。綠章惆悵再乞。夜深障黠蠟。心

緒無會。怨鳳簫寒。螿蟾幄暗。消盡燕脂濃淚。橫陳豔綺。肯輸與西廊。媚春桃李。不嫁含章。墮梅餘恨蕊。

烏夜啼 同瞻園登戒壇千佛閣

春雲深宿虛壇。磬初殘。步繞松陰、雙引出朱闌。吹不斷。黃一線。是桑乾。又是夕陽無語、下蒼山。

夢芙蓉

羅睺嶺爲趨戒壇潭柘分道處茗憩書壁用夢窗韻

溪霞明斷綺。帶東風客雁。笳將十里。鏡空春路。心緒淡蛾外。汎莫謀野醉。年年催載秋被。盼客山靈。惜愁鬢未整。鶯語亂呼起。轉首瑤臺眼底。疑有雙成。結束連環佩。舊塵如夢。還付亂雲洗。駐鞍消茗翠。斜陽冷透峯意。未怯春寒。知游仙路近。微步響風水。

繞佛閣

崇效寺楸花最盛往年徐芷帆養吾兄弟花時輒宴賞其下予季彥

偁閒亦一至養吾下世眎已五年彥偁慕亦宿草矣芷帆作楸陰感舊圖徵

題屬筆泫然不止黃墟之悲也

紺煙斂霽。香外梵歇。頽照蕭寺。珠露飄蕊。慣催俊侶。年年貫春醉。畫闌再倚。誰料素約和恨難理。殘醪沾地。夜深定有秋魂暗驚起。蠹壁字零落。細數詞流空百輩。何況故人傷高當日淚。總冷透西風。鄰笛淒異。斷鴻知未。有一樣西堂。孤坐無睡。繞花陰。夢痕如水。

鶯啼序

龍樹寺餞別高理臣府丞張次珊參議用夢窗豐樂樓韻

輕陰傍樓易暝。帶春雲步綺。畫闌繞。凍柳初黃。暗結沈恨天際。細禽喚。年光冉冉。荒波盪晚。疑無霽。殢離人。腸斷斜陽。絮點飄墜。十載東華。對酒念往。信孤根自倚。鏡中路。窺熟西池。楚吟流怨紅翠。賦深情。蘭荃繡筆。淚花迸。銅仙鉛水。慣傷春。蝶悄鶯沈。夢醒何世。劉郎老去。咫尺蓬山。倦數舊游美。天外緊。東風一信。絳蕊顛倒。縹緲鵑聲。誤人歸事。銀河夜挽。珠宮晨叩。香牋飛出。迴鸞篆。悄冥冥。海闊星垂地。情絲怨極。長宵霧閣。雲窗頓拋亂紅。整緯。橫汾舊曲。采石新吟。料畫輪正遲。怕點檢。鑪薰

花外笛譜梅邊。酒醒觚棱。鳳城十二。東門帳飲。西臺車馬。江湖頭白。回望處。惜芳菲。須掩傷高袂。白鷗去矣。難馴。燕幕孤棲。蕩魂萬里。

菩薩蠻

西洲風緊驕禽唳。文梁乳燕棲無地。相望鬱金堂。氤氳心字香。芳牀山黛蹙。自轉商絃軸。郎意未分明。綠窗閒夢驚。

鯉魚風蹴波鱗起。黃姑夜叩星宮事。含笑斂冰梭。微霜新過河。鈿箏長短柱。掩抑聲無主。夢裏擲青梅。苑花交扇開。

花翻寶勒新豐騎。沈沈芳晝金鋪閉。山枕膩紅消。當筵鸞帕拋。錦機無氣力。密緒雙雙織。心事篆煙灰。春羅書字來。

茱萸錦束胡衫窄。乘肩倦態偎花立。迴扇喚風來。春窗朱鳥開。壓愁麟帶重。多謝行雲送。虬箭水聲微。飄燈人不歸。

蜂衙蝶館參差對。行軒四角流蘇綴。一霎謝橋風。蠻花委地紅。玉璫緘翠札。曲折

何緣達。商略解連環。人前出手難。

弱楊睥睨秦蘅老。馱金走馬長楸道。寶帶鷓鴣裘。東方居上頭。背珠錯落。脫手

翻阿鵲。際海發紅桑。腹心花箭香。

鬧紅滿鏡衝單舸。疊瀾不定銖衣鞞。新語約餐霞。恨無書報他。留仙裙襖薄。傾蓋

鴛鴦覺。錦字太無憑。閒愁攜手生。

昨宵解帶翻成結。侵晨翠幌當風怯。莫近水西闌。迴身羅袖單。琴心相爾汝。夢斷

秦臺侶。賤管發秋慵。鏡心閒淚紅。

### 蹋莎行

照水單衫。飄香小扇。晚涼愁倚闌干徧。冷鷗三兩不歸來。鏡心一夕紅衣變。經醉湖山。傷高心眼。秋來畫取蕪城怨。謝堂倦客總魂消。無人淚溼西飛燕。

### 河濱神

燭樹蠟煙微。花袍白馬來時。天吳移海綠塵飛。日夕靈風滿旗。溼霧冥冥斑竹院。

野鴉如陣迴旋。帝子不歸秋晚。單衾沈夢銅輦。

臨江仙

花底相思無處說。香殘獨燼依依。春寒分付與單棲。比愁量錦瑟。和恨卷羅衣。誰  
信謝娘香閣畔。天涯錦字淒迷。柳花風起亂鶯啼。莫將孤枕淚。尋夢月西時。

遐方怨

消粉盞。減香筒。屈膝銅鋪。爲君提攜團扇風。泣香殘露井邊桐。一秋辭輦意。袖羅紅。

琴調相思引

吹夢東風嬾似雲。占人懷抱是歌顰。雁行低盡零亂一箏塵。獨自意行僵寶瑟。兩  
邊閒淚閣羅巾。小簾朱戶依舊去年人。

玉樓春 分和小山韻同半塘伯崇

目成已是斜陽暮。誰分合懽花下住。心知明月有圓時。身似斷雲無定路。當時不  
合多情遇。風卷紅英隨水去。莫敲單枕故相尋。夢裏已無攜手處。



鶻聲鴉軋吳音似不寄吳娘機上字。只憑樓下去來潮。將取尊前新舊淚。浴蘭攜  
手年年事。消盡笙歌沈醉意。花時不是不傷春。說與春愁真解未。  
少年不作消春計。孤負酒旗歌板地。好天良夜杜鵑啼。今日逢春須著意。  
柳迴腸事。小雨闌花千點淚。等閒尋到眼前來。欲避春愁除是醉。斜陽煙

鬪雞回

驚飄吹幕。推枕瓊瑰滿。玉鏡窺雙蛾。淺諱說相思。帶羅寬一半。江郎恨極天涯重。  
見怕逢春晚。尺素書香羅薦。解得連環。半牀絃索亂。

唐多令 衰草和穗平

掃斷馬蹄痕。消凝油壁塵。翦紅心、霜訊催頻。一道玉鉤斜畔路。已無意、鬪羅裙。濃  
綠鎮迷人。蘭苕淒古春。換年年、冷戍荒屯。淚噴西風原上火。怕猶有、未招魂。

燕山亭 寄題鄭叔問薊門秋柳圖

消盡毵毵。斜照淡黃。一夜驚鴉無數。移恨漢南。舊日闌干。只有亂塵隨步。眠起無端。

便忘了。龍池煙雨。何苦。又按徹伊涼。換他金縷。身世愁寄孤根。是禁慣清霜。伴人  
羈旅。西風笛裏。滿眼關山。絲絲繫春不住。自怯宮腰。幾曾爲倚簾人妒。歸去。還夢繞  
一天風絮。

綺寮怨 爲半塘翁題春明感舊圖

笛裏呼杯人盡。凍醪和淚凝。對冷月、臥仰空梁。楓林黑、斷夢無憑。年時黃壚聚別。傷  
高眼、倦客相向青。怪瘴花、悴折朱絃。恩恩去夜。壑尋墜盟。最是故人茂陵。摩挲翠  
墨。情懷似醉還醒。細說飄零。有哀雁、兩三聲。天邊喚回遼鶴。教認取、舊春城。詩魂定  
驚。花陰甚處是、塵暗生。

醜奴兒慢 龍樹寺西樓對雪

低鴉數羽。飛破溼煙零亂。暗愁引年涯消與。凝白闌干。瘦倚筇枝。夢華城闕有無聞。  
瓊樓陰重。玉妃倦舞。還戀清寒。不見灞橋。酥融流水。玉照歸鞍。賸林表、黃昏山色。  
怨入秦鬢。笛裏天涯。縞衣將夢莫輕還。琅玕斜處。梅塵未洗。難理孤懽。

齊天樂 鴉

半天寒色黃昏後。平林漸添愁點。倦影偎煙，酸聲噤月。城北城南塵滿。長安歲晏。又啼入延秋。故家啄徧。問幾斜陽。玉顏悽訴舊團扇。南飛虛羨越鳥。亂烽明似炬。空外驚散。壞陣秋盤。虛舟暝蹋。何處衰楊堪戀。江關夢短。怕頭白年年。舊巢輕換。獨鶴歸無。後棲休恨晚。

瑞鶴仙 得梅生長安書卻寄

滿春衫淚汗。西雁到。客枕離魂輕度。城南舊章杜。料天涯一樣。看花如霧。秦箏漫譜。怕酒邊塵浣玉杵。問麻鞋萬里。孤拜杜鵑。誰識臣甫。月色今宵換盡。解憶長安。兩家兒女。殘年倦旅。菰蘆約。渺何許。上高樓莫望。江南春好。斜陽時候最苦。縱青山無恙。誰管斷雲去住。

鷓鴣天 庚子歲除

似水清尊照鬢華。尊前人易老天涯。酒腸芒角森如戟。吟筆冰霜慘不花。拋枕坐。

卷書嗟。莫嫌啼煞後棲鴉。燭花紅換人閒世。山色青回夢裏家。

高陽臺 除夕和韻

紅冷粃盆。墨枯彩帖。年涯消盡誰催。一寸春心等閒都著寒灰。今宵纔信東風嬾。負冷吟。殘醉情懷。問關山。笛裏梅花幾度吹開。聲聲不分鄰家鼓。把朦朧臺榭。殘夢驚回。馬影雞聲。天邊消息還猜。虛堂冰雪凌兢甚。怕過時。春不歸來。最無聊。照取吳霜婪尾深杯。

石州慢 用東山韻

一枕春醒。相伴畫堂。羈緒天闊。江南信息沈沈。水驛芳梅誰折。荒闌俛久。未信笛裏關山。玉龍猶噤。黃昏雪。空外暮笳聲。送飄燈時節。歌發。鬧紅香榭。歸鶴春城頓忘離別。留戀斜陽。只有鷓鴣聲淒絕。不知臨鏡。畫出幾許宮眉。新妝消與愁千結。擁髻已無言。又窺人黃月。

喜遷鶯 用梅溪韻

玉蟲寒滴。照落梅籬戶。淺春猶隔。惻惻生衣。迢迢促漏。人定水沈煙直。做成情味苦長。忍俊鏡奩顏色。倦吟罷。伴西樓墜月。今夜愁客。懽迹忍淚憶。幾許舊家。點檢閒簫笛。鳳屨輕塵。鸞釵密緒。吟入怨紅悽碧也。思尋夢去。花外路。何曾經歷。睡未著。又一襟亂愁無隙。

燭影搖紅 上巳同半塘南禪登江亭

殘墨山容爲誰青。到鉤簾處。荻芽平岸。乳禽喧。依舊滄蘭路。消送流光過羽。冷禪天。叢鈴碎杵。芳游何在。清角無端。吹愁如許。春盡天涯。茂園心醉。思歸賦。好天良夜。舊東風。誰信啼鴉苦。欲采薺花。寄與綠窗深。心期又誤。危闌休倚。亂掩斜陽。浮雲無數。

倦尋芳 陳止齋和張端士夏日詩序云屈原賈誼陶淵明文辭皆喜道孟夏

而悲樂不同。雖所遭之時異。要亦懷抱使然耳。今年立夏後。沈陰閣雨。淒然如秋天時。人事其悲樂似有適相應者。拈此以記。惜無由起止齋而質之。

賸寒著夢空。綠生煙。鶯燕驚晚。似客東風。花外暮笳吹散。落日鷓聲流水急。連天芳草。王孫怨。黯河橋正垂楊恨結。倚簾人遠。甚餽釘陰晴天氣。綫山眉相對。淒展。凭徧迴闌。未稱畫羅輕扇。經亂池臺。歌舞歇。沾愁櫻筍時光賤。鎮無聊。又黃昏雨絲飄斷。

阮郎歸

夜窗書眼怯開帷。燈花收爛時。五更寒月不相隨。上廊林影遲。青史事。碧山棲。蹉跎雙鬢絲。十年心事入摺頤。雁聲將夢飛。

塞翁吟

葦灣汎秋晚。蓮向盡以美成澀體寫之

亂笛迴塘路。催換野色瓏璁。故情斷。墜衣紅。宛急雨闌東。客懷未耐秋搖兀。慵對豔錦屏空。暗裏憶舊珍叢。負一舸。恁。花宮。星期近。南飛倦翼。憔悴與。津梁夢中。料今夜西池露下。盼不到。太乙仙槎。怨入高鴻。鴛鴦最苦。睡穩荒波。猶夢薰風。

蕙蘭芳引

飄簾水花。淺涼浸。紺紗新覺。墮一點風螢。知是扇羅倦撲。漏長夢短。去路阻。屏山天角。想怨吟難就。背燭玉繩西落。暗笛誰家。飛聲三四。水調參錯。算料理風情。深淺淚都無著。題紅詞費。桂宮隱約。清夜闌。誰熨小眉愁萼。

眼兒媚

雨聲迴潤故衣篝。得酒病懷休。舞紅消盡。西風還送。葉葉心頭。行雲不受秋拘管。將夢上空樓。夜涼雙雁。分明說與。天路閒愁。

齊天樂 獨游龍樹寺有懷半塘次珊

高林葉葉無留意。長安頓驚秋少。淚掩疏襟。愁呼斷角。新結傷高懷抱。歸艤路渺。對搖落滄洲。夢痕千繞。立盡斜陽。故人不共雁程到。清游經亂更減。舊時嵌壁句。空委煙草。故國驂鸞飛仙擁鶴。消息微聞江表。離心悄悄。付一笛黃昏。水風殘調。寄語南雲。茂陵人漸老。

聲聲慢 辛丑十一月十九日味聃賦落葉詞見示感和

鳴蜩頽城。吹蝶空枝。飄蓬人意相憐。一片離魂，斜陽搖夢成煙。香溝舊題紅處，拚禁花、憔悴年年。寒信急，又神宮淒奏，分付哀蟬。終古巢鸞無分，正飛霜金井，拋斷纏緜。起舞迴風，纔知恩怨無端。天陰洞庭波闊，夜沈沈，流恨湘絃。搖落事，向空山，休問杜鵑。

花犯 辛丑除夜

影屏山。燈唇碎語，春痕似依舊。夜堂無酒。憐燕綵誰簪，蜜苜孤守。睡輕厭數殘更漏。欺人年事驟。賸淺鬢、細梅三兩，飄香黏半袖。簾櫳外邊峭寒多。頭番問園苑，東風醒否。芳訊換，還惆悵，綴幡人瘦。簫聲送，背鄰笑語，容易到，林鴉驚散候。料鏡檻，飛鸞塵澀，新妝愁裏鬪。

虞美人

水堂煙月消眉萼。夢斷瓊枝約。低顰深坐未應知。何事粉香和淚，溼羅衣。暝空箏語西樓起。吹絮簾重倚。看人花底醉清歌。不信一春夢雨，比愁多。



花心動 花朝

若箇花枝稱東君。年年盡情妝點。舞趁繡旛。歌節金鈴。不是等閒鶯燕。隔牆還結鞦韆社。卻拋撇。濃春一半。謝橋外。東風冷透。探芳心眼。似水流年未綰。空萬縷千條。絲楊搓怨。一樣水西。挑菜光陰。只是鳳鞦人遠。扇執撲蝶分明約。思量後。妝慵歌嬾。閉門又。闌干亂紅。流徧。

木蘭花慢 送陳伯弢之官江左

聽枯桐斷語。識君恨。十年遲。正濺淚花繁。迷歸燕老。春去多時。相攜。夢華故地。怪單衣。無路避塵緇。錦瑟看承。暫醉白頭吟望。低垂。差差。津館柳成絲。離緒費禁持。問何計消磨。夕陽宦味。逝水心期。鷗夷。舊狂漫理。已沈陰。江表杜鵑啼。莫上吳臺北望。斜煙亂水。淒迷。

倦尋芳

鏡塵掩瘦。簾月通愁。人病孤館。伴客殘春。禁受藥煙飄斷。舊著香羅經酒。殢新調。繁

軫當歌嬾。暫朦朧。有銅街咫尺。鈿車雷轉。便僥倖。城烏啼散。更箭沈沈。窗曙猶淺。未必成眠。慵極半衾生戀。雁過時飄。聞笛淚。花開翻惱。登樓眼。楚雲濃。料輸他。簸錢庭院。

霜葉飛

秋晚奉使嶺南晦鳴悔生集中聖齋用夢窗韻聯句錄別越日待舟

唐沽感音寄和

亂雲愁緒孤帆外。隨風飄著燕樹。倦程先雁下滄洲。寒帶丁沽雨。甚一霎。飄輪過羽。微塵驚見紅桑古。怕更倚危樓。海氣近。黃昏換盡。酒邊情素。何況北極觚稜。東門帳飲。怨歌今夜難賦。簡書猿鳥意蒼茫。空覓荒雞語。夢不入。蓴絲半縷。商量聽水聽風去。賸恨笛飛聲罷。寂寞魚龍。覩人眠處。

又 滬上喜遇半塘翁作

過江人暮經年事。燈牀重話秋雨。北風驅雁暫成行。飛泊寒箏柱。伴獨客。零宮斷羽。天涯惟有啼鶻苦。漫浪說浮家。冷夢落。滄波幾隊。白鷗同住。長記墮策吹塵。浮雲

蔽眼。上東門外歧路。賸烽驚斷後歸魂。嗚咽銅駝語。笑一夕、枯槎倦渡。腥塵還傍蠻江去。要故人登臨倦。自結春帆。素馨開處。

虞美人 擬小山

朝朝愁黛羞鸞鏡。腸斷安排定。玉梅傳棧別筵開。卻道未須、花謝便歸來。炎洲路在屏風上。酒醒鳴雙槳。淚花不惜涴紅牋。知道黏天波浪、寄書難。瑤臺不恨驚鴻遠。一樣秋蓬轉。蠟花陪淚照匡牀。喚起盈盈、猶是睡時妝。牽衣怕領年時味。推酒成迴避。閑情斷作水東流。明日曲房春老、燕歸愁。

定風波

點鏡春姿起翠禽。經年喚醒五湖心。照眼嬌梅臨水放。惆悵。疏香不上小紅簪。別去雲軒千種憶。無益。狂來蠻榼百分斟。江上北書無鴈託。休說海南千里瘴花深。

解連環 賦餅中落梅

碎鈿香迹。引啼煙翠羽。細窺簾隙。黯帳紙、殘墨曹騰。又攙弄麝塵。半消宮額。拚忍清

寒有妝鏡。愁鸞。恨泣。悵新歌散雪。舊譜暗香。斷紅無覓。瑤臺夢中誤擲。倩仙雲評泊。笑靨羞索。待料理。紺玉寒泉。總浸作愁漪。換春無力。未返芳魂。料不怨。高樓橫笛。伴黃昏。背燈瘦影。翠尊酌得。

夢玉人引

誤驚鴻。夢滄江上。未歸客。斜月空舲。慵對冷楓。拈筆潮落潮生。盪旅情。半村沙頭風笛。眼底凌波。比行雲難覓。錦屏羅扇。到如今。零亂舊懽迹。鏡語星星。小蛾經歲愁寂。封與相思。紅鱗寒無力。料獨坐。背繁霜。不信燈花今夕。

宴清都 壬寅小除夕陽山舟中

餞臘蠻邨鼓。聲聲急。雁邊低和鳴鶻。瓊簫市遠。膏鑪燭薄。好春何許。橫溪數萼嬌紅。點綴入、迎年秀語。任向夕、雪意垂垂。韓山冷落眉嫵。銀荷翠管西船。歌呼簌博。津忘羈旅。塗牋燥墨。沾杯淡酒。自溫眠緒。荒雞定憐沈夢。是一夜、鄉心幾處。喚緒風。帆色新年。春程未誤。

阮郎歸 月夜維舟楞伽峽山水幽。雙孟東野石龍渦。詩序云四壁千仞散泉。

如雨仿佛遇之。

千葉無蒂著巖拗。飛簾噴雪消。溼雲雙束怒厓高。春湍不敢豪。煙艣閣。水燈飄。幽猿三兩號。驂鸞仙路夜誰招。月華搖鳳簫。

玲瓏四犯

未減吳絲。怪睡覺西園。芳訊催晚。一袖鑪薰。長閣暗愁成片。天外似墨沈陰。意緒冷。社前歸燕。問鏡棧。多少鉛淚。不浣謝橋塵點。翠禽啼暝。山屏半。報春殘。絮花當面。紅樓繡箔。飄燈夜。猶道東風淺。料理病骨夢中。漸不是。年時羅薦。待訴情無奈。新聲澀盡。參差金鴈。

燭影搖紅 晚春過黃公度人境廬話舊

春暝鉤簾。柳條西北輕雲蔽。博勞千囀不成晴。煙約游絲墜。狼藉繁櫻剗地。傍樓陰。東風又起。千紅沈損。鶉鴂聲中。殘陽誰繫。容易消凝。楚蘭多少傷心事。等閒尋到。

酒邊來。滴滴滄洲淚。袖手危闌獨倚。翠蓬翻。冥冥海氣。魚龍風惡。半折芳馨。愁心難寄。

摸魚子 梅州送春時得輦下故人三月幾望書

近黃昏。悄無風雨。蠻春安穩歸了。恁恁染柳熏桃過。贏得錦牋悽調。休重惱。問百五韶光。醞造愁多少。新鬟舊笑。有拆繡池臺。迷林鶯燕。裝綴半殘稿。流波語。飄送紅英最好。西園沈恨先掃。天涯別有憑闌意。除是杜鵑能道。歸太早。何不待倚簾人共東風老。消凝滿抱。恁垂燭呼尊。綠成陰矣。誰與玉山倒。

浣溪沙

獨鳥衝波去意閒。壞霞如赭水如牋。爲誰無盡寫江天。並舫風絃彈月上。當窗山髻挽雲還。獨經行地未荒寒。

翠阜紅厓夾岸迎。阻風滋味暫時生。水窗官燭淚縱橫。禪悅新耽如有會。酒悲突起總無名。長川孤月向誰明。

訴衷情 癸卯七夕和夢窗

鸞駟秋訊有無閒。樺燭掩屏山。瑤然露井梧韻，驚夢絳河還。  
無別語，擁眠鬢，淚闌干。蘭叢風起，未抵鍼樓，羅薦新寒。

又 又和

網絲飄斷水沈煙。銀鴨穩雙眠。侵衣露點如雨，坐看月流天。  
茗岸路，棹觥船。是何年。倚樓心事，清絕羅衣，原耐秋寒。

解連環 秋感和夢窗

緒牽愁結，被蠻薰沁骨，素天無極。傍露井，葉葉疏桐，信經過暮涼，畫秋真色。罷酒闌  
干，鴈書斷，浮雲東北。望三山鑿翠，尺海漲塵，有情難憶。登臨故懽盡擲。覩新霜鏡  
裏，烏笑頭白，待叩君密約，鸞釵怕著枕。睡酣暗消瑤碧。夢入關榆，但流恨沈沈。寒汐  
背西風，怨蛩細語，伴人絮得。

唐多令

廊蔭轉疏槐。圓蟾明上階。倚空尊、涼夢徘徊。多少清湘瑤瑟怨。幾曾有鶴飛來。燈  
尊半成灰。短書千里回。報巖扃、晚桂都開。前度憑闌人換盡。問何事、戀天涯。

齊天樂 芙蓉

輕紅不上瓊娘靨。重重步幃新亞。麝發潮妝。霞融膩玉。臨鏡冰絲成把。春魂漸化。委  
香篋仙衣。冷雲齊卸。喚起伶俜。載秋單舸爲誰迓。寒裳人去未久。畫闌憑不熱。前  
度游冶。豔錦霜初。斜陽木末。愁入黃昏無罅。仙城夢罷。賸鉛淚偷淹。憶君清夜。月墮  
江空。翠綃何處寫。

金縷曲 久不得半塘翁書賦寄

下殿扁舟具。傍滄江、經年堅臥。西風孤旅。不近彈棋中心局。依舊埋憂無路。枉贏得、  
蘭成詞賦。袖墨淋浪神州淚。算韓陵、片石差堪語。歌不得、獨絃苦。竹西未是無佳  
處。只吞聲杜鵑再拜。低頭臣甫。海氣荒荒蛟龍惡。我亦枯槎倦渡。尙夢繞、燈牀風雨。  
散髮相從明朝事。問江干、鷗鷺平安否。須爲報、尺魚素。



又 書感寄王病山秦晦鳴

斗柄危樓揭。望中原、盤雕沒處。青山一髮。連海西風掀塵黯。卷入關榆悴葉。尚遮定、浮雲明滅。烽火十三屏前路。照巫閭、知是誰家月。遼鶴語正嗚咽。微聞殿角春雷發。總難醒、十洲濃夢。桑田坐閱。銜石冤禽寒不起。滿眼秋鯨鱗甲。莫道是、昆池初劫。負壑藏舟尋常事。怕蒼黃、柱觸共工折。天外倚、劍花裂。

夜游宮 舟夕孤坐榜人折臨水小梅枝爲供

吹水疏香訊早。紺壺煖、迴燈一笑。零亂蒼鬢枕函小。似羅浮、月昏黃、夢中到。天黯吹笙道。細禽傍、空尊啼繞。起換傷春舊年稿。斷無人、理紅簪、歲華老。

喜遷鶯 羅江舟夜歲除和夢窗

風燈搖暮。餞闌歲暫閣。瘴江雙艖。分客錫枝。看人花勝。依舊故年游旅。香汎舵樓松火。紅上巖陰橘戶。燕來早。問殘寒消盡。芳音回否。閒處孤夢寄。煙驛幾籤。斗挂蒼山午。流怨迴潮。年涯催送。不送蠻帆一羽。自酌屠蘇無味。慵倚蕙鑪劃句。漫移枕。看

槃花燭卷。紅雲成縷。

六醜 甲辰元夕舟泊端州郭外水燈喧闐嗑然其爲春矣

又東風漸起。恨海角。酬春無力。市樓半塵籠。燈搖素壁。芳意疏隔。暗裏年光去。鬧蛾  
懽會。渺瘴江孤驛。誰家噴起中流笛。駕穩蓬萊。六鼇咫尺。沈沈萬波吹息。惹蹋歌一  
笑。飛棹無迹。篷窗人寂。擁膏鑪燭直。舊侶瓊簫冷。誰話得。銅陀夢繞香陌。恣魚龍  
曼衍。春城如墨。金錢換短宵。懽懽刻。曹騰裏。不省當頭自有。素娥真色。驂鸞事。分付愁  
客。到夜深。點滴方諸淚。銀荷對拭。

浣溪沙

夢熟煙江十四程。鬢絲堤柳兩盈盈。年芳隨水漫無情。落酒東風梅便旋。衝帆細  
雨燕將迎。春愁把筆自然生。

齊天樂 木絲

燭籠飛上珊瑚岸。殷空萬燈成蕾。幹掩斑鱗。香銜絳囀。凝作連溪朝采。煙滋露漑。就

中著溫茸。歲寒會耐。老盡春叢。可憐朱鳳故巢在。越王臺畔麗質。照人風雨夜。天半無悔。繭蝶移家。蓉砂變景。誰睨孤根嶺外。交柯未改。好留駐年年。祝融幢蓋夢結扶桑。日華擎翠海。

減字木蘭花 舟泝滄江風雨淒戾交舊存沒之感紛有所觸輒綴短韻適踵

八哀非事銓擇也

淮流如黛。六月吳篷。懽共載。解袂愔愔。兵火連天。照海東。一官垂死。訣我聯絲書。七紙風義平生。慚愧山陽范巨卿。平湖何笛帆錫驂

蛻君句律。夾巷過從。窮日夕。霜月槎枒。走上樊樓賣酒家。竹林游在。記寫八分招

阿買。曙後星孤。留得傳家一硯無。長汀黎噴園先生承忠

蒼髯樹頰。落落潛郎三十載。餘事荆關。冷笑濃雲邈遶山。荒亭接葉。點筆便爲求

米帖。不辦歸帆。竟了京塵粥飯緣。長興張叔靈先生度

支離病骨。一殉浮名成解脫。破寺迴飈。夜夜歸魂季母招。苔花及榻。命燭論心恆

見跋。何處沾巾。斗酒青山北郭門。安。吉。施。廬。臣。浴。升。

盟鷗知否。身是江湖垂釣手。不夢黃梁。卷地秋濤殷臥牀。楚宮疑事。天上人間空。

雪涕。誰詔巫陽。被髮中宵下大荒。富順劉斐邨光第

蓬萊一譎。誰挽使還文字職。得喪虛瀉。瞥眼驚藏巨壑舟。相過魑魅。糾纏幽憂非。

爾意。神理緜緜。記坐高齋十六觀。道州何硯孫維棟

交游海裏。眼看聯翩鴻鴈起。病骨西風。一夜霜摧鏡面容。百身何贖。累我阿連三。

日哭。池草春枯。淚盡西堂夢也無。固始秦野冀鴻聲

劍頭微映。海水刺天漂熱血。慘月中庭。誰解張絃受廣陵。富春一角。零亂巖花朱。

鳥啄。白首何歸。山色無人問是非。桐廬袁重黎昶

謁金門

窗網黑。四面春寒無極。繞樹驚鳥啼磔磔。淚花紅緯溼。換了羅衣無力。愁夢玉關消息。密誓鸞篋君不憶。強尋明鏡隙。

花漏急。迴步地衣紅窄。舞袖郎當隨促拍。主人翻是客。今日雲屏芳席。明日殘鶻荒驛。塌地陰雲濃似墨。夢中何處立。

清波引 勿幕亭酌泉亭在連州巾山麓

小瀾不整。是當日。流杯佳境。翠茵偎冷。野風盪愁醒。玉瀨散空響。定有餐霞人聽。自憐纔淨聞根。又飄落。午時磬。孤游慣領。倚危岫。雲意未定。地鑪供茗。對煙緒搖暝。清冷在山性。肯負輶轡修綆。坐恐一片匳冰。鑑人塵影。

摸魚子 清明雨夜泊英德寄弟閨生

一更更。滴篷淒雨。天涯人自消受。倦游諳慣。江湖味。禁得病懷僝僽。吟未就。伴孤影。幢幢颭幕。燈花瘦。離魂暗逗。又禁火年光。看雲心事。迸入夜鐘後。還山約。過了春鶻啼候。輕帆依舊。孤負。廿年社燕秋鴻迹。多少淚華沾袖。君信否。便燒燭聯牀。不是尋常有。菱花十畝。要藥裏商量。書匳料理。垂老鎮廝守。

天香 珠蘭

分畹青瓷通簾翠。押酥懷晚豔多麗。匊葉無塵宮黃初麝。小馥度人疑醉。素纖細摘。清露溼珠孃秋佩。釵串新裝鈿粟衣。絡舊融檀泚。一甌點將春焙。話懨懨、瘴鄉身世。誰省舊香消黯。漸凝鮫淚。孤醜闌宵似水。怕零亂流蘇夢難理。自翦南沈芳心倦矣。

木蘭花慢 西齋坐雨感如書至

露涼花墮夕。淺秋在水西闌。看照鬢清波。疏人翠簷。慣得幽單更殘。睡遲病枕。有哀蛩和笛咽尊前。獨客慵忺越醞。故人新費吳牋。居然畫扇好青山。激夢發蒼顏。奈秋鴻蹤迹。江籬易擷。津柳難攀。愁端背燈自理。過中年。禁得雨聲閑。莫道滄江歲晚。驚塵不到鷗邊。

又 程使君書報半塘翁亡翁將之若耶上冢且爲西湖猿鶴之間遽逝吳中賦此寄哀時方爲翁校刊半塘定稿故章末及之

馬塍花事了。但持淚問西泠。信有美湖山。無聊緝鉢。倦眼難青。飄零水樓賦筆。要扁

舟一繫暮年情。纔近要離家側。故人真箇騎鯨。瑤京何路問玄亭。九辨總無靈算。浮生消與功名抗。疏心事傳經。冥冥夜臺碎語。咽飄風。鄰笛不成聲。淚眼塵牋未理。禮堂誰分平生。昔年和翁生壙詞有云。傍要離穿冢爾何心。長安市翁笑曰。息壤在茲。豈識耶。

夜飛鵲 香港秋眺懷公度

滄波放愁地。游棹輕迴。風葉亂點行杯。驚秋客枕酒醒後。登臨塵眼重開。蠻煙蕩無。霽。颭天香花木。海氣樓臺。冰夷漫舞。喚癡龍。直視蓬萊。多少紅桑如拱。壽筆問何年。真割珠厓。不信秋江睡穩。掣鯨身手。終古徘徊。大旗落日。照千山。劫墨成灰。又西風鶴唳。驚笳夜引。百折濤來。

喜遷鶯 瓊臺長至和夢窗冬分人別韻

滄洲程別。正凍澀酒懷。稀逢南雪。譙角宵長。客衫春瘦。金線繡牀都絕。倦擁蠹籤葉。亂自聽。黎謳簫節。恨兩鬢。是清霜新點。繁枝羞折。南越梅訊渺。帳底暗香。愁與青

燈結多事東風。天涯容易，輕送瑣霞聲。噎。甚時斗槎回汎。心翦柔波春闊。尋夢去，怕離煙遮盡。沙邊黃月。

六么令 憶西園池上紅梅

石闌棲影。零亂幾枝玉。年年冷漪荒翠。心事慵娥獨。一笑飛瓊戲。挽。消得珠成斛。料量金屋。吹簫聲裏。喚起新妝倚修竹。誰信空尊易泣。顛倒傷春局。多少飄麝樓臺。落靨東風撲。莫爲題瓊客去。流怨松陵曲。翠禽還宿。卻收燈火。自下羅幃夢蛾綠。

祝英臺近 欽州天涯亭梅

掩峯屏。暄石瀨。沙外晚陽斂。出意疏香。還鬪歲華豔。暄禽啼破清愁。東風不到。早無數。繁枝吹淡。已淒感。和酒飄上征衣。莓鬢淚千點。老去難攀。黃昏瘴雲黯。故山不是無春。荒波哀角。卻來凭。天涯闌檻。

南鄉子

流轉信天涯。撲鬢清霜鏡裏催。驛館濃花無意勸。深杯。消得閒愁淡蕩回。倦眼若



爲開。古鬲雙煙小炷培。自卷單衣推枕起。徘徊。似有春鴻輒語來。

燭影搖紅

疊鼓沈陰。粉梅飄晝餘寒釅。社前雙燕不歸來。梁畫凝塵掩。容裔絲楊翠颭。怯東風、新愁漱漱。纔收燈火。未結鞦韆芳情。淒豔。無故黃鶯。背人啼溼沈香檻。一春懽事水東西。除酒消愁。別夢銀屏萬感。鎮移心。箏絃未斂。笑聲歸路。灑面狂花。黃昏塵黯。

虞美人

芳時獨客憐書札。著酒還慵答。纔因蕙草憶羅裙。無數東風。驚夢不成雲。冥冥一浦沈香雨。碎鏡流花去。未能無恨對春潮。賺得迴帆。心眼到今朝。

琵琶仙 送朱敬齋還江陰

殘酒辭春。渺千里。岸草征袍同色。離緒輕結。柔楊絲絲怨行客。茸帽底、暄風暗咽。盪愁滿、亂雲江國。越縵離聲。吳艤俊約。須記今夕。是蠻海、飄泊歸來。甚臨別天涯又

寒食顛倒玉觴無味。苦低垂頭白。人意比、飛花更嬾。怕隔年、冷了詞筆。好趁萋甲光陰。醉君重碧。

徵招 殘暑方熾。騎秋一雨。園林戶箔灑然。碧池風來。竹聲戛戛。落波際敷簾。

水西榭與閨生弟夜話。依白石自製腔寫之。並拈其詩中句發端。

人生難得秋前雨。天涯對牀今夜。倦客總無眠。儘挑殘紅燄。卅年哀樂話。未消得、酒杯陶寫。斷續檐聲。轉轡鄉緒。併時縈惹。圖畫。白蘋波。扁舟月。何時喚人東下。問訊五湖盟。有羣鷗來迓。葛巾慵未卸。似客燕。尙迷殘社。水窗曉。明鏡徘徊。覩素絲盈把。

月華清 乙巳中秋和西菘

玉籟消涼。林霏散夕。上簾人在香徑。憔悴圓姿。櫛櫛細雲遮定。露槃空、天袂知寒。樹香老。畫闌懸暝。誰省。問山河小劫。幾多殘影。桂殿秋醒未醒。待訴與方諸。淚珠哀迸。萬感孀娥。禁得管絃淒哽。漸拋殘、舊舞霓裳。好催放、破空金鏡。傾聽。是誰家怨笛。待他端正。

秋霽 園夜臥雨蓴鱸之思益深和梅溪

別枕潺潺障暗雨。簾衣暈冷燈色。悴葉涼喧。晚蛩愁咽。病懷慣禁秋力。倦吟暫息。夢痕宛轉。蓴絲碧。問故國。誰睽。夜闌孤坐。瘴鄉客。驚臥歲晚。亂落江離。釣竿沈吟。詩卷疏寂。背西風。殘鷓苦說。青銅欺鬢。盛年白。歸事布帆。從辦得。怕酒醒後。驚見畫裏湖山。采珠荒水。擣塵新驛。

西平樂 別西園作

灌木愁鴉。露莎拋錦。離思暗落迴廊。彈墨單衣。勘書深燭。清懽草草三霜。看抱葉香枯翳鏡。連雨萍沈敗艇。西風漸老。冥鴻去翼成行。誰許驚塵海角。紅荔顚。絆穩北歸艎。蕙簾蘿幌。仙書映掌。花藥澄湖。虹月英光。消不得。能言怪石。鑿空靈槎。說甚虞翻宅徙。陸賈書新。一夜江湖夢已涼。梁燕再來。巢塵簌簌。鑪穗悒悒。悵望天涯。罷酒闌干。憑誰指與斜陽。

清平樂 夜發香港

舷燈漸滅。沙動荒荒月。極目天低無去鵲。何處中原一髮。江湖息影初程。舵樓一笛風生。不信狂濤東駛。蛟龍偶語分明。

木蘭花慢 歲除苦雨兀坐篝燈賦此遣懷

洗梅根墮粉。換年事。雨聲中。看蜜苣籠花。糝粳添勝。圍幕香重。樓東曙鴉未起。黯歌塵。猶顛好。簾櫳。吟興玉牋旋引。曲游金埒還慵。懽悰。半冷翠盤龍。多事買吳篷。笑黃柑未擘。洗妝清壓。慣溼春風。相逢鏡屏夢底。問歲寒。宮袖幾時紅。雙舉流霞漫勸。老懷翻惱瓊鍾。

慶春宮 結草庵拜半塘翁瘞宮作

頽堞銜煙。昏鐘閣水。野鷗喚近清明。華表羈魂。黃墟吟伴。暗塵房檻深局。斷雲玉筍。感詞客。依稀有靈。新腔愁倚。一棧泉華。還薦芳馨。哀絃凍折誰聽。淒唳修蘿。山鬼逢迎。蓬島塵狂。芝田日晏。夢游翻羨騎鯨。淚珠千斛。拚一向。寒原縱聲。孤留何事。身世浮漚。休問殘僧。

烏夜啼

西樓一夜潺潺。玉鑪殘。只有杏花、同度五更寒。春潮長。空凝望。木蘭船。不信歸期、錦字更開看。

柳梢青

虞山蒙叟湖上句云主人要悟虛舟理但看紅妝與翠微晨起獨至定香橋觀荷口占短章聊爲叟語下作一轉倘所謂我轉法華也耶

一角風漪。文鱗吹去。錦羽梢回。妮隊頽霞。弄珠無力。明鏡徘徊。虛舟自解忘機。漫消頰。紅妝翠微。三宿湖山。廿年塵土。誰是誰非。

燭影搖紅

月夜汎舟裏湖徧串六橋並丁家山而歸山椒一園歌鼓徹曙

壓鏡秋姿。四山濃黛和愁斂。浴空蟾影轉斜河。三五涼螢閃。清景人閒易欠。洗閒情、筒杯未釀。翠波鐘罷。歸盡連錢。蜻蛉孤汎。欺月珠燈。隔花飄出閒闌檻。亂催阿濫。聒清宵。魚鳥應微厭。殘畫滄洲半罨。挂西峯。蒼龍睽睽。昏鴉醒未。風外稀疏。重城更點。

齊天樂

幽花一暝秋如夢。懨懨翳燈籠帳。淚剝冰綃。愁量錦瑟。香咽纖魂還傍。淒風自颺。卷葉葉羅衣。冷薰空桁。誰侶雛鶯。夢游分影夜江上。多情最憐小玉。結連環短佩。仙步來往。舊月鉤闌。殘雲鏡盞。供得閒人惆悵。孤懽半強。任落拓江湖。楚腰慵唱。起玩涼星。沸簾箏綫響。

西子妝

叔問卜築竹格橋南水木明。瑟遂營五畝。證以吳郡圖經。跨流而東。

陂陀連蜷爲吳小城。故墟懷昔傷高。連情發藻。睠念昨年結鄰之約。幾時可

遂因次其韻

池粉濯妝。市簫掣淚。半染吳根殘土。掛譙涼月。照啼鳥。換當年。錦帆歌鼓。吳春舊賦。奈傾國。不消再顧。故宮鬢。賸瘦楊眉樣。斜陽愁處。鷗鄰阻。竹粉連牆。未辦雙屐步。一尊還約看山來。敞書簾。淡蛾迎戶。哀歌漫度。問開徧。棠梨誰主。咽荒塚。夜夜漂花最苦。

又 酬吳彥復

津柳著陰。夜窗歇雨。夢醒青山歸晚。渺然華髮坐滄波。怪十年、故懷輕換。清杯恨澱。  
任拂拭、星文鏽斷。傍西風、睨畫堂多少。俚人殘燕。西池宴。屈戍銅鋪。但有愁一片。  
玉樓簾影至今垂。睡冥冥、翠瀛三淺。迷陽唱倦。倚沈醉、蛾眉青眼。怕重逢、墨淚單衣  
漬滿。

三姝媚 秋夜餞北客離席聞歌感音成拍

燭花搖短夜。撲簾衣新霜。唳鴻來迓。勸酌清吭。是未秋雲鬢。秦娘聲價。掩抑絃絃。傳  
怨入、吳蘭殘帕。彩筆休辭。無數閒愁。泥他陶寫。門外酸風淒射。又送客、衰蘭短亭  
嘶馬。換疊陽關。促翠筵圓月。背人西下。似酒流年。禁幾度、觥船狂瀉。便逐鷗夷歸舸。  
滄江恨惹。

齊天樂 寒夜同麥孺博潘弱海

黃昏連樹拳鴉噤。江寒笛聲不起。擁葉驚波。呼風斷角。淒別歸鸞千里。鐙窗自倚。漸

冰折吳絲薄。醪慵理。尚有殘香。夜深不煖舊心字。荒雞空喚倦旅。未應霜霰集。誰整歸計。箭水繁聽。櫺紗淡色。落盡涼蟾無寐。西樓翠被。怕一夕將愁。玉璫難寄。曙蠟紅啼。夢痕持淚洗。

渡江雲

滬上遇伯弢旋復別去歌酒相勞聲爲此詞

江風殘酒夜。輭潮半落。帶夢卷迴帆。斷鐙春尙淺。濺淚看花。冷約背梅崦。嘶騶罷躍。漸領略。荒雪江南。吟望低。白頭誰侶。照坐有頽蟾。懨懨。哀時詞賦。送老關河。攪尊前百感。休更將。危闌煙柳。分付何戡。明朝照鬢秦淮綠。怕雨昏。風暝愁兼。歧路語重。逢竟溼青衫。

掃花游

花朝微雪和夢窗

菴空淡色。黯杏葉河梁。燕風微峭。凍波乍嫺。卷愁心似惜。亂沙鷗老。覷冷春紅。細蹋瑤光鏡曉。喚吳棹。怕幽約五湖。花夢稀到。樓觀還縹緲。是亂蜃飄寒。碎玉凝照。度春草草。被瓊妃斷卻。翠溫簾窈。倦笛飛梅。怨咽江城變調。柳絲早。誤東園。鳳鞦人掃。



八聲甘州 暮登靈巖絕頂叔問爲述半塘翁昔年聯棹之游歌以抒懷用夢

窗韻

倚蒼巖半暝拂春裾。千鬢亂明星。信閒僧指點。愁香黏徑。荒翠通城。故國鴟夷去遠。斷網越絲腥。消盡興亡感。一塔鈴聲。招得秋魂來否。對冷漪空酌。渴夢難醒。問琴絃何許。飄淚古臺青。好湖山、孤游翻嬾。又咽風、哀笛起前汀。挖筇去。小斜廊路。雙屨苔平。

玉連環

花翻歌扇衣香卸。夢雲低亞。沙棠雙槳綺羅塵。愁不耐。滄波瀉。風定絮花凝榭。晚鶯閒話。不辭高館領春寒。堅坐看斜陽下。

滿路花 寒食酬叔問和美成韻

寒餘北崦風。晴壓東闌雪。睡鳧香四汎。鄰煙絕。青門憶否。十里絲楊折。玉牋連夢闕。蠟苒灰枯。漢宮尙鬪芳節。閒愁天與。杜宇聲聲血。和春催去棹。滄波接。危闌拍徧。

纔信哀歌切。中坐絃能說。說行路難。爲君刻意傷別。

又 清明再和簡叔問

闌枝過筆低。鳥迹書苔破。泉香霏杏粥。催新火。花慳酒殢。一繭愁絲裏。亂疊書圍坐。薄午簾陰。病懷惟稱頽臥。紅芳無主。權計年年左。春湍流白日。誰關鎖。江湖滿地。夢引樵風過。野鷗慵勝我。一棹相尋。世外應有人呵。

卜算子

千片惱吳花。接葉鶯調語。睡燼明窗一穗煙。夢響長廊雨。愁著倚闌時。歌斷臨觴侶。自惜流光輾轉看。淚溼彌天絮。

漁家傲

繞榻書籤兼畫幘。朦朧散帙何曾竟。老去不禁茶力猛。微睡醒。風鑪煎朮供秋病。萬里碧雲生雁興。行行書破青天影。樓月半升簾薄暝。闌獨凭。商音滿耳無人聽。香碗悄悄鐙翳翳。冷螢開闔綠窗紙。著枕搜吟工夜計。無一字。夢騰倦眼惟思閉。

泣露哀蟲妨短睡。夢回練幕涼於水。策策高林九月底。中夜起。秋聲何與閒人事。

木蘭花慢 陳伯平使君飲席話舊

傍滄浪桂樹。素心寫小山篇。笑楚製荷衣。吳謳蕩節。萍泊何緣。飛仙。素雲擁處。要手  
料。南斗灑人閒。不用流霞灑引。鏡中留得朱顏。幽禪。一榻煮茶煙。絲鬢幾年前。惜  
冥冥此意。繁鬢沈陸。孤夢攀天。鷗邊。後期守定。理雙綸。同上五湖船。莫話滄桑事影。  
湘心一碧潺然。

洞仙歌 丁未九日

無名秋病。已三年止酒。但買萸囊作重九。亦知非吾土。強約登樓。閒坐到。淡淡斜陽  
時候。浮雲千萬態。迴指長安。卻是江湖釣竿手。衰鬢側西風。故國霜多。怕明日。黃  
光開瘦。問暢好。秋花落誰家。有獨客徘徊。憑高雙袖。

驀山溪

吳城小市橋東。聽楓園退樓。老人誦古觴詠地也。予將僦居其閒。叔

問爲相陰陽練時日。且舉宋詞人吳應之故事。詞以張之依韻報謝兼抒近

懷

避風孱羽。投老皋橋市。流浪廿年蹤。綺春波、故情紈綺。樵風吟伴，長負隔籬杯。珍重  
意。覓枝巢。分席閒鷗喜。塵樊海角。削迹疑無地。獨樹老夫家。譜紅梅、豔題難繼。壓  
天霜霰。憔悴舊山心。三畝宅。五湖帆。怕說菟裘計。

惜紅衣

張園秋晚草木變衰。昭倚扶病來游。感話近事和白石

倦侶哀時。長謠送日。斷愁無力。病裏登臺。霜林媚紅碧。當脣注酒。持一笑。剛腸從客。  
喧寂。涼雨雁聲。識殊方棲息。明鏡廣陌。盈掬狂塵。蒼波盪愁藉。湛盧迸淚。去國海  
西北。斷得故山歸思。何地釣游尋歷。醉晚英無語。知是誰家秋色。

又 晦鳴病山別五年矣。荒江臥病。音書寂寥。病山郵示新篇。兼道晦鳴天南

宦蹟漂零。舊侶離憂。如何用白石韻寄晦鳴靖州。遂報病山不勝歲寒之思矣。  
萬感逃虛。孤吟費日。老來心力。雁外封書。蠻雲去天碧。離羣歲晚。愁萬里。閒關遷客。  
音寂。鐙枕倦醒。咽滄波風息。千班紫陌。鳴殿春雷。青蒲舊聲藉。觚棱夢墮。下國斗

垂北。手握楚蘭何事。不許九關攀歷。料爨書繙罷。瀝酒碧雞秋色。

又 叔問暫客淞濱。屏絕歌酒樓。鐙坐雨兀對忘言。重感旅逸。悄焉疊此。

病減霜尊。陰沈海日。苦吟猶力。定侶耽慵。忘情遠山碧。匡牀踞晚。聞去雁。樓頭如客。  
羈寂。香燼籟沈。閱濛濛千息。羅窗粉陌。百感無端。飄花淚波藉。樵風但戀。水國送  
南北。卻掃閉關何用。不斷亂愁來歷。辦釣竿幽計。斟酌石湖天色。

荔支香近 皋橋夜集送瞻園

凍靄官橋鐙颭。雙畫艣。透幕撼撼。西風吹暝。淩波路。天東一點涼蟾。導客窺朱戶。歌  
罷。婀娜輕箏。雁猶語。游味淺。漫拍徧。河梁句。歲晚江空。贏得倦鴻成侶。紅燭樓心。  
酒醒天涯。斷腸否。夢委行雲一縷。

點絳脣 試鐙夜微雪和夢窗

明雪羅窗。小梅清靨。妝初洗。試鐙風起。飄斷行雲地。漏轉瓊籤。說盡天涯事。愁如  
水。曉寒籠被。春到檐聲裏。

六醜 滬上元夕和夢窗吳門元夕風雨韻

漸梅英墮粉。翠幄煖。花風新掣。翦淞半江。春綃冰暈滅。密逗芳節。細漏丁東際。繡旛  
雙影。近寶臺高揭。蕃街走馬嘶塵熱。霧絡消香。波簾卷纈。沈沈釀寒城闕。被瓊簫成  
陣。迤邐吹徹。吟悰漸歇。況侵年苧髮。記起傳柑事。情味別。春芳又遲鳴鳩。濺行雲  
倦趁。曲坊巾襪。銀荷燼。鬧蛾飛絕。不堪是。擲徧金錢換了。舊時明月。歌塵定。猶旋迴  
雪。聽笑語。凝白闌干外。清鉛暗結。

淡黃柳 吳門重別瞻園

東風晚急。吹得梅成雪。眼看江城寒食節。倒柳郵亭漸綠。十日相從正堪折。宴歌  
歇。懽心賦春別。打雙槳。訪桃葉。賸吳天。客雁寒無列。後夜相思。夢痕何處。來往青溪  
淡月。

霜花腴 聽楓園春集用夢窗韻

五湖計熟能遠游。春來怕檢塵冠。臨水廚清。鑿坏山近。端居避世仍難。酒杯自寬。繫

舊情長駐花前。算滄波對席閒鷗。亂愁不遣晚盟寒。蘿薜幾人招隱。歎風枝未定。怨咽驚蟬。棋局新悲。鐙牀昔話。繁吟限日飛牋。待租畫船。欠翠眉歌袖。便娟背斜陽。料理閒身。小楓臨鏡看。

又 宋詞人之僑吳者世但稱賀方回吳應之諸賢叔問謂吳夢窗鷓鴣天楊柳閨門之句蓋有老屋相近皋橋其點絳脣懷蘇州詞所云南橋殆指此又兩寓化度寺詞皆有懷吳之思豈垂老菟裘固以此邦爲可樂耶

謝堂倦客。喚酒醒。西風夢老吳皋。煙草橫塘。玉梅妝榭。詞仙去住無聊。賦情紫簫。夜深明月南橋。伴年年老屋閨門。帶鴉黃柳短長條。賓主百年逆旅。算菟裘一席。占了漁樵。朱邱尊空。青門春去。霜花醉墨飄蕭。倦魂待招。料錦鯨猶戀迴潮。過江人漫感山丘。燕來還定巢。

瑞龍吟 寓園餞春伯弢和清真韻見貽率酬一解

吳皋路。依舊翠檻交藤。露臺臨樹。年年寒食。東風怨羅恨綺。消春甚處。倦吟佇。珍

重勸歸啼鳥。戀人堂戶。天涯楚客能狂。對花對酒。低徊夢語。無限浮雲心事。短裾羞倚。搖楊狂舞。歸燕慣。瞋空簾。人意非故。塗妝暈色。憑寫傷高句。何曾見。雲屏淚眼。香塵迴步。鏡裏千紅去。凭闌待理。黃昏斷緒。重疊愁成縷。年事晚。沈沈燈花飄雨。夜長漏促。一箏塵絮。

又 和夢窗韻

市橋面。還是臥柳吹絲。去波明練。芳塵簾閣。惜惜黃昏。細雨游絲自轉。漏催箭。容易曼歌消酒。舊襟須濺。烏衣也。怯殘寒。謝堂夢醒。春陰絮晚。拋盡芳華前事。過江人老。行雲天遠。鷓鴣未休。衰蘭歧路零亂。薦紅病綠。今夕愁無岸。不辭到。西窗燭燼。南鄰鐘斷。坐閱狂香卷。誤人睡裏。清歌漸散。懽緒東風嬾。空付與。吳娘哀箏彈怨。後期最惜。橫塘帆片。

八聲甘州 和柳耆卿韻

殢春殘病酒近黃昏。東風冷於秋。正隔紗煙窈。飄鈴雨急。相望紅樓。墮絮飛花不了。



好計一年休。江水知人意，迎淚西流。只有高臺歌舞，恁半妝易試，急拍難收。覲雕梁如客，驚燕爲誰留。漲迴波，天涯塵滿，怕未堪，重上木蘭舟。簾前路，變青蕪色，漸引閒愁。

### 驀山溪

輕簾四揭，得月前櫳早。繞鬢聒飢蚊。小朦朧，園鴉催覺。淙檐一雨，蘿桁卷絺衣。新酒盞，短鐙檠，料理成秋笑。炎涼覆手，取次流光渺。不斷故山心，被西風，年年吹老。飛鴻將夢，一夕上高樓。攜玉笛，問金莖，此意無人曉。

### 秋宵吟 和白石自製曲

水窗虛。芭蠟皎。夢醒秋堂，鬻悄。還依枕，正霧雨冥迷，砌蟲咽曉。理愁絲，似亂葆，倦客三年江表。消凝處，是盪晚荒波，際天衰草。瘦盡青山，未辦得一丘送老。病侵潘令，恨極江郎，攬鏡鬢霜繞。天末涼風早。滿目江湖，鴻雁信杳。怕高樓，細數流光，橫竹吹徹怨未了。

小重山 戊申中秋作

翠溼篁陰小閣寒。酒消渾不耐，越羅單。水飭風起燭枝殘。驚禽去，捎響碧琅玕。投老臥雲關。眼中塵事滿，素心難。天涯作計理孤懽。無情月，三度病中看。

龍山會 重九汎舟斟酌橋有憶和夢窗

一艣秋無罅。故苑荒煙臥柳樓臺亞。五湖帆未整，塵鬢影，窺向流花橋下。迴陣側新鴻帶林際，山眉翠冶。倦芳期，涼叢麝粟，颭風金灑。還憶對倚商歌，白眼青天，試五陵驕馬。楚離搖落後，流恨滿，鄰笛西風殘夜。京輦十年心，付杯底，滄波亂瀉。醉漫捨，有約待鷗夷車後挂。

月下笛 聞促織感賦

冷月牆陰，淒淒碎響，替秋言語。羈人聽汝，咽愁絲，黯無緒。空階都是傷心地，恁禁得，哀鐙斷雨。正宵碁四起，霜絃孤曳，宛轉催曙。愁誤金籠住，伴落葉長門，枕函慵訴。回紋罷織，舊家零亂機杼。西風涼換人閒世，問憔悴，王孫幾度。等閒是，變了潘郎髮。

夢寄誰去。

安公子

雨氣昏園夜。夜聲風葉行空謝。倦潑深杯。人不醉、數南譙更能見。暗裏、霜蟾影壁盡。弦挂。偏背燈、臥起都無那。漸曉笳淒動、吹落瓊瑰盈把。重疊魚書。避人吟覲成。淒詫。甲帳珠簾。前日事、苦東風衰謝。夢說與、當筵莫漫危絃卸。鸞鏡塵、中有滄洲畫。恁竹黃池冷、猶是夕陽未下。

玉燭新 叔問贈瑞香謂卽離騷九章之露申也賦此報謝叔問以爲有美人

懷服之思

鉛霜和影颺。是碎翦、春愁。蕊珠宮樣。麝塵院落。東風外、旋展流蘇成桁。釵梁未上。顆顆結、相思花網。端正看、分朵幽雲。羞供少年新賞。含風漫整新妝。怕短夢蓬萊。故宮潛悵。衆香斂避。開落事、試問孤根誰傍。葳蕤玉障。解睡徹、芳韶駘蕩。休賺取、屬酒春人。熏籠夜帳。

華胥引 重午感舊

新苔凝礎。閒雀窺幃。澡蘭舊節。畫鼓聲沈。燎鑪焰短。愁篆結。不信鄰笛驚風。助曉吟  
淒咽。牆角雙榴。褪紅還上裙褶。梅雨江南。送離魂。怨流菰葉。楚雲章句。沈沈秋心  
半篋。腕晚歸帆何處。恨路長波闊。呵壁荒唐。酌觴清些誰答。

夢芙蓉 南蕩汎舟用夢窗韻

簾花搖夢綺。引行雲棹過。麗娃鄉里。紺波無岸。秋在錦機外。冷霞熏客醉。西亭曾試  
香被。脆笛風前。呼秋人晚步。羅襪細塵起。卷盡吳魂網底。來去簫聲。散落中洲佩。  
霸圖重問。一笑鬧紅洗。遠峯休掃翠。鴛鴦解妒眉意。料理浮家。尋鷗夷舊話。飄斷五  
湖水。

高山流水 七夕用夢窗韻

絳河不動九微風。數秋期。輪徧織葱。花外玉鵝笙。黃昏韻入初鴻。閒愁在。唾碧拈紅。  
穿鍼伴。多少微雲院落。畫燭房櫳。浸三星細轉。滴滴露槃濃。機中。年年錦書恨。憑

說與翠水璇宮。容易誤良宵。夢約幾負香茸。笑雕陵、錦羽偏工。人天事、輕賺羅池倦客。酒醒清鍾。下疏簾憶斷。釵盒故情慵。

采桑子

雙蛾桂葉吳妝淺。香袖憑肩。水調初圓。絳蠟風消細細寒。月華人意分張後。雁語寥天。花夢空煙。風景何嘗似去年。

臨江仙

喚笛渚風起。冷禽磔磔。髟柳髟髟。畫橋外、斜陽豔入衰荷。經過舊尋夢地。行雲重步。屢生波。懽娛去。換亂螢窺席。荒水飄歌。婆娑金槃翠醕。今夜無那愁何。便流連叢桂。舊月無多。由他。奈秦樓阻。書期誤。怨發雙蛾。終憔悴。爲有人含睇。薜荔山阿。

雪梅香

酒無力。憑舷獨客背西風。爲高樓悵悵。天涯易發秋慵。收艇汀洲雨連夕。近橋簾幕水涵空。去程急。盼斷書期。迤邐賓鴻。恩恩引離緒。燭外行雲。淡畫吳峯。舊國年芳。

換將亂葉衰紅。洩地驚波古城曲。隔年愁夢臥屏中。依前是。倦枕沈沈。宵半疏鐘。

彩雲歸

春陰日夜傍高樓。好風光。翠歇紅收。驚夢回。鳳燭慙慙地。惆悵事。喚作無由。尊前又。彩雲新怨。唱吳天盡頭。鎮閒阻。謝堂懽語。舊燕空留。休休。江南恨地。問傾城。何事  
綢繆。一波去水。萍絮狼藉。未解西流。算別來。千歌萬舞。淚眼翻溼。蘭舟重經過。江草  
江花。一路新愁。

雨霖鈴

清明過何笛帆乘驢橋故居

昏鴉啼澀。近連橋。路暗雨如織。孤雲一逝何處。門巷亂。苔花綦迹。薄暝流飈。旋起漸。塵動敲壁。甚燕燕。淒語東鄰。此地無人解吹笛。天涯酒醒消魂極。但恩恩。醉地空  
尊泣。文章枉換羈旅。零落盡。茂陵殘筆。夜壑孤吟。應省今朝。過了寒食。待翦紙。重與  
招魂。夢斷楓林黑。

西河

庚戌夏六月癭庵薄游吳下訪予城西聽楓園話及京寓乃半塘翁舊

廬迴憶庚子辛丑閒嘗依翁以居離亂中更奄踰十稔疏鐙老屋魂夢與俱  
今距翁下世且七暑寒已向子期鄰笛之悲所爲感音而歎也爰和美成此  
曲以摠舊懷

歌哭地。殘鐙事影能記。劫灰咫尺上闌干。夜笳四起。草堂人去薜蘿空。西山窺笑檐  
際。舊庭樹。誰再倚。虛舟汎若無繫。爲君胥宇燕重來。退寒廢壘。夢華一覺玉京秋。  
閒鷗空戀煙水。酒徒散盡醉後市。問黃墟。猶話鄰里。愁絕斜陽身世。怕銅駝斷陌。  
黃塵淒對。西北高樓浮雲裏。

### 南鄉子

素蠟燼無煙。風轉高螢照屋椽。秋病無名如中酒。頽然。亂帙匡牀伴獨眠。夢醒雁  
南還。遼海書沈動隔年。畢竟新愁吹不到。鷗邊。獨自滄江上釣船。

### 金縷曲

數點籬頭雨。溼年光。如塵似夢。雁聲將去。慘結秋陰朦朧月。隱印苔花夕步。更著袂。

清寒如許。莫費鄉園叢菊淚。伴孤雲、老臥滄江暮。持此意、問鷗鷺。盈盈一水終無語。儘留連、沙昏石冷、舊盟誰主。試俯清漪窺衰鬢。猶帶十年塵土。賸對立、鷓鴣媚嫵。萬事一身惟足嬾。又支筇、數盡池東樹。鴉陣起、爲誰舞。

蹋莎行 狄文子客淮南過江見訪

臘雪欺梅。春灰瀝酒。過江人落東風後。狂名消與短衣裝。離心紛若長亭柳。燕館霜繁。梁園月瘦。卅年景物供懷舊。白頭費淚與江南。亂花歧路愁時候。

三姝媚 鮪庵有鄧尉探梅之約詞以速之

燒鐙時節過。正江春多陰。縞空梅朵。暝蹋蒼煙。話舊蹤能記。醉楓紅臥。倦屨空山游計屢。東風相左。料理詩痕。飄雨吳杯。照人醒坐。身世狂花愁籥。想素約聞鷗。自消塵流。雪老波荒。賸笛邊心事。細禽啼破。念別傷春。春已在、雙崦單舸。莫遣空枝千繞。瑤臺夢鎖。

點絳脣



宛轉鑪灰。此中多少淒涼事。蠟槃紅起。又滴黃昏淚。漏斷杯空。那得相憐計。君知未。換紅移翠。猶是東風地。

陽春曲

去年愁。今年事。依舊望春淒絕。簾戶好東風。黃昏近。燕子歸傍畫梁說。放鐙時節。驚故國。墮梅如雪。纔信粉坼紅黏醉。醒中易成消歇。倦游宴東園。湔裙路。誰誤約。書花寫葉。而今歌塵綠徧。濺迴波。卷淚雙疊。新聲但有暮鳩。更惱亂。玉龍吹徹。看門外。逝水漂花去。江南夢闕。

雪梅香

雨無極。溼帆。一一下江城。對空洲蘅杜。旋波翠幕冥冥。攙亂鴻音。水樓笛。盪搖螢點。市橋鐙。愴茲夕。路渺仙鄉。極眼將迎。伶俜。十年事。說向蠻牋。似夢疑醒。倦迹江南。庾郎自此愁生。酒盞秋諧。病消息。燭花晨換。客心情。還侵枕。萬葉驚飄。空外商聲。

祭天神 送伯弢還武陵

望楚天長短。黃昏雨。斷行人。戍鼓聲中啼雁苦。悲秋佩。委衰蘭。夢醒吳鉞語。背西風。一臥迢迢滄江暮。莫漫觸蛟龍怒。更淒絕。斜日新亭路。山河異。風景是。舉目成今古。問何堪。滄桑危涕。兵火浮家。庾信生平。竟寫江南賦。

浪淘沙慢

辛亥歲不盡五日作

暝寒送繁霜。覆水暗雨啼葉。檐鐸敲愁乍急。帷鐙顫影旋滅。翦不斷。連環春緒疊。是當日。鸞帶親結。問故徑。蘼蕪夢何許。前塵竟拋撇。淒切。錦書寄遠終輟。念玉儿金牀。西風夜縹緲。胡雁咽嗟攬。斷羅裾。寧信長別。恨腸寸折。明鏡前。掇取中心如月。卻剗連峯平於埜。黃塵擁。巨川頓竭。怒雷起。玄冬還夏雪。更千歲。倚杵天摧。厚地圻。深盟會與纏絲絕。

金縷曲

井上新桐植七年矣。周無覺撫之而歎曰。此手種前朝樹也。斯語極

可念拈以發端

手種前朝樹。帶虛廊斜陽一角。閱人無語。乞向西鄰斤斧底。會共籜龍赦取。看玉立。

亭茗如許。今日離披銀牀畔。問孤根、肯傍龍門否。一葉葉、戰風雨。螻蛄三兩啼相訴。說年來、紅悽翠慘、好秋誰主。剗地霜蕪連天白。棲鳳長迷處所。算乾淨、猶餘吾土。眠坐清陰、渾閒事。要歲寒、根幹牢培護。盟此意、酌清醕。

國香慢 爲曹君直題趙子固凌波圖

一幀湘魂。正指瑤水闊。汎瑟煙昏。江皋幾叢憔悴。留伴靈均。日暮通詞何許。有嬋媛、北渚孤顰。國香縱流落。未許東風。換土移根。經年亡國恨。料銅槃冷透。鉛淚潛痕。故宮天遠。鵝管從此無春。補作宣和殘譜。儘消凝、老去王孫。不成被花惱。步入鷗波。滿襪秋塵。宣和畫譜無水仙。

虞美人 晚秋病起浮家石湖

經年未醒鷗夷夢。雁外荒波動。不須商略挂帆人。便與扁舟、出世已無津。頑秋腰腳慵難理。久斷傷高淚。故人書札墮西風。卻道江山塵土、我清空。是日得伯叟書云然

綺寮怨 兵後海上遇歌者朱素雲

亂柳香風吹店。酒帘河外青。傍水陌、細語殘鶻。春陰底、喚上旗亭。中年哀絲怨竹。潛  
催換、鬢雪和夢驚。甚候烽起滅。江關無人睇。故國塵暗生。悵恨病辭茂陵。銅仙去  
後。劫灰怕問昆明。氣挾幽并。舊人是、米嘉榮。江南落花風景。且訴與、十年情。傷懷步  
兵。澆愁但願醉。無淚傾。

曲玉管 京口秋眺

野火黏堤。寒雲齧壘。霜空竟日飛鴻響。客裏登樓窮目。衰柳無行。儘回腸。冷眼論  
兵。愁心呷酒。無多景物供吟賞。最愛青山也似北顧倉皇。寄奴鄉。霸氣消沈。賸嗚  
咽。迴潮東注。永嘉幾許流人。惟餘叔寶神傷。感茫茫。又玉龍吹起。一片西風鱗甲。江  
山如此。幾曲闌干。立盡斜陽。

洞仙歌 過玉泉山

殘衫賸幘。悄不成游計。滿馬西風背城起。念滄江一臥。白髮重來。渾未信、禾黍離離

如此。玉樓天半影。非霧非煙。消盡西山舊眉翠。何必更繁霜。三兩棲鴉。衰柳外、斜陽餘幾。還肯爲、愁人住些時。只嗚咽。昆池石鱗荒水。

水龍吟 麥孺博挽詞

峨如千尺崩松。破空雷雨飛無地。京華游俠。山林棲遯。斯人憔悴。一暝隨塵。九州來日。諒非吾事。正蒼黃急劫。推枰撒手。渾不解。茫茫意。也識彭殤一例。愴前塵。飄輪彈指。長城並馬。滄溟擊楫。窮秋萬里。歸臥荒江。中宵破夢。慘春衰涕。更大招愁賦。湘魂縱返。甚人閒世。

六么令 和況夔笙

碧紗煙語。恩怨無端的。分明宋牆東畔。簾箔幾重隔。扶夢花鐙宛轉。不照傷心色。後期今夕。青天碧海。未道相思是無益。蠟苴灰猶有淚。惜別筵前滴。羅帶詩本無題。出意機中織。千萬秦箏素手。莫放危絃急。鳳帷鴛席。能拚憔悴。知否金釵未堪擘。

高陽臺 花朝渝樓同蒿叟作

短陌飛絲。長波皺麴。市帘江柳爭青。中酒年光。買春猶是旗亭。綵旛長記花生日。甚綠窗、兒女心情。儘安排。畫桁吳縑。鈿閣秦箏。白頭未要相料理。要哀吟狂醉。消遣餘生。無主東風。博勞怨不成聲。朦朧幾簇東闌雪。算今年、又看清明。怕相逢。社燕歸來。還訴飄零。

夜飛鵲 乙卯中秋

金波暖斜漢。流照屏山。樺燭冷散青煙。珠簾欲上美人去。誰家今夜今年。當窗亂雲霧。恣霓裳狂舞。換譜鈞天。乘風汗漫。問瓊樓。何似人間。多事桂宮仙斧。七寶尙淩虛。裝綴嬋娟。闌外秋香泣露。移槃清淚。消盡金仙。廣寒殿闕。怕常娥。不許流連。共孤光誰與不成把盞。北望淒然。

霜花映 九日哈氏園

異鄉異客。問幾人。尊前忘了飄零。鴻響天寥。菊遲秋倦。池臺亂倚霜晴。坐無老兵。負舊狂。休泣新亭。鎮填胸。塊壘須澆。躡愁不與酒波平。多難萬方一概。便知非吾土。

已忍伶俜。金谷吟商。玉山扶醉。消磨半日浮生。畫闌更憑。莽亂煙。殘照無情。要明年、健把茱萸。晚香尋舊盟。

醉翁操 勞玉初避地勞山賦此寄懷

巉嶠。單椒。誅茅。託而逃。誰招。千年故丘。還其巢。白頭心國飄蕭。歌且謠。把臂舊漁樵。說此中。幾人我曹。令威去後。無夢歸遼。幼安涕淚。消與白衣阜帽。山有木而風號。海有涯而波滔。思君無暮朝。心同媒何勞。斗柄帶招搖。望京樓。望天沅寥。

千秋歲 效連詠體夔笙得前拍予繼聲

玉宇瓊樓。綠尊翠杓。不分傷春蹙眉萼。花辭故枝。忍爛漫。萍黏墜絮。仍飄泊。寶奩金錦衾。鐵總成錯。昨夜夢沈情事各。今夜夢回。思量著。那惜行雲楚臺約。當初莫愁似海。而今瘦沈腰如削。四條絃。五紋繡。渾閒卻。

戚氏 丁巳滬上元夕

月明中。人閒無主。是東風。火合銀花。倚交琪樹。錦成叢。瓏璫好。簾櫳歌鶯舞。燕惜。恩

恩。滄江倦客吟晚際。此三五幾心同。市煖蛾鬧。林暄鴉起。舊霞倒影仙蓬。算金錢換得。流水宵短。撲地春空。回首帝里游踪。黿駕鳳吹。迤邐趁青驄。瑤臺路。翠嬌紅嫵。管疊絲重。萬芙蓉。紺蕊鏡裏衣香。尺咫步綺西東。歲華轉燭。悄拍闌干。把蓋北望朦朧。未是閒情緒。催霓唱徹。作弄春工。問取孀娥見否。便臨花對酒。恁忡忡。年時笑語。傳柑醉沾鎬宴。一餉華胥夢。費念奴。憔悴清歌送。終古恨。縈損渠儂。賸夜窗。寸蠟衰紅。念芳節。袖溼淚龍鍾。甚春寒重。蕃街畫鼓。曼衍魚龍。

新鴈過妝樓 和夢坡

網戶昏黃。飄鐙近。盈盈蘸甲觴光。曼聲不起。塵麝暗簌空梁。莫倚蛾眉憐短鬢。未秋鏡影已先霜。少年場。奈何喚徹。沈恨周郎。天風無端應拍。便暮雲駐得。肯駐斜陽。望京舊夢。沈醉不換悲涼。箏心更移更促。怕零落。十三金鴈行。滄江晚。費箇儂分付。今夕迴腸。

洞仙歌



推枕秋懷斷。乍夢闌。徙倚初寒池館。繞空廊。露葉遠樓風鴈。冥冥月氣。鐙輝亂。問幾度。安排平圃。宴閒簫管。甚疊徧霓裳。翻恨新聲嬾。輾轉。醉愁酒醒。殢睡香消。易感難拚。漫與短髮飄蕭。冷卻故園心眼。良天好夜。終須見。要舞袖。聯翩花底換。回醉眊向當筵。擊筑哀歌未辭晚。忍坐看。看點拍。江南怨。奈碧雲無信。舊叢霜老。誰家苑。

摸魚子 馬鞍山訪龍洲道人墓山在崑山縣西北隅

占城陰。頽雲一角。有人持恨終古。書生滿眼神州淚。淒斷海東煙霧。墳上土。怕有酒能澆。蹋徧橋南路。英游遲汝。向笙鶴遙空。不逢鴛廣。心事更誰訴。天難問。身世儒冠誤否。憑渠筆力牛弩。銅琶無分中興樂。消受此生棲旅。憑弔處。賸破帽疲驢。悵望千秋去。啼鵲最苦。要無主青山。有靈詞客。來聽斷腸語。行到橋南無酒賣。老天猶困英雄龍洲詞斷句也蘇紹叟憶劉改之詞任樓上張騫山中李廣商略儘風度

好事近 靈隱夜歸蔣氏湖莊作

湖氣鬱衣巾。步入寶坊林月。耐得山亭泉冷。信肝腸如雪。出山十里螻蛄聲。聞根

甚時歇。據槁安心隨地。又南鄰鐘發。

紫萸香慢 焦山九日同病山仁先情仲

避塵塵。重陽杯罌。山靈肯惜吾曹。是悲秋扶病。辦腰腳。一登高。送盡西風鴻陣。又天邊霜信。驟薄青袍。賸松寥片石。乞與客題餽。問塊壘。可能酒消。無聊。且話南朝。風落帽。手持螯。怕黃花冷覩。高城急雨。著意明朝。眼前插萸人瘦。儘流恨。去來潮。倚樵柯。上皇山路。暮雲低盡。玄鶴不許人招。霜鬢自搔。

臨江仙

門柳低垂牆杏簇。臨津珠箔人家。東風歷歷十年賒。誰將新社燕。銜送故枝花。上枕愁心無倚著。窺帷樓月西斜。細香飄夢泊天涯。天涯何處所。鏡外綠窗紗。

六么令 清明龍華寺薄游

紙鳶風過。扶路餽簫熱。江橋酒旗青處。草色裙腰接。撲水紅萸萬點。過眼芳菲節。數聲新鳩。鞦韆索外。喚起春人試羅屨。不信玄都夢裏。歷盡華鬢劫。百尺無主香臺。

斷續殘鐘咽。雞酒招魂幾許。錢紙灰成蝶。照人啼靨。端端正正。卻是桃花舊時月。

### 洞仙歌

年年明月照高樓。無恙只是清宵。易惆悵。算姮娥識我。不爲閒愁。飛動意。把盞淒然北向。酒醒烏鵲起。一碧雲羅。遙指虛無斷征鞅。知道有前期。對影聞聲。甚邈隔。萬重山樣。須信是。瓊樓不勝寒。猶自有愁人。白頭吟望。

### 丹鳳吟

題蔣孟賚密韻樓圖孟賚旣得宋本周密草窗韻語爲圖紀之韻語

凡六稿咸淳重光協洽陳存敬序乙亥李彭老李萊老題詩按癸辛雜志至大戊申草窗年七十七則生當紹定壬辰韻語紀年至甲戌年四十三蒿中年以前之作南宋江湖詞人兼以詩傳者惟姜堯章最著草窗詩風格稍遜而舉體修潔庶幾近之又生長行都棲息苕霅閒山水清音自異凡響卷中自元代至康熙時題識殆徧乃未入藏家著錄洵希世之祕笈矣

坐擁連牀縵縹帶草春窗。英光深燭。真珠船到。開卷蠹塵輕籟。元和蛻取。義熙題徧。

儘有書城。能消陵谷。過眼雲煙漫省。喚起詞仙。一笑來伴幽獨。按譜笛中世換。舊  
費斷碧。淒賸馥。蔓草王風感。甚芳菽。疏雨清事能續。吟邊今古。一抹弁峯寒綠。送盡  
飛鴻。三徑晚。愴憑闌。心目古芸隱處。珍重文字福。

金縷曲 壽閨生弟六十

無怪吾衰矣。算阿連、左弧懸到。齊頭甲子。湖海平生輕離合。頗負夜寒姜被。泝別恨、  
峽流牂水。猶有滄江容一臥。便安排、風雨連牀計。秋色在、鴈行裏。篆盤婆律香雲  
起。待商量、歸心與問。聞思大士。咫尺茗山家何許。茅屋石田而已。且生事、醉鄉料理。  
四海子由真健者。幾滄桑、自笑難兄弟。吾意託、小山桂。

虞美人

黃昏笛裏梅風起。蔓草羅裙地。滿闌紅萼總宜簪。不道尊前消減。去年心。何郎詞  
筆垂垂老。坐被花成惱。月寒江路喚真真。一縷清愁猶著。故枝春。

摸魚子 龍華看桃花

嬾能探，劫餘芳信。年年閒了游騎。祇林依舊霞千樹。嬌入上春羅綺。紅十里。還一掩一層。淡沱煙光裏。東風旋起。悄不似仙源。將家小住。便作避秦計。玄都夢。消與金門游戲。夢回惆悵。何世華鬢。天也無香色。說甚道場興廢。空徙倚。怕輕薄芳姿。未省傷春意。劉郎倦矣。任題徧花牋。都無好語。賸濺感時淚。

鷓鴣天 越日重游遂訪石芝居士

百隊行春迤邐車。千林步綺淺深霞。陰晴併日如中酒。哀樂臨年各爲花。花夢短。酒悲賒。甘拋有盡送無涯。道人不對東風笑。掃地焚香自作家。

水龍吟 沈寐叟挽詞

十年輕命危闌。望京遂暝登樓眼。虞淵急景。伶俜已忍。須臾盡緩。沈陸繁憂。排闥舊夢。一朝悽斷。痛招魂無些。宣哀有詔。經天淚。中宵泫。垂死中興不見。掩山丘。風回雲偃。涪溪撰頌。茂陵求稿。湛冥何限。我獨悲歌。紫霞一去。淒涼九辯。賸大荒酌取。人天孤憤。覓靈均伴。

鷓鴣天 龍鳳兜展彥僮弟墓

紙蝶風旋土一堆。無多老淚著寒灰。殘鷓錦樹啼還咽。小鴈鑪峯夢不回。身後事。眼前來。青山須辦骨同埋。便能世世爲兄弟。知否人閒更可哀。

惜黃花慢 仁先以舊京移菊經歲作花倚聲徵和

楚客情芳。鎮夢餘避得。酌月春觴。閉門成世。悄偎鬢白。託根耐晚。羞染蜂黃。抱花愁問伶俚。蝶舊籬畔。堪此淒涼。念帝鄉。薦秋俊賞。飄換繁霜。十年臥隔滄江。濺露英數點。老淚柴桑。後期孤許。楚筠晚節。前塵半落。燕麥斜陽。瘦姿不敢傷。遲暮爲珍重。簾底秋妝。最斷腸。夜衾萬感幽香。

薄倖

後堂芳樹。逗一霎、黃昏意緒。未慣得、春魂無檢。輕繞河橋風絮。甚臥枝、花發東園。春根重上相思句。便綵箠翻歌。金尊顛酒。催合鄰簫新譜。也自解、連環誤。渾不耐、綠窗鸚語。幾曾知門外。飄紅無地。等閒卻倩游絲駐。不關風雨。但懨懨、淚眼天涯。望斷

無尋處。危闌徧倚。心結行雲成縷。

浣溪沙 和病山薰風卽席之作

解道傷心是小顰。分明怨恨曲中論。世間原有蕊珠人。妙舞折腰翻地錦。清吭飄  
淚簌梁塵。滿衣猶是故山雲。

未必天花及我身。占人懷抱是歌顰。紅氍翠幕一逡巡。翻劫枯禪參聖解。哀時閒  
淚賺詞人。不關夢裏楚臺雲。

清平樂 何詩孫爲梅蘭芳北歸畫卷徵題

殘春倦眼。容易花前換。萼綠華來芳畹晚。消得閒情詩卷。天風一串珠喉。江山爲  
被清愁。家世羽衣法曲。不成凝碧池頭。

高陽臺 過蒼蚪湖舍

吹劍驅愁。揮杯勸影。湖上重與溫存。一弄荒波。客來猶道閒身。隔年縹渺鈞天夢。傍  
清鐘。忍斷知聞。袖香熏。攜向虛堂。還熨詩痕。遮門不是閒煙水。洗秋心最苦。更託

鵲春。小閣通明。夜深孤月尋人。褰裳手把芙蓉朵。問目成、可記靈均。便從君、把臂黃華相守孤根。

臨江仙 此辛酉歲暮同寐叟作叟目爲調高意遠者也稿佚不復省慈護世講檢叟遺篋得之

留與眼前資痛飲。不須遣盡閒愁。徘徊明月在高樓。揮觴疑有待。吹笛未宜休。人事音書寥寂久。夢來躍馬神州。中宵攬涕不能收。有情歌小海。無女睇高丘。

燭影搖紅 乙丑元日和閨枝

野哭千家。閉門不恨春光淺。年時仙仗簇朝正。瞻座香飄殿。投老滄江臥晚。怕安排、黏雞畫燕。盡情鐙火。多事屠蘇。今朝心眼。留命何年。飾巾那計流光換。夢魂猶自點朝班。誰道長安遠。再拜鵲聲咽斷。倚危闌、飄風鬢短。爲誰消息。爆竹東鄰。青旛孤顫。

小重山 蒼蚪示紅豆詩愧不能和拈此報之



南國春芳又一時。背人開玉合，意淒其。枉拋紅淚惜前期。愁根蒂，惟有錦鸚知。無  
力護瓊枝。東風休再種，有情癡。年來心事在江離。渾不稱，頭白賦相思。

鷓鴣天 廣元裕之宮體八首

生小仙娥不自妍。璧臺金屋誤嬋娟。幾曾宛轉酬千琲，已忍伶俜過十年。蚪箭水，  
鵲鑪煙。無端芳會散金錢。簾櫳早是愁時候，爭遣新寒到外邊。

金斗餘薰向夕涼。撲簾真見倒飛霜。竊香鳳子紛成隊，撼局鴉兒太作狂。三歎息，

百思量。迴腸斷盡也尋常。鏡前新學拋家髻，猶被狂花妒淺妝。

微步塵波避洛神。玉顏團扇與溫存。牽牛夜殿憐私語，騎馬宮門拜主恩。翻覆雨，

合離雲。經年纔雪舊啼痕。清狂一往寧無悔，卻繡長旛禮世尊。

罷轉歌喉道勝常。多生爭忍不疏狂。直饒在髮爲薶澤，未願將身作枕囊。蟾鬢鎖，

鵲橫梁。東家著意在王昌。情知薄倖青樓夢，且坐佳人錦瑟旁。

關道嬋媛北渚游。東風連苑冷於秋。無多裝綴花宮體，禁斷排當鞞部頭。懽易散，

夢難留。女牀鸞樹向人愁。紅蠶憔悴同功繭。纔盡春絲未放休。  
臨鏡朦朧。懶卸釵。無聊啼笑枉多才。探看青鳥沈懽訊。橫臥烏龍本妒媒。  
笙字錯。錦梭迴。肯將心力事妝臺。不知下九還初七。且疊紅牋寄恨來。  
未必芳期未有期。等閒蜂蝶劇嬌癡。側商小令翻新水。卷地狂香發故枝。  
風雨裏。苦禁持。有人低唱比紅兒。總知滿樹金鈴繫。未省秋人落葉悲。  
歷劫相思信不磨。親將雙帶綰香羅。未灰蠟苴拚成淚。垂絕鷓絃忍罷歌。  
休躑躅。已蹉跎。珊瑚拗折負恩多。人間會有相逢事。奈此青春悵望何。

望江南 雜題我朝諸名家詞集後

湘真老。可代殿朱明。不信明珠生海嶠。江南哀怨總難平。愁絕庾蘭成。風翥山  
蒼梧恨。竹淚已平沈。萬古湘靈聞樂地。雲山韶濩入悽音。字字楚騷心。王船山  
爭一字。鵝鴨惱春江。脫手居然新樂府。曲中亦自有齊梁。不忍薄三唐。毛大可  
雲海約。明鏡已秋霜。但願生還吳季子。何曾形穢漢田郎。歸老有鱸塘。顧梁汾

迦陵韻。哀樂過人多。跋扈頗參青兕氣。清揚恰稱紫雲歌。不管秀師訶。陳其年  
江湖老。載酒一年年。體素微妨耽綺語。貪多寧獨是詩篇。宗派浙河先。朱竹垞  
蘭鐫貴。肯作稱家兒。解道紅羅亭上語。人閒寧獨小山詞。冷煖自家知。納蘭容若  
消魂極。絕代阮亭詩。見說綠楊城郭畔。游人齊唱冶春詞。把筆儘淒迷。王貽上  
留客住。絕調鷓鴣詞。脫盡詞流薌澤習。相高秋氣對南山。駸行波前。曹升六  
長水畔。二隱比龜溪。不分詩名叨一饌。居然詞派有連枝。人道好壘籬。李武曾李分

虎

南湖隱。心折小長蘆。拈出空中傳恨語。不知探得領珠無。神悟亦區。厲樊榭  
回瀾力。標舉選家能。自是詞源疏鑿手。橫流一別見淄澠。異議四農生。張皋文  
金鍼度。詞辨止庵精。截斷衆流躬正變。一燈樂苑此長明。推演四家評。周保緒  
舟如葉。著岸是君恩。一夢金梁餘舊月。千年玉筍有歸雲。片席蛻巖分。周穉圭  
無益事。能遣有涯生。自是傷心成結習。不辭累德爲閒情。茲意了生平。項蓮生

娛親暇。餘事作詞人。廿載柯家山下客。空齋畫扇亦前因。成就苦吟身。嚴九能  
秋醒意。抱碧契靈襟。生長菖蘭工雜佩。較量台鼎讓清吟。欣戚導源深。王壬秋陳伯  
毀

甄詩格。凌沈幾家參。若舉經儒長短句。巋然高館憶江南。綽有雅音涵。陳蘭甫  
皋文說。沉澗得莊譚。感遇霜飛憐鏡子。會心衣潤費鑪煙。妙不著言詮。莊中白譚復  
堂

窮途恨。斫地放歌哀。幾許傷春憂國淚。聲家天挺杜陵才。辛三賊中來。蔣鹿潭  
香一瓣。長爲半塘翁。得象每兼花外永。起孱差較茗柯雄。嶺表此宗風。王佑震  
招隱處。大鶴洞天開。避客過江成旅逸。哀時無地費仙才。天放一閒來。鄭叔問  
閒金粉。曹鄴不成。拔戟異軍成特起。非關詞派有西江。兀傲故難雙。文道希  
雙飛翼。悔殺到瀛洲。詞是易安人道韞。可堪傷逝又工愁。腸斷塞垣秋。徐湘蘋

又 意有未盡再綴二章紅友之律順卿之韻皆稱詞苑功臣新會陳述叔

臨桂況夔笙。並世兩雄無與抗手也。

談聲律。詞筆此權輿。翻譜竹枝歸刃度。重雕藁斐費爬梳。持配紫霞無。雕蟲手。千古亦才難。新拜海南爲上將。試要臨桂角中原。來者孰登壇。

小重山 晚過黃渡

過客能言隔歲兵。連邨遮戍壘。斷人行。飛輪衝暝。試春程。回風起。猶帶戰塵腥。日落野煙生。荒螢三四點。淡於星。叫羣創雁不成聲。無人管。收汝淚縱橫。

齊天樂 乙丑九日庸庵招集江樓

年年消受新亭淚。江山太無才思。戍火空邨。軍笳壞堞。多難登臨何地。霜飄四起。帶驚鴈聲聲。半含兵氣。老慣悲秋。一尊相屬總無味。登樓誰分信美。未歸湖海客。離合能幾。明日黃花。清晨白髮。飄渺蒼波人事。茱萸舊賜。望西北浮雲。夢迷醒醉。並影危闌。不辭輕命倚。

高陽臺 除夕閩生宅守歲

藥裏關心。梅枝熨眼。年光催換天涯。綵勝迷離。忘情紅入燈花。常時風雨聯牀地。付冷吟、閒醉消他。更休提、束帶鳴雞。列炬飛鴉。驚心七十明朝是。甚兩頭老屋。舊約長賒。醉倚屠蘇。寧知肝肺槎枒。干戈滿目。悲生事、對阿連、休話無家。卻因依、北斗闌干。凝望京華。

一叢花 雨過廢園見杏花

雲陰如墨。罨頰垣。勻注錦成斑。誰言窈窕宜宮體。夢不到、飄麝闌干。消息雨聲。無人報與。各自度春寒。背飛雙燕。著花端。欲語會人難。芳春似客垂垂老。斷無分、迴汝頰顏。悵悵壞妝。消磨閒醉。應勝醒時看。

定風波 丙寅九日

過眼黃花七十場。無詩負汝只傾觴。老去悲秋成定分。纔信。使無風雨也淒涼。已自樓筋力減。多感。鴈音兵氣極滄江。搖落萬方同一概。誰在。闌干閒處戀斜陽。

鷓鴣天 簡蘇堪時將營壽藏丐其書碑碑曰彊邨詞人之墓

敢學邠卿畫古圖。卻師表聖構元廬。頭皮留在還看鏡。心力拋殘但覆瓿。 螻蟻飽。  
馬牛呼。姓名官職總區區。豐碑幾許征西字。消得先生點筆無。

隔浦蓮近 非園盆荷秋放一花感賦

鴛鴦涼夢過了。秋被西亭窈。罷舞霓裳隊。明年約紅情繞。霞豔妝避曉。湘娥笑。倩影  
凌波小。爲花惱。西風嫁晚。房空心苦顛倒。閒鷗冷覷。分共涉江人老。塵鏡破。粲賸  
自照。淒調。雙葉流怨多少。

瑞鶴仙

雨懷淒不斷。又西風、飄送離行江鴈。衰燈耿虛館。正慵拋書帙。病疏醪盞。孤悰易倦。  
付相思、春灰宛轉。料沈鱗不寄。芳音怨入。最高樓畔。須念帶圍寬窄。篝被寒溫。鏡  
鑿深淺。無人看管。誰料理。夢雲亂。怕羅帷燭背。玉釵敲著。不省天涯淚眼。算青驄便  
有來時。歲華漸晚。

六醜 吳門聽楓園僦舍十年來三易主人矣戊辰閏春偶過其地海棠一樹

摧抑可憐淒對成詠

料芳姿記省。護燭底、輕陰池閣。夜深照妝。妝成春妒卻。鉛黛零落。夢繞鞦韆地。臥枝紅。嬾暈錦圍成幄。嬌多叵耐金鈴索。淚點冰綃。顏酡羽爵。十年舊香依約。甚偎闌一餉。情緒還惡。銀屏珠箔。奈孤根誤託。海燕移家慣。無駐泊。綠章負了前諾。有幽單萬感。阿環能覺。相思斷。錦城天角。纔知道。薄倖東風。不管等閒哀樂。斜陽瘦。猶戀紅萼。怕繚牆。亂水飄花。無人念著。

丹鳳吟 寄懷陳述叔嶺南

俊賞霜花腴譜。韻起孤絃。秋蓬書客。蘭茝盈抱。宜稱賦情南國。歌成鬢改。老懷慵問。度厄鶯花招人蘿薜。口著閒身句裏。未忍傷春。春去留淚沾臆。卻遣天涯悵望。暮雲頓合無燕碧。袖底瑤華滿。晦雞鳴風雨。心素能惜。滄洲期在。落月照梁顏色。蔓草王風身世感。共低垂頭白。幾時把臂。迎夢江路識。

宴山亭 蒼蚪遂於詞復喜繪事一日得宣和御筆牡丹曰此詞皇畫也爲書



詞皇閣以榜其齋

傾國春姿。金屋弄妝。照鬢嬌霞添嫵。朱帔翠瓔。蘸筆天香。彈壓洛陽新譜。換劫燕脂。尚皴染。瑤臺風露。分付。伴流落胡沙。杏花詞句。曾是端冕羣芳。又玉案宮綃。盡情擡舉。銜花鹿去。挂榜人來。依稀朵雲縈護。幾闋清平。應未稱。倚聲家數。愁佇。紅萼久。無人爲主。

好事近

賦朱庵臺桂。桂爲明季一老尼。手植枝柯。四周繆結累八九層如浮

屠狀庵在秀州南堰

遺世廣寒仙。香界別開蟾戶。一例恆沙劫換。比月盤松古。色身不礙被黃繩。糝地碎天布。遮莫窮檐薪盡。供籜龍斤斧。盤山天成寺有松一株形如累盤土人呼爲月盤松

隔溪梅令

己巳元日賦示詰禪

換年簫鼓沸鄰東。故情空。鏡裏凋顏。不媚燭花紅。思悲今已翁。閒門芳信比人慵。

問東風。留命傷春。深淺酒杯中。去年同不同。

花犯 巢園櫻花周梅泉索賦

鞞輕陰。娥娥怨粉。東風滯沈醉。萬姝嬌睇。渾未譜羣芳。催賦多麗。倚天照海。搖花氣。仙雲臨鏡起。問島客。移根何許。闌干心萬里。南飛寄棲一枝安。藏春處最好。玉窗閒地。香夢穩。渾不羨。絳都芳事。愁心託。晚鶯細語。遮莫到。東鄰妍。睩裏。要障取。十圍宮錦。金鈴從料理。

過秦樓

雨澈蟬音。葉溫禽夢。竟日水窗吟斷。題門字少。坐佛齋空。著意玩他鑪篆。多事料理閒身。期客繩牀。憎人腰扇。要披襟獨往。棲心閒地。自饒疏散。休再說。賜葛含風。傾杯承露。夢繞翠寒亭畔。流塵巷色。飄鼓街聲。不稱曳筇心眼。樓望簾櫳未燈。連海元雲。雲涯人遠。坐清宵不去。禁慣單衣露點。

木蘭花慢 感春和蒼蚪

問東闌瘦雪。尙消得。幾清明。是拆繡樓臺。差池燕羽。佻巧鳩鳴。金鈴未知繫處。更蒼苔顛倒。藉紅英。禁斷尋芳意緒。交加中酒心情。多生有客惜香盟。愁檢瘞花銘。漸數盡番風。強扶倭墮。還忍伶俜。陰晴問春未準。怕到頭。開落總無聲。夢裏催歸杜宇。香車不勸逢迎。

南鄉子

病枕不成眠。百計湛冥夢小安。際曉東窗鷓鴣喚。無端。一度殘春一惘然。歌底與尊前。歲歲花枝解放顛。一去不回成永憶。看看。惟有承平與少年。

菩薩蠻

溫溫藥鼎蟲吟細。倦懷不問殘燈事。江鴈破愁眠。薄帷褰曉寒。壺觴疏點檢。酒病秋深淺。不用忖腰圍。新來羅帶垂。

齊天樂 蒼蚪赴天津寄示渡海四十韻倚歌賦答

麻鞋一著無歸意。滄溟縱心孤往。盡室裝寒。循涯客返。離恨秋潮同長。行吟飢餓。要

留命桑田。故躔迴向。自理哀絃。北征誰省。杜陵唱。回風獨樹漸晚。去舫攀未得。歧路惆悵。鼓角中原。煙波大澤。何地堪盟息壤。孤光近傍。勝愁臥荒江。白頭吟望。夢款音書。度樓南鴈響。

又 惜仲別六年矣。枉句見懷。率酬一解。

孤臣江海湛冥後。心肝十年歸奉。杜老麻鞋。冬郎畫燭。長結觚稜昔夢。吳鉤坐擁。肯老去銷沈。向來飛動。鼓側乾坤。不辭辛苦日華捧。白頭輕賦去國。路歧終古意。拚倒芳甕。斗北攀依。周南濩落。千里月明仍共。疏麻折送。尙著意盟鷗。歲寒珍重。越客吟成。病肩霜夜聳。

芳草渡 還鄉未旬。旋復別去。經碧浪湖作。

滴夢雨。又漲綠霜波。細塵麴灑。照落楓臨岸。丹黃對展巖畫。林表蟾鏡挂。迎扁舟東下。漸歲晚。繾綣寒卮。卻背鄉社。牽惹酒悲頓起。倦理雙溪漁隱話。便贏取。青山落手。沈吟釣竿把。蕩人海氣。恣曼衍。魚龍修夜。問其日。細聽回帆鼓打。

石湖仙 味攬翁載舊燕討春鄧尉歸贈梅枝翛然如見似人也

風懷消盡。漸拋斷年時。西崦香訊。誰爲小紅簪。理詩狂、鷗夷起趁。煙蘿攜手。想並照、清泉紅粉。無分。伴翠禽、紙帳啼引。月明暗香動處。散江城、笛中舊恨。凍驛黃昏。定怯玉肌皺損。竹外枯苔。雪邊衰鬢。款春成韻。花夢穩。清寒夜永須忍。

倦尋芳 題映盦藏大鶴山人詞墨

斷銘鶴蛻。零楮蟬棲。芳卷誰理。頭白傷春。詞客有靈孤寄。恨墨香沾新篋。衍哀絃。心在閒宮徵。舊江南。怕湖山劫換。倚聲無地。好看取、叢殘收拾。一樣生平。雲海愁思。細素連情。中有楚蘭閒淚。珠玉故多。臨水感。文章何止藏山事。待招魂。小城隈。笛聲不起。

東坡引 庚午歲除

拖筇慳雪霽。探梅誤年例。一鑪商陸閒窗底。曹騰惟有睡。曹騰惟有睡。椒花罷頌。屠蘇無味。更禁斷、宜春字。鄉兒解叩承平事。新年明日是。新年明日是。

浣溪沙 元夕枕上作

連夕東風結苦陰。通明簾幕卻偎衾。病軀無復酒懷侵。止藥強名今日愈。探芳越減去年心。月華人意兩冥沈。

瑞鶴仙 庚子歲晏賦此調寄悔生長安今三十年矣悔生垂老無家留滯舊

京欲歸不得倚聲寄憶重依美成高平調報之

處幽篁怨咽。凝望裏。一鏡綠愁白髮。無家更傷別。倚新聲猶戀。前塵茗雪。桑田坐閱。任輦紅。灰外換劫。賸行歌汐社。儲稿史亭。此恨銷骨。莫道長安倦旅。再拜啼鵲。夢迷行闕。神州涕雪。卅年事。寸腸折。怕登樓眼底。流紅無地。江南芳草頓歇。解傷心故國。淮水夜深片月。

三姝媚 寒食梵王渡園作

閒芳明倦眼。帶餘寒林亭。冶春過半。笑靨臨池。有露桃依舊。避人妝面。佇立妍香。花信與。東風俱換。野水鱗鱗。不上金杯。茗懷深淺。隨地登樓能慣。便冷節相攜。暗愁

輕遣報答風光。要水滸煙次。小詩尋徧。輒腳行芳。明日事，筇枝先嬾。坐久夕陽逾好。歸輪漫轉。

漢宮春

真茹張氏園杜鵑盛開後期而往零落殆盡歌和榆生

淒月三更。有思歸殘魄。啼噉能紅。傷春幾多淚點。吹渲闌東。綰巾搵溼。試潮妝、微發瓊鍾。新敕賜一窠瑞錦。昭陽臨鏡猶慵。攜榼卻慳才思。惹津橋沈恨。撩亂花茸。芳華慣禁閒地。不怨東風。鶴林夢短。委孤根、竹裂山空。三嗅拾馨香細泣。何時添譜珍叢。

渡江雲 望蒼蚪不至倚此致懷

春裝喧遠素。倚樓倦睫。鴈外數南程。舊京花事減。去住無端。坐閱柳條青。催人怨鵝。背夜月、啼到無聲。何計尋、白頭料理。聚散隔年情。消凝。鑪煙依戀。藥裹流連。分萍蓬不定。渾未忘、延秋湖舸。話雨牀燈。心魂老去須相守。辦歲寒、尊酒平生。吟望苦。終期共惜伶俜。

風入松 病閒戲述

鬢絲微颺藥煙塵。倚病得修薰。浮生已覺蘧蘧夢。賸佛香、一分隨身。亂帙匡牀坐擁，依然棲穩秋魂。公言難得綠衣新。天厭苦吟人。扁舟出世非吾惜。問挂帆、底事逡巡。鴈外驚波滿目，後期多定無津。

應天長 海綃翁客秋北來坐我思悲閣談詞流連浹旬吳湖帆爲作圖餞別翁示新章借其起句答之

王風蔓草歧路亂花。萍蓬逝水遲合。老去庾郎蕭瑟。相思素箋疊。哀時意。慳問答。漫料理。曼吟囊篋。夢回處。一笑南雲。卷送帆葉。同抱歲寒心。舊賞新歡。絃外最清發。作弄斷鴻蹤迹。涼風動天末。芳馨在。雙醉頰。悄未隔。美人明月。待飛蓋。共酌前修。隨分閒業。

鷓鴣天 辛未長至口占

忠孝何曾盡一分。年來姜被減奇溫。眼中犀角非耶是。身後牛衣怨亦恩。泡露事。水雲身。枉拋心力作詞人。可哀惟有人間世。不結他生未了因。



蕙風詞

運彭



況周頤（咸豐九——民國一五）

字夔笙。號蕙風。廣西臨桂人。初名周儀。以諱清。宣統溥儀名。改周頤。九歲補博士弟子員。光緒己卯舉人。官內閣中書。與王鵬運同問詞於江寧端木埰。嘗切磋於半塘古微。所作詞。頓挫排盪。柔厚沈鬱。千辟萬灌。略無鑪錘之迹。而又嚴於守律。一聲一字。悉無舛訛。雖闊大不及古微。而綿密則過之。其論詞尤工。細入毫芒。發前人所未發。蕙風詞話其最著者也。此外又有香海棠詞話。餐櫻廡詞話等。

跋

吾師臨桂況先生自定詞。曩與歸安朱先生詞合編爲鶯音集者。名薰風琴趣。前於丁巳夏秋間仿聚珍版印行。僅二百本。未足廣其傳也。客歲尊嶽校刻薰風詞話斷手。亟請並刻自定詞。纒屬以行。詞凡若干閱。視曩編琴趣增益無多。吾師詞可傳者。寧止此數。蓋從嚴格矜慎之至也。自卷下握金釵。迄霜花腴。並辛亥國變後作。撫時感事。無一字無寄託。蓋詞史也。昔人謂蘇文忠才大如海。其爲詩無不可賦之題。無不可用之典。吾師之於詞亦然。晚歲避地滬濱。鬻文爲活。滬人士對於吾師。無論知與不知。咸欲得一詞自增重。於是乎吾師之詞之題。乃至陸離光怪。匪夷所思。求之前人集中。殆未曾有。而其詞益妥帖易施。題不足爲詞病。而皆爲自定詞所不取。其它驚才絕艷之作。蚤歲克副盛名。中年用自排遣者。吾師之所吐棄。它人得其一二。以之收名定價而有餘。則夫自定詞之風流自賞。寸心千古。豈偶然哉。並世承學之彥。受而讀之。於格調旨趣氣息閒深闊其得力之故。由門徑而塗轍。而堂奧。一一與

詞話相印證。而歧趨與時習。末由而中之。則庶幾蘭畹金荃。去人不遠矣。乙丑閏四月下沐。受業武進趙尊嶽謹跋。

# 蕙風詞

臨桂 況周頤 夔笙

## 齊天樂 秋雨

沈郎已自拌顛顛。驚心又聞秋雨。做冷欺燈。將愁續夢。越是宵深難住。千絲萬縷。更攙人蟲聲。攪人情緒。一片蕭騷。細聽不是故園樹。沈沈更漏漸咽。只檐前鐵馬。幽怨如訴。儻是殘春。明朝怕有無數飛花飛絮。天涯倦旅。記滴向篷窗。更加淒苦。欲譜瀟湘。黯愁生玉柱。

## 南浦 六月二十八日葦灣觀荷同幼遐前輩

幽路入花天。鬧紅深、恰共中仙乘興。花外小紅亭。無人到、亭外綠陰千頃。疏煙澹日。木蘭愁絕。餘香凝。惜起青黃顛。葉曾共、嫋婷窺影。無邊香色。年年算鴛鴦。慣識。枝交蒂並。年少冶游心。飄零後、禁得萬蟬淒哽。歡娛謾省。碧雲日暮。頗黎冷。十二迴闌腸斷處。依約凌波來凭。

臨江仙 前詞意有未盡再呈幼遐前輩

正是撩人天氣也。可憐雲澹煙輕。鬧紅深處見娉婷。花光人影。分占十分清。畫裏歸來愁亦好。何須夜飲秦箏。他年記取小紅亭。小紅亭外。高柳萬蟬聲。

鶯啼序 葦灣之游與半唐老人一再酬和意仍未盡復拈此解清游難得不覺言之鄭重也

輕陰半湖翠罨。想臨妝媚嫵。鏡奩遠。一抹愁痕。鬧紅誰在深處。謾幽憩。銀箋按拍。指幼丈高陽臺。涼蟬喚入花閒去。甚香風。別樣溫柔。澹搖洲渚。故故來遲。傍柳畫舸。似凌波未許。翠隄外人各天涯。曲闌應向凝佇。只娉婷。紅衣倒影。記愁絕。中仙說與。露房擎。青子離離。爲誰心苦。菱花自小。葦葉長愁。紫萍是墜絮。問併作。幾多紅怨。畫裏回首。卻又盈盈。未開剛吐。芳塵去後。蘅皋悽斷。非花非霧。情何極。錦鱗多恨。字難分付。涼雲十里。鴛鴦不是催歸。有人玉韉愁駐。逢花最惜。見說爲花。便有花暗妒。向此際。揭天絲管。跪地簾櫳。一任微波。鑿人幽悵。風裳水佩。羅衣紈扇。年年花好。

人暗老。望蓬山、腸斷花知否。蹋搖細槳聲中。路入疏煙，似聞怨語。

念奴嬌

憶南湖舊游。用朱小岑先生依真漂帛塘觀荷韻。

長卿游倦。恰年時、畫裏都是愁中。湖上大堤堤上路。天涯見說能通。流水三生。淩波一霎。嬌眇隔香紅。垂楊踈地。那時亭北。闌東。誰念芳字題殘。紅牙拍徧。換羽更移。宮目送橫塘天樣闊。香霧何事惺忪。一葉顰秋。萬花妝晚。腸斷到東風。鴛鴦在否。夢雲猶帶疏鐘。

高陽臺

舊苑鴉寒。荒皋雁瘦。吳霜正染青袍。載酒江湖。十年吹斷瓊簫。玉梅花下相思路。算而今、不隔三橋。怨良宵。滿目繁華。滿目蕭條。紅箋枉費珍珠字。甚江關詞賦。不抵金貂。門外垂楊。要他來繫征橈。金尊自倒休教勸。怕天涯、回首魂消。碧迢迢。玉宇瓊樓。絳鶴難招。

永遇樂

吳坊本事和漱玉

慘碧山塘。畫船只在。消淚多處。坐柳移尊。凭梅駐笛。相見應暫許。紅羅嫌窄。金鈴愁重。底是妒花風雨。最惆悵。驚鴻散後。夢雲更迷春侶。可憐昨夜。畫樓西畔。望斷星點三五。鈿小花羞。匳低月怨。歌態誰楚楚。頽鱗難託。紅蠶更縛。可奈杜鵑催去。江南客。傷心弟一。四絃倦語。

法曲獻仙音 金閨寒夜和夢窗

殘月闕尊。凍雲沈笛。況是天涯庭院。燭淚紅深。枕絳香薄。傷心畫譙清點。伴夢短。梅花冷。玄禽語春怨。玉容遠。也應憐。杜郎落拓。悲錦瑟。絃柱暗驚淚染。宛轉碧淞潮。共垂楊。縈恨難翦。鳳紙題殘。奈雲邊。珠佩聲斷。拌塵消鬢綠。萬一跨鸞低見。

減字浣溪紗

綵勝斂頭故故斜。垂楊深巷。秦娘家。惜花人更瘦於花。眉黛可憐虛夜月。臉紅從此斷朝霞。傷心一語抵天涯。

早梅芳近



海棠春。芙蓉晚。特地明妝換。銀鸚呼酒。拚得相思更相見。坐慵鬟翠重。笑怯眉青淺。近尊前小立。無語杏衫蒨。紫鸞簫。丹鳳瑄。金粉江南怨。仙山樓閣。不抵人閒繡簾遠。瘦花鶯易妒。倦柳驄難戀。醉扶歸。鷓鴣殘月滿。

減字浣溪紗

重到長安景不殊。傷心料理舊琴書。自然傷感強歡娛。十二迴闌凭欲徧。海棠渾似故人姝。海棠知我斷腸無。

鳳栖梧 過香鑪營故居

記得天涯揮手去。夢逐征鴻。繞徧東華路。梁燕可知人在否。相逢也莫淒涼語。淚眼更看門外樹。欲斷無腸。苦恨香聰誤。最是不堪回首處。鳳城西去棠梨雨。

菩薩蠻

五更纔得朦朧睡。夢中多少傷心事。殘月亂啼烏。夢回鐘動無。鴛衾空復暖。魂共鑪煙斷。何日是歡期。他生重見時。

青衫溼徧。五月二十四日宣武門西廣西義園。既亡兒小羊墓。是日爲亡姬

桐娟生日

空山獨立。年時此日。笑語深閨。極目南雲。淒斷近黃昏。生怕鶻啼。料玉局。幽夢鳳城西。認伶俜。三尺孤墳。影逐吟魂。繞徧棠梨。念我青衫痛淚。憐伊玉樹香泥。我亦哀蟬。身世十年恩眷。付與斜暉。況復相如病損。悲歡事。咫尺天涯。儻人天。薄福到書癡。便菱花。長對春山秀。祝蘭房。小語牽衣。往事何堪記省。疏鐘慘度招提。

鷓鴣天

苦恨花枝照酒杯。名花誰見老風埃。憑伊滿地飄紅雨。消得春人愛惜來。驚歲晚。又春回。傷心長是強顏開。芙蓉城闕知何處。說到神仙事可哀。

減字木蘭花

風狂雨橫。未必城南芳信準。說起前游。夢繞青篷一葉舟。花枝縱好。載酒情懷都倦了。柳外湖邊。付與鴛鴦付與蟬。

蘇武慢 寒夜聞角

愁入雲遙。寒禁霜重。紅燭淚深人倦。情高轉抑。思往難回。淒咽不成清變。風際斷時。迢遞天街。但聞更點。枉教人回首。少年絲竹。玉容歌管。憑作出、百緒淒涼。淒涼惟有花冷。月閒庭院。珠簾繡幕。可有人聽聽。也可曾腸斷。除卻塞鴻。遮莫城烏。替人驚慣。料南枝明日。應減紅香一半。

金縷曲 八月十八夜記夢

風葉鳴窗竹。黯秋燈、殘更數盡。夢回難續。天上寒於人間否。記伴黔婁幽獨。惶愧煞、年時金屋。底不相逢教傳語。怕相逢、令我悲心目。應念我、瘦於菊。西風等是無情物。說淒涼、人天一例。清寒徹骨。歸去青鸞休相問。珍重菱花香玉。只此恨、平分誰屬。弟一天涯傷心事。有阿侯、夜守秋墳哭。渾未解、訴寒燠。

蝶戀花 八月二十二日遂父招同文石幼遐登西爽閣子美因病不至

西北雲高連睥睨。萬里愁心。一抹遙山翠。誰向西風傳恨字。秋光鬯好人顛顚。有

酒盈尊須拌醉。感逝傷離。何況登臨地。滿目煙蕪殘照裏。青青不盡平生意。

燭影搖紅 臘月二十夜大雪歸自四印齋作

夜話高齋。碎瓊隨步歸來晚。小窗燒燭對梅花。疏影如相款。贏得塵襟暫澣。甚清寒、天涯未慣。料量青鬢。幾許霜華。角聲休喚。風雪年年。舊吟春事成依黯。素娥深鎖凍雲低。幽恨憑誰管。不恨瓊樓自遠。恨華年、無端暗換。怎生消受。明日旗亭。鷓鴣須典。

摸魚兒 甲午中秋

正良宵、玉輪高揭。桂花香墮瑤席。紅樓十二晶簾捲。誰見素娥幽寂。休怨抑。算閱盡清寒、尚有團圓日。持觴太息。問袁渚煙寒。庾樓塵揜。誰與共今夕。凝眸處。大地山河瑩澈。秋容淨掃空碧。柔情一縷渾難訴。便抵雲羅千尺。閒竚立。怕只有流螢來照羅衣溼。嬋娟望極。悵佳節難酬。苦吟誰和。蟲語咽苔隙。

又 詠蟲

古牆陰、夕陽西下。亂蟲蕭颯如雨。西風身世前因在。儘意哀吟何苦。誰念汝。向月滿花香底。用淒涼語。清商細譜。奈金井空寒。紅樓自遠。不入玉箏柱。閒庭院。清絕卻無塵土。料量長共秋住。也知玉砌雕闌好。無奈心期先誤。愁謾訴。只落葉空階。未是消魂處。寒催堦鼓。料馬邑龍堆。黃沙白草。聽汝更酸楚。

唐多令 甲午生日感賦

已誤百年期。韶華能幾時。攬青銅、謾惜鬚眉。試看江潭楊柳色。都不忍、更依依。東望陣雲迷。邊城鼓角悲。我生初、弧矢何爲。豪竹哀絲聊復爾。塵海闊、幾男兒。

水龍吟 二月十八日大雪中作

雪中過了花朝。憑誰問訊春來未。斜陽斂盡。層陰慘結。暮笳聲裏。九十韶光。無端輕付玉龍遊戲。向危闌獨立。綈袍冰透。休道是傷春淚。聞說東皇瘦損。算春人也應顛頓。凍雲休捲。晚來怕見。樓檜東指。嘶騎還驕。棲雅難穩。白茫茫地。正酒香羔熟。玉關消息。說將軍醉。

壽樓春 乙未清明後一日星岑前輩招同會淦半唐游江亭會淦期而不至

賦此調寄懷半唐屬和余亦繼聲起句同用嗟春來何遲五字

嗟春來何遲。恰芳塵散麴。煙渚流澌。此際飄零詞客。倦游何依。悲擘薰愁。牽離似左徒。行吟江涯。恁錦瑟華年。青山故國。回首夢都迷。登臨地。芳菲時。幾紅牙按拍。白袷尋詩。底事尊前雙淚。者回難持。麝香恨。今誰知。賸短碑。淒涼題辭。更不綰春愁。垂楊過籬三兩枝。

減字浣溪紗

風壓榆錢帖地飛。油雲東北走輕雷。銅街車馬未全稀。芳樹總隨幽恨遠。亂雅猶帶夕陽歸。城頭清角莫頻吹。

水龍吟 己丑秋夜賦角聲蘇武慢一闋爲半唐所擊賞乙未四月移寓校場

五條胡同地偏宵警鳴鳴達曙淒徹心脾漫拈此解頗不逮前作而詞愈悲亦天時人事爲之也

聲聲只在街南。夜深不管人顛顛。淒涼和併。更長漏短。殺人無寐。燈炮花殘。香消篆冷。悄然驚起。出簾櫳。試望半珪殘月。更堪在。煙林外。愁入陣雲天。未費商音。無端淒戾。鬢絲搔短。壯懷空付。龍沙萬里。莫謾傷心。家山更在。杜鵑聲裏。有啼鳥見我。空階獨立。下青衫淚。

祝英臺近 示姬人病新瘳

撫清琴。鑽故紙。相伴鎮憐汝。拂拭盤龍。珍重淡眉嫵。綠窗對影伶俜。侵荅味好。道都是檀奴心苦。虎山路。料應綠徧垂楊。和煙萬千縷。是汝鄉關。是我舊游處。恁時重繫蘭橈。紅牙按拍。爲低唱。酒邊詞句。

蝶戀花

門掩殘春風又雨。著意尋春。商略年時誤。吹咽瓊簫儂自苦。消魂弟一流鶯語。滿地梨花啼杜宇。春便歸休。儂定歸何處。萬種春愁誰與訴。畫船艤徧桃根渡。

握金釵

鐵笛倚層樓。天涯怨芳草。定巢新燕能道。畢竟無塵是壺嶠。花作伴。海流愁。人未老。竟夕聽笙歌。根根甚時曉。翠尊莫惜頻倒。沈醉東風夢長好。春黯黯。事茫茫。難自料。

蝶戀花

柳外輕寒花外雨。斷送春歸。直恁無憑據。幾片飛花猶繞樹。萍根不見春前絮。往事畫梁雙燕語。紫紫紅紅。辛苦和春住。夢裏屏山芳草路。夢回惆悵無尋處。往

摸魚兒

又恁恁。紅桑閱盡。天涯無恙芳節。垂楊幾費黃金縷。得似寸腸縈結。芳草歇。見無數。殘紅。錯認啼鵲血。侵尋鬢雪。悵京雒風塵。滄洲身世。容易故人別。仙山迴。信有玉局金闕。人寰下望愁絕。笙歌不破鶯花夢。只是潮聲嗚咽。清怨切。更誰念。五銖衣薄春寒徹。餘香更爇。千萬捲珠簾。斜陽過也。著意看新月。

臨江仙 子大來申詞事雲涌臨江仙連句八闋極掩抑零亂之致訥翁和之



余亦疊韻晨夕素心之樂身世斷蓬之感固有言之不足者

老去相如猶作客。天涯跌宕琴尊。上階難得舊苔痕。簾深春夢淺。香冷夕陽溫。拾

翠心情消歇盡。東風不度蘭蓀。言愁天亦欲黃昏。斷魂芳草外。何止憶王孫。

一桁湘簾塵不到。除非燕子歸來。吳天暢好碧於苔。月娥瓊駕出。流照輓金杯。明

日晴陰君莫問。迴燈又見花開。非花非霧卽蓬萊。鄰娃工度曲。絃管未須哀。

約略琵琶商婦怨。春花秋月蹉跎。貂裘換後峭寒多。江山敲枕夢。風雨缺壺歌。明

鏡曉霜羞短髮。負它雲髻蛾蛾。相逢切莫誤橫波。雍門成舊曲。無計惜韓娥。

楊柳樓臺花世界。嘶驄只在銅街。金荃蘭畹惜荒萊。無多雙鬢綠。禁得幾低徊。暖

不成晴寒又雨。昏昏過卻黃梅。愁邊萬一損風懷。雁箏猶有字。蠟炬未成灰。

往事秦淮流不盡。權歌淒斷吳艫。揭天風色帶潮青。斜陽非故國。名士又新亭。乞

與相思紅豆子。消磨記曲銀屏。雲階月地各飄零。扶花成醉纈。仗酒破愁局。

畫舫重溫羅綺夢。捲波風急誰知。江南大好惜年時。水香山媚嫵。花靨柳腰肢。可

有青衫供換淚。故人消息還疑。倚闌心事絕淒其。長亭霜後葉。辛苦又辭枝。  
西北樓高雲海闊。嘯歌猶是狂生。閒愁莫誤酒杯行。多情應笑我。皺水底干卿。  
過  
眼鶯花成昨夢。夢回省識飄零。癡龍作雨亦慳晴。吹寒清角怨。何況帶潮聽。  
危坐促絃絃轉急。新愁舊恨難論。秭歸啼血到吳根。有樓皆蜃市。無地著桃源。  
劫  
外琴書須位置。要它相守心魂。少留清氣在乾坤。珍珠休換字。金粉易成塵。

滿庭芳

簾押寒輕。窗茸暝重。一院濃綠無人。空梁舊燕。來伴倦吟身。又是荼蘼過也。銅駝陌。  
軋軋香輪。東風裏。殘花藉草。何處更飄茵。前塵如昨夢。金觴玉柱。鶴嶺龍津。念飄  
零投老。惆悵逢春。便有桃源。忍問。不知漢。畢竟知秦。天涯路。關河寸寸。一寸一傷神。

玉樓春

金猊香冷羅衣薄。鶉鴂聲中風雨惡。玉奴羯鼓悔催花。花若遲開應未落。垂楊只  
在闌干角。纔隔垂楊便天各。闌干憑到落花深。寒食清明孤負卻。

瑞龍吟 甲寅暮春得子大湘中書附贈別詩倚此卻寄

滄洲路。無恙昨夢鶯花。故人雞黍。垂楊西北高樓。研箋漉酒。相望隔雨。黯離緒。容  
易綠鶻啼徹。玉驄嘶去。停琴極目湘天也。應念我。絃清調苦。詩事煙波江上。贈別  
詩作於大通舟次。落霞回首。浮雲羈羽。緜佩楚蘭情芳。珍重魚素。危闌佇立。斜日風  
催絮。還淒斷。青冥海色。黃昏潮語。別後消魂處。更誰問訊。吟邊月露。禁得春寒否。憑  
舊燕。商量和愁同住。茂陵鬢雪。不關遲暮。

沁園春 綠櫻花弟三詠

東都妙姬。蕪城賦句。南都石黛。玉臺新詠。序句傾國傾城。恁宜笑。宜顰。盈盈晚翠。如  
煙如夢。冉冉春青。妒煞鸚哥。誤它鳳子。照影前池。澹不勝芳菲節。倩碧雲捧出。天外  
飛瓊。多情更惜殘英。只點上蒼苔。辨未曾算。何必成陰。總然蔥蒨。忍教結子。如此  
娉婷。中國櫻花不繁。而實日本櫻花繁而不實。淺暈鄉愁。濃分海色。回首東風。弟幾  
町花知否。念荷衣慘綠。似我飄零。

燭影搖紅 甲寅除夕

問訊梅花。蚤春消息殘寒外。小窗兒女自團圓。幽恨憑誰解。往事思量莫再。隔朦朧、金鑪翠靄。爲誰詩鬢。苦恨消磨。年年春在。鬯好屠蘇。引杯不分愁如海。椒紅柏綠。總依然。誰念朱顏改。夢裏風雲萬態。作蘭夜、笙歌一派。此時情味。減了年時。東陽腰帶。

高陽臺 和漚尹社作韻我非社中人也

網戶斜曛。銅街薄暝。窺人柳眼猶青。幾換晴陰。東風又綠林亭。流鶯勸我花前醉。怕花枝、萬一多情。最愁人、何處高樓。今夕殘箏。韶華不分成蕭瑟。奈江關庾信。略約平生。戲鼓錫簫。尊前儘費春聲。蘼蕪特地傷心碧。算年年、總負清明。更何堪、舊壘紅襟。來話飄零。

減字浣溪紗 余賦櫻花詞屢矣率羌無故實偶閱黃公度日本雜事詩注及

日人原善公道先哲叢談再占此九調時乙卯大暑前一日

爛漫枝頭見八重。倚雲和露占春工。十分矜寵壓芳叢。  
鬢影衣香滄海外。花時人事夢魂中。去年吟賞忒怱怱。

萬里移春海亦香。五雲扶艦渡花王。從教彩筆費平章。  
萼綠華尤標俊賞。綠者尤娟倩藐姑射不競濃妝。徧翻芳譜只尋常。

不分羣芳首盡低。海棠文杏也肩齊。東風萬一尙能西。  
見說墨江江上路。綠雲紅雪繡雙隄。梅兒冢畔惜香泥。

何止神州無此花。西方爲問美人家。也應惆悵望雲涯。  
風味似聞櫻飯好。天台容易戀胡麻。一春香夢逐浮槎。

畫省三休佇玉珂。峨眉寶帶惹香多。錦雲仙路簇青娥。  
似此春華能愛惜。有人芳節付蹉跎。隔花猶唱定風波。

舜水祠堂璨雪霞。廣平鐵石賦梅花。葛薇身世一枯槎。  
紅樹仙源仍世外。綵旛春色換鄰家。過牆蜂蝶近紛拏。

何處樓臺罨畫中。瑤林瓊樹絢春空。但論香國亦仙蓬。未必移根成悵惆。祇今顧影越妍濃。怕無芳意與人同。

且駐尋春油壁車。東風薄劣不關花。當花莫惜醉流霞。總爲情深翻怨極。殘陽偏近舊雲斜。啼鴉說與各天涯。

翦綠裁紅十四詞。昨今兩春爲櫻花賦詞凡十四闕。迷花我合署櫻癡。花能惹淚怕花知。安得爾雲飛綺夢。儘教哀露折繁枝。三山立馬豔陽時。

定風波

未問蘭因已惘然。垂楊西北有情天。水月鏡花終幻迹。贏得半生魂夢與纏綿。戶網游絲渾是冑。被池方錦豈無緣。爲有相思能駐景。消領逢春惆悵似當年。

戚氏 鑿括近作減字浣溪紗詠櫻花九首詞成塵略具所用典其言中寄託與夫言外之意得十之二三而已爲櫻花詞弟十五

倚珍叢。落日掩首海雲東。錦織鸞情粉。含蛾笑。總愁儂。玲瓏占春工。酥搓蕊破一重

重。綠華舊日吟賞。駐馬何似少從容。閨苑環佩。瓊林冠冕。後塵五等花封。算神州載得。西指槎遠。何處相逢。說與俊約仙蓬。江樹玉秀。綺綰岸雙通。餐英侶。飯抄霞起。餅擘脂融。弔驚鴻。畫舸淚雨繁華。燭轉記省番風。帶鶯浪蝶。島日町煙。眼底著意妍穠。舜水祠環繞。憑香豔絕。映帶貞松。怪底星旛未改。付花狂。絮舞暗塵中。劇憐畫省翹冠。翠娥禪鬢。春好人知重。甚醉鄉容易韶華送。風雨橫。多少殘紅。賸倦吟暮色。簾櫳。又芳節。萼雪照春空。作神山夢。瓊枝在手。俛瞰魚龍。

八歸 題張子苾祥齡半篋秋詞

吳霜鬢點。京塵衫色。如夢事往倦說。何堪蠹紙珍珠字。還付九天哀怨。兩潮嗚咽。二十年前分袂地。賸慘黯。銅駝煙月。渭水曲。莫賦招魂。此恨總華髮。賡和年時對影。揮豪珠玉。四印高齋清絕。曩寓都門與子苾半唐連句和珠玉詞於四印齋遠游王粲。少時張緒。荏苒蘭荃摧折。訪滄桑舊雨。我獨中腸杜陵熱。如何許。令威華表。瘦損瓊簫。香詞空半篋。

隔浦蓮近 杭州人來言湖上荷花盛開爲占此調依夢窗體

蕙皋不度佩響。飛夢成來往。畫裏樓臺換。迷金碧千波晃。鷗鷺知悵惘。天機錦未了。雲霞想。影娥上。含情怕問。玉容別久無恙。夕陽芳草。負了紅衣雙漿。香色年年送去浪。休忘。蹋搖歸路妍唱。

風入松 宋徽宗琴名松風

北來征雁帶魂消。夕吹咽寒濤。太清樓畔鷓絃澀。空回首、仙樂層霄。舊譜水雲舟夜。新聲國寶湖橋。杏花詞事翦冰綃。遺恨付桐焦。音官大晟飄零後。風和雨、送盡雲韶。今古人天淒籟。霓裳一例蓬蒿。

故宮風雨咽龍吟。法曲惜消沈。獸香錦幄聞箏後。絲桐語、特地情深。十八胡笳淒拍。九重仙樂遺音。玉笙雞塞夢重尋。客路各霑襟。瘦金零落霓裳譜。朱絃怨、茸母光陰。說與宮聲不返。隴雲啼損雙禽。

蒼官擁仗鳳鸞鳴。篤耨篆香清。百琴堂裏彈薰日。須不讓、黃鵠秋聲。別殿春雷合奏。



先朝靡玉齊名。霜瞳點漆海東鷹。溪絹也飄零。孤臣心事流泉激。知音少。絃斷誰聽。唯有風煙喬木。黃昏吹角空城。  
層樓倚翠。萬松巔。清籟戛湘絃。瓊瑰花石丹霄路。秋濤語。飛墮歌前。轉眼驚颿揭地。斷腸衰草黏天。孟婆無計送歸船。別鵠不堪彈。當筵猶自呼方響。紅鸚鵡。心事殘鶻。淒斷雙聲徵角。河清舊曲誰傳。

西江月 乙卯七月二十五日夢中哭醒口占

夢裏十年影事。醒來半日閒愁。羅衾寒側作深秋。清淚味酸於酒。何處傷心不極。此生只恨難休。眼前紅日在簾鉤。聽雨聽風時候。

多麗 秋雨

碎秋心。斷鴻殘角疏砧。更何堪。瀟瀟颯颯。黃昏付與愁霖。問誰消。蟲聲四壁。知難醒。蝶夢重衾。敗葉階前。孤桐井畔。絲絲渾似淚霑襟。美人隔。紅牆碧漢。塵世自晴陰。重陽近。橫空作暝。見說登臨。鎖姮娥。濃氛慘結。西風消息侵尋。費香添。貌薰恁熱。兼

露滴鶴警還瘖。變徵無端，移宮未穩。鄰家鐵笛入雲深。向此際、違寒避溼。菊釀索濃。樹滄江晚，斜陽回首，恨滿煙林。

紫萸香慢 九日再賦

凭危闌、茱萸愁把。作寒野色淒迷。拌一回扶醉，便消得、夕陽西。信是無風無雨，甚寥天鴻唳。夢壓雲低。笑劉郎、恁日、搦管怯糕題。指峻路、有人手攜。秋期省記，疑非顰欲損、遠山眉。算黃花、晚晚閒情得似。陶令東籬。可無白衣人至。最醒處、易成悲峭。西風未妨吹帽。茂陵絲鬢。誰惜綠減霜欺。清淚自持。

最高樓 雨夕餞秋

風和雨。嗚咽似驪歌。芳節惜蹉跎。高樓何況聞鴻雁。重衾生怕夢山河。說傷心、應更比送春多。鐘未到、尚餘梧幾葉。更欲斷、最憐花寸蠟。霜晚晚、鬢消磨。西風樹到無聲苦。東籬菊亦奈愁何。賸淒清、今夕也、等閒過。

鷓鴣天

如夢如煙憶舊游。聽風聽雨臥滄州。燭消香燼沈沈夜。春也須歸何況秋。書咄咄。索休休。霜天容易白人頭。秋歸尚有黃花在。未必清尊不破愁。

又 得明正德補版元本爾雅殘破特甚補綴成編賦此題後

老向書叢作蠹魚。病餘還補蠹餘書。劇憐風雅彫殘甚。怪底經生故訓疏。風雨外。閉門居。一編能遣幾居諸。尋常豹鼠何難識。未必終童我不如。

徵招 漚尹將之吳門有書來云雖小別亦依黯也賦此報之

清琴各自憐孤倚。停雲總成消黯。後約幾情深。比黃花香淡。客襟淒萬感。算霜月。一秋分占。見說將離。綠蕪愁到冷吟闌檻。點檢浣花箋。珍珠字。天涯更無人念。咫尺翠隔吳雲也。難爲別暫。不辭青鬢減。只尊酒。再攜須釀。兩潮語。寂寞滄洲。更雁驚寒漸。

玲瓏玉 元姚雲文字聖瑞高安人有江村遺稿當是倚聲專家紫萸香慢玲

瓏玉皆自度曲聲情悱惻饒絃外音余極喜之今年九日旣賦紫萸香慢寒宵無聊更仿此調聖瑞詠雪余則詠霜此題蓋塵有作者

無恙危闌染秋色。一夕誰知。林疏日薄。作寒那更天涯。惱亂丹楓醉舞。甚嬋娟青女。猶鬪華姿。淒其。虧荒城。侵曉角吹。慢惜何郎鬢綠。念江山金粉。一例成悲。嬾具鸚裘。向東籬。且看寒枝。葭蒼伊人何處。使咽盡。孤琴促節。雅操貽誰。錦書滯。悵南樓。驚雁過遲。

南鄉子

秋士慣疏蕭。典盡鸚裘飲更豪。況有鸞笙丹鳳瑄。良宵。不放青燈照寂寥。一笠一詩瓢。隨分滄洲聽兩潮。何止黃花堪插帽。嬌嬈。江上芙蓉亦後彫。

曲玉管 憶虎山舊游

兩槳春柔。重闌夕遠。尊前幾日驚鴻影。不道瓊簫吹徹。淒感平生。忍伶俜。杳杳蘅皋。茫茫桑海。碧城往事愁重省。問訊寒山。可有無限傷情。作鐘聲。換盡垂楊。只縈損。天涯絲鬢。那知倦後相如。春來苦恨青青。楚腰擎。抵而今消黯。點檢青衫紅淚。夕陽衰草。滿目江山。不見傾城。

醉翁操 一九初交寒消未幾海濱風日饒有春意天時人事我愁如何倚此

索隘庵孟劬漚尹和

淒然春妍含暄。渺風煙堪憐。南鴻爲誰愁驚寒。雪明霜暗何天。憑畫闌。有恨付無言。  
隔輦紅幾家管絃。豔陽錯認。生怕啼鵲。玉鍾翠袖回首承平少年。花有香而歌前。  
柳有陰而吟邊。何因青鬢斑。多情無韶顏。阻夢萬千山。亂雲殘照春忍還。

浣溪紗 漚尹往還蘇滬閒蟾不再圓驪輒一唱感時惜別情見乎詞  
身世滄波夕照邊。總然相見亦相憐。那更垂楊偏不繫木蘭船。莫向天涯輕小別。  
幾回小別動經年。蚤是無多雙鬢綠。況霜天。

金縷曲 海上秋深炎景逾庚伏感拈此解

天也因人熱。甚秋風、年年容易。者回奇絕。燄燄燒空雲如火。占斷滄溟空闊。卻付與、  
亂蟲騷屑。空谷斷無人倚竹。笑梧桐、何苦知情節。誰障扇。庾樓月。燠涼也作滄桑。  
閱便尋常。天時人事。而今休說。門外風沙驕陽路。珍重填胸冰雪。問襜褕、何如吾拙。

推枕總然無好夢。又朝暾、紅似殘鵲血。愁極目、且晞髮。

定風波 中秋集愚園爲彊村補祝

淨洗塵氛一雨涼。中秋天氣日猶長。把酒祝君千萬壽。知否。天教留眼看紅桑。莫負名園今夜月。清節未花。桂葉亦芬芳。更撼玉笙鏗鐵板。休管。綠陰深處萬蛩螿。

玉燭新 重陽近矣倚此爲寒花問

光陰簪菊近。費暗省秋期。幾探芳信。故人自別。江山瘦、鬢好登臨誰分。題糕落帽。忍忘卻、年時疏俊。簾乍捲、笙語霜前。依稀破人醒困。安排更把茱萸。怕剗地煙塵。放晴難穩。素娥問訊。應不負、占取一天風韻。無情有恨。數舊約、曾無憑準。愁暫倚、風雨壺觴。低徊看鬢。

傾杯 丙辰自壽

清瘦秋山。斑斕霜樹。年年勸人杯盞。浮生事、未信長是。似月難圓。比雲更幻。便南飛黃鶴依然。腰笛意懶。舊江山、夢沈天遠。自惜金縷滄桑。莫辭留倦眼。首重回、承平

游衍怕者回憑闌。斜陽如水。去日蹉跎。青鏡鬢絲較甚文章賤。持此恨誰遣。憑消頷。梧葉閒愁。芙蓉幽怨。相期老圃寒花晚。

洞仙歌 秋日獨游某氏園

一羈閒緣借。便意行散緩。消愁聊且有花迎徑曲。鳥呼林罅。秋光取次披圖畫。恣遠眺。登臨臺與榭。堪瀟灑。奈脈斷征鴻。幽恨翻縈惹。忍把鬢絲影裏。袖淚寒邊。露草煙蕪。付與杜牧狂吟。誤作少年游冶。殘蟬肯共傷心話。問幾見。斜陽疏柳挂。誰慰藉。到重陽。插菊攜萸事真假。酒更貫。更有約。東籬下。怕蹉跎。霜訊。夢沈人悄。西風乍。

紫萸香慢 丙辰重九

又怱怱。一回重九。菊萸總逐愁新。恁悲哉。秋氣慣蕭瑟。隔年人。最是無風無雨。費遙山眉翠。鎮日含顰。念東籬。俊約迹往。越成塵。渺過雁。幾重冷雲。黃昏。忍對清尊。持薄酒。與誰溫。甚青娥皓齒。檀痕招損。畢竟聲吞。總然夕陽如醉。算多事。怨濃霧。彌登臨。自憐衰鬢。故人不見。寥落客裏佳辰。霜重閉門。

金人捧露盤 芙蓉

恁娉婷。真不染。世閒塵。似靜女。曉鏡妝新。當樓映幕。未煩初日助風神。拒霜高格。與東籬傲骨同論。夢江頭。寒木末。誰手把。寄夫君。舊情在。麝度微薰。集裳欲問。水花莫誤注騷人。後開隨分。向西風。展盡紅顰。

滿路花 彊村有聽歌之約詞以堅之

蟲邊安枕簟。雁外夢山河。不成雙淚落。爲聞歌。浮生何益。儘意付消磨。見說寰中秀。曼隸修蛾。舊家風度無過。鳳城絲管。回首惜銅駝。看花餘老眼。重摩挲。香塵人海。唱徹定風波。點鬢霜如雨。未比愁多。問天還問嫦娥。梅郎蘭芳以嫦娥奔月一劇蜚

聲日下

寒翁吟 彊村屢聽歌。歟生竟弗與。雖曠世。希有如嫦娥奔月一劇。不足以動

其心。信嬾不可醫。耶抑興會不可彊也。

有約無風雨。不分冷落歌塵。幾愁裏。掩重門。黯燭淚襟痕。逢花拌酒年時夢。何處暫



許溫存。繡隱幕。麝飄茵。爲說與消魂。冰輪憑闌見。嫦娥自昔。渾未肯。多情向人便。眞箇聞聲對影也。無望。點拍霓裳。駐得浮雲。相如倦也。只有纖阿。來照黃昏。

蕙蘭芳引 秋士多悲舊游如夢尋芳倦矣孤負萼綠華來消魂黯然萬一杜

蘭香去誰能遣此情見虞詞

歌扇舞衣早淒斷。倦游心目。豔十里秋塵。多恐破愁未足。茂陵病損。意最感。霓裳新曲。悄夢雲不度。咫尺天涯絲竹。玉雪伊人。星辰昨夜。總付根觸。問能幾消磨。何止鬢難再綠。垂鞭側帽。墜歡忍續。招素娥。來話廣寒幽獨。

八聲甘州 葬花一劇屬梅郎擅場之作爲賦兩調

向天涯。絲管已難聽。何堪恁傷春。算憐卿憐我。無雙傾國。第一愁人。仿佛妒花風雨。逐夢入行雲。芳約啼鶻外。回首成塵。占取人天紅紫。早頽垣斷井。分付消魂。拌隨波未肯。何計更飄茵。便三生。願爲香土。費怨歌。誰惜翠眉顰。腸迴處。只青衫淚。得似紅巾。

西子妝

蛾蕊顰深翠茵蹴淺。暗省韶光遲暮。斷無情種不能癡。替消魂、亂紅多處。飄零信苦。只逐水、霑泥太誤。送春歸、費粉娥心眼。低徊香土。嬌隨步、著意憐花。又怕花欲妒。莫辭身化作微雲。傍落英、已歌猶駐。哀箏似訴。最腸斷、紅樓前度。戀寒枝、昨夢驚殘怨字。

減字浣溪紗 聽歌有感

解道傷心片玉詞。此歌能有幾人知。片玉詞句歌塵如霧一顰眉。碧海青天奔月後。良辰美景葬花時。誤人畢竟是芳姿。

惜起殘紅淚滿衣。它生莫作有情癡。人天無地著相思。花若再開非故樹。雲能暫駐亦哀絲。不成消遣只成悲。

蜂蝶無情剗地飛。楊花薄倖不成歸。落紅身世底矜持。便似青山薶玉骨。願爲香霧護瓊枝。根根歌管夜何其。

儂亦三生杜牧之。多情何事誤芳期。最傷春處送秋時。少日聽嘶芳草路。東風鶯  
囀上林枝。而今真箇隔天涯。

帶月霑霜信馬歸。曉來添得鬢邊絲。綺窗重按玉梅詞。舊作有玉梅詞紫陌銅駝  
勞悵望。黃河羌笛費淒其。閒愁萬一阿儂知。

鶯啼序 梅郎自滬之杭有重來之約其信然耶宇宙悠悠吾梅郎外孰可念  
者萬人如海孰知念吾梅郎者王逸少所謂取諸懷抱因寄所託樂記云言  
之不足故長言之唯是夢蝶驚鴻大都空中語耳不於無聲無字處求之將  
謂如陳髯之賦雲郎則吾豈敢

聞歌向來易感。倚孤琴倦語。記曾幾。花月因循。自別何事凝佇。費遙夜、紅牙按拍。湖  
天可有癡雲駐。爲傷春、蹙徧雙蛾。似憐遲暮。芳約燕蘭。夢裏事往。賸滄洲臥雨。渭  
城唱、禁得何戡。茂陵詩鬢將素。忍重尋、旗亭敗壁。最根觸、新腔金譜。翠禽邊、昨夜星  
辰。縞衣仙路。驚鴻片霎。怨字三生。此情定念否。人去也、一聲雙淚。便抵河滿。慧業

愁根更誰儂。汝玉璫盼斷，青衫溼徧。何郎詞筆，猶蕭瑟，再休提。舊曲霓裳序，人天幾劫。何曾換卻華鬢。葬花怕無香土。離魂化蝶，到得西冷，要柳絲繫住。尙仿佛、江山金粉未盡消磨。幾見娉婷，舊家風度。雲涯恨遠，霜華愁重，相思休管鶴更瘦。便瑤臺從此迷煙霧。淞潮待翦還慵。自撥湘絃，斷腸訴與。

又 題王定甫師夔礎課誦圖

周頤年十二，受知定甫先師。忽忽四十餘年，垂白江湖，學殖益荒落，愧且罪已。丙辰歲暮，晤補園十五兄滬上，出示夔礎課誦圖，靈均博謔之節，少陵明發之痛，胥寓虛是。展對肅然，增倫敦之重，復念吾廣右詞學，朱小岑先生真倡之於前，吾師與翰臣虛谷兩先生繼起而振興之。周頤得見虛谷先生手蹟，自此圖題詠始。又題詞中如張興治、馮魯川、顧子山三君，皆工倚聲。周稚圭先生尤填詞專家，端木子疇前輩曩同在徽省，奉爲詞師，有感氣類之雅。輒學邯鄲之步，矧丁陽九，神州擾離，風雅弁髦，名教掃地，吾人今日處境。

之難堪。有甚於零丁孤露。飲冰茹蘗。又豈吾師及諸先輩所及料。俯仰興懷。曷能自己。歌哀響繁。不覺言之覩縷也。定甫師蚤孤。依姊氏。姊孀家。藜簞有

廢圃數弓。梧桐一石。二姊課師。讀師展卷。姊擣衣。各據一石。其後師官京朝。憶姊鄉居繪圖徵題。時道光乙巳丙午閒也。附記。

音塵畫中未遠。莽滄桑換幾。賸依黯。昔日春明。秭歸啼處離思。記分占、桐陰片石。書燈慘淡。碓霜碎。便蘭騷。能貌嬋媛。未抵情至。垂老侯芭。載酒記省。悵華年逝水。爲讀書。根觸鄉愁。梗萍行念身世。數承平。鸞箋象筆。擅葦豔。誰爭臣里。向天涯。昨夢重尋。舊家詩事。驚秋斷杵。映雪寒窗。坐我更悽悱。差勝是、廿年親舍。戲綵膝繞。蒜髮荷衣。那禁清淚。故山雁斷。新亭麥秀。唯應月姊知人怨。破書堆。萬一蕤憂地。披圖涕雪。松楸望極。南雲漲天。可奈塵起。趨庭卯角。雅學初程。授誦亦謝姊。仲姊月芬適黃蚤逝。曾手鈔爾雅。授頤讀。重愴念。吟邊雪絮。夢裏曇花。仲姊綺年明慧。曾於秋夜見彩雲俄頃。卽散竊以爲爾擢之預兆。此恨生離。未應得似。羈孤易感。情親難再。人

生能幾年少日。況山河風景而今異。填胸事往休論。四十年前。絳紗弟子。

水調歌頭

明瞿忠宣公印文曰起田氏

石質青帶微黃有緒紺二色理高一

寸七分疆方徑七分頂一角微缺朱文起田右氏左邊款稼軒太史之命震孟

人世自桑海。金石詎消磨。孤山忠武王印。歷劫水雲窩。難得後先輝映。唱徹鶴歸來後。鶴歸來傳奇紀忠宣歸骨虞山事。遺製見文何。可惜昆吾鐵。斫不到蛟鼉。擊賊笏。遼東帽。等摩挲。淺淺身外物耳。聲價重山河。我是湘南聲叟。懷想靈旗風雨。渺渺洞庭波。甚日數椽隱。乞與壯煙蘿。

六州歌頭

鏡中見鬢絲有白者

飛蓬兩鬢。容易雪霜欺。能似舊。青青否。一絲絲。不須悲。草木無情物。催換葉。清秋節。芳未歇。寒先徹。底禁持。似我工愁。儻不教顛顛。造物何私。況天涯。飄泊後。昨夢都非。老態垂垂。鏡先知。念歡事少。憂心悄。吾衰早。復奚辭。長似此。星星矣。欲胡爲。莫頻窺。一樣傷心色。行滋蔓。到吟髭。金粉改。江山在。越淒其。商婦琵琶咽。到無聲處。縈損

蛾眉。便青春又也。忍憶少年時。醉插花枝。

浣溪紗 自題菊夢詞

辛苦回燈憶夢時。夢餘遺恨滿天涯。叢菊賺人多少淚。況梅枝。酒畔光陰銀鑿落。曲中消息玉參差。雪虐霜欺須拌得。鬢邊絲。

繞佛閣 過教場頭巷鶯翁故居

舊懷拌損。殘照故國。無淚堪賈。愁路驄引。夢華逝水。雪鴻更休問。鳳城大隱。門巷未改。閱世朝槿。暗塵淒緊。燕歸莫也。雕梁怕重認。送目幻樓閣。自古滄桑無此恨。誰念未歸山邱。須與忍。賸占取人天。各自孤憤。惘然金粉。便對影江山。無復游俊。悄寒邊。暮雲低盡。

水調歌頭 壬戌六月十一日集海日樓爲寐叟金婚賀

嘉耦歲寒侶。琴瑟亦冰絃。黃金白首相況。金欲遜其堅。偕老百年常事。公是劉樊仙眷。何止百而千。百者數之始。中半最華年。燭雙照。樓百尺。敞瓊筵。騰天躍海。看取

晨旭總成圓。指顧光華復旦。仙仗御香深處。比翼更朝天。英和有比翼朝天圖見恩

福堂筆記 醉寫催妝句。眉筆老逾妍。

雙調望江南 曩年十三歲賦落花得香韻全闕不足存越五十年改定二首

風格渾不似也

閒庭院。花落更斜陽。肯與游絲爲繾綣。莫將飛絮共平章。飄泊不能狂。東風急。無計挽紅芳。輸與鄰家蜂蜜好。不知何處燕巢香。迴盡舊時腸。

花如畫。未必畫非真。見說畫中花不落。移家作箇畫中人。占取最長春。春未肯。著我軟紅塵。花若有情花亦瘦。十年香夢太酸辛。我與我溫存。

戚氏 滙尹爲畹華索賦此調走筆應之

佇飛鸞。萼綠仙子綵雲端。影月娉婷。浣霞明豔。好誰看。華鬢夢尋難。當歌掩淚十年閒。文園鬢雪如許。鏡裏長葆幾朱顏。綺袂重認紅簾初捲。怕春暖也猶寒。乍維摩病榻。花雨催起。著意清歡。絲管賺出嬋娟。珠翠照映。老眼太辛酸。春宵短。繫驄難穩。



栩栩須還。近尊前。暫許對影香南。篆語徧寫烏闌。番風漸急。省識將離。已忍目斷關山。晚華將別去。道人先期作虎山之游。避之。念我滄江晚。消何遜筆。舊恨吟邊。未解清平調苦。道苔枝翠羽。信纏繇。劇憐畫罨瑤臺。醉扶紙帳。爭遣愁千萬。算更無、月地雲階見。誰與訴。鶴守綠慳。甚素娥。暫缺能圓。更芳節。後約是今番。耐清寒。慣梅花賦也。好好紉蘭。

鷓鴣天 贈阿蘩

桃李爲容雪作膚。本來珠海出明珠。十年看舞聽歌倦。脆管簾櫳一起予。春婉婉。錦模糊。江山金粉屬農渠。冰霜磨鍊相思骨。容易天教付點酥。

甘草子 七月初五夜雨

風雨。颯颯瀟瀟。捲地收殘暑。一葉下廊腰。省識秋來路。低盡碧天凝眸處。更黯黯、溼雲堆絮。驀憶江南庾郎賦。比斷鴻哀否。

摸漁兒 癸亥八月初二日賦

近尊前。一聲河滿。聲吞和淚腸熱。十年花事。伶俚甚。禁得綵旛摧折。風雨咽。爲已斷鵲魂。苦憶啼時血。情天一髮。念芳約俱寒。墜歡何望。曲怨玉笙裂。花落後。無那佳人又別。胭脂猶有殘雪。天涯忍此春消息。不是衆芳消歇。千萬結。膽弱線衰。楊青眼。堪愁絕。倡條冶葉。問底事。干卿一池吹皺。持恨與誰說。

鷓鴣天

匝地嬌雷般畫輪。疏鐘無力破黃昏。總然明月都如夢。也有青山解辟塵。滬瀆無山。楓葉醉。菊花新。色香天與饋吾貧。西風肯到閒庭院。消得憑闌一岸巾。

又 重陽不登高。示緜初密文。兩女客。有作重陽詞者。用避災字。此字不易用也。

秋是愁鄉雁不來。登高何望只風埃。暫時楓葉濃如錦。何處萸囊避得災。憐霸業。委荒萊。卽今戲馬亦無臺。何如偃蹇東籬下。猶有南山照酒杯。

減字浣溪紗

風雨高樓悄四圍。殘燈黏壁淡無輝。篆煙猶裹舊屏幃。已忍寒欺羅袖薄。斷無春

逐柳絲歸。坐深愁極一霑衣。

花與殘春作淚垂。何論茵溷已辭枝。憐花切莫誤情癡。

聽雨聽風成暫遣。如塵如

夢最相思。斷腸都不似年時。

荏苒霜華改鬢絲。自從青鏡見顰眉。杜鵑啼徹落花時。

屏上有山非小別。釵頭無

鳳不長離。一泓清淚影娥池。

一燾溫存愛落暉。傷春心眼與愁宜。畫闌憑損縷金衣。

漸冷香如人意改。重尋夢

亦昔游非。那能時節更芳菲。

紅到山榴恨事多。斷無消息奈情何。尊前唱徹懊儂歌。

鴉子局翻悲短劫。鮫人淚

織委空波。鈿盟禁得幾蹉跎。

風雨天涯怨亦恩。漂搖猶有未消魂。能禁寒徹是情根。

月作眉顰終有望。香餘心

字索重溫。不辭癡絕佇黃昏。

慘碧鬢天問不響。護花能得幾金鈴。摧殘風雨若爲情。

搗麝塵香終淡薄。飛龍骨

出亦伶俚。總然無夢不如醒。

錦瑟知人恨已深。如何絃柱不侵尋。暗思前事擁輕衾。燈爇自憐偏炯炯。更長難得是沈沈。一簪華髮十年心。

金縷曲 題東軒老人山水畫册老人一號寐叟

遺恨橫蒼翠。算年時、多情海日。見人顛顛。滿目江山殘金粉。叟也何嘗能寐。邱壑是、填胸壘塊。疊嶂層巒空迴合。甚蘭根、欲著渾無地。知渲染、費清淚。靜觀無那東軒寄。俯茫茫、同昏八表。濤驚雲詭。陵谷遷流十年夢。併作無聲詩史。聊付託、迂倪顛米。兜率海山堪盤礴。莫驂鸞、回首人間世。墨黯淡、剡谿紙。

霜花腴 彊村先生霜腴圖題詞

醉扶壽客。近酒邊、何知世有滄桑。風雨天涯。燠寒人境。十年顧影情芳。自持晚香。甚歲華、葵麥斜陽。費腸迴、舊約東籬。義熙箋管幾吟商。消得未荒三徑。是懷姿卓傑。炤映容光。彭澤秋高。酈泉花大。纔知瘦亦尋常。校餘夢涼。彊村以校夢名。葦引鏡看。

詩鬢能蒼。辦餐英、駐景年年。采山煙路長。

金縷曲 院內秋海棠數株西風紅淚嬌小可憐轉瞬小春將半寒重於秋娉

婷晚翠變爲黃葉蕭蕭矣流景自傷漫拈此詞

秋也拋人去。舊吟邊、是花是淚、都無尋處。還憶碧闌幽夢小。月底萼騰香霧。拌寂寞、和煙和露。未解飄零無限意。恰西風、已覺思量苦。如我瘦、最憐汝。而今更是淒無語。誤芳期、脂痕鬢影、暗傷遲暮。不爲此時顛顛損。只爲前時媚嫵。爭併作、一時情緒。翠袖不堪重倚竹。正愁人、何止飄紅雨。休爲我、唱金縷。

花發沁園春 小春見梅

薄暖輕寒。去春還遠。綺窗又見春色。纖紅吐秀。小碧銜妍。略約去年風格。年時記得。花落後、時時相憶。恰開也、又說花枝。撩人春恨如織。問訊瑤臺咫尺。算何郎韶顏。一見還識。簾深貯豔。檻曲移香。何處好春消息。花前小立。應勝似、無端尋覓。便三點、兩點春光。此時多少憐惜。

減字浣溪紗

如水清涼沁碧衫。一重秋樹一重簾。一痕眉月影纖纖。樹隔層煙煙隔月，幽情無奈一窗銜。玉鉤銀燭海棠酣。

水調歌頭 落花

擁被不聽雨。作算一宵晴。峭風多事吹送，到枕一更更。花落已知不少，一半可能留得。未問意先驚。簾幕帶煙捲，紅紫繡中庭。促成陰，催結子，此時情。了他春事，不是風雨妒殘英。風雨枉教人怨，知否無風無雨，也自要飄零。只是一春老，無計勸愁鶯。

江南好

憐花瘦。移向繡閨中。掩卻碧紗屏十二。曉來依樣有殘紅。不敢怨東風。

又 詠梅

娉婷甚。不受點塵侵。隨意影斜都入畫。自來香好不須尋。人在綺窗深。

觀堂長短句

運齋



王國維（光緒三——民國一六）

字伯隅。號靜安。浙江海寧人。以諸生留學日本。早歲治元明通俗文學。辛亥後。專力經史。會古文字器物多出土。因以其學識理董之。所得之多。爲近世學者所未有。晚主清華大學研究院。感憤時事。自沈昆明湖卒。著述甚多。觀堂集林則其手定也。



## 序

王君靜安將刊其所爲人間詞。詒書告余曰。知我詞者莫如子。序之亦莫如子。宜余與君處十年矣。比年以來。君頗以詞自娛。余雖不能詞。然喜讀詞。每夜漏始下。一燈熒然。玩古人之作。未嘗不與君共。君成一闕。易一字。未嘗不以訊余。旣其睽離。苟有所作。未嘗不郵以示余也。然則余於君之詞。又烏可以無言乎。夫自南宋以後。斯道之不振久矣。元明及國初諸老。非無警句也。然不免乎局促者。氣困于彫琢也。嘉道以後之詞。非不諧美也。然無救於淺薄者。意竭于摹擬也。君之於詞。於五代喜李後主。馮正中。於北宋喜永叔。子瞻。少游。美成。於南宋除稼軒白石外。所嗜蓋鮮矣。尤痛詆夢窗玉田。謂夢窗砌字。玉田壘句。一彫琢。一敷衍。其病不同。而同歸于淺薄。六百年來詞之不振。實自此始。其持論如此。及讀君自所爲詞。則誠往復幽咽。動搖人心。快而沈。直而能曲。不屑屑于言詞之末。而名句間出。往往度越前人。至其言近而指遠。意決而辭婉。自永叔以後。殆未有工如君者也。君始爲詞時。亦不自意其至此。而

卒至此者天也。非人之所能爲也。若夫觀物之微。託興之深。則又君詩詞之特色。求之古代作者。罕有倫比。嗚呼。不勝古人。不足以與古人並。君其知之矣。世有疑余言者乎。則何不取古人之詞。與君詞比類而觀之也。光緒丙午三月。山陰樊志厚敘。

# 觀堂長短句

海寧王國維靜安

## 少年游

垂楊門外。疏燈影裏。上馬帽檐斜。紫陌霜濃。青松月冷。炬火散林鴉。酒醒起看西窗上。翠竹影交加。跌宕歌詞。縱橫書卷。不與遣年華。

## 阮郎歸

美人消息隔重關。川途彎復彎。沈沈空翠壓征鞍。馬前山復山。濃潑黛。緩拖鬟。當年看復看。只餘眉樣在人閒。相逢艱復艱。

## 蝶戀花

昨夜夢中多少恨。細馬香車。兩兩行相近。對面似憐人瘦損。衆中不惜寒帷問。陌上輕雷聽隱鱗。夢裏難從。覺後那堪訊。蠟淚窗前堆一寸。人閒只有相思分。

## 虞美人

碧苔深鎖長門路。總爲蛾眉誤。自來積毀骨能銷。何況眞紅一點、臂砂嬌。妾身但使分明在。肯把朱顏悔。從今不復夢承恩。且自簪花、坐賞鏡中人。

浣溪沙

六郡良家最少年。戎裝駿馬照山川。閒拋金彈落飛鳶。何處高樓無可醉。誰家紅袖不相憐。人間那信有華顛。

點絳脣

厚地高天。側身頗覺平生左。小齋如舸。自許迴旋可。聊復浮生。得此須臾我。乾坤大。霜林獨坐。紅葉紛紛墮。

蝶戀花

滿地霜華濃似雪。人語西風。瘦馬嘶殘月。一曲陽關渾未徹。車聲漸共歌聲咽。換盡天涯芳草色。陌上深深。依舊年時轍。自是浮生無可說。人間第一耽離別。斗覺宵來情緒惡。新月生時。黯黯傷離索。此夜清光渾似昨。不辭自下深深幕。何

物尊前哀與樂。已墜前歡。無據他年約。幾度燭花開又落。人間須信思量錯。  
百尺朱樓臨大道。樓外輕雷。不聞昏和曉。獨倚闌干人窈窕。閒中數盡行人小。  
一  
雲車塵生樹杪。陌上樓頭。都向塵中老。薄晚西風吹雨到。明朝又是傷流潦。  
黯淡燈花開又落。此夜雲蹤。知向誰邊著。頻弄玉釵思舊約。知君未忍渾拋卻。  
妾  
意苦專君苦博。君似朝陽。妾似傾陽藿。但與百花相關作。君恩妾命原非薄。

### 浣溪沙

掩卷平生有百端。飽更憂患轉冥頑。偶聽啼鴉怨春殘。坐覺無何消白日。更緣隨  
例弄丹鉛。閒愁無分況清歡。

### 清平樂

垂楊深院。院落雙飛燕。翠幕銀燈春不淺。記得那時初見。眼波靨暈微流。尊前卻  
按涼州。拚取一生腸斷。消他幾度回眸。

### 浣溪沙

漫作年時別淚看。西窗蠟炬尙洩瀾。不堪重夢十年閒。斗柄又垂天直北。官書坐會歲將闌。更無人解憶長安。

謁金門

孤檠側。訴盡十年蹤迹。殘夜銀釭無氣力。綠窗寒惻惻。落葉瑤階狼藉。高樹露華凝碧。露點聲疏人語密。舊歡無處覓。

蘇幕遮

倦憑闌。低擁髻。豐頰修眉。猶是年時意。昨夜西窗殘夢裏。一霎幽歡。不似人間世。恨來遲。防醒易。夢裏驚疑。何況醒時際。涼月滿窗人不寐。香印成灰。總作回腸字。

浣溪沙

本事新詞定有無。斜行小草字模糊。燈前腸斷爲誰書。隱几窺君新製作。背燈數妾舊歡娛。區區情事總難符。

蝶戀花

嫋嫋鞭絲衝落絮。歸去臨春。試問春何許。小閣重簾天易暮。隔簾陣陣飛紅雨。刻  
意傷春誰與訴。悶倚羅衾。動作經旬度。已恨年華留不住。爭知恨裏年華去。  
窗外綠陰添幾許。賸有朱櫻。尙繫殘紅住。老盡鶯雛無一語。飛來銜得櫻桃去。坐  
看畫梁雙燕乳。燕語呢喃。似惜人遲暮。自是思量渠不與。人間總被思量誤。

點絳脣

屏卻相思。近來知道都無益。不成拋擲。夢裏終相覓。醒後樓臺。與夢俱明滅。西窗  
白。紛紛涼月。一院丁香雪。

清平樂

斜行淡墨。袖得伊書迹。滿紙相思容易說。只愛年年離別。羅衾獨擁黃昏。春來幾  
點啼痕。厚薄不關妾命。淺深只問君恩。

浣溪沙

已落芙蓉并葉凋。半枯蕭艾過牆高。日斜孤館易魂銷。坐覺清秋歸蕩蕩。眼看白

日去昭昭。人閒爭度漸長宵。

蝶戀花

月到東南秋正半。雙闕中間。浩蕩流銀漢。誰起水精簾下看。風前隱隱聞簫管。涼露溼衣風拂面。坐愛清光。分照恩和怨。苑柳宮槐渾一片。長門西去昭陽殿。

菩薩蠻

回廊小立秋將半。婆娑樹影當階亂。高樹是東家。月華籠露華。碧闌干十二。都作回腸字。獨有倚闌人。斷腸君不聞。

刪餘稿

如夢令

點滴空階疏雨。迢遞嚴城更鼓。睡淺夢初成。又被東風吹去。無據。無據。斜漢垂垂欲曙。

浣溪沙



路轉峯迴出畫塘。一山楓葉背殘陽。看來渾不似秋光。隔座聽歌人似玉。六街歸騎月如霜。客中行樂只尋常。

臨江仙

過眼韶華何處也。蕭蕭又是秋聲。極天衰草暮雲平。斜陽漏處。一塔枕孤城。獨立荒寒誰語。驀回頭。宮闕崢嶸。紅牆隔霧未分明。依依殘照。獨擁最高層。

浣溪沙

草偃雲低漸合圍。瑠弓聲急馬如飛。笑呼從騎載禽歸。萬事不如身手好。一生須惜少年時。那能白首下書帷。霜落千林木葉丹。遠山如在有無間。經秋何事亦孱顏。且向田家拚泥飲。聊從卜肆憩征鞍。只應遊戲在塵寰。

好事近

夜起倚危樓。樓角玉繩低亞。唯有月明霜冷。浸萬家鴛瓦。人間何苦又悲秋。正是

傷春罷。卻向春風亭畔。數梧桐葉下。  
愁展翠羅衾。半是餘溫半淚。不辨墜歡新恨。是人間滋味。  
幾年相守鬱金堂。草草  
渾閒事。獨向西風林下。望紅塵一騎。

採桑子

高城鼓動蘭釭炮。睡也還醒。醉也還醒。忽聽孤鴻三兩聲。  
人生只似風前絮。歡也零星。悲也零星。都作連江點點萍。

西河

垂柳裏。蘭舟當日曾繫。千帆過盡只伊人。不隨書至。怪渠道著我儂心。一般思婦游  
子。昨宵夢。分明記。幾回飛度烟水。西風吹斷伴燈花。搖搖欲墜。宵深待到鳳凰山。  
聲聲啼鳩催起。錦書宛在懷袖底。人迢迢。紫塞千里。算是不曾相憶。倘有情。早合  
歸來。休寄一紙無聊相思字。

摸魚兒 秋柳

問斷腸。江南江北。年時如許春色。碧闌干外無邊柳。舞落遲遲紅日。長堤直。又道是。連朝寒雨送行客。烟籠數驛。賸今日天涯。衰條折盡。月落曉風急。金城路。多少人間行役。當年風度曾識。北征司馬今頭白。唯有攀條露臆。都狼藉。君不見舞衣。寸寸填溝洫。細腰誰惜。算只有多情。昏鴉點點。攢向斷枝立。

蝶戀花

誰道人間秋已盡。衰柳毵毵。尙弄鵝黃影。落日疏林光炯炯。不辭立盡西樓暝。萬點棲鴉渾未定。澹灩金波。又竊青松頂。何處江南無此景。只愁沒箇閒人領。

鷓鴣天

列炬歸來酒未醒。六街人靜馬蹄輕。月中薄霧漫漫白。橋外漁燈點點青。從醉裏。憶平生。可憐心事太崢嶸。更堪此夜西樓夢。摘得星辰滿袖行。

點絳脣

萬頃蓬壺夢。中昨夜扁舟去。縈迴島嶼。中有舟行路。波上樓臺。波底層層俯。何人

住。斷崖如鋸。不見停橈處。

高峽流雲。人隨飛鳥穿雲去。數峯著雨。相對青無語。嶺上金光。嶺下蒼煙互。人間曙。疏林平楚。歷歷來時路。

踏莎行

絕頂無雲。昨宵有雨。我來此地聞天語。疏鐘暝直亂峯回。孤僧曉度寒溪去。是處青山。前生儔侶。招邀盡入閒庭戶。朝朝含笑復含顰。人間相媚爭如許。

清平樂

櫻桃花底。相見顏雲髻。的的銀釭無限意。消得和衣濃睡。當時草草西窗。都成別後思量。料得天涯異日。應思今夜淒涼。

浣溪沙

月底棲鴉當葉看。推窗跼跼墮枝間。霜高風定獨憑欄。爲製新詞髭盡斷。偶聽悲劇苦無端。可憐衣帶爲誰寬。

青玉案

姑蘇臺上烏啼曙。剩霸業、今如許。醉後不堪仍弔古。月中楊柳，水邊樓閣，猶自教歌舞。野花開徧眞娘墓。絕代紅顏委朝露。算是人生贏得處。千秋詩料，一坏黃土，十里寒螿語。

滿庭芳

水抱孤城，雲開遠戍，垂柳點點棲鴉。晚潮初落，殘日漾平沙。白鳥悠悠自去，汀洲外，無限蒹葭。西風起，飛花如雪，冉冉去帆斜。天涯。還憶舊，香塵隨馬，明月窺車。漸秋風鏡裏，暗換年華。縱使長條無恙，重來處、攀折堪嗟。人何許，朱樓一角，寂寞倚殘霞。

蝶戀花

閱盡天涯離別苦。不道歸來，零落花如許。花底相看無一語。綠窗春與天俱暮。待把相思燈下訴。一縷新歡，舊恨千千縷。最是人間留不住。朱顏辭鏡花辭樹。

玉樓春

今年花事垂垂過。明歲花開應更彈。看花終古少年多。只恐少年非屬我。勸君莫厭金罍大。醉倒且拚花底臥。君看今日樹頭花。不是去年枝上朵。

阮郎歸

女貞花白草迷離。江南梅雨時。陰陰簾幙萬家垂。穿簾雙燕飛。朱閣外。碧窗西。行人一舸歸。清溪轉處柳陰低。當窗人畫眉。

浣溪沙

天末同雲黯四垂。失行孤雁逆風飛。江湖寥落爾安歸。陌上金丸看落羽。閨中素手試調醅。今宵歡宴勝平時。

山寺微茫背夕曛。鳥飛不到半山昏。上方孤磬定行雲。試上高峯窺皓月。偶開天眼覩紅塵。可憐身是眼中人。

青玉案

江南秋色垂垂暮。算幽事、渾無數。日日滄浪亭畔路。西風林下。夕陽水際。獨自尋詩

去。可憐愁與閒俱赴。待把塵勞截愁住。燈影幢幢天欲曙。閒中心事。忙中情味。并  
入西樓雨。

浣溪沙

昨夜新看北固山。今朝又上廣陵船。金焦在眼苦難攀。猛雨自隨汀雁落。溼雲常  
與暮鴉寒。人天相對作愁顏。

鵲橋仙

沈沈戍鼓。蕭蕭廐馬。起視霜華滿地。猛然記得別伊時。正今夕、郵亭天氣。北征車  
轍。南征歸夢。知是調停無計。人間事事不堪憑。但除卻、無憑兩字。  
繡衾初展。銀釭旋剔。不盡燈前歡語。人間歲歲似今宵。便勝卻、貂蟬無數。霎時送  
遠。經年怨別。鏡裏朱顏難駐。封侯覓得也尋常。何況是、封侯無據。

減字木蘭花

皋蘭被徑。月底欄干閒獨凭。修竹娟娟。風裏時聞響佩環。驀然深省。起踏中庭千

箇影依舊人間。一夢鈞天只惘然。

鷓鴣天

閣道風飄五丈旗。層樓突兀與雲齊。空餘明月連錢列。不照紅葩倒井披。頻摸索。且攀躋。千門萬戶是耶非。人間總是堪疑處。唯有茲疑不可疑。

浣溪沙

夜永衾寒夢不成。當軒減盡半天星。帶霜宮闕日初昇。客裏歡娛和睡減。年來哀樂與詞增。更緣何物遣孤燈。

畫舫離筵樂未停。瀟瀟暮雨闔閭城。那堪還向曲中聽。只恨當時形影密。不關今日別離輕。夢回酒醒憶平生。

纔過苕溪又雪溪。短松疏竹媚朝輝。去年此際遠人歸。燒後更無千里草。霧中不隔萬家雞。風光渾異去年時。

賀新郎



月落飛鳥鵲。更聲聲、暗催殘歲。城頭寒柝。曾記年時游冶處。偏反一欄紅藥。和士女、盈盈歡謔。眼底春光何處也。只極天、野燒明山郭。側身望、天地窄。遣愁何計頻商略。恨今宵、書城空擁。愁城難落。陋室風多青燈炮。中有千秋魂魄。似訴盡、人間紛濁。七尺微軀百年裏。那能消、今古間哀樂。與蝴蝶、遽然覺。

人月圓 梅

天公應自嫌寥落。隨意著幽花。月中霜裏。數枝臨水。水底橫斜。蕭然四顧。疏林遠渚。寂寞天涯。一聲鶴唳。殷勤喚起。大地清華。

卜算子 水仙

羅襪悄無塵。金屋渾難貯。月底谿邊一晌看。便恐凌波去。獨自惜幽芳。不敢矜遲莫。卻笑孤山萬樹梅。狼藉花如許。

八聲甘州

直青山、缺處倚東南。萬堞浸明湖。看片帆指處。參差宮闕。風展旌旗。向晚櫓聲漸數。

蕭瑟雜菰蒲。一騎嚴城去。燈火千衢。不道繁華如許。又萬家爆竹。隔院笙竽。嘆沈沈人海。不與慰羈孤。賸終朝襟裾相對。縱委佗。人已厭狂疏。呼燈且覓朱家去。痛飲屠蘇。

浣溪沙

曾識盧家玳瑁梁。覓巢新燕屢回翔。不堪重問鬱金堂。今雨相看非舊雨。故鄉罕樂況他鄉。人間何地著疏狂。

踏莎行 元夕

綽約衣裳。淒迷香麝。華燈素面光交射。天公倍放月嬋娟。人間解與春游冶。烏鵲無聲。魚龍不夜。九衢忙殺閒車馬。歸來落月挂西窗。鄰雞四起蘭釭灺。

蝶戀花

急景流年真一箭。殘雪聲中。省識東風面。風裏垂楊千萬線。昨宵染就鵝黃淺。又。又是廉纖春雨暗。倚徧危樓。高處人難見。已恨平蕪隨雁遠。暝烟更界平蕪斷。

翠地重簾圍畫省。簾外紅牆。高與銀河並。開盡隔牆桃與杏。人間望眼何由騁。舉首忽驚明月冷。月裏依稀。認得山河影。問取嫦娥渾未肯。相攜素手層城頂。獨向滄浪亭外路。六曲欄干。曲曲垂楊樹。展盡鵝黃千萬縷。月中併作濛濛霧。一片流雲無覓處。雲裏疏星。不共雲流去。閉置小窗真自誤。人間夜色還如許。

浣溪沙

舟逐清溪彎復彎。垂楊開處見青山。毵毵綠髮覆烟鬟。夾岸鶯花遲日裏。歸船蕭鼓夕陽間。一生難得是春間。

臨江仙

聞說金微郎戍處。昨宵夢向金微。不知今又過遼西。千屯沙上暗。萬騎月中嘶。似梅花儂似葉。朅來手撫空枝。可憐開謝不同時。漫言花落早。只是葉生遲。

南歌子

又是烏西匿。初看雁北翔。好與報檀郎。春來宵漸短。莫思量。

荷葉盃 戲效花閒體

手把金尊酒滿。相勸情極不能羞。乍調箏處又回眸。留摩留。留摩留。矮紙數行草草。書到總道苦相思。朱顏今日未應非。歸摩歸。歸摩歸。無賴燈花又結。照別休作一生拚。明朝此際客舟寒。歡摩歡。歡摩歡。誰道閒愁如海。零碎雨過一池漚。時時飛絮上簾鉤。愁摩愁。愁摩愁。昨夜繡衾孤擁。幽夢一霎鈿車塵。道旁依約見天人。真摩真。真摩真。隱隱輕雷何處。將曙隔牖見疏星。一庭芳樹亂啼鶯。醒摩醒。醒摩醒。

蝶戀花

窈窕燕姬年十五。惜曳長裾。不作纖纖步。衆裏嫣然通一顧。人間顏色如塵土。一樹亭亭花乍吐。除卻天然。欲贈渾無語。當面吳娘誇善舞。可憐總被腰肢誤。

玉樓春

西園花落深堪掃。過眼韶華真草草。開時寂寂尙無人。今日偏嗔搖落早。昨朝卻

走西山道。花事山中渾未了。數峯和雨對斜陽。十里杜鵑紅似燒。

蝶戀花

終古錢塘江上水。日日西流。日日東趨海。兩岸越山瀕洞裏。可能消得英雄氣。說與江潮應不至。潮落潮生。幾換人間世。千載荒臺麋鹿死。靈胥孤憤終何是。誰道江南春事了。廢苑朱藤。開盡無人到。高柳數行臨古道。一藤紅徧千枝杪。冉冉赤雲將綠繞。回首林間。無限斜陽好。若是春歸歸合早。餘春祇攪人懷抱。

水龍吟 楊花用章質夫蘇子瞻唱和均

開時不與人看。如何一霎濛濛墜。日長無緒。回廊小立。迷離情思。細雨池塘。斜陽院落。重門深閉。正參差欲住。輕衫掠處。又特地。因風起。花事闌珊到汝。更休尋。滿枝瓊綴。算來只合。人間哀樂。者般零碎。一樣飄零。寧爲塵土。勿隨流水。怕盈盈一片春江。都貯得。離人淚。

點絳脣

暗裏追涼。扁舟徑掠垂楊過。溼螢光大。一一風前墮。坐覺西南紫電排雲破。巖城鎖。高歌無和。萬舫沈沈臥。

蝶戀花

莫鬥嬋娟弓樣月。只坐蛾眉。消得千謠詠。臂上宮砂那不滅。古來積毀能銷骨。手把齊紈相決絕。懶祝秋風。再使人間熱。鏡裏朱顏猶未歇。不辭自媚朝和夕。

觀堂先生致力詞曲。在光緒末年。迨辛亥以後。棄去不復作。晚年自定觀堂集林。存詞僅二十三闋。茲輯其少作爲刪餘稿。附定稿之後。非先生本意也。丙子七夕記。

飲虹籀論  
清詞百家

可尊



望江南 飲虹篋論清詞百家

讀有清百家詞。偶有感興。輒繫小令於後。未必能中肯綮也。雖然。蠡測管窺。直書所見。非云短長。聊以自遣而已。二十五年十月。冀野盧前記。

江天暮。紅淚滿金篝。語似花間才力薄。人如秋夢性情柔。斷雁使人愁。李 雯  
婁東老。白首識孤心。月片龍團都笑語。艾眉瓜鼻換沉吟。故國夢中尋。吳偉業  
眞男子。痛飲發狂歌。秀水從游薪火在。浙西宗派此先河。六義豈能磨。曹 溶  
調箏乍。蒼水最知音。動壑哀泉商羽激。雛鶯枯樹怨思深。智井古苔侵。宋 琬  
飛紅雨。門巷歎重來。隔水芙蓉多嫵媚。流鶯鐵馬漫疑猜。夢只到妝臺。龔鼎孳  
英雄少。豎子竟成名。落筆尙饒湖海氣。自家重染繡閨情。一著勝尤生。曹爾堪  
燒香曲。兩字借輕盈。終覺顧庵阿所好。酒樓郵壁亦虛名。圓轉讓新鶯。尤 侗  
雙紅豆。把酒祝東風。不獨和平西麓近。有時雅麗玉田同。跌宕一時雄。吳 綺  
拈花笑。託詠越西施。信有轉輪容感慨。別無世界許栖遲。還對黍香詞。徐石麟



綺羅態穠豔不相同。好是蓋思評。鷺語生香真色定。詞宗玉立有家風。梁清標閒陶寫。何礙出雲藍。淡處翻濃秋水妙。顧蘭風格藕漁參。故應老江南。嚴繩孫彊邨說。一字鴨鵝爭。樂府齊梁遺蛻在。斬新機杼出天成。吹簫苦脣櫻。毛奇齡中原走。黃葉稱豪風。小令已參青兕意。慢詞千首儘能雄。哀樂不言中。陳維崧沙洲遠。逐鷺語能奇。好月憐癡疑。燭影空庭。颺雨亦成詞。雕琢豈堪師。王士禛姜張裔。浙派泝先河。蕃錦茶煙無足取。靜居載酒未容訶。朱十總貪多。朱彝尊論彭十。怨粉與啼香。絕豔公然推獨步。若言持律已迷方。豈可擬南唐。彭孫通揚州客。絕句自名家。把筆填詞同法乳。淒迷還似雨中花。碧水映明沙。王士禛西陂稿。專力在歌詩。餘事偏工長短句。白頭開府尙棲遲。河洛一家辭。宋 鞏詞衷作。遠志舊齋人。不與萬戈成沆瀣。程邨詞句亦能新。出語見勤辛。鄒祗謨承徐沈。詞話尙能鳴。後起蓉湖爲世誦。常州壇坫得先聲。齊物仰長明。董以寧盟鷗閣。小令有餘情。草舍尙容安卷帙。題名蒼水況平生。造語出中誠。董 俞

功名誤。垂老不能安。一卷蒼梧多古意。百年侘傺許人看。筆下淚洩瀾。董元愷  
標南宋。始自實庵詞。心往手追張叔夏。幽深綿麗已兼之。周賀不同時。曹貞吉  
兼疏密。秋錦有名言。還見墳篋同軾轍。君王一飯大名前。想見太平年。李良年  
思漁父。早歲誦遺篇。本色清於朱載酒。有時論議擬吳鹽。白雨未能先。徐 鉉  
懷吳季。詞句萬人傳。身後空名堪自慰。纒塘風月足流連。彈指失天年。顧貞觀  
天南北。游屐鑄詞新。盡掃白科存本色。龜溪二隱想斯人。應比竹山真。李 符  
華年怨。彈指入鷗弦。楊柳弄絲籠霧白。黃鸝對語走珠圓。秋水傍前川。汪懋麟  
呻吟共。正變已難言。只以中鋒扞寫好。不歸常浙自然妍。情致本纏綿。高士奇  
王張亞。兼括衆人長。蘅圃評題疑不類。柘西身世豈悲涼。浙派費平章。沈皞日  
神明得。覃九足稱奇。張史原來分一體。碧山未可與肩齊。此語久然疑。沈岸登  
餘波集。言志五言多。別出心裁長短句。詩家俊語讓先河。好處不能磨。查慎行  
銷魂句。應擬小山詞。冷暖如人飲水喻。詞中甘苦自家知。姑射是仙姿。性 德

朱門士燈火見薪傳。早歲填詞通潞客。故無俗尙繞毫端。綽約與人看。雙翔麟  
排聲譜。詞句許談龍。未必衍波皆上選。飴山境亦不相同。鹿死問誰雄。趙執信  
空中語。身世隱南湖。月上可憐勞寄託。好將靜志比長蘆。探驪得明珠。厲鶚  
銅絃響。鞞鞫想精魂。亦是殺機劍俠氣。並同曲品記藏園。此外不須論。蔣士銓  
標南宋。吳下不同科。紅葉江村渲染豔。後來琴畫亦相和。風氣一時多。王昶  
瓊瑤想。圖寫苦吟身。雙鎖公然琴第一。泉聲幽咽盡成春。蘊藉勝他人。王芑孫  
除酸澀。原出六朝文。色澤有餘情韻婉。亦能拔幟獨張軍。吐氣自芳芬。吳翌鳳  
伊犁客。一代學人雄。不必新聲傳後世。卽論餘事亦從容。常派失孫洪。洪亮吉  
師樊榭。亦自許清才。終覺力難支柱起。未能風骨予張開。浙派有輿臺。吳錫麒  
黃冠語。曲體有專長。白日悠然拈小令。靜寧淡泊不尋常。羽扇自登場。趙懷玉  
霞塘句。傳誦比衣裁。病鶴舞風詩品合。秋蟲咽露見詞才。何必派中來。黃景仁  
花間外。尙可采芙蓉。賦筆用多於興比。微言都在國風中。文采半天工。楊芳燦

蓮裳子。奇麗發文章。別具會心評浙水。倚晴此語細商量。朗秀自登壇。樂鈞  
成專業。燕樂考隋唐。吹笛梅邊傷實實。卻從聲律訂宮商。令曲繼喬張。凌廷堪  
疏鑿手。直欲繼風騷。雖有四農持異議。宛陵一選挽狂潮。尊體已崇高。張惠言  
推神韻。竟體被蘭芳。人爲傷心纔學佛。微波步武出南唐。知己郭和譚。錢枚  
隨園選。此本早流傳。幽雋超塵凡。豔絕定評韻甫已當前。清貴在中年。劉嗣綰  
難兄弟。唱和更同聲。深美欲兼閎約旨。沈醇況復寄深情。常派立山成。張琦  
雷池步。斯守傍姜張。薄滑遂爲浙派病。少年學語漸頽唐。功過兩相妨。郭麐  
謨觴館。亦是學人詞。廣博尙能承樂教。西洲曲子作新辭。鼓吹太平時。彭兆蓀  
名言在。婉約復堂稱。結想縵綿許雅奏。疏香細豔示修能。樂苑置心燈。嚴元照  
飛動處。野鶴尙依雲。映雪冰壺還玉潔。曹郎評跋久相聞。畫筆亦清芬。改琦  
香銷後。散曲獨擅場。詞是末流環浙水。尖新細巧見微長。鶯語弄笙簧。趙慶熹  
書餘論。詞話啓于庭。應與月坡稱合璧。後來七子更專精。吳下有新聲。宋翔鳳

傳漁唱。此地有詞仙。三十六陂人到否。白雲白石世爭傳。俊賞出茶煙。王敬之詩書畫。三絕重當時。大節凜然千古在。虛名猶恐世人知。見道不於詞。湯貽汾行詩法。門徑亦深深。高格倘容思量細。過庭書譜耐追尋。枝葉不堪吟。葉申薌長明蓋。推闡四家評。信有傳燈詞辨在。姜張妙處亦天成。對壘始周生。周濟賢宅相。衣鉢渭陽來。不獨宗周成定論。外言內意出心裁。爲釋止庵猜。董士錫金梁夢。語語善藏鋒。北宋瓣香斯未墜。渾融雅正具宗風。並世幾家同。周之琦花墩下。琴雅發深心。笛譜釣船秋瑟響。浙中一例是南音。今日幾人聽。馮登府迴翔地。常浙雅難分。一閣真松辛苦語。輕塗淺抹似微雲。波面起瀾紋。楊夔生才情斂。拜石肯孤行。家法何須傳枕秘。一時宗派已難名。姑自寫生平。顧翰從風尙。萬善亦奇葩。豈必雕龍追琢出。漫持俊語盡成家。攤卷似平沙。方履齋小蘭石馨逸具天真。已足駕方齊物論。不須續選繼宗人。風味自清新。董祐誠食蟾蜍。動氣發風疑。劍客飛仙真絕壁。紅禪兩字最相宜。梵志豈能齊。龔自珍

有涯生。無益事。偏爲浙水中。興憑一手。傷心隨意入新詞。摸擬得神資。項廷紀  
雞舞鏡。顧影自生憐。跌盪每從宛妙出。野橋埋首不知年。考證著新篇。姚 燮  
詞綜續。辛苦倚晴樓。帝女花傳稱絕唱。亦如令語雅風流。品格屬陰柔。黃燮清  
芬陀利。才似水雲清。身處亂離陸務觀。詞中風度玉田生。二蔣許齊名。蔣敦復  
經師作。高館憶江南。尊客論詩詞亦可。卽知綽有雅音涵。不必沈王參。陳 澧  
書羈旅。譜慢始耆卿。春柳漢南多畫本。喜從行役寫閒情。小令偶天成。龍啓瑞  
懷淥水。詞客八旗俱。側帽風情年少事。冰蠶驂靳足相於。雋語吐如珠。承 齡  
陳言去。義法故通詞。思益猶能以理勝。別存一格在當時。瑚網未能遺。周壽昌  
十家選。壓軸馬平王。龍壁古文能合轍。粵西詞脈已深藏。始信瘦春芳。王錫振  
收藏富。刊度亦勞心。秀水人才先輩在。有時擁鼻一沈吟。造語密而深。杜文瀾  
恢雄概。骯髒想空青。縱不與坡分一席。亦知野史有新亭。擊楫歎零丁。邊浴禮  
傳天籟。太素想元賢。濃淡偏從今古別。後來細膩逾於前。墨戲亦翩翩。勒方鏡

狂歌處。忠愛在江湖。幾許傷春閒涕淚。可知詞客杜陵無。身世等漚鳧。蔣春霖  
藤香老。楹帖俊能腴。偶作令詞追小晏。若爲長慢厲朱餘。潭上有新廬。薛時雨  
居薇省。啓迪粵西詞。不獨辛勤存碧瀼。百年詞運賴支持。一代大宗師。端木埰  
東鷗影。覆蓋草堂人。積案每多詩畫卷。門前又見桂蘭新。座語盡生春。周星譽  
眉山例。喬梓並清奇。絕世紅梅與絳濯。還憑鷗夢築高窻。明允有佳兒。劉履芬  
霞川隱。重不以倚聲。詞有別才兼本色。非關采藻與風情。博雅未能名。李慈銘  
靈光在。通謁必先生。位置寒松於浙派。卻如梅管視桐城。絕續未亡聲。張鳴珂  
過京口。長念舊詞流。天假以年論成就。直從南渡逼秦周。豈獨復堂儔。莊  
櫨煙潤。佳句篋中藏。感遇霜飛鏡子語。出頭一地讓莊郎。所喜兩當行。譚  
湘潭水。彎折世猶疑。大海波揚容一汲。入時文字莫驅齊。秋醒獨成蹊。王闓運  
無歸附。尙有小玲瓏。差近姜張終味薄。寒松詞筆略相同。中乘百家中。葉大莊  
蒙香室。淮上此宗風。壯語辛劉常筆涉。芊緜不與二窗同。顧盼足稱雄。馮  
煦

原臨桂。嶺表自開疆。作氣起孱爲世重。如文中葉有湘鄉。一瓣爇心香。王鵬運承湘綺。未必畏前賢。抱碧靈襟通默契。菡蘭雜佩汨羅前。騷雅應流傳。陳銳彊翁語。傲兀故難雙。拔戟信能特地起。自餘曹鄴不成邦。立派有西江。文廷式樵風趣。俊逸望如仙。兩字英雄雖諛語。謂通律呂信難言。一鶴在中天。鄭文焯思悲閣。親炙憶當年。老去蘇吳合一手。詞兼重大妙於言。力取復天全。朱祖謀杼甘苦。詞話比雕龍。弱歲如鶯多宛約。晚年氣韻轉蒼龍。卓絕蕙風翁。況周頤人間世。境界義昭然。北宋清音成小令。不須引慢已能傳。隔字最通圓。王國維



民國廿六年五月初版

實價國幣八元

(外埠酌加寄費)

“詞家名清”

(冊十全)



印翻樣照准不

編輯者 陳乃乾

發行者 章錫琛  
上海福州路開明書店

印刷者 美成印刷公司  
上海梧州路三九〇號

總發行所

上海福州路二七八  
電報掛號七〇五四

開明書店

分發行所

廣州 漢口 北京 長沙 南京 武漢

開明書店分店

# 詞學季刊

龍沐勛編

零售每期

預定全年四册

四角

一元六角

郵費在內

詞苑叢談 清徐 鈞著 四角

白雨齋詞話 清陳廷焯著 卽出

西河詩詞話 清毛奇齡著 二角

藝概 清劉熙載著 二角

雨村四話 清李調元著 卽出

花間集評註 李冰若著 六角

唐宋名家詞選 龍沐勛輯 九角

詞 範 楊易霖選 三角

周詞訂律 楊易霖著 一元五角

宋詞十九首 端木榘輯 四角

朱彊村先生手寫詞藁  
(珂羅版印) 四元

讀詞偶得 俞平伯著 四角

開明書店出版

上海图书馆藏书



A541 212 0014 9629B

